

**SEVENTH LEGISLATIVE ASSEMBLY OF MIZORAM
(EIGHTH SESSION)**

LIST OF BUSINESS

FOR ELEVENTH SITTING ON WEDNESDAY, THE 30th MARCH, 2016
(Time 10:30 A.M. to 1:00 P.M. and 2:00 P.M. to 4:00 P.M.)

QUESTIONS

1. **Questions** entered in separate list to be asked and oral answers given.

LAYING OF PAPERS

2. **Pu LALSAWTA**, to lay on the Table of the House the following :
 - i) Finance Accounts 2014-15 Volume-I and Volume-II.
 - ii) Appropriation Accounts 2014-15.
 - iii) Report of the Comptroller and Auditor General of India on State Finances for the year ended 31 March 2015.

PRESENTATION OF REPORT

3. **Pu LALRINLIANA SAILO**, to present to the House the Fourth Report of Committee on Estimates relating to Kaladan Multi Modal Transit Transport Project under Public Works Department.

FINANCIAL BUSINESS

DISCUSSION AND VOTING ON DEMANDS

4. **Pu B.D. CHAKMA**, Minister to submit to the Vote of the House various Demands under his charge.
5. **Pu LAL THANHAWLA**, Hon'ble Chief Minister to submit to the Vote of the House various Demands under his charge.

LEGISLATIVE BUSINESS

Bill for introduction, consideration and passing

6. **Pu LALSAWTA**, Minister to beg leave of the House to introduce “The Mizoram Appropriation (No.2) Bill, 2016”.

ALSO

to introduce the Bill

to move that the Bill be taken into consideration

AND

to move that the Bill be passed.

NGURTHANZUALA
Secretary

.....

S P E A K E R : Kan inhmangaih tawn chuan Pathian keimahniah a awm reng ang a, a hmangaihna pawh keimahniah a famkim bawk ang. I Johana 4:12

Tunah chuan zawhna No. 150-na kan la tawh ang a, a zawhna neitu MLA zahawm tak Pu Lalthanliana zawt turin sawm ila.

Pu LALTHANLIANA : Pu Speaker, ka lawm e. Disaster Management & Rehabilitation Department changtu Minister zahawm tak chhan atana ka zawhna chu –

Laipuitlang leimin venna tur atana RCC column siam tum kha engtikah nge hna thawh tan a nih dawn ?

S P E A K E R : Awle, a department neitu Minister zahawm tak Pu C.Ngunlianchunga chhang turin sawm ila.

Pu C.NGUNLIANCHUNGA, MINISTER : Pu Speaker, Pu Lalthanliana, MLA zahawm tak Starred Question No. 150-na chhanna chu –

Laipuitlang leimin venna atan RCC column siam a la ni rih lova. Laipuitlang leimin venna tur atan hemi chungchang hi ni 23.8.2015-ah khan Principal Secretary, Disaster Management & Rehabilitation Office chamber-ah department hrang hrang DM&R te, PWD te, AMC te leh Local Council, Laipuitlang ten an ngaihtuah a. An thuchhuakah chuan pawisa hi a tam tham deuh avangin SCRF guideline mila siam a ngaih avangin State Disaster Management Authority (SDMA) meeting hmasa berah agenda a telh tura tih a ni a. SDMA meeting-ah hian he agenda hi ngaihtuah a la ni lova. Chumi ngaihtuah hunah chuan RCC column hi siam tum a ni a, a pawisa te kan neih theih dan azirin.

Tin, retaining wall, drainage leh pile foundation, soil deleting, cabin wall thawh rih a ni a. Amaherawhchu, hemi lei tawlh hmunah hian lei chunglang tla a awm avangin paih faina tur DM&R Department chuan ₹9,62,000 Deputy Commissioner, Aizawl kaltlangin pawisa pek a ni a. Hemi chungchangah hian bialtu MLA zahawm tak wawiina zawhna zawttu Pu Lalthanliana hian a bial a nih angin helaia a venna tur te pawh AMC te nen tangkawpin ama MLA fund te pawh a thawh niin kan hria a. DM&R Minister ka nihna ang pawhin a hnenah lawmthu ka sawi a. Chumi rual chuan kan MLA zahawm tak tak te bial hrang hrangah disaster a thleng mek zel a. Tah hian keini atangin sum inpek ngawt a theih loh avangin hei Dampa bialtu Pu Robiaka, kan MLA zahawm tak bialah pawh an tui lakna a chhia a. Anin ₹2,00,000.00 a rawn thawh a, keini DM&R atangin ₹6,00,000.00 kan pe a. Tichuan ₹8,00,000.00 in an thawk dawn a. Khatiang khan kan MLA zahawm tak tak te pawhin an bial chungka khang ang harsatna awmah khan, tunah pheih chuan fund te pawh kan nei tam deuh dawn tawh niin a lang a. Kan thawh tlan a pawimawh a ni tih kha ka chhan pahin ka'n sawi a ni e, ka lawm e.

S P E A K E R : Aw, zawhbelhna Pu Rinawma leh Pu Ruatkima han zawt ve ve se la.

Er.LALRINAWMA : Pu Speaker, ka lawm e. A ban hi design company kuta dah tum a ni nge, Engineering Company ti mai ila private firm-ah te dah tum a ni nge ? Tute nge a ban design hi khawih tura tih an nih tih ka zawt e.

Pu LALRUATKIMA : Pu Speaker, kan Minister zahawm tak hian a hre thovin ka ring a, tukin chanchinbuah te kan hmu a. Champhai, Kanan vengaleimin thenfai leh siamthatna atan SDRF emaw NDRF emaw sum hman a ni em ? A nih chuan engzahnge hman a nih tih leh The Assam Requisition & Control Vehicle Act of 1969 angin mimal excavator emaw tipper hman a ni em ? A nih chuan tute khawl nge hman a nih tih ka zawt tel a. Tin, leimin thenfai nan hian helai hmun atan hian engzahnge sen a nih tih kha kan zawt tel a ni.

S P E A K E R : Laipuitlang leh Champhai kha a inhlath deuh hlek a, mahse, Minister zahawm takin a chhan theih tho chuan a pahnih chhang se.

Pu C. NGUNLIANCHUNGA, MINISTER : Pu Speaker, Er.Rinawma zawhna a ban hi tunge design tir tum anih tih kha, sawi tak ang khan SDMA meeting a sum hi kan pek theih dawn leh dawn loh la ngaihtuah chauh tur a ni a. A design lam kha chu a la hla deuhin ka hria. A chhuah hunah kan la ngaihtuah ang chu khalai kha chu.

Tin, a pahnihna Pu Lalruatkima zawhna Champhai-ah khan leimin a awm a kan hriat theuh angin. Kein in hetah Directorate atangin emaw Secretariat atangin emaw a hranpain kan ti lova. District-ah District Disaster Management Committee a awm a, chumi kaltlang chuan hnathawh a ni a, Champhai DC hnenah ₹40,00,000 pek a ni a. Khawl an hman te kha chu kein in kan hriatpui lo Pu Speaker, ka lawm e.

S P E A K E R : Awle, zawhna no. 151-naah kan kal ang a. Chumi hma chuan a department neitu zahawm tak hi a awm loh avangin Pu P.C.Lalthanliana kha chhang turin a authorized a. Zawhbelhna hetiangah chuan a awm theih loh kha. Zawhna neitu MLA zahawm tak Dr.K.Beichhua zawt turin i sawm ang.

Dr.K.BEICHHUA : Pu Speaker, ka lawm e. Transport Department Minister zahawm tak hnena ka zawhna chu –

- (a) Tun dinhmunah Mizoram-ah lirthei sorkar-a in register engzatnge ni ?
- (b) District wise in engzat theuh nge ?
- (c) Mimal lirthei engzatnge ?
- (d) Aizawl khaw chhungah Taxi engzatnge ?
- (e) Sorkar motor engzatnge tih a ni a. Minister chhangtu tur a awm loh chuan Pu Speaker, han belh deuh zawk ka va duh ve, a theih ang em ?

S P E A K E R : Aw, heta mi kha chhang phawt se, hetah pawh hian a tam khawp alawm, engzatnge a,b,c,d,e. panga lai a awm tawh, a lawmawm e, panga a nei tawh a. Khai le Pu P.C.Lalthanliana chhan sak turin i sawm ang.

Pu P.C.LALTHANLIANA, MINISTER : Pu Speaker, member zahawm tak Dr.K.Beichhua zawhna chhanna hetiang hi a ni –

- (a) Kum 2014-2015 record angin lirthei 151486 a awm.
- (b) Aizawl – 107458, Lunglei – 13611, Siaha – 3927, Champhai – 7685, Kolasib – 8608, Serchhip – 5014, Mamit – 2416, Lawngtlai – 2767, Total – 151486
- (c) Kum 2014-2015 record a a lan dan angin mimal lirthei (non-government vehicles) 146708 a ni.
- (d) State Transport Authority (STA) record a a lan danin 3525 a ni.
- (e) Kum 2014-2015 record a a lan dan angin sorkar motor 4778 a awm tih a ni e.

S P E A K E R : Zawhna No. 152-naah kal ila. Zawhna neitu MLA zahawm tak Pu K.Sangthuama zawt turin sawm ila.

Pu K. SANGTHUAMA : Ka Starred Question 152-na Transport Minister zahawm tak chhan atan –

- a) Bairabi – Sairang Rail kawng laih mek hi engzatnge estimate ni a, compensation engzatnge pek ni tawh?
- b) Pek loh an la awm em? Awm se engzatnge pawisa la pek loh?
- c) Chhungkaw engzatnge compensation hi pek an nih tawh a, la pek loh chungkaw engzatnge la awm?
- d) Sairang eng hunah nge rail thlen tir theih a nih ang tih hi ka zawhna a ni e.

SPEAKER : Awle, Minister zahawm tak Pu PC Lalthanliana chhan sak turin sawm ang.

Pu P. C. LALTHANLIANA : Pu Speaker, member zahawm tak Pu K. Sangthuama zawhna leh chhanna hetiang a ni –

- a) **Lei laihna Estimate** : Bairabi atanga Sairang thleng lei laihna estimate hi Railways atanga kan thu dawn danin 126 crore a ni e.

Aizawl District Compensation : Aizawl District-a rail kawng atan compensation ₹ 30,57,70,542/- (Rupees thirty crore fifty seven lakh seventy thousand five hundred forty two) only pek chhuah a ni tawh.

Kolasib District Compensation : Kolasib District atan ₹67,15,17,887/- (Rupees sixty seven crore fifteen lakh seventeen thousand eight hundred eighty seven) only dawn a ni a, ₹64,94,66,843/- (Rupees sixty four crore ninety four lakh sixty six thousand eight hundred forty three) only pek chhuah tawh a ni .

- b) **Aizawl District** : Pek vek tawh a ni.

Kolasib District : Compensation mi 227 hnenah la pek loh a ni. Pawisa la pek loh hi ₹1,93,92,862/- (Rupees one crore ninety three lakh ninety two thousand eight hundred sixty two) only a ni. La pek lohte hi thlanmual ram la insawi fel loh vang leh thubuai thehluh mek vang te a ni.

- c) **Aizawl District** : Chhungkaw 112 hnenah pek fel vek tawh a ni. Hmaih palh tlem la awm hi a thara acquire sak tum a ni a. Survey zawh tawh a ni.

Kolasib District : Chhungkua 1167 hnenah compensation pek tawh a ni a, la pek loh chhungkua 227 an ni.

- d) Railway-in an sawi dan chuan kum 2019 velah Rail hi Sairang luh thlen tir theih beisei a ni a. Amaherawhchu, Ministry of Railways hi Mizoram state sorkar hnuai a nih loh avangin chiang takin a sawi theih loh. Pu Speaker, ka lawm e

SPEAKER : Zawhna 153-naah kan kal ang a. Zawhna neitu MLA zahawm tak Er. Lalrinawma zawt turin sawm ang.

Er. LALRINAWMA : Pu Speaker, ka lawm e. Rural Development changtu Minister zahawm tak hnena ka Starred Question No.153-na –

- a) Tun dinmunah MGNREGA hnuaiyah kum 2015-2016 chhungin mipui inhlawhna ni engzatnge chawhrualin siam a nih?
- b) A District wise-in engzatnge?
- c) Tun dinmunah kum 2015-2016 chhungin MGNREGA hnuaiyah sum engzatnge hmuh a nih?
- d) Labour component leh material component atan engzatnge?
- e) Material component atang hian VEC, BDO, PD ten engzat man theuh nge an thawh tih ka zawt e. Ka lawm e.

SPEAKER : Awle, a Department neitu Minister zahawm tak Pu R. Lalzirliana chhang turin sawm ila.

Pu R. LALZIRLIANA, MINISTER : Pu Speaker, Er. Lalrinawma, MLA zahawm tak zawhna chhanna –

- a) Tun dinmunah MGNREGA hnuaiyah kum 2015-2016 chhunga chawhruala mipui inhlawhna ni zat chu ni 35 a ni. Amaherawhchu, nimin lamah kan sawi tawh kha pawisa kan hmuh belh leh avangin ni 72 chu kan inhlawh thei dawn niin kan hria.
- b) A District-wise a ni inhlawh zat chu a hnuai ami ang hian a ni e:
 - (i) Aizawl – 35 (ii) Lunglei – 34 (iii) Saiha – 36
 - (iv) Champhai – 35 (v) Kolasib – 37 (vi) Serchhip – 37
 - (vii) Lawngtlai – 34 (viii) Mamit – 34
- c) Tun dinhmuna kum 2015-2016 chhunga MGNREGA hnuaiyah sum hmuh zawng zawng zat chu ₹15,277.464 a ni e.

- d) Labour component atana sum hman zat chu ₹11,601.49643 lakh a ni a, material component atan chuan ₹2,263.55007 lakh a ni e.
- e) Material component atanga VEC, BDO, PD te thawh theuh chu a hnuai ami ang hian a ni e.
- | | | |
|-----|---|------------------|
| VEC | - | ₹ 625.96481 lakh |
| BDO | - | ₹ 903.99863 lakh |
| PD | - | ₹ 455.72863 lakh |

Tihian DRDA hi 40% a ni a material component-ah hian, BDO hi 40% a ni bawk a, VEC hi 20% a ni. Helaia kumina kan hmuh zawng zawng nuai 15277.464 tih ah hian nimin lama ka sawi kha hemi kan chhan lai hian belh tel hman a ni lova.

Nimin lama ka sawi vaibelchhe 116 kan hmu leh a niminah kan han tih pawh kha nizanah khan min rawn belh leh a. Tichuan, vaibelchhe 129 nuai 99 lai min rawn belh leh zawk a, nuai 116 vel ni lo khan. Chuvangchuan, a vai hian ka'n total dawn a engineer ka ni ve lova, ka hman lova, lo total mai rawh chu chu. Pu Speaker, nangmah kaltlangin ka'n hrilh a nih chu.

SPEAKER : Zawhbelhna, aw, a neitu Pu Rinawma.

Er. LALRINAWMA : Pu Speaker, ka'n sawi duh lai chu Material component chungchanga DRDA 40%, BDO 40%, VEC 20% tih lai hi a ni a. Ni 11 June, 2014-a MGNREGA State Employment Guarantee Council meeting hian he thu hi a titlu a. Hei hi tawi tein Pu Speaker, ka ngai pawimawh khawp mai a, a chhan chu VEC te helaia a ziaakah hian ti hian a ziaak kher a, i phalnain ka'n chhiar teh ang, "Section 165 of MGNREGA all 2000 emphasized that at least 50% of the total work under MNREGA is to be located to the village panchayat since 100% of the labour component are executed/implemented by the village panchayat VEC" a ti a ni he Committee hian, "In order to streamline rationalise implementation of material component amongst the three

stake holders, the meeting decided to allocate the percentage shared under the material components' a ti a. Nichina ka sawi tho kha a ni ta a, (SPEAKER : I chhiar chhuah kha khawilai ami nge?). E, ka tihpalh, i ngaihdamna ka dil e. Hei hi MGNREGA State Guarantee Council meeting dt 11.6.2014-a neih minute ami a ni, kan hmanlai a nia. MGNREGA Operational guideline 2013 chuan village panchayat, gram sabha mawhphurhna section 2.1.4-ah hian ti hian a ti bawk a, Pu Speaker, i phalna in hei chauh hi ka'n chhiar teh ang. (SPEAKER : A enge i chhiar dawn ?). Ka sawi mai ang e, chhiar lovin.

Material component hi technical work a ni a, chu chu GP-te mawhphurhna tur a ni tiin he guideline hian a ziak a ni. Amaherawhchu, he Committee thu hian VEC/Village Panchayat-ten MGNREGA a labour component chu 'za a za an execute/implement' a ti a. Mahse VEC/Village Panchayat-te hian heng labour component hi an thawk lova, an monitor zawk a ni tih kha ka sawi duh a. Chumi tlawhchhan avanga helaia VEC ho te ho ti mai ila, panchayat ho hna chanpual tur kan han tidanglam ringawt mai lai hi a tha nat thlak ka ti a, VC-ten fund an nei tha bawk si lova. Chuvang chuan, hei hi a ennawn leh theih em tih kan Minister zahawm tak hi ka zawt a ni e.

SPEAKER : Aw le, a tidanglamtu kha an awm a, chu chu Minister-in han sawifiah teh se, khawngaihin.

Pu R.LALZIRLIANA : Pu Speaker, SLMC meeting khan a'n tidanglam a ni mai a. VC-ten an monitor a tih kha a dik chiah bik chuang lova. A nihna takah chuan VC-te hi, VC nih kan chak tak nachhan em em chu hemi MNREGA vang hi a ni a. Khaw thenkhatah phei chuan in tha tak tak lo sa ve te pawh an awm a ni. Engpawhniela, a hna kha a tha a, a hlep a lo awm a nih chuan an vannei a ni mai a. Chuvangin, hei hi a ennawn leh theih ang em an ti a nih chuan, ennawn theih e, tih kha a ni mai a. A tul dan angin kan lo ennawn ang a. VC-te hian hei lo hi chu sum hmuhna an nei vak lova, an

khawngaihthlak ve a. Department tin hian engkimah kan zu chhawr vek a, an hlawh a tam bawk si lova, helama tlem hlawkna, an monitor tih ringawt kha chu anmahni in an thawk thin a ni tih kha chu chiang taka hretute kan ni ve a. Er. Lalrinawma pawh hian a hre ve tho ang a, mahse thahnem a ngaihpuoi a, a lawmawm ka ti a, kan lo ennawn leh ang.

SPEAKER : No.154-naah kan kal thei ta e. A zawhna neitu MLA zahawm tak Pu Lalruatkima'n zawt se.

Pu LALRUATKIMA : Pu Speaker, ka lawm e. Ka Starred Question no.154-na PWD changtu Minister zahawm tak chhan atan-

- a) 2 Lane, NH-54 Kawnpuoi to Aizawl via Sairang Package No. 1 (118.00 kms – 133.00 kms) leh Package No. 2 (133.00 kms – 147.789 kms) hi tute nge contractor?
- b) Tender amount leh agreement amount engzatnge?
- c) Engtikah nge hna thawh tan a nih? Engtik huna thawh zawh tura ruahman nge a nih? Hnathawh hun hi extend a ni em? A nih chuan vawi engzat leh engtik thleng nge extend a nih?
- d) Estimate hi revised a ni em? A nih chuan vawi engzatnge ennawn a nih a? Revised amount? Engvangin nge a hun takah hna hi thawh zawh a nih loh?

SPEAKER : A Department neitu kan House Leader, Chief Minister zahawm tak Pu Lal Thanhawla'n han chhang se, amah i lo sawm ang.

Pu LAL THANHAWLA, CHIEF MINISTER : Pu Speaker, member zahawm tak Pu Lalruatkima zawhna, Starred Question No. 154-na chhan na-

- a) M/S ABCI Infrastructure Pvt.Ltd.
- b) Tender Amount : Rs. 49.93 crore
Agreement Amount : Rs. 53,94,75,708

- c) Dt. 23.7.2009-ah hna thawh tan a ni a, dt. 22.7.2011 a thawh zawh tura ruahman a ni. Hnathawh hun hi extend a ni a. Hnathawh hun hi vawi 7 extend a ni a, dt. 1.11.2015 thleng extend a ni.
- d) Estimate hi vawikhat revised tawh a ni a, revised vawikhatna amount chu Rs. 94.175 crores a ni a, revised vawihnihna estimate chu MoRT&H ah thawn leh mek a ni a. A amount chu Rs. 102.28 crores a ni.

A hun taka hna hi thawh zawh a nih loh chhan chu :-

Package 1/54 leh package 2/54 atana compensation tur hi hna pek an nih lai hian sanction a la awm hman lova, sanction awm hnu ah pawh 2009 December-ah Kolasib DC ah cheque pekthlak hman a nih chauh avangin hna hi a hun taka tan theih a ni lo a. Compensation-te pek fel a nih hnua hna tan a nihin, contractor item ah lung hal ngai pakhatmah a tel loh avangin contractor-in hnathawh harsa a ti hle a, mahse PWD lam ten heng hi revise estimate kan siam ang a, kan telh mai ang tiin an thawh luih tir hram hram a, an harsa chung leh an duh lo chung kha, hei hian hna nasa takin a ti muang a ni.

Tin, member zahawm tak ten kan hriat belh atan- package 1/54 from 118/00 – 133/00 Kawnpui – New Khamrang and package 2/54 from 133/00 – 147/789 New Khamrang – Buichali, hei hi 2 lane widening NH-54 Kawnpui to Aizawl via Sairang package 1/54 (118.00 kms – 133.00 kms) leh package 2/54 (133.00 kms – 147.789 kms) hnathawktu contractor chu M/S ABCI Infrastructure Pvt.Ltd ve ve a ni a. Original sanction amount hi member zahawm tak te lo hriat atan, package 1/54 (118.00 kms – 133.00 kms) ₹61.71 crore, tin, package 2/54 (133.00 kms – 147.789 kms) chu ₹67.57 crore a ni. Tin, heta tender amount package 1/54 (118.00 kms – 133 kms) hi ₹49.93 crore a ni a, package 2/54 (133 kms – 147.789 kms) hi ₹5403 lakhs a ni. Agreement amount package pakhatna zawkah hian ₹53,94,75,708.10 a ni a, package 2/54 ah hian ₹98,95,49,967.28 a ni.

Supplementary agreement amount package 1/54 ah hian vbc 1887 nuai 920450 pawisa 72 a ni. Package 2-ah hian cheng vbch. 2,349 nuai 110497 pawisa 90 a ni. Hnathawh tan hun package 1-ah hian ni 23.7.2009 a ni a, package 2-ah ni 5.4.2009 a ni. Hnathawh zawh hun tur ruahman chu package 1 chu ni 22.7.2011 a ni a, package 2 chu ni 4.4.2011 a ni. Package 1 leh 2-ah te hian extension hun pek ve ve an ni a, package 1 leh 2 a extension hun pek dan chu a hnuai ami ang hi a ni-

Package -ah vawi 7. Tin, extension hmasa ber chu ni 289, extension vawi 2-na 325, extension 3-na 130, 4-na 365, 5-na 212, 6-na ni 71, 7-na 172 a ni a. Kha kha a tlangpuia extension kalphung a ni a, hun a duh dan. Tin, package 2 hi a vawi 1-na ni 249, a vawi 2-na 140, a vawi 3-na 256, a vawi 4-na 52, a vawi 5-na 238, a vawi 6-na ni 30 a ni. Khang kha a tlangpuiin extension kalphung a ni a.

Original estimates sanction khan sum renchemna avangin ministry lam khan kawng chhuat awmsa engemawzat, alkatra luan chin hai khaw a, a hnuai phah sa chu GSB a ring nghal tura sanction hmuh a ni a. Hei hi a taka kalpui theih a nih leh tak loh avangin, GSB material-te hian original sanction ang chuan a daih lo sa ve ve a. A tir sanction quantity kha contractor-ten an bill thlen tawh hnu ah chuan, revised sanction a nih hma chuan contractor-in hnathawh a bill theih dawn leh dawn loh a chiang lova. Hna chhunzawm a duh tawh si lova, hei vang hian nasa takin hna progress in a tuar a ni.

Tin, road shoulder kha atirah chuan kawng laihna, excavated rock hmanga siam tura duan a ni a. Mahse, kawng laihna lung leh lei te kha hmun hrang hranga a inan loh em avangin ministry lam hotute'n an lo zinin specification thlak turin an ti a. Hei hi Revised Estimates ah hian telh a ni, Revised Estimates sanction a nih hma chuan thawh mai theih a ni bawk si lova, hei vang hian nasa takin hna a muan phah a ni.

A chungka kan han sawi bakah, thil dang neuh neuh, culvert dah belh te, line side drain siam tur te leh thil dang Revised Estimates-ah khan telh an ni a. Revised

Estimates sanction hmaa hma lo lak vak dawn a hnathawktute pawisa pekna tur awm si lo kha a ni hlawm a. A pumpui package 1-na leh 2-na hnathawh zawh harna chhan lian tak pakhat chu Revised Estimates sanction tlai vang a ni. Package 1 leh 2 Revised Estimates sanction hun, ni leh thla chu hetiang hi a ni – package 1-kha ni 28.1.2013, package 2 kha ni 23.7.2013. Actual date of completion – package 1 kha ni 1.11.2015, package 2 kha ni 30.5.2014 a ni e, Pu Speaker.

SPEAKER : Awle, i zawh leh zel tur pawh a chhang fai vek emaw tih nak alaiin. Zawhbelhna.

Pu LALRUATKIMA : Pu Speaker, a ngaihnaawm khawp mai a. Kha kum 7 zet mai kawng kan siam ta reng mai a, kawng awm sa kan widening a, a rei vang vang khawp mai a. Vawi 7 lai mai extension period kan han pe kha a fel lo hlein ka hria a. Tin, khati tak mai a, a let deuhthaw a revise ngai kha kan inenlet tul pawhin ka hria a. A chhan chu Mizoram project reng reng hi RE awm lo hian kan kalpui hleithei lo a ni deuh ber mai a, a hun taka thawh zawh awm baw si lo, chung chu ka'n sawi hmasa ni sela.

Pu Speaker, Minister zahawm tak khan compensation pek a lo ngaih leh si avangin estimates-ah hian a tel lo a, chu chuan a senso a tisang a ni, a ti a. Compensation chu engzahnge pek a nih tih kha ka zawhna ni sela. Tin, a work quality-ah khuan tha taw kan ti em tih leh Kawnpui-Kolasib inkar hi engtikah nge thawh zawh a nih ang tih kha ka'n zawt tel a.

Tin, Pu Speaker, khulai kawng tho NH-54 ah khuan Lailapur khawchhung takah khuan kawng tawite, Assam lam leh Mizoram inthenna ni a mi tam takin an ngaihnaah khuan fur laiin motor lian a tlu nasa lutuk a, PWD lamin siam an tum pawhin kan ti hleithei lo a, kumtin hian problem kan nei ziah a. Fur a lo thleng leh mai dawn a, tun thal chhung hian siam theih a ni ang em tih kha ka'n zawt tel a ni.

SPEAKER : Chief Minister zahawm tak chhang turin sawm ila.

Pu LAL THANHAWLA, CHIEF MINISTER : Pu Speaker, kan ram leilung hi a nihna dinhmun dik tak kan hre vek a. Geologist, mithiamte chuan kan leilung hi a no a, heavy monsoon area a ni bawk a, landslide-prone area a ni a, tin, lung chang kan nei lova. Tin, hna reng reng hi compensation component hian a tibuai deuh zel a, a hnuk khawtlai deuh zel a, kan rel kawngte nen lam hian. Chu chu hnathawh hi a muanna chhan tlangpui a ni a. Tin, sum hi, helaiah zem lianpui nei a, a tul ang anga hmang zung zung kan ni lova, dil chawp zel kan ni a. Revised Estimates a ni emaw, ni lo emaw, kan tlakchham chuan, helaiah zem lianpui hun a duh zat zat, tul zat zat va la mai kan nih loh avangin, dil nawn zel a ngai a. Kan zempui lam khuan kan hmanhmawh angin min hmanhmawhpui ve vak lo bawk a, chu chu a tlangpuiin kan harsatna a ni a. A chhe laite hi mi hmuh hmaa siam zung zung kan duh a, mahse kan sum leh kan tha in a tlin ngang lo a ni.

Pu LALRUATKIMA : Pu Speaker, Lailapur lai ka zawhna kha, khawngaihin, Lailapur bik kha Mizoram tho a ni a, PWD enkawl a ni a. Lailapur kawng lai tak kha, NH-54 kha a ni a. Fur kan lo thleng leh mai dawn a, khu khu thal chhung hian siamthat theih a ni ang em? kan ti a ni.

Pu LAL THANHAWLA, CHIEF MINISTER : Kumin chhungin thase kan duh, ka duhtawk rih mai keima mimal chuan, kan Engineer ten an la en ang chu a tul angin.

SPEAKER : Zawhna No. 155-naah kal ila, zawhna neitu MLA zahawm tak Pu Lalthanliana zawt turin sawm ang.

Pu LALTHANLIANA : Pu Speaker, ka lawm e, kan Chief Minister zahawm tak Public Works Department chhan atana ka Starred Question No. 155-na chu –

Ramthar North Multi-Purpose Centre sakna turah hian harsatna a awm em ? Enge harsatna ? Ka lawm e.

S P E A K E R : Kan House Leader zahawm tak Pu Lal Thanhawla chhang turin sawm ila.

Pu LAL THANHAWLA, CHIEF MINISTER : Member zahawm tak Pu Lalthanliana zawhna Starred Question No.155-na chhanna chu –

Awm e, tih a ni a, a bulpui berah chuan a hmun a zim avangin original DPR ang khan a sak theih ta lova. Chu chu tunah hian remruat a, ngaihtuah chhoh mek zel a ni a. DoNER Ministry atangin ni 18th February, 2014 ah sanction a ni a. A zat chu nuai 462,37,000 a ni a. Original DPR hi North-East Consultant re-services siam a ni a. Original DPR ang chuan building, thuthmun accorded area zau zawng hi 281.57 sq.metre. a ni a. Chhawng 7-a sak tur a ni, basement 4, ground floor, third floor, second floor te a sak tura duan a ni a. A building pumpui total area zau zawng chu 1604.69 sq. metre tura duan a ni. Land lease a a lan dan chuan he Hall hmun zau zawng chu 172 sq. metre chauh ani thung a. A hmuna leng thei tur hian drain te pawh siamthat leh revise a ni a. A drawing thar ang chuan a building thuthmun accorded area hi 162 sq.metre a ni dawn a. Chhawng 8, basement 3, parking floor, ground floor, first floor, second floor leh third floor tura duan a ni. Basement pumpui total area hi 1164 sq.metre tura duan a ni a. Hetia DPR ang loa hna lo thawh hi nodal in a phalloh tlat thil a ni a. Tin, a hna hi sanction atanga kum 2 chhunga tan a nih loh baw k avangin DoNER Secretary hoa ni 18.2.2016-a meeting neihah khan

ennawn leh tura rel a ni a. Engtia kalpui zel tur nge tih ngaihtuah mek a ni. Pu Speaker.

SPEAKER : Awle, zawhbelhna a awm lo niin a lang a. 156-naah kan kal thei a, a zawhna neitu MLA zahawm tak Pu Lalthanliana bawkin zawt se.

Pu LALTHANLIANA : Pu Speaker, ka lawm e. Transport Department changtu Minister zahawm tak chhan atana ka zawhna Starred Question No. 156-na chu –

- (a) Tun hnaiah Aizawl khawpui atan Taxi permit thar pek tumna a awm em ?
- (b) Aizawl khawpui tana Taxi fare sorkarin a siam hi bawhchhia lo awm ta se khawiah nge zualko tur ?
- (c) Rate hmang dik lo te hi enge a hremna ?
- (d) Aizawl khawpui chhungah hian commercial vehicle eng chin nge service phal a nih ? Ka lawm e.

SPEAKER : Awle, Minister, a Department changtu a awm lova, Authority a pek Pu P.C. Lalthanliana chhan sak tur in i lo sawm ang.

Pu P.C. LALTHANLIANA, MINISTER : Pu Speaker, member zahawm tak Pu Lalthanliana zawhna chhanna chu hetiang hi a ni –

- (a) Awm lo.
- (b) Director, Transport Department-ah zualko tur a ni.
- (c) Rate hmang dik lo te hi Section 179 of Motor Vehicles Act, 1988 hmanga hrem theih a ni a, fine ₹500/- thleng chawi tir theih a ni.
- (d) Aizawl khawpui chhungah hian Taxi, City Bus, Line Bus, Goods vehicles (Pick up, 407 truck leh Tipper) te hi service phalsak an ni

- a. Goods vehicles bik hi Aizawl khawpui chhunga an tlan dan tur chu Traffic Police lam ruahman dana kalpui a ni tih a chhanna a ni e.

SPEAKER : Awle, zawhbelhna awm chi a ni lova, Question No. 157-na ah kal ila. A zawhna neitu MLA zahawm tak Pu Lalruatkima'n zawt se.

Pu LALRUATKIMA : Pu Speaker, ka lawm e. Ka Starred Question No. 157-na Industries Department changtu Minister zahawm tak chhan atan -

- (a) PSU tihtawp tak zinga ERR-a chhuak ve ta lo kum tam tak lo service tawh te hian an service an chhawm thei dawn em? Dawn loh chuan engvanga service hi chhawm lo tur nge an nih ?
- (b) LDC qualification HSLC a nih laia lutte IVth Grade ah dah an awm em ? An awm chuan mi engzatnge awm ? Engvanga dah nge an nih ?
- (c) Service zawm zel la thlang hote hi January 2016 hlawh engvanga pek loh nge an nih tih ka zawt e.

S P E A K E R : Awle, a Department neitu Minister zahawm tak Pu H. Rohluna chhang turin i lo sawm ang.

Pu H. ROHLUNA, MINISTER : Pu Speaker, member zahawm tak Pu Lalruatkima Starred Question No. 157-na chhanna chu –

- (a) PSU tihtawp tak zinga ERR a chhuak ve ta lo hian an awmna hmasa-a an service an chhawm thei dawn lo. PSU tihtawp a nih hnu a sorkar hnuaiia appointment pek te hi “Special Scheme for appointment of employees of the closed PSEs under the Government of Mizoram” tih hnuaiia appoint an ni a. He scheme hnuaiia appointment pek apiangte chu

“...will be treated as new employees in all aspects...” tih a ni. Tin, PSU hi sorkar lakah organization hrang hlak a nih avangin sorkar hnuaiia regular service nei tan tur hian PSU hnuaiia an service hi chhawm thei tura ngaih an ni lo.

- (b) Awm e, LDC qualification HSLC a nih laia lut, IV Grade-ah dah mi 3 (pathum) an awm. A chung a Special Scheme hnuaiia Rule 21-ah, “There will be no relaxation in educational and other qualifications prescribed by the revelant Recruitment Rules” tih a ni a, an luhna tur Service Rules-in qualification a demand nei lo te chu an qualification in a phak chin post ah appoint theih an ni.
- (c) Appointment pe tur hian recruitment procedure mumal tak zawh tur a awm a, DPC/MPSC thut leh recommendation lak te, an thawhna tur Department-a post ruak identify leh appointment pek zawng zawng hi thawklekhkata tihfel vek hman a ni lova. Tin, organization lamin document te a hun taka an rawn pek theih bik loh avangin January thla tirah appointment kan ti chhuak hman lova. An service loh chhunga hlawh pek chu a remchan loh avangin January 2016 hlawh hi pek an ni lo a ni

Pu Speaker, hemi zawhna hi a nihna takah chuan Finance Department lama zawh chi a ni a. Industries lamah a lo kal a, Finance lam nen inrawn tlang in he chhanna hi kan siam a ni.

SPEAKER : Zawhbelhna i nei a, mahse kha Minister khan a sawi Chiang viau a, ama chan bik a ni lo a. Khatilaiah khan tlemin harsatna a nei maithei a.

Pu LALRUATKIMA : Pu Speaker, khawngaihin thil pakhat, nichin khan Lailapur kha kan House Leader zahawm tak leh kan hon’ble Speaker ngei pawh khan kan state pawn, kan ram pawn ni ang khan an sawi zauh mai

a, pawl ka ti khawp mai a. Kan ram pawnah kei chuan ka ngai ngai lova, chuvang chuan hei hi House record a awm chu a dik ka ti chiah lo.

SPEAKER : Kha kha ramri kha chu a mimal ngaihdan kha a ni lo, inziak sa a awm mai a ni.

Pu LALRUATKIMA : Ramri pawh a ni lo deuh a ni, khulai mai khu a ni. Khalai kha khawngaihin min lo hrethiam ula.

Ka'n zawhbelhna chu ERR House zahawm takin a pawm hmain engatinge service hi heng mi te hi siamfel an nih tih ka zawt a. Tin, a pahnihnaah chuan ZOHANDCO hmalakna chhonzawm tum a ni em? ZOHANDCO bungrua (assets) hi engtin nge enkawl zui zel tum a nih tih leh Registers of Companies Office hriattir an ni tawh em tih leh official liquidator in em ni thiat, a nih loh chuan eng dan hmanga thiah nge a nih tih leh an hnuai ami tho Pu Speaker, ZIDCO leh MIFCO te kha restructuring tih tum zel a ni em ? MIFCO privatize tum kha eng chen nge kalpui a nih tawh tih ka'n zawt tel a ni.

Dr. K. BEICHHUA : Zawhbelhna Pu Speaker, PSU tihtawp tak te khan engzatnge leiba an neih tih min hrih theih chuan. Tin, ERR-a chhuak zat kha engzatnge an nih? Pawisa pek fel vek an ni tawh em tih ka zawhbelhna a ni e.

SPEAKER : Hei hi Minister khan a sawi tawh a, a chhan theih theih chhang sela maw, chhan theih loh chin a nei ang tih kha hria ila. Minister zahawm tak Pu H. Rohluna i sawm ang.

Pu H. ROHLUNA, MINISTER : Pu Speaker, nia sawi tak ang khan zawhna main question hi chu keini chhan tur chiah ni lo deuhin a lang a. Amaherawhchu zawhbelhna a ERR chungchang pawh hi ka chhang thei mai lo a. Tin, ZOHANDCO hmalakna chhunzawm zel dan tur hi chu sorkar in a la ngaihtuah ang a. ZIDCO hi restructure tura hma lak mek zel a ni a. Tichuan MIFCO erawh hi chu a kal zel dan tur sorkar in a la ngaihtuah zui tur a ni.

Tin, member zahawm tak Pu Beichhua zawhna kha leiba zat hi ka rawn in ring lova, hemi nen a inkaihhnawih deuh chin an tih chuan a inkaihhnawih thei tho ang a. Mahse vawiinah a figure hi sawi sual ka hlau a, churang chuan ka sawi mai thei lo a ni.

SPEAKER : Aw le, zawhna No. 158-na kan kal thei ta e. A zawhna neitu MLA zahawm tak Pu Lalruatkima'n zawt se.

Pu LALRUATKIMA : Pu Speaker, ka lawm e. Disaster Management & Rehabilitation Department changtu Minister zahawm tak chhan atan ka Starred Question no. 158-na :-

- a) NH-54 Rangvamual leimin thenfai hna thawh nan vawi engzatnge sum pek a nih tawh? Sum hi engzatnge pek a nih tawh? Khawi fund atanga pek nge a nih?
- b) Leimin thenfai hnathawktute hi engtinngge thlan an nih (selection criteria) thin? Tute nge hnathawk tura thlante hi?
- c) Fur ruahtui tlak hmian thenfai zawh hman beisei a ni em?

SPEAKER : Aw le, Department neitu Minister zahawm tak Pu C. Ngunlianchung a chhang turin i lo sawm ang.

Pu C. NGUNLIANCHUNGA, MINISTER : Pu Speaker, Pu Lalruatkima, MLA zahawm tak zawhna Starred Question No. 158-na chhanna -

- a) NH-54 Rangvamual leimin thenfai hna thawh nan hian pawisa vawikhat ₹ 1,39,97,700/- (Rupees one hundred thirty nine lakh ninety seven thousand seven hundred) only DC Aizawl-ah pek a ni. He pawisa hi State Disaster Response Fund (SDRF) atanga pek a ni.
- b) Leimin thenfai hna thawh nan hian sum sanction hmasa ah chuan PWD in an khawih avangin DM&R Department-in a hriatpui lo. Tin, a thawhnhniha a paihfai mekah hian fur ruahtui tlak hmaa thawh zawh tum a nih avangin emergency- in AIE Construction hnenah DPR buatsaih tura tih an ni a, an ruahman angin tunah hian AIE Construction hian leivung paih hna hi an thawk mek a ni.
- c) Fur ruahtui tlak hma ngeia leivung kawng hnawh thei paihfai hna hi ngawrh taka thawh mek a ni a. A leivung paih ngawr ngawr phei chu tunah hian kan zo tawh a. Chumi dawl tur chuan gabion box (lungrema a ko an siamna) dah leh mek a ni Pu Speaker.

SPEAKER : Zawhbelhna, a neitu Pu Lalruatkima.

Pu LALRUATKIMA : Pu Speaker, khulai hmun khu kan Life-line a nih avangin fur ruahtui tlak hma ngeia thawh zawh kha a tul khawp mai a. Chulaiah chuan hei SDRF sum kan pe a, PWD lam kawng mah zawk a nihna chen a awm a, PWD thawh tur awm zawk tak. Helaiah hian engatinge SDRF sum kan pek daih tih kha ka zawhbelhna ni sela.

Tin, contractor te kha leimin thianfai tur khan, thenfai hna thawk tur khan engatinge tender hmang lova thlan an nih tih kha ka zawhbelhna a ni e.

SPEAKER : Aw, Pu R.L. Pianmawia

Pu R.L. PIANMAWIA : Pu Speaker, ka zawhbelhna chu Rangvamual leimin hi engvanga lo awm nge a nih tih ka zawt a. Tin, mimal inhmun nge a nih a sorkar ram tih ka zawt a. Mimal ram a nih chuan tunge a neitu ? Engvanga sorkar in mimal ram buaipui ta vak nge a nih tih ka zawt e.

SPEAKER : Awle, Minister zahawm tak a chhang turin i lo sawm ang. A pahnih khan lo chhang kawp teh se.

Pu C. NGUNLIANCHUNGA, MINISTER : Pu Speaker, question neitu in a zawhbelhna- engvanga SDRF sum hi hmang mai nge tih kha, a ni viau a khulai kawng khu amah pawhin a sawi ang khan kan lifeline tak tak a ni a, PWD atangin sum an dil a, an hmuh theih si loh avangin khulai kawng khu a hnawh chuan Mizoram nun a buai mai si a. Chuvang chuan ni 19.1.2016 ah hemi chungchang hi kan Minister zahawm tak Pu Lal Thanzara, PWD enkawlputu leh DM&R Minister te leh sorkar-a line department pawimawh tak takte meeting chuan tender chhuah lovin, a hmanhmawh thlak bawk si a, fur ruahtui tlak hmaa zawh a ngaih avangin pek mai a ni ta a ni tih kha tender lova kan tihna chhan a ni a.

Tin, keipawh a hmunah kalin a tlangah te pawh kan lawn a, khulai lei khu a nghet lo khawp mai a, leivung khu a chhawngin kan laih tir a, fur ruahtui pawh lo kal se hnawh thei tawh lo turah kan ngai a, chutiang chuan theihtawpin hna kan thawk a ni. Tender kan chhuah loh chhan kha a urgent vang a ni.

Tin, engvanga lo awm nge tih kha Pu Ramthanmawia'n inhmun a lai a, chumi atang chuan khulai kawng khu duhaia tam a lo min ta a ni, a pawh khawp mai. Sawi tawh ang khan a lei khu a nghet lo em em mai a, tunah pawh enge kan an ang phei chu kan hre lova, theih ang chin chin chu kan han paihfai na in, a leilung han en chuan hlauhthawn awm tak a ni tih kha ka chhanna a ni.

S P E A K E R : Zawhna No. 159-na ah kan kal thei ta a, a zawhna neitu MLA zahawm tak Er. Lalrinawma zawt turin sawm leh ang.

Er. LALRINAWMA : Pu Speaker, ka lawm e. Industries changtu Minister zahawm tak hnena ka zawhna Starred Question No. 159-na -

- (a) Tun dinhmunah Mizoram chhunga oil leh gas laihchhuahna tura hma lak mekah hian Company ten oil emaw gas emaw hmuh an nei tawh em ?
- (b) Lo nei ta se engzat vel nge beisei a nih ?
- (c) Company te hian licence fee an chawi em ? Chawi ta se tun thlengin cheng engzatnge hmuh a nih tawh ?

S P E A K E R : Pu H. Rohluna i lo sawm ang.

Pu H. ROHLUNA, MINISTER : Er. Lalrinawma, member zahawm tak Starred Question No. 159-na chhanna chu -

- (a) Nei tawh e, ONGC in Meidum-ah gas an hmu tawh.
- (b) Department-in a hriat theih chinah chuan gas an hmuh hi test an nei zel a, hemi bakah tuna gas awmsa aia tam hmuhchhuah theih in beiseiin ONGC hian Hydro-fracturing an ti leh. Tun dinhmunah Meidum atang hian gas 552674 Standard Cubic Feet (SCF) per day a awm theiin an hria.
- (c) Aw, chawi e, company hrang hrang hnen atangin tun thleng hian PEL fee ₹ 22,06,82,427 (cheng vaibelchhe sawmhnih pahnih nuai ruk sing riat sanghnih zali sawmhnih pasarih) hmuh a ni tawh.

Pu Speaker, nimin lamah te pawh kan sawi nual tawh a, company hrang hrangin PEL fee an pek dan chu hetiang hi a ni - ONGC hian 2003-2004 atanga 2015-2016 thlenga an pek tawh hi ₹10,35,15,284 (vaibelchhe sawm nuai sawmthum panga singkhat sangnga zahnih sawmriat leh pali) a ni a, Oil India hian

₹8,49,63,781 (vaibelchhe riat nuai sawmli pakua singruk sangthum zasarih sawmriat pakhat) a ni a. Naftogaz, anni hi chhim lam block tunhma in pek an ni a, licence fee an pe nual tawh a, amaherawhchu hna an thawh that loh avangin an licence tihtawp a ni a, chutichung chuan ₹32,23,362 (vaibelchhe thum nuai sawmhni pahnih sangthum leh zathum sawmruk pahnih) hi licence fee Mizoram sorkarah an pe hman a.

Tunah hian Pu Speaker, chhim lam block kan han sawilan takah chuan tuna exploration an tih mekna hi north block-ah ONGC in an bei a, central block-ah hian Oil India in an ti a. Tichuan, chhim lam block Reliance leh Naftogaz in an tih hi hma an lak mai loh avangin an hna kha cancelled an ni a. Tunah re-tender a global tender tih te a ngaih avangin hun a lo rei deuh hlek tawh a, NOC te hi pek that leh vek a ngaih avangin chumi chuan hun a duh ta deuh a. Mahse, tunah chuan Mizoram sorkarin kan tihtur ang chin chu kan tifel vek tawh a, Environment & Forest lam atangin clearance kan thawn thla tawh a, Autonomous District Council lam atang pawhin a lo ngai a, hengte pawh hi central-ah Directorate General of Hydro Carbon(DGH) Ministry of Petroleum and Natural Gas-ah Mizoram sorkarin a tih tur ang chu a ti tawh a, reiloteah hi chuan chhim lam block pawh hi tender theih mai turah kan beisei a. Tunah hian nimin lama kan sawi tawh angin Oil India hian Keifang-ah ngawrh takin an bei mek a, tukin lamah chuan 2247 mt. an verh tawh a, beiseina sang tak kan nei chho zel a ni tih ka'n sawilang tel duh a ni.

S P E A K E R : Awle, zawhna hun kan hmang zo ta a, thil dangah kan kal hmain kan zingah hian Minister zahawm tak Pu John Rotluangliana leh Parliamentary Secretary zahawm tak Lt. Col. Z.S. Zuala te, Pu Chalrosanga te, Pu K.S. Thanga te an tel thei lova, House-ah awm loh phalna an rawn dil kha kan phalsak a. Pu John Rotluangliana leh Lt. Col. Z.S.Zuala te hi chhungkaw lam thihna avanga lo tel thei lo an ni a, MLA zahawm tak Pu Chalrosanga Ralte hi

ka bialah Chief Guest turin kan sawm a, tah chuan min tel sak a ni. Pu K.S. Thanga erawh chu damlohna thil a ni tih he House hi ka hriattir e.

Tunah chuan Laying of Papers-ah kan kal ang a Minister zahawm tak Pu Lalsawta'n heng a hnuai amite hi rawn lay sela -

- (i) Finance Accounts 2014-15 Volume-I and Volume-II
- (ii) Appropriation Accounts 2014-15
- (iii) Report of the Comptroller and Auditor General of India on State Finances for the year ended 31st March 2015 Hengte hi rawn lay turin amah ilo sawm ang.

Pu LALSAWTA, MINISTER : Pu Speaker Sir, with the recommendation of His Excellency, the Governor of Mizoram and with your permission, I lay the following reports in respect of the Government of Mizoram on the Table of this august House -

- (i) Report of the Comptroller and Auditor General of India on State Finances for the year ended 31 March 2015
- (ii) Appropriation Accounts 2014-15
- (iii) Finance Accounts 2014-15 Volume-I and Volume-II

Thank you Sir.

SPEAKER : Awle, a copy kha sem nise.

Awle, tunah chuan MLA zahawm tak Pu Lalrinliana Sailo-in 'The Fourth Report of Committee on Estimates relating to Kaladan Multi Modal Transit Transport Project under Public Works Department' tih hi House ah rawn present se, amah i lo sawm ang.

Pu LALRINLIANA SAILO : Pu Speaker, ka lawm e.

Ka report tur hi kan hriat tlan a niin ka ring a. Burma ram atanga hmar lama tui luang Zoram thlen dawna chhim lama rawn let leh Chhimtuipui lui kan tih thin project a ni a. Kaladan Multi Modal Transit Transport Project PWD enkawl a ni akum 4-a zo turin 2010 September ni 27-ah work order an pe chhuak a, chu chu an hnathawh dan te kan va en a ni a. Kan member te chu kan sawi tawh thin a, sawi nawn ngai tawh lovah ngai ila, a that ka ring a. A hmunah ramri bul thleng ten kan va kal a. Kan hriat angin chumi zawm zel atan Myanmar te kan thleng a, Pathian in rem a tih chuan chumi umzui bawk siin Assembly-in khulai Estimates Committee, Parliament ami te zu zir a, zu thlir a, zu en zel te kan tum a. MEA Minister te, a rem chuan Prime Minister te, a rem rem zu hmuh tumin kal kan tum a. Tiang chuan rim takin an rawn furnish te kan han en a. Chu chu a bu chhung thu hi sawi ka tum vak lova. Tum hnih revised a ni tawh a, tuna revised lehna hi a lo puitlin chuan ₹534.63 crore in additional expenditure hi awm tur angindepartment-in a rawn ziak a.

Tin, ngun takin kan va en a ni a, zawh tur hun hmasa kha 2014 a ni a. Chuan 2017-a zo turin tunah hian department te an innawr a, an thawkrim khawp tho in kan hmu a. Tin, mak kan tih chu department in 2017-ah an zo ang an tih a kan zawhna min chhan laiin contractor-in 2018-ah an ti ngat mai te kha mak kan han ti deuh va.

Tin, Pu Speaker, hemi chungchanga inkaihnawih pawimawh deuh mai chu, sawlaih sawn compensation saw loh theih loh lai pawh a awm a. Mi ram dik tak va sut pawh a nei a, chutih ruala hemi hindrance an ti a, an sukukna avanga hydel cost, an khawl te, man power te, chumi thawk lo a an awmna kha ₹16.5 crore lai a ni a. Tin, tunah hian ka sawi duh lai tak chu Land Owners Association an ti a, Lairam-ah sawn, chumite pawh chuan niminah hei paper te min rawn pe a. April ni 1 atang hian kan duh anga kan ram compensate kan hmuh loh chuan hna hi thawk tawh lo se kan ti a ni tiin. Keini pawh lehkha te pawh min pe a, kan va kal pawhin, 'e khai, kan ram tan' tiin kan inngen ve a.

Tin, engemaw hriatthiam loh an han neih Mizoram area aia an compensate claim area tam zawk tih kha Vigilance-in min pek ngei a ni a. Ama'rawhchu, Lairam-ah hian Pathian mi tak tak te, mi tha te, mi thahnemngai, ram tana thahnemngai te an awm a. Tunah hi chuan mi sangkhat chuang compensate claimant te atangin mi 235 velah an chhuk thla ta a. Tiang chuan, Estimates Committee hian kan purview a ni emaw, ni lo emaw kan thawk ve hle a ni.

Tiang chuan tunah hian compensate claimant ti mai ila, Land Owners Association te'n an claim a, chutiang chuan ri arawn awm leh a. Pu Speaker, kan sawi duh lai tak chu an hnathawh kal zel, hei ram tana project pawimawh em em a nih thu kan hre vek a. Kan Zoram chauh ni lo, India hmar chhak chauh ni lo, central-in arawn tum ngut ngut mai a ni a. Tuna railway ngat phehi hi chu Railway ministry-in a hranpaa budget a neih rual rualin tunah hian ka hriat dan chuan PMO-in direct-in tuna railway tur hi a monitor a ni tih te ka lo hre ve a. Tiang chuan sawlai project saw a pawimawh em em a ni.

Ka sawiduh lai tak chu hei ti hian thawh zawh tur angah hian an zo ta thin lova. Technical thil avang leh compensate nawrna avang a ni mai thei. Amaherawhchu, kan PWD te hian ngun takin vil lehzual se tih Committee-in a duh chu hindrance, an sukukna lai kha engtia rei nge tih hi chiang taka dah thain kan hria a ni. A chhan chu tunah pawh hei naktuk tuk leh atang chuan in thawhtir kan tum lova, sawlai RDS leh ARSS te saw an ti a. Ama'rawhchu, kha period kha a rei leh dawn em? Chu chuan hindrance puitling tak a thlen ang em? A pumpuia a kum tela hnathawh sukuk leh anga an sawi a kha a dik tehreng em? Chulai chu Committee pawimawh kan ti khawp mai a. Entirnan, lo thawk tawh chuan karkhat daih te khan kum 2, kum 3 tel mai a minrawn effect alawm mawle an tih leh te kha awm thei a nih avangin Committee chuan chutiang chuan ngun takin a ngaihtuah a. Chumi period pawh chu hindrance register-ah khan ngun takin anmahni contractor te ringawt ni lovin, keimahni lampang sorkar pawh hian ziak tha se, lo chhinchhiah tha thlap se tih hi Committee duh dan a ni.

Pu Speaker, i remtihain Fourth Report of Committee on Estimates relating to Kaladan Multi Modal Transit Transport Project under Public Works Department hi he House zahawm takah hian ka present e. Ka lawm e.

S P E A K E R : A copy kha sem ni se. Awle, tunah chuan Financial business-ah kan kal thei ta a. House remtihna lak tawh kha kan ring ang a. Minister pahnih te demand hi kan lakawp mai thin a, vawiinah pawh kan la kawp leh mai ang a. Vawiina kan lak kawp tur chu Minister zahawm tak B.D.Chakma leh Pu Lal Thanhawla, Chief Minister te an ni. Nidangah chuan a upa zawk ta hi kan la hmasa thin a, vawiin chu a naupang ta kan la hmasa zawk dawn a ni.

Tunah chuan Pu B.D.Chakma a demand te sawiho turin rawn submit sela, i lo sawm ang.

Pu B.D.CHAKMA, MINISTER : Honorable Speaker Sir, on the recommendation of the Governor of Mizoram and with your permission sir, I move the demand no.35,41 for ₹ 25,72,05,000/- only, for meeting expenses during 2016-2017 in respect of the following Departments.

Demand no.35- Fisheries Department ₹ 8,76,45,000/- and Demand No.41-Sericulture Department ₹16,95,60,000./- Total ₹25,72,05,000/- only, thank you sir.

S P E A K E R : Awle, tunah chuan kan House Leader, Chief Minister zahawm tak Pu Lal Thanhawla a demand te submit turin i lo sawm ang.

Pu LAL THANHAWLA, CHIEF MINISTER : Pu Speaker, Governor zahawm tak remtihna leh i phalna in heng a hnuaia Department te mamawh

phuhruk nan 2016-2017 cheng 13,53,19,20,000 hi he House zahawm takah hian ka rawn pharh dawn a-

1) Legislative Assembly	₹19,58,30,000
2) Governor	₹10,60,000
3) Council of Ministers	₹5,98,62,000
5) Vigilance	₹5,27,88,000
6) Secretariat Administration	₹1,06,01,14,000
7) Personnel & Administrative Reform	₹2,79,81,000
8) GAD	₹ 66,73,52,000
9) District Council Affairs	₹2,87,88,06,000
10) Power	₹3,21,46,29,000
11) Public Works	₹4,86,00,22,000
12) Minor Irrigation Department	₹51,34,76,000
Total	₹13,53,19,20,000

He House zahawm tak min ngaihtuah sak turin ka rawn pharh e. Pu Speaker, ka lawm e

S P E A K E R : Kan Minister-ten an demand hrang hrang House-ah an rawn pharh ta a. Nichin khan rawtna a awm a, demand sawiho nan minute 10 chu a tlem lutuk kan ti a, kha rawtna kha kan support em? Kan support lem lo a nih chuan a ngai ang khan kan kal ang a. A sawi dan kan thiam hlawm dawn nia

Pu R.LALZIRLIANA, MINISTER: Pu Speaker, demand sawina ni te a ni bawka, khalai ka support leh support loh lam ai mahin dar 4 ah hian i remtih chuan thingpuite kan lo order ve ringawt a, nidang ai chuan a rei deuh tur chuan kan ngai.

S P E A K E R : Kan Chief Minister chan pheï hi chu demand engemaw zat a awm a, sawi vek kan duh dawn si a minute 10 hi chu ni e, a tlem lam a ni mai thei a. Awle, minute 15-ah sawi zawh vek i tum ang u. Hun kan pawt sei tawh a thuawih zir ve tawh ila. Awle sawi tan ila, Pu R.L.Pianmawia.

Pu R.L.PIANMAWIA : Pu Speaker, vawiinah kan House Leader department enkawl leh Fisheries Minister te demand sawi hona turah sawina hun min pek avangin ka lawm e.

A hmasain, Fisheries department hi an tet ang ai hian hma an la nasa khawp mai a. Sangha dil nei thar leh a siamthatna tur tih puitlinna thlengin hma an lak sak thin a, a lawmawm hle in ka hria a. CSS atang te pawhin kan work programme ah khan hmalakna tur tam tak an rawn tarlang a, a lawmawm hle in ka hria. Ka bial chhungah pawh sangha dil nei te tanpuina mi engemaw zat hnenah min pek sak avangin an aiawh in lawmthu ka sawi bawk a. Tin, an hmalak zelna tur atana motor leina tur budget-a an han dah thei te kha an fakawm ka ti a, kha khan an hmalakna pawh nasa zawkin a ti kal theiin ka ring a. Tin, an tih lawmawm em em mai chu YMA luidung humhalh tha te an hriatpui a ni tih hriatna tura tanpuina sum pek tur an han dah thei te kha a lawmawm hle in ka hria a, an fakawm em em a ni.

Tin, an fakawm em em rualin sangha chi pek chungchangah hi chuan rialno khat te, no hnih ten an han sem thin a. Patlingin nilengin an lo buaipui ve a, khatiang chauh dawng tura an lo inpuahchah ve thin erawh kha chu, an mamawh ang tawk deuh sangha chi pe tawh turin kan Minister hi ka han ngen a ni.

Demand No.15-na ah kal ila, GAD ah a hmasain lawmthu ka sawi duh a. SHDC atan nuai 308.03 min dah sak avang te leh SHDC office Aizawl a sakna tur nuai 50 min ruahman sak te avangin lawmthu ka sawi a. SHDC atana sum kan dah thin te hi

tun aia tama tihpun theih dan kawng a awm chuan hma min lak sak turin ka ngen duh bawk a.

Tin, SDO Civil enkawlina hnuaiiah kan bial khi a awm a, Sakawrdai Civil SDO in min enkawl a. Office pawh nei lovin tunhma AO quarter hlui kha an ring a, a tawp khawp mai a. Khimi sakna tur khi min ngaihtuah sak theih hram dan a awm lawm ni ka ti deuh a, ka han ngen a ni.

Tin, GAD hnuaiia District Development Fund min pek thin kha tuna a lan danah chuan a awm dawn ta lo a. Hei hi tih leh hram dan awm thei sela tih ka sawi duh a. Tin, GAD hnuaiiah bawk hian Mizoram House hrang hrang ten motor an indaihlo hlawm em em mai a. Chuvangin khumi indaih lo phuhruk nan khuan heti zawng hian remruatna min ngaihtuah sak thei ang em aw ka ti a, Minister-te motor hlui, car hlui ho kha kan House-ah khuan sem darh ta sela. Chutilo chuan helaiah a kawl thei lo tur te thleng pawha kawl theihna kawng a in hawng chho mai dawnin a hriat a. Khulai indaih lohna phuhruk theihna ni bawk si kha min hriat sak se, remruat dan te a awm theih chuan ka ti a.

Demand no.39-na ah power-ah hian sorkarin hma a la nasa a, eng pek lohna khua la awm mahse ka bialah chuan eng pek loh na khua pawh a awm tawh lova. Heng eng pek tharna khuaah te hian a enkawltu tur an awm si lova, hemi atan hian MR min dah sak turin ka ngen bawk a ni.

Demand no.45-na PWD-ah hian a lawmawm hle in ka hria a. A tu te mai pawhin tuna kan sorkar, Pu Lal Thanhawla kaihhruai sorkar chu an tih theih miah loh pawh ti thei turah an ngai a. Harsatna zawng zawng thlena ti thei tura an ngaih ang ngei hian tunah pawh kawng chhe chungchangah hma an la tak tak a, Aizawl khawpui chhung te mam ngai lo pawh kha a mam zer zur tawh mai a, istiri-a nawh ni awm tak hian a tle ver vur mai a, a ropui a, lawmawm ka ti hle a. Tin, ka bial Hmarthimpui

zangkhabungbut hnan ti eng turin National Highway ah min puan sak tawh Vairengte atanga New Vervek inkar kan lawm hle a. Amaherawhchu work programme-ah khan a rawn lang ve lo tlat mai a, lang chi a ni lo nge ni, han lang sela chuan kan nui nawn awn awn tur a nia. Engtizia nge min hrilhfiiah theih chuan ka lawm khawp ang ka ring .

Tin, session-ah ka sawi fo tawh a, ka zawt fo tawh a, East Phaileng – Zuangtui kawng sum tam tak sen tawhna tihtawp mai a nih thu kha. Tun session-ah pawh khan ka zawt a, chhanna ah khan khua a paltlang tam lo em atin ni tih kha a ni berin ka hria a. Khua paltlang tam lo tih ringawt hi chu thlawhna pawh hian khua a paltlang tam bik vak emaw ni aw tih te ka ngaihtuah a. A pawimawhna lampang kha kan chhut tur ni in ka hria a. Tunah hian East Phaileng – Zuangtui atan hian PWD hian mi 375 hnenah cheng nuai zahnih sawmsarih pariat leh singkhat leh sangsarih compensation ah a pe ral tawh a. Han hluihlawna han tawp san mai tur chuan kan in sengso tam tawh bawk si a, tih dan hram a la awm lawm maw ni le, tihtawp mai chu a va uihawm ve, he ti zat zat kan seng tawh a. Kawng kalna tur pawh engkim an ti tawh a, land acquisition te pawh an ti fel vek tawh kha a ni a. Chuvang chuan hei hi chu a tih hram dan a la awm ka ring a, min ngaihtuah sak turin ka duh a.

Demand no. 13 Personnel & Administrative Reforms-ah hian ka sawi duh chu Mizoram hi Pathian khawngaihna zarah Chanchin Tha avangin ziaik leh chhiarah te pawh chhuanawm takin ram pum angah te pawh hriat kan lo ni chho ta mek a, kan mi te pawh thiamna lamah an lo changkangin rual kan awt tawh lo viau a, state tam tak ten min phak lohna chin pawh a awm tawhin a hriat a. Hemi karah hian Mizoram state tan bik All India Service bika state cadre keimahni pual bika kan la nei ve lo erawh hi chu a hrehawm khawp mai a. Kan state, Mizoram pual hian state cadre, All India Service-ah hian neih ve thuai theihna tur in kan House Leader ngei pawh central-a Home Minister Pu Rajnat Singh-a te pawh a lo zuk dawr tawh a, lehkha te hial pe in a lo buaipui tawh a. Hei hi chak zawka bawhzuia hma lak theih dan a awm ang em aw ka ti a. Mimawlin han ngaihtuah mai chuan a huphurhawm hle a, amaherawhchu, kan hotupa hi ram pum

pawhin kan rin ngam a nih avangin leh rintlak a nih avangin hei pawh hi arawn ti chhuak leh thei mai ang tih ka ring tlat a.

Chuvang chuan IAS te, IPS te, IFS te keimahni puala cadre kan neih theih chuan tuna sorkar hnathawk lai atang te leh a thawk lo atang te hian mi hmantlak tak tak, inpui nghak tur hi an lo chhuak teuh dawn in ka hria a. A chhan chu, kan tawng tu huatthu suh ah Mizo tawng a tir atanga hmang ve lo hote tam tak helaiah an rawn thawk thin a. Inpui nghaktu rilru hi an pu pha lo hrim hrim mai a, tuna a kal ang ringawt hi chuan kan ram sum leh pai lakluhna tihlawktu aiin a ei hektu an ni zawk ta mai em tih te pawh hi ngaihtuah theih a ni a. Chuvangin, inpui nghaktu tur mithiam tak tak, fel tak tak tuna sorkar hnathawk lai department hrang hrang ami te mai bakah mi thar rawn pen chhuak tur te hi kan chher chhuah theih nan, Mizoram tan bik hian cadre hranpa neih theih hram dan hi awm thei sela, chumi kawngah chuan hma la turin ka ngen a ni.

Demand no. 47- Minor Irrigation ah hian tlemte han sawi tel duh ka nei a. Hei hma an lak chak chhoh teh reng nen hun engemaw chen chu an chawl ta vang vang mai hian a hria a. Amaherawhchu, work programme te en chuan thawh tur eng eng emaw chu a lo awm a, mahse, keini bial lam kaihnawih ah chuan Tuiphur II project hmana chhuak mai tur kha vawiin thleng hian engmah thawm a la awm ta lo a, chuvang chuan hei hi an lo mangnghilh ta mai em ni tih ka sawi tel duh a. Hengah hian kan hotuten min ngaihtuhsak a, tan min lak sak sauh sauh turin ka ngen duh a ni.

Aw le, Pu Deputy Speaker, kan Minister pahnih te demand hi lawm takin ka thlawp a ni. Ka lawm e.

Pu R.VANLALVENA : Pu Deputy Speaker, ka lawm e. Kan Minister zahawm tak Pu B.D.Chakma leh kan Chief Minister, House Leader zahawm tak demand vawiinah sawi theia ka awm avangin lawmthu ka sawi a. A hmasa in Pu Deputy Speaker, Demand no. 35 leh 41- na ah hian tan ka duh a. Kan Minister hi a fakawm khawpin ka hria a,

mithiam a ni bawk a, helai House-ah hian Pathian khawngaihna in kan han awm ho a, a inzir chak em em a, Mizo tawng te hi a thiam chak khawp mai, a rawn awm tirh leh tun te hi chu inthlau tak a ni a. Mithiam a nihna hi a langin ka hria a, a fakawm ka ti a. Tin, a department enkawl ah pawh a rilru a pe in hma a sawn hle a ni tih kan Governor Speech atangte leh a hmalakna hrang hrang en hian a hmuh theih a, a lawmawm ka ti a, ka chhuang tak zet zet a. Sericulture-ah te hma an la nasa em em a, district hrang hrangah Integrated Sericulture Development Project an nei a. Lunglei-ah te leh hmun hrang hrangah NLUP atang pawhin family tam tak 2206 lai an cover a, Sericulture atang ringawt pawhin hma an la nasa a ni tih kan hre thei a. Tin, Kolasib District lam bikah pawh Muga atanga hma la tur te'n project tha tak an siam a, tunah an kalpui mek a ni tih te pawh kan hria a, a lawmawm ka ti a.

Tin, Fisheries-ah pawh an hmalakna hrang hrang kan hmu a. Sangha tam zawk thar chhuah theih dan tur ruahmanna tam tak a nei a, kan sawi seng lova. NLUP atanga a cover ringawt ah pawh chhungkaw 3654 tan hma a la a, nasa takin hma a sawn a ni tih kan hmu thei a. An hmalakna kimchang kan sawi seng lovang a. Amaherawhchu, a tha zawk ang em aw tih suggestion pakhat ka rilrua awm chu sangha hi kan ramah hian kum khatah vawikhat chauh lak a ni a, an lak pawh hian a uih hman ang tih hlauin phurh haw vat vat a ngai thin a. Chuvangin cold storage hi hmun engemaw zat ah hian dah ni ta se, kan sangha thar tuten dahkhawm ve ta se, phai sangha kan lakluh a tlem zawk nan leh kan sangha te hi a tlo zawk theih nan district hrang hrangah hian cold storage hi nei ila, kan sangha thar hi chutah chuan dah ta ila. A kar a kar te pawh vawn that ve theihin siam ta ila, chu chu kan Minister zahawm tak hian min lo hriat sak se.

A dawt lehah chuan demand no. 1-na – Assembly chungchang hi tawite sawi ka duh a. Hei ti hian Assembly-ah kan han thu a, kan Assembly-a thawktute hah zia hi kan hre tlangin ka hria a keini ho Minister ni lo, Parliamentary Secretary ni lo ho phei hi chuan kan chiang viauin ka hria. Committee peng hrang

hrang a tam em em a, chung chuan subject hrang hrang kan la a, kan committee deuh reng a, officer ho, a thawktu ho hi an hah em em a. Department-ah zawhna te an han siam a, vawikhatah department hian an chhang fuh mai thei lova, vawihnih vawithum in chhan nawn a ngai a, chutiang reng reng chuan hun kan hmang thin a, an hah zia hi kan hriatpui a, an fakawm ka ti a. Zin chhuah a ngai a, kan zin dawr dawr a. Team hrang hrang kan nia, vawiinah team khat an zin a, a tuk lehah team khat, an lo haw chauh a, khatiang reng renga kal kha an ni a. An motor hi a tha lo khawp a, VIP zui thin te an ni a, VIP te hi an tlan chak thin si a, anni Assembly motor hi a tha lo lutuk a, an tan hian a hrehawm thinin ka hria. Chuvang chuan motor tha deuh te hi a lei ve theih lawm maw ni le aw, Assembly-a kan officers ho kal velna atan hian tih kha kan House Leader hian min lo hriat sak ta se. He budget atang hian motor leina te kha a awm thei em? A nih loh pawhin khawi atang hian emaw sawh thlak theih dan te a awm em tih kha ka'n rawt duh a.

Tin, GAD, demand No.15 ah khan kai dawrh ka duh a. GAD- ah hian 1974 daih tawh ah khan Mizoram Urban Area Control Act hi passed a ni a. Chu chu hman loh in a awm vang vang a, 1998- ah Law atangin GAD ah Rules siam turin an thawn a, vawiin thlengin chu chu a la reh ta vang vang a. Aizawl-ah in luah man te, dawr luah man te control a nih loh dan chu hretu vek kan ni a. In luah man te hi tute emaw chuan an faten pawl sawmpahnih an han passed a, college an han kal ve dawn tawh a emaw, tlema chhungkaw khawsak a lo san deuh dawn avangin in luah man te an han san tawp zel a. Thenkhat chu missionary kan tir ve duh tih avang te in in luah man kan han san tawp mai a, thenkhat chuan lehkha them an pe ve ve a, 'hei hi tun thla atanga in luah man tur a ni a,' an ti a. Khatiang kha tuna kan dinhmun hi ania, a lehlamah in luah tute lah in neitute hriat lova lo chhuak ru daih an awm bawk a. Chutiang chuan kan in luah man hi control loh in a awm tlat a.

Tin, dawr ni se, saw Millennium Centre te pawh saw kan hria in ka ring a, zun man ringawt te saw a to em em a. Tin, dawr neitu in nuai sawm hnih, nuai sawm, nuai nga rawn deposit la, chutilo chuan i luah thei tawh lovang te kan inti a, kan dawr luah man te pawh saw control loh a awm a, chu chu kan Aizawl dinhmun hi a ni a. Tin, market area ah te pawh sawn sorkar dawr te pawh a awm a, pi leh pu te atanga kan chhawm niawm tak hian kan nei reing ka hria a, sawngah te pawh sawn Dan mumal tak neih hi a tulin ka hria a. Allocation of Business Rules, 2014 ka'n en hian GAD-in an siam turin kan gazette-ah hian a lo chhuak a. Kan Chief Minister zahawm tak chan a lo ni kher hi a lawmawm ka ti a.

Tin, mi harsa zawkte tana rules hi siam tur a nih avangin 1974 kha kan Congress sorkar loh lai a ni a, 1978-a Law Department in GAD-a a thawn phei lai kha kan sorkar loh lai a lo ni leh chiah chiah a, kan Chief Minister zahawm tak hunlai hi ni se chuan Rules tha tak hi kan nei daih tawhin ka ring a. Tin, hetianga Dan passed a lo nih a rules siam tura kan in tih a kan theihngilh zel lai hi kan hlawh punna tur ni se chuan kan theihngilh hi ka ring lo deuh. Chuvangin Pu Speaker, he Dan hi kan siam ran a tul in ka hria. Aizawl khawpui hi enkawl loh ang deuhthaw in kan chhuah mai ang tih hi ka hlau a, chuvangin a changtu GAD lam te pawh khan theihtawpa buaipui zui ni thei se chuan a tha in ka hria a, chu chu ka'n sawi kai duh a.

A dawt lehah chuan PWD hi han kai leh ka duh a. PWD hi an hah hle tih kan hria a, an hna chan a zau a, a tam a, an thawkrim hle a ni tih a hre tu vek kan ni a. Tun kum chhung ringawta an hnathawh pawh hi en ila formation cutting-ah km.62 chuang, black topping pawh 109 km chuang, culvert ni se an siam tam em em a, 152 lai khawih lai an nei a. Tin, lei dawh lai te pawh an ngah em em a ni, building pawh 54 lai sak mek an nei a, tun kum chhungah hian 13 lai an zo hman tawh a ni tih kan hria a. Chutiang chuan an hah a ni, nichina

paper present Kaladan Multi Model Transit Transport lama hmalakna kan member zahawm tak Pu Lalrinlana Sailo sawi lai te pawh kha henga an chhiar tel loh hi a nia. Sawngah te pawh sawn an thawk nasa hle a ni. Chutiang khawpa hah leh rim chuan kan PWD te hian hna an thawk a.

Amaherawhchu, tlema an chet chhiatna deuh, hnathawh tam na na na chuan a tha lo lai deuh hlek hi a awm lo thei lova, khatiang a awm chang khan kan chirh theh ta luai luai thin a, whatsapp-ah te, facebook-ah te, media a tha tawh si a, a chhe lai hi kan insawi duh lai hi a ni bawksin hian a vanduaithlakin ka hria a. An thiltih that lai hi kan fakhleitheilo va, a tha lo lai kan sawi hluai mai thin te hi a hrehawm ka lo tih pui thin a. Hna tam tak hi chhun zan zawm hian an thawk a ni tih hi he House-ah hian ka'n sawi lang ve duh a. A bik takin keini awm ve na lai Aizawl road south division-ah te pheichuan session hmasa November vel atanga working season vawiin thleng hian chhun zan zawmin an thawk tak zet zet a. Zingah ni se kan SDO ho hian mahni inah pawh chaw ei hman lovin, zanah ni se inkhawm hman loh chang hi an ngah a, vawiin thleng hian an la thawk char char a ni. Ka lo ngaihtuah pui ve vak ngai lova, mahse tuna hetiang-a kan han awm ve takah hian ka hriatpui ve ta viau a, englaipawh hian an thawk hi a ni ringawt mai a ni. An lo hah hle a ni tih hi ka hriatpui ta a, an chungah lawmthu ka sawi a ni. A bik takin kan Chief Minister zahawm takin Venghlui-ah (nikum lamah he House zahawm takah pawh kan sawi tawh a) in14, chhungkaw 40 lain harsatna an tawka, lei tlahniam, mahni inah pawh riak ngam lova riah chhuah ngai khawpin harsatna kan tawka. Chumi atan chuan kan Chief Minister zahawm takin hman lak sak a. Tunah khuan a ven hna thawkin nuai 95 senna turin ruahmanna min han siam pui a. Check dam te leh side drain tha zawkte min siam sak a, a chungah lawmthu ka sawi a ni.

Kan demand hrang hrang hi sawi tur a tam viau nain ka luhchilh thui lutuk lo ang a.

A pangana ah chuan Vigilance hi hmanni ah Starred Question ka siam tawh a. Kan Chief Minister min chhanna kha lawmawm ka ti a. Vigilance Department-ah hian property return thehluh tur a ni tih House-a min chhanna atang khan kan hria a. Hei hi a pawimawh khawpin ka hria a. Property return hi sorkar hnathawkten a bik takin officer ten kan asset kan thehluh loh chuan hrem theih kan ni tih chiang takin min hrilh tawh a. Hei hi ngaih pawimawh tulin ka hria a.

Minor Irrigation-ah hian a tawp berah chuan han kal ila. Nichina a sawi ang khan Minor Irrigation hi engemaw chen kan chawl tawh a. Mahse tunah project 25 lai mai an rawn nei a. Chhungkaw 791-in an hlawhtlin pui theih tur project tha tak mai an rawn nei a. Minor Irrigation pawimawh zia kan hria a. Kan ram hi lo nei hnam kan ni a, englai pawhin lo nei hi kan tam reng a, a average a lakin. Chungho in an chhawr theih tur project tha tak Minor Irrigation Department-a a lo lang hi lawmawm ka ti a, nghahhlelhawm pawh ka ti a ni.

Tin, a tawp ber tak takah chuan Pu Deputy Speaker, electric power kan neih that zia hi, hetiang khawpa ram rethei harsa, ni si ti em em a electric power kan hnianghnar hi lawmawm ka ti a. Heng hi kan department te leh kan Chief Minister, a changtuten theihtawp chhuaha hma an lak vang a ni a. Mi state, tha awm taka kan sawi thinte ai hian kan tha zawk a ni. Chu chu ka sawi theih tawk a ni, Pu Deputy Speaker, hun min pek avangin ka lawm a. Kan Minister zahawm tak takte pahnih demand hi House-ah hian pass a nih theihna turin ka rawn thlawp e. Ka lawm e.

Pu K. SANGTHUAMA :- Pu Deputy Speaker, ka lawm e. Vawiinah hian kan House Leader zahawm tak demand leh Fisheries leh Sericulture changtu Minister zahawm tak demand kan sawiho dawn a ni a. Sawi tur a tam em em a, mahse, department zawng zawng chu hma vek sen a ni lovang a.

A hmasain demand 35 na Fisheries kha han sawi hmasa ta ila. Mizoram-ah hian sangha khawi hi kan hlawhtling ang reng viau a, a lawmawm ka ti a. Sangha dil neitute pawh an tui a. Chuvangin hei hi theihtawp chhuaha kan Minister zahawm tak pawh hian enkawl pui a, kan rama pawisa lakluhna tam tak hi Fisheries lam atang hian a tih theih a ni tih kan Chiang Tlang a, chuvang chuan theihtawp chhuah turin vawiinah hian ka'n chah ve leh duh a. Chutih rual erawh chuan sangha dil nei fumfe lo, tanpuina pek hi a awm ve leh zauh thin a ni awm a, hengah hian fimkhur takin kal ta ila, a nei ngeite chu duhsak ila, tam deuh pawh pe ila, chu chu ka'n rawt duh a. A chhan chu sangha dil neih theih mang lohna awm ang chi ah te hian Pu Deputy Speaker, tanpuina hmu an awm leh tlat thin a, hetiangah hian fimkhur takin hma lak ni sela a that ka'n ring a.

Tin, pakhat lehah chuan nichinah ka hmaa min a sawi tawh bawk a. A dahthatna, cold storage kan neih loh avang hian sangha khawituten harsatna tam tak an nei thin a. Hei hi kan budget han en hian tihtheih mai awmin a lang a. Chuvangin hei hi kan Minister hian ngaihtuahna lo hmanng sela. Sangha chu kan thar tam angreng viau a. Mahse, a hralhna kawngah hian vawi khatah man khawm vek dawn ta ila, a hralhna a awm mang si loh chuan a lo uih mai emaw a ni a, tlawm tea hralh emaw a lo ngai a. Chuvang chuan hemi kawngah hian tan la leh deuh hlek ta ila, kan Minister khan kha lam kha rilruah lo nei selangin. Tuna kan thar nasa tak hi man man zawk emaw hralh zawh theiha a awm chuan sum kan lakluhna, sangha lamah hian tam takin hma kan sawn ang tih hi vawiinah hian ka'n sawi duh bawk a.

Tin, pakhat lehah chuan sangha chi sem hrim hrim hi fimkhur deuh hlek bawk ila. Kan sem tam ang hu hian a nung tam lo tlatin hriatna ka'n nei a, Pu Deputy Speaker. A chhan chu kan sangha sem hi a te ta lutuk deuh hlek a. Chuvangin a thi hi a tam em em mai a. Tlema lian deuh zawk, a to hret a nih pawhin, lian deuh zawk hi pe ta ila, chutichuan kumkhat chhung khan lian tak tak a lo ni thei ang a, kan hlawk zawk ang tih hi ka hmuh ve dan ania. Chuvangin, sangha chi sem chungchangah hian an sem

tawhna te leh a lo dawng tawhte atanga kan experience ve in tlema lian deuh hlek hi sem ni se chuan kan thatpui zawk ang tih ka'n ring deuh hlek a ni.

Tin, Sericulture chungchangah hian hma la zel se ka'n duh a, a chhan chu Sericulture hi kan rama eizawna puitling tak siam theihna kawng a ni a. Kum khat chhungin, kuminah hian a chaw tur kan phun chuan nakumah a ei nghal zel thei a, a puitling nghal zel thei a. Chuvangin hetah hian kan tui tawk lo, Mizoram hi kan tui tawk lo emaw ni chu aw ka'n ti a. Vawikhata hausak thur thur theihna mai phe chu Pu Deputy Speaker, a ni chiah lo nain Sericulture hi ei hmuhna chu a tling a ni. Hetah hian a sawi pawh kan sawi tam a ngai a. Ei zawn nana mi tam takin an hman theih a ni a, tunah pawh hian engemaw zatin eizawn nan an hmang tih kan hria a. Kan Minister zahawm tak hian hma han la se, tun ai hian kan thang lehzuang ang tih kha ka'n sawi leh duh bawka a ni.

Tin, kan House Leader zahawm tak demand lamah hian kal ta ila. Lawmthu sawi tur tam tak pawh ka neiin ka hria a. A hmasain power chungchang hi sawi ta ila. Chawlhmun-ah te, Sakawrtuichhun, Rangvamual, Phunchawng velah khuan electric ban tlu lek lek hi a tam em em mai a. Mahse, tun hnaiah enggemaw zat khutilaiah phun thar a ni a, a lawmawm khawp mai. Chuvangin kan House Leader chungah hian lawmthu ka'n sawi duh a ni. Ban tam tak, khu lamah, kan bial hi han tih loh theih loh a, lo hrethiam ula, mahni bial na na na chu kan sawi pawhin kan thahnemngaihna kha a ni a, House Leader zahawm tak pawh khan lo hrethiam sela, kan bial na na na kha chu sorkarin thil min tih sakte lawmthu sawi ve te a'n ngai a. Chuvangin a lawmawm hlein kan hria a, kan lawm khawp mai a. Tin, transformer bun tur 4,5 lai a awm a. Chu chu a lo la thleng chiah lo deuh a, mahse, a lo thleng tep an ti a. Hei pawh hi a lo thlen veleh keini ho chu kan inpeih viau a. A hmunte, a bunna turte kan nei sa vek a, chuvangin transformer hi a lo thlen veleh min bun sak turin ka'n ngen duh bawka a.

Tin, pakhat lehah chuan, Law College khu sak zawh tawh a ni a, ka bialah khuan a awm a. An sa zo tawh a, chutah chuan electric hi fit tawh a ni a mahse connection hi pek leh phawt tur a ni a, connection hi a hma lam in pek theih hram ni se ka duh khawp mai a. A chhan chu luah thuai kan duh a, electric a awm loh chuan a luah thuai theih dawn lova, hei hi kan Chief Minister zahawm takin min hriat sak turin ka duh a.

Tin, connection kan tihna ah khuan 25 lacs ngawt mai sanction kan hmu a, khu Law College ah khuan. Mahse, hei hi la hman zawh loh niin kan hria a, hriatchian pawh tha hle in kan hria a. College building lian vak lo ah 25 lacs lai sanction a ni a, nuai 7 or 8 vel dawn lai hi la hman loh niin kan hria a, chu chu a building lam atan te a la hman theih em tih te kan House Leader zahawm tak khan min lo enchian sak se kan duh bawh a. Power lamah chuan duhtawh mai ila.

Demand no.45-na PWD lamah hian lo sawi leh ta ila. Nimin khan MZU kawng hi, kan House Leader zahawm tak hnenah hmanni ah pawh ka sawi tawh a. Ani khan 'kar hnih-khat chhungin kan zo vek ang a tih ang khan, niminah khan a black-top 1.8 kms, a la bang zawng kha niminah khan zawh a ni ta a, kan lawm khawp mai a. Chuvangin a hnena lawmthu sawi kan ba a, harsatna eng eng emaw karah rei tak khulai khu buaina te kan lo nei a, tunah chuan MZU kawng tha taka zawh a ni ta a, vawiinah hian lawmthu ka han sawi duh a ni.

Chutih rual chuan, hemi a dam lampang Vaivakawn-Ropaiabawh kawng thui vaklo khu min han black-top sak leh se, khulaiah khuan nuam takin kan kal thei mai dawn a ni a. Chuvangin, Pu Dy. Speaker, Vaivakawn atanga dam lampanga chhohna kawng tawite, khu khu han tih leh ni se chuan, tam pui pawh ngai awmlo tak a ni a.

Tin, pakhat leh ah chuan Luangmual ah khuan eternal road tha tak kan nei thei dawn a, lawmawm hle in ka hria. Kan SDO ten nasa takin tan an la a, tunah chuan kawng tha tak kan nei dawnin kan hria a, kan lawm khawp mai.

Tin, Ramrikawn atanga PTC inkar khu a tha lo khawp mai a, nikum lamah ka sawi tawh a 84 lakhs in kan chei a, duh thu a sam lo deuh va, tunah khuan 8 lakhs vel chiah kan nei a, chu chuan thui a daih dawn silova. Chuvangin, kan House Leader ka'n ngen leh duh chu khulai khu fur chhia ah pawh kal theiha min siam sak turin ka duh a. Helam kawng duh thu a sam lova. Chuvangin kan House Leader zahawm tak hi ka han ngen leh duh chu fur chhia ah pawh kal nuam deuh hleka min siam sak turin kan duh a. Helam kawng duhthu a lo sam lova, a lo tha lo thin a. Chumi chhung chuan motor lian nen kan in tawk sir thin a, in pelh ngaihna pawh a awm lo thin a, chuvangin khuti lai khu vawiin chuk chukah chuan a siam mai theih lovang tih chu kan ring a. Mahse, khawngaihni rilru min lo neih sak sela, khulai km li emaw lek khu theihtawpa siam turin vawiinah hian kan ngen duh a ni.

Pakhat leh ah chuan, nichina member zahawm tak Pu Piana'n a sawi tawh kha ka rilru ah a awm reng a, hmanni ah kan sawi dun tawh a. A kawng hi km 35 aia tam a ni lawm ni a hnaihna kha. Helai kawng hnaite a Phaileng to Zuangtui tih tlang theih mai compensation pawh nuai tam tak lo lak tawhna hi kan House Leader zahawm tak hian, nichina Pu Piana sawi kha ka rilrua sawi ka lo tum a ni a, ka han sawi nawn leh kher duh a. Rilru-ah lo nei sela, a theih phawt chuan ti tlang ila, darkar tam tak hlep theih a ni a, petrol/diesel tam tak kan hlep ang a, darkar engemaw zat chu helaiah hian kan hlep thei dawn hrim hrim a ni. Pu Dy. Speaker, 35 kms laia hnaih hleih anih avang chuan tul tlatin ka hria a ni.

Tin, central service a tih kha pawimawh ka ti hle mai a, state cadre neih kha. Hei hi rilru-ah lo nei leh bawh turin ka han sawichhuak ve leh a. Tin, Electric Veng, Church Street phei-ah sawn, tui hi a han haw dawn apiang hian a phui lo a, tui kha a haw

zung zung mai a. Kan kawt chiah a ni a, sawi pawh ka hreh deuh hlek a. Kan in saw 100 ft chiah a ni a, a sei lam saw, feet 100 chiah chhungah sawn tui han herh hawn khan engngemaw zatin an la a, ft. 100 chhung velah khan kawng kha a chhe em em mai a. Hei hi min lo hriat sak se ka duh a, vantlang an zahawm hle in ka hria. Kan in feet 100 kar chiah khan a ni a, khuar lian tak tak kha a awm a, a awm chhan chu thil dang ni lovin, tui pipe phui loh vang a ni a. Keini chauh tui la kan ni lova, mi tam tak lakna kha a ni a. PHE kan au-eih zo si lova, kan House Leader zahawm tak hnenah hian ka han thlen mai. (SPEAKER : Warning). A ni maw, Pu Dy. Speaker, tawite chauh.

Chubak chu a mimal thil viau na a, han sawi ka duh chu, Electric Veng Hall thlangah sawn, in kan nei ve a, kan luah lova, mahse, kan hriatloh in P & E khan hmanlai khan wire lian pui mai a chungah an han zam a, kan sak zawm thei ta lova. A hlauhawm em em a, min dahsawn sak turin kan dil a, vawiin thlengin kan la hlawhtling thei lova. Naupang pakhat phe chu kan inchunga a lawn kha a zu bawh thla a, a thih phah nghe nghe a. Hei hi House-ah ka han sawi ve reng reng duh a, sorkar kha a hranpa-in ka va dem lova, tunhmaa awm tawh a ni a. Khawngaihin kan House Leader hian min lo hriat sak sela. A theih phe chuan, a hrui dum lian pui pui hian a thlak mai theih a, kan thlak dawn nia, tiin min chhang a. Mahse vawiin thlengin thlak a la ni lova. Mihring tan a hlauhawm em em mai a, keini chhung tan chuan thudang ni se, kan sak zawm theih tawh loh pawhin ti khan a awm mai ang a. Amaherawh chu, vantlang tan zawk khan, hmanah mi an lo thi tawh bawk nen. Inchung an han lawn hriat sen a ni si lova, lawn theih vek a lo ni a, naupang pakhat a thi tawh a, kan MLA zahawm tak Pu Ngena tupa kha a ni nghe nghe a. Hei hi khawngaihin min lo hriatsak se kan lawm ngawt ang.

Pu Dy. Speaker, kha kha ka sawi theih tawk ni se, ka lawm e.

DY SPEAKER : A hrui sawi kha, Aerial Bunching Cable (ABC) a ni e. Pi Vanlalawmpuii Chawngthu i lo sawm ang.

Pi VANLALAWMPUII CHAWNGTHU : Pu Speaker, ka lawm e. Demand No. 35-na Fisheries chungchang kha, ka hma chiaha MLA zahawm tak Pu K. Sangthuama khan a rawn sawi tawh a, ka sawi tum sangha chi an sem hi a lawmawm em em rualin duh aiin a te mah mah a, a man to deuh zawk pawh ni se hei aia lian hi sem theih dan a awm em tih kha ka rawn rawt ve duh a.

Demand no. 15-na GAD-ah khan kan Chief Minister zahawm tak hnenah hian lawmthu sawi ka duh a. Hrangturzo bial East Lungdar khua-ah Helipad te min siam sakin helicopter service min tih sak dawn a, tun atanga hun reiloteah a service ve thei dawn a, chuvangin a chungah lawmthu ka sawi a. Kan Chief Minister zahawm tak leh Aviation Wing te hmalaknain Delhi leh Aizawl direct flight kan han nei thei te hi a lawmawm em em a. Nimin lamah pawh kan hotu dangten an sawi tawh a, khumi Lengpui Airport a din hma khuan siam tum a nih laiin Congress sorkar laiin Choak bak a tum lovang tih a nih kha, chutiang a nih lai chuan tunah thingtlang khaw hmun hrang hrang pawh thlawhna-in an han thleng mai thei turte hi a lawmawm tak zet a. Kan Chief Minister zahawm tak leh a thawhquite hi an fakawm hlein ka hria a.

Hemi a service hi kan chhawr nasa dawn a. Entirnan, ruang phurh chungchangah te, tin, official duty pawimawh tak taka kal te, hun chep tak kara kal thin te an ni a, chung mite tan chuan a pawimawh lehzual dawn a. Tin, damlote emergency tak taka thlawh ngai Kolkata han tlawh kawi leh ngai ang chi te hetianga direct flight an kal mai tur te hi a lawmawm tak zet a ni tih kha ka sawi ve leh duh a ni.

Tin, Demand No. 1-ah hian Legislative Assembly tih kha hei ka bula thu MLA zahawm tak Pu R.Vanlalvena'n a rawn sawi tawh ang khan, motor indaihlohna tih kha nia, kan zin chhuak fo a, Assembly Committee hrang hrangah kan awm ve a, chungah chuan official te motor tha lo thin lutuk hi a veiawm kan ti a, kan lo sawiho thin a. Tin, chumi bakah chuan Ambulance hi a chhe reng mai a, hei hi tih dan a awm lawm

ni. A nih loh chuan a thar lei belh dan te hi a awm em tih kha ka rawn rawt tel ve duh bawk a ni.

Tin, staff te kha a rawn fak a, kha kha kei pawh ka rawn sawi tum a ni a. Official-te hi an hna hi an expert em em mai a, thil hi an hre em em mai a, department hrang hrang hna hi an expert em em mai te leh zo tak leh tlin taka an hna an thawkte hi an fakawm tih kha ka rawn sawi lang ve duh a ni.

Demand no. 39-na power chungchangah khan kan hre vek a, tute emaw chuan Congress sorkar-Mombati sorkar min ti thin a ni. Mombati sorkar tih a nihna chhan chu Zoram mipuiten kan hria a, Tuirial Hydel Project kan tih riral dan zawng zawngte kan hria a. Chumi a nih rual chuan Congress an rawn sorkar leh kum 2008 ah khan bul an rawn tan leh a, tunah reilotea power kan neih tur hi kan nghakhlel em em a ni Zoram mipuite chuanin. Chuvangchuan, mombati sorkara min siamtute pawh hi tun ang hunah hian an inehhir ve ka ring rum rum thin a ni. Sorkar chak tak kan Chief Minister zahawm tak kaihhruaina hnuaiah hetiangah power ngai pawimawh hotu kan nei hi Mizoram mipuite hi kan vannei hle a ni tih ka'n sawilang ve duh a.

Demand no.-45 na PWD chungchang kha sawi ila. Kan Chief Minister zahawm tak leh a thawhpuite hnenah hian lawmthu sawi kan ba nasa em em a. Kan bial intawm Hrangturzo-ah khian hna tam tak min thawh sak a, PWD ah hian, a vai chuan sawisen a ni lova, hun pawhin a daih lova, a chungah hian lawmthu ka sawi duh a. Nakinah MLA zahawm tak bial thenawm Pu John Siamkunga pawh hian lawmthu sawi tur a rawn ngah vein ka ring a, a chungah hian lawmthu ka'n sawi nawn leh bawk a ni.

Tin, Pu R.Vanlalvena, MLA zahawm takin a rawn sawi tawh a, Kaladan chungchang te, Kaladan Multi Modal Transit Transport Project te, Mizoram PWD in an hnathawh tur te tlin takin an thawk a, a sawi ang khan chhun leh zan pawh sawi lovin an thawk a ni. A hmunah kalin Estimates Committee ten kan va en a, kan va kal a, a

phurawm em em a ni. Zoram nghahfak kan tih tawh kha, chu chu hre rengin department te hian thahnemngai takin an thawk a, chhun leh zan zawmin electric eng hnuaiah pawh an hna an chawl lo tih hi Zoram mipuite hian he House kaltlang hian an thawhrim zia hi lo hre ve se tih kha kan sawilang ve duh a. Fak an phu hle bawkin ka hria.

Tin, thenkhat chu lei a chim te, kawng a chhiat te, lei a min tea lawm em em pawl hi kan awm a, mahse i dinglama thu te hi chu tiang hi kan ni ve lova. Pu Deputy Speaker, lei a chimte hian a pawl kan ti ngawih ngawih a ni, kan hotuten a rangthei ang bera thawm that hna hi an thawk thin a ni. Chumi a nih rual chuan rang takin hna hi thawh theih a ni mai thin lova, chumi hna rang takin thawh theih a nih loh rualin, khulalah Airport kawng lei chim pawh kan hria a, Airport kawng lei an chim a, mipuite kan mangang a ni. Airport a kal turte leh khulam khawthlang lam ten an mamawhna leh an harsatna hriain kan PWD changtu Minister zahawm tak leh a thawhpui ten rang takin hma an la a. Tun hmaa sap hoin kawng an lo neih thin Lengpui kawngte an rawn thawm tha a, an rit fai a, tiang chuan short cut an rawn siam a ni, Airport leh khawthlang lam kal tur tan. Khatiang khan harsa takin hna an rawn thawk a, hemi te avang hian he department hi an fakawm hle bawkin ka hria a.

Tin, mipui hi kan phun hma ve reng reng ka ti bawk a. Kawng chungchangah hian hei kan opposition leader zahawm tak hi a hrechiantu a nih ka ring a, Delhi khawpui berah pawh hian link road leh a khawi emaw lai tih loh hi chu chhe tak tak, kawng tha tak lo awm se, a hnung lawkah chuan kawng chhe tak a awm a ni. Kan phun hma ve thin bawk a, theih ni se chuan kan hotute hian heng kawng zawng zawng kawng hi siamthat vek an duh a ni. Chutiang chuan India ram khawpui berah pawh kawng zawng zawng hi a tha bik lo a ni tih te pawh kan hriat tlan a tulin ka hria a. Chumi a nih rual chuan tunlainn hei Aizawl khawpuiah kan hria a, main road mai bakah veng kilkhawra motor luh theihna kawng chu chhun zan zawmin an thawk a, an black top bawk a. Hetianga working season-a theihtawpa an thawkte hi a department leh a changtu Minister zahawm tak, kan Chief Minister te hi an fakawm hle a ni. Sawi tur tam

tak awm mahse Pu Deputy Speaker, kan Minister zahawm tak tak te demand pahnih hi ka rawn thlawp a, pass ngei a nih theih nan ka rawn support e. Ka lawm e.

DEPUTY SPEAKER : A lawmawm e, tunge sawi ve leh ang. Kan duh tawk deuh mai em ni? Support lam vek a nia, aw Er. Lalrinawma

Er.LALRINAWMA : Pu Deputy Speaker, ka lawm e. vawiinah hian demand pahnih kan Minister zahawm tak Pu B.D.Chakma leh kan House Leader zahawm tak demand sawi tur a ni a.

A hmasa in demand no. 35-na Fishery Department ah hian bul ka'n tan phawt mai ang a, Fishery Department hian, sangha chi te an han sem a a lawmawm a. Governor speech-ah pawh a thar tam zia te pawh kan hria a. Amaherawhchu, he department hi fimkhur kan va ngai em ve aw ka ti a, thil hriatchian loh hi kan ngah deuh em ka ti a. Vawiinah hian unstarred question kha kan dawng vekin ka ring a, khata unstarred question no. 87-naah khan tihian a rawn ti a, NLUP leh RKVY sangha chi te hi (50-70mm leh 100mm size) pakhat man engzat nge a nih a, SPAB, DPAB-in engtikahnge a rate hi a approve tih kha ka rawn zawt a. NLUP sangha chi 80 to 100mm size rate chu district zawng zawngah ₹1 per no a ni. SPAB meeting 10.3. 2015-ah approved ani tiin min chhang a. Amaerawhchu hei hi SPAB meeting in ni 10.3.2015-a approve rate chu a ni. Tah chuan ₹1 hi a engber hi nge min rawn chhan tih pawh hi hriat thiam hleihtheih pawh a ni lova. Dt.10.3.2015-a he Committee thukhawm in section no. 4-na a sangha chi a sawiho hi Indian common carp te, Indian major carp te, common carp te, silver carp te, grass carp te a ni. District wise in rate hrang hrang a awm a, an rawn chhanna ah hian a eng ber rate nge tih pawh chu min hrih si lova. Taihmak lehzual pawh hi a va tha em aw tih kha ka'n ngaihtuah a. House zahawm tak-ah hian zawhna te kan han in zawt a.

Tin, a dawt leh atan chuan paddy cure fish culture atan sangha chi man chu ₹4.40 a ni e. NLUP Input Purchase Board meeting-ah 10.10.2004 ah approve a ni e, a rawn ti leh bawk a. Committee meeting minute hi a awm a tah hian. Heta a rate pawh hi common carp fingerlings chu Serchhip district leh Champhai district-ah chauh ₹4.40 hman tur a ti a ni. Hetah hian Zoram pumpui atan a rawn ziaik leh bawk a. Chuvang chuan department in emaw, District level atang emaw in hetiang zawhna chhan turte hi chu fimkhur taka kan inhrilh hriat a va tul em tih kha ka'n sawi duh a.

Pu Dy. Speaker, chubakah Fisheries Department hi a fimkhur a ngai ka'n tih em em na lai chu sangha chi supply chungchangah hian kan hre tawh maithei a, kan hre lo maithei bawk a. Sangha chi hi NLUP hnuaiyah paddy cum fish culture atan supply a ni a. Tahchuan, Mizoram Fish Seed Farm hian sangha chi common carp nuai sawm pali leh singruk sang khat, cheng nuai sawmruk pali leh singthum man angin a kal a. Tin, helai pakhat zawkah hian ₹57,20,000/- man, a chi zat chu nuai 13 a ni a. Chutih lai karah chuan hetah hian a rate hi ₹4.40 hman a ni. Ama'rawhchu, nichina kan sawi ang khan SPAB meeting ah khan district hrang hrang rate tur hi siam vek a ni a. Chumi ang chuan a District azirin a rate hrang hrang kha pek a ni a ni.

Ama'rawhchu, heng district te hian SPAB-in rate a lo siam tawh ang hi hmang ta ila chuan cheng 1,21,50,000 kan sen hi ₹32,79,000/- velin kan zo thei a ni. Ama'rawhchu, ₹4.40 hi Serchhip leh Champhai chauh rate tur ni a a lan laiin Mizoram pumpui ah SPAB meeting-a kan rate neih tawh sa hmang lo va, he rate sang hi kan hman avangin, mipui pawisa, NLUP pawisa, Annual Plan ami ₹88,71,000/- hi vawiin ah hian a lo thlawnin, awmze nei lo in kan thehthang a ni. Hei hi chu rawn sawifiah se ka duh khawp mai. A chhan chu vawiin ah pawh loh theih loh in mipui atangin chhiah kan la a, sorkar sum a harsa tih pawh kan hre vek a ni. Ama'rawhchu, hetiang a rate diklo zawk hmanga pawisa hetiang a kan ti hi chu a fel lo ka ti a. Tin, engatinge NLUP pawh hian heti em em a ₹4.40 hmang se an tih tih lai hi a mak ka ti a. Tah hian lehkha pakhat a rawn kal leh zel a ni. Chu lehkhaah chuan Pu Dy. Speaker, i phalna-in ka'n chhiar ang e.

‘Two firms namely Mizoram Fish Production Centre Chemphai, Bilkhawthlir and Mizo Fishseed Firm, Chemphai Bilkhawthlir recommended by SPAB, dated 10-10-2014 should supply the fish seed,’ a ti ta a. Tichuan hetah hian a rate pawh ₹4.4 hmang tur hian a rawn ti nghal a ni. Hei a chungah hian “by NLUP Implementing Board for supply of common carb fish seeds for the district of Mizoram with an approve rate i.e ₹4.4 per common carp fish seed’ tiin a rawn ziak talh a ni. Hei hi NLUP Implementing Board atanga Director, Fisheries Department-a lehkhah kal kha sangha chi supply Rs.4.40 a an supply-na tur an hriattirna lehkhah kha ka chhiar a ni Pu Dy. Speaker. Ka sawi duh lai zawk chu mipui pawisa kan ren a ngai a ni. Hetianga rate dik loa kan ti hi thil fel lo tak a ni tih hi vawiin ah hian ka’n sawi duh a. Chuvang chuan, kan Minister zahawm tak pawh hi a rawn sawifiah ka phut tlat a ni tih hi vawiin ah hian House-ah hian ka sawi duh a ni.

Tin, a dawt leh atan chuan PWD chungchang hi ka’n sawi leh duh a. Kan bial chhungah hna hrang hrang kan thawk a. A constituency ang pheih chuan on-going tamna ber hi a ni mai awm mang e aw ka ti a, a lawmawm pawh ka ti a. Chutih rual chuan problem eng eng emaw pawh a awm a, harsatna neuh neuh te kan nei a. Khangah-te khan min hriatthiam chhoh leh a bik takin Chhawrtui-Rullam kawng khi kan mutan rei em em mai a. Khingte pawh khi chak leh zual zawka hma lak a nih zel theih nan ka’n ngen a. Tunah pawh lak reng a ni a. An lak rengna-ah lawmthu kan sawi rualin tun hunah hian fur te a thleng leh mai dawn a ni tih lai kha ka’n sawi duh a.

Tin, a dawt leh atan chuan power chungchangah hian RGGVY hnuaiah kan bial chhungah RGGVY in a commission tawh anga lang si, mahse, transformer te pawh la hman hleihtheih loh, khatiang neuh neuh kha kan nei a. Hei hi a hmingte kha thlak niin ka hria a. Han ennawn a, hna bak la awm ang khi chu min clear sak thei sela mipuite pawh kan lawm hle ang tih ka ring bawk a. Tin, power chungchang ka’n sawi duh lai bik pakhat chu vawiin-ah khan kan Industries Minister zahawm tak khan Meidum-ah khan gas cubic metre 5,52,674 standard cubic feet per day kha hmu chhuak dawn khan a hria a. Khata ka ngaihtuahnaa lo lang ta chu, thermal power plant lam hi kan ngaihtuahna ah

lut se a va tha awm em tih lai hi ka rilru-ah a lo awm a. A hmingin engineer te kan lo ni a, kan rawn haw dawnin, Tripura Rukhya ah hian ka va kal ve a ni. Tahchuan gas thermal power Plant unit 6 lai kha an lo din a. Unit khat khan 8 megawatt zel pe chhuakin, 48 mega watt kha lammual tiat vel saw ni maiin ka hria a, tunhnua ka ngaihtuah let leh hian, chutiangah chuan an lo inbun khawm vek thei mai a. Tin, gas hmang khan boiler ah tuiso siamin, tikhan, steam turbine-ah. Khatiang khan gas hmang khan current chak tak kha a siam theih a ni. Kan kawmthlang Tripura pawhin gas thermal power plant ah hian nasa takin hma a la mek a ni tih kha ka'n sawi duh a. Tin, chungte chu vawiin ah heti zat gas kan hmuhchhuah tur leh nitin heti zat kan lo neih theih dawn chuan vawiin atang hian a project kha buaipui a, tuikhuah hi a that viau rualin, ram a chim chhe nasa bawk si a. Kan duhthlanna hi thliar fel a, hma kan lak leh zual hi a tha mai awm mang e aw tih kha ka rilru ah a awm bawk a ni.

Tin, Bairabi khuah hi kan han sawi thin a. Hmanni Starred Question 125-na, October, 2014-ah khan Bairabi Dam 80 mega watt pechhuak tur tuikhuah lo ni ta se, Pu Dy. Speaker, i phalna in, submerge area, cathment area ah hian sorkar hmun pawimawh a awm em tih kan zawhna-ah khan, submerge area ah hian Hortoki, Meidum tih te, National Highway 3km tih te leh Buichali lei leh thil dang tam tak kha a lo awm a. Meidum phe chu gas te kan la chhuak dawn bawk si a, 80 mega watt pe chhuak tur anga kan tih dawn chuan a chim vek dawn hian a lang bawk si a. Chuvangchuan, hengte pawh hi Bairabi-a lungleng hi kan tam angreng khawp mai a. Fiamthu-in kan bial-ah khan 'i chakna kha a tlem chhan chu Bairabi tuikhuah lam sawi lovin, gas ringawt i sawi a,' min ti pawl hi an awm a ni.

Chuvangin, khalai mi lunglenna kha tihchhiat kan hlau deuh nge ni? Thudik hi inhrilh Chiang Ila, kan khuah theih dawn loh chuan tum tawh lo law law mai Ila. A chim chhiat tur a tam bawk si a. A compensation vel hi a hautakin rehabilitation resettlement te hi a senso thlak ngawtin ka ring a. Tin, a submerge area hrim hrimah pawh khuan tunah hian on-going project te pawh hi a awm nual ka ring deuh a ni. Pu Dy.

Speaker, khalai kha ka'n sawi duh a. Chuvangin vawiin ah tuikhuah a tha e, ama'rawhchu, a hautak si. Chuvangin, gas kan hma lawkah nasa taka lakchhuah tur a awm lai hian thermal power plant hi ka'n sawi vul duh a ni.

Tin, a dawt leh atan chuan ka hma-a MLA zahawm tak Pu Vena sawi, Mizoram Urban Area Rent Control Act tih khan keipawh ka lung hi a ti leng khawp a. Hmanni-ah Law & Judicial Demand sawi ni khan ka sawi tawh a. Min rawn chhan ka rin tehreng nen, tawngkam khat mah khan min chhang lova, min vailiam sak daih mai a. Nichinah khan MLA zahawm tak khan a rawn sawi nawn leh a, a lawmawm ka ti a. Keipawhin ka han chhuichianna atang chuan kum 1998-ah (MLCP Act Rules kan han siam peih hma tehreng nen) Law & Judicial rules siam turin GAD-ah an thawn pheiniin a lang a, mahse lipui-a thlak ang vang vang a ni. Kum 2016 March thla a lo thlen pawh hian peih a la ni ta chuang lova, a nghawng tur Aizawl-ah kei ngei pawh hi a dik tak chuan mahni in leh loa la khawsa tehchiam ka ni lova, in luah man pawh hi ka chawi chuang lova.

Amaherawhchu, chutih rual rual chuan luah man chawi hi kan tam khawp mai. Chuvangin he dan hian chiangkuang takin standard rent siam tur a ti a, fair rent siam tur a ti bawk a. Vawiinah chuan standard rent pawh a awm lova, fair rent pawh a awm lova, a neitu remtihnain kan inluah zel mai chu a ni a.

Ka hmaa member zahawm tak sawi ang khan thawh fuh loh deuh chang pheichuan, 'kan fa ten in an luah ve dawn tawh a nang zawng lo chhuak rih mai teh,' min tih chuan bungraw tela chhuak mai tur kan ni mai a. Chuvangin vawiinah hian urban area tam tak a awm tawh a. Aizawl lo pawh hmun dang dangah, district capital hmun hrang hrangah pawh in luah hi control a ni lova.

Amaherawhchu, kan hotu kal hmasa ten thahnemngai takin khawpui chhunga in luah man thunun a ngai a ni, awmze nei zawka kalpui a ngai a ni tih hi an

lo hre em em mai a. Thahnemngai taka kan hotu kal hmasa ten Dan an lo siam tawh, vawiina lipuia thlak ang maia la reh vang vang mai hi chu, mirethei kan VIP alawm kan ti ta sa sa baw a, hengte pawh hi tihlan na tur remchang a ni a. Amaherawhchu, in lo ti thei ta lo a nih leh hei kan sorkar tep tawh a, kum hnih mai a ni tawh a, tahchuan keinin kan han chhu chat mai ang a, mipui hian min Amen dur durin ka ring a. Hotu sangah kan han thlen ang a, in lo ti ta lo a nih pawhin keini tan chuan hmabak tha deuh min lo siam turah ka'n ngai deuh a. Chuvangin Pu Deputy Speaker, hei hi thahnemngai takin tihhlawhtlin kan duh a ni tih vawinah hian ka'n sawi duh a ni. Engpawhnise kha kha ka sawi theih tawh ni mai rawh se. Ka lawm e.

DEPUTY SPEAKER : Tunge han sawi leh ang, hei minute 10 a la awm a? Aw, in laklawh viau chuan darkhat pawh kan pel mai ang a, House-in rem a tih chuan, mi pakhat tan chuan sawina hun a la awm a ni. Tunge sawi ang le, aw Pu K.Lalrinthanga.

Pu K.LALRINTHANGA : Pu Deputy Speaker, vawiina kan Chief Minister leh kan Minister dangte demand sawiho ah hian ka sawi hmasak ber duh chu Fisheries Department hi a ni a. Tunah chuan sangha chaw herna khawl bun a lo ni tan ta a. Bilkhawthlir-ah pawh a in te sa in khawlte bunin kumthar mai ah hian her tan a ni dawn a ni tih Minister-in min hriattir a, lawmawm ka ti hle a. Hemi atang hian sangha khawi lamah hmasawna kawng hrang hrangin kan nei thei dawn niin ka hria a. District hrang hrangah khatiang kha buatsaih a ni a. Chuvang chuan Mizo sangha duh tak (kan lui ah te sangha a tam tawh lova) hovin kan ei tur kha a lo tam chho dawn ta niin a hriat a, lawmawm ka ti hle a, chuvang chuan ka han sawi duh a ni.

Chutihruah chuan kan sangha khawi tuikhuah kan han sah a, bazara zawrh tura kan sangha zuar tuten an buatsaih dan hi a fel tawh lo hlein ka hria a. Nizan angah khan tuikhuah atangin kalkawngah Inrinni zinga zawrh tur te, bazar ni a zawrh tur ten Aizawl tlangah te emaw, hmun dangah te emaw an rawn phur chhuak a, zing dar 7/8 tih velah va lei dawn hian a dul hi a nem duai tawh thin mai a. Chu chuan a man hi

a titlawm vein ka hria a, a tuina pawh a ti hniam a. Chuvangin a sawngbawl dan hi Chiangkuang deuhva kan siam a tha in ka hria a. Hmun hrang hrangah sangha khawina hmun (Sangha dil awmna hmun) velah hian vur siamna khawl hi kan la inphuhruk tawk lo niin ka hria, vur kan nei tha tawk lo. Tin, a phurhna tur pawh hi refrigerated van ang chi hi nei thei ta ila, chu chuan phur ta sela. Bazar hmun thlennaah khan tharlam takin a thleng ang a tichuan kan sangha lei te pawh tui deuh hlekin a ei theihin a rinawm a, chu chu ka han sawi duh a.

Tin, sangha chi chungchangah hian 2009 lai vel khan complain a awm avangin an sangha chi sem ka en tawh a. An semna apiangah ka um zel a. Chuta thil paw deuh mai chu an han teh hian bel atanga puan awng deuh hleka han lak chhuah hian tuia chiah deuh hleka no-a a an va suah chuan tui an suak tel teuh a. Chutichuan no a sangha awm zat an chhiar ang aia tlem daih kha an suak chhuak ta thin a. A tehkhawng no khatah chuti zat chu a awm tiin han chhiar han chhiar mahse tui an suah tel teuh chuan a dawngtu tur khan a dawng tlem ta a. Chuvangin a dawn tur ang zat kha supplier hnen atangin a dawng ta lo thin a ni. Supplier in a pek lai khan Department-in uluk taka a en a, tui atangin a kang ngei a ni tih chian hnu ah chauh tui atangin suak ta sela, a dawngtu turin tha takin a dawng thei ang, a dawn tur ang zat a dawng thei ang tih kha ka han tarlang duh a.

Tin, a len zawngah hian te lutuk hi supply lo turin ruahmanna siam ni ta sela. Fingerling han tih ringawtah khan a then chu a rawn kengtute hian a te deuh hlekte an rawn keng a, lo teh sak deuhhlekk hi a thain ka hria a. Tum khat ka ennaah chuan a te lutuk deuhhlekk a, 'A dawngtu tur te khan in pawm em? Association kha inngaihtuah Chiang rawh u,' an ti a, anni pawh khan an iai a. Amaherawhchu, supplier khan 'sorkar ruahman aia tam deuhhlekk ka pe mai ang, ka rawn keng tawh laklawh si a' a ti a. Chutichuan an dawn tur aia tam deuh hlekk khan an dawn tir ta a. Chutiang deuh chuan monitor deuh hlekk a ngai a, chutiang chuan hma lak nise a thain ka hria a.

SAD demand no. 11-ah hian ka sawi duh chu Secretariat main gate atanga Aizawl West lampang Tuikual phei chhukthlakna kawng khu a chep lutuk a, insut palh pawh a hlauhawm. Truck 407 tih vel te, eng eng emaw truck lian deuh te an kal ve fo a, truck rawn kal saw khap ni se thain ka hria a. Chutih rual chuan motor park a tam ve si a, motor inpel hleithe lovin a awm thin a. Kalkawng saw tih len a ngaiin ka hria a. Khatla lampanga chhohna tur chu sorkarin a tilian vek tawh a, a lawmawm a, thlang lampang khu tih len a ngaiin ka hria a. Nakinah chuan department hrang hrangin building an sak chuan kawt velah motor din tir te a ngai leh ang a. Aizawl West lampang hi mipui awm belhna, kan thanna anih deuh avangin helai kalkawng hi a chep hle hmian tih len ni se thain ka hria a. Tin, gate chhak lama lei chhun vum, chhun zawl saw kalkawng a rawn hnaih ta deuh hlek a, motor park te pawh sawn motor tlan hi a dal leh ta deuhhlekk a. Chuvangin sawlai lei chhun pawn saw kiang deuhhlekk sela, saw mi zawl PWD in an hman saw, hman sen loh an hung vak mai a, an hman bak saw chu public parking atan te pawh hman turin ruahman ni se. Kalkawng sira chep deuh deuh a Secretariat tlawhtu ho motor in-park saw a hnawk riau mai a. Chuvangin sawlai saw sizing deuh hlek a ngaiin ka hria a.

DEPUTY SPEAKER : Ngawi rawh lawk, darkhat a ri a ni mai a, hun pek belh lawk ang u aw, kan remti em? Aw, sawi zawm rawh le.

Pu K. LALRINTHANGA : Pu Deputy Speaker, ka lawm ngawt ang, sawi tur ka la nei teuh mai. Demand No. 45 – na PWD ah hian ka sawi duh chu, National Highway Vairengte atanga Phainuam, Saiphai, khitah Saipum khawchhak lam pangah Zohmun tih chho zela an puan thar hi ka rawn tarlang duh a. A hma chuan Vairengte atanga Phainuam inkar khu PMGSY kalkawng a ni a, 2013-a PWD, PMGSY enkawltuten kalkawng metal na tur an zuk dil chhuah tum khan bridge awm ho kalkawng 11 te tan sanction an nei ta lova. Phainuam te pawh bridge a awm avangin sanction an nei ta lova. Khulai khu leilet phei a nih avangin a diak em em a, tunah pawh

a diak chho tan leh tawh a. An kal hlei thei lo a ni. Amaherawhchu, vanneihthlak takin National Highway-in an rawn la ta a. Work programme hi ka han en a, hemi enkawl na tur, a siamthat na tur, khimi Zohmun thleng, khawchhak lampang thlenga kalna tur ruahmanna hi pakhatmah a awm lova. Chuvangin, khulai mite khuan tunah chuan kalkawng tha an la nei rih dawn lo niin a lang a. Chuvang chuan kan department enkawltute hian helam ah hian ngaihtuahna siam nasa deuh hlek se la tha in ka hria a, ka rawn ngen duh a ni.

Tichuan, work programme phok no. 29-naah khan Kolasib District-ah Construction & Repair of Road tihah khan Kolasib leh Bairabi chiah a awm a. PWD in pawisa a neih reng reng hi Kolasib-ah hian an bel deuh vek zel a. Khaw dang Kawnpui te, Vairengte te, Bilkhawthlir-ah te hian pawisa hi an dah ve ngai lo ang tluk deuh thaw a ni. An dah a nih pawhin (za a panga) ang vel lek te, 10%(sawm) te an dah thin a. Kolasib-ah hian an hmangfai vek ringawt zel mai a. Chuvang chuan, khaw dang hian PWD hnathawh hi kan mamawh ve a ni tih hi min hriat sak sela ka duh a. Tun tumah pawh khaw dangah pakhatmah a awm ve lo, Kolasib leh Bairabi-ah chauh a awm. Chuvang chuan, a thik pawh kan thik ve deuh a ni, chu chu ka han tarlang a ni.

Vairengte 2nd lane metal, Congress sorkar hmasak laia metal tawh kha vawikhatmah siamthat nawn loh a ni a. Vawi tam tak PWD EE te hnenah kan sawi a, a changtu Minister te hnenah pawh kan sawi a, a puitute hnenah pawh kan sawi a. Tun thlenga la siam loh khu pawh kan ti hle a. Chu chu min siam sak theih chuan ka lawm hle ang. Upgradation of Silchar to Duurban road, Phaisen, Buhchang atan khuan pawisa nuai 14.57 dah a ni a. A kalkawng khu a thui hle a, nuai 14 hi chuan a siam zo thei dawn lo tih a Chiang a, kumin atana dah a ni a. A pawisa dah zawng zawng a chu tam tak a ni a, mahse kumina siam tur atan chuan pawisa hi a tlem lutuk a, an siam zo thei dawn lo tih hi a Chiang hle in ka hria. Khulai khu Mizoram kan pawisa lakna hnar a ni a, balu a tam em em a. Mizoram chungka kan balu neih that a ni a. Truck lian pui pui a tlan a,

kalkawng tha vak lo a siam a nih chuan kan sum hnar kha kan hmang hlawk teh chiam dawn lo a ni tih a chiang a.

Ka sawi leh lawk duh chu Kolasib atanga Bilkhawthlir inkar kalkawng metal re-surfacing-ah khuan a then lai chu a mam em em a. Nimahsela, a pan deuh a, hmun tam takah khuan 2ft, 3ft bial vel te pilh a awm leh teuh tawh a ni. Khu khu engtia siamthat leh tur nge? Tunhma chuan kalkawng an siamthat chuan kalkawng metal sa tawh te hai khawk in an siam thin a, mahse pakhatmah hai khawk awm lovin a chungah pan tea bel nawn a ni a. Tun dinhmunah chuan a mam nalh em em a. Mahse a thenlai tam tak kha a khawk leh tawh a. Thla hnih khat vel lek siam zawh hlima khuti zat a pilh leh tawh chuan a daih rei lovang tih ka ring a. Chuvangin, a bill siamtute pawhin, security lam atangte pawha tih that leh dan kawngte hi ngaihtuah sela tha in ka hria a.

Sawi tur tam tak te chu nei mah ila ka duh tawk mai ang a. Vawiina kan Chief Minister demand leh Fisheries & Sericulture Minister demand te hi pass tur atan ka rawn thlawp ve a ni e, ka lawm e.

DEPUTY SPEAKER : Awle, tunah chuan kan chawl rih ang a. Dar 2:00-ah kan thukhawm leh dawn nia.

2:00 Pm

DEPUTY SPEAKER : Kan sawihona kan chhunzawm leh ang a. Chawhma lam khan member parukin kan sawi hman a. Tunge han sawi hmasa ang le? Pu JH Rothuama.

Pu J.H. ROTHUAMA : Pu Deputy Speaker, ka lawm e. Vawiina kan sawiho tur hi a pawimawh hlawm khawp mai a, tlem han sawi ve ka duh a. A hmasain kan Chief Minister zahawm tak chanvoah hian tan ka duh a. Champhai-ah kan hriat angin thalai inkhawmpui kan hnung lawkah khan kan nei a, kei chu ka damloh avangin ka kal thei

lova. Kan Chief Minister zahawm tak te nupa an han kal a, a lawmawm ka ti khawp mai a. Chanchinbuah khan sawm lohva kal ang lek lek te khan an rawn sawi a, amaherawhchu a nih loh zia kha tihlan a ni tawh a. Hemi kan inbuatsaihna atan hian a bialtu pahnih Champhai North leh South atang khan engemaw zat thilpek, tanpuina kan pe ve a. Chubakah chuan a pawimawh zual kha kan PWD Minister te, tin, tui lampang an mamawh a, kan PHE Minister te khan theihtawp min chhuahpui leh zual a.

Tin, Champhai han tih mai khan a dawngtu kha Tlamsam te, Zotlang te, Ruantlang te, Zote te, Champhai khawpui te an ni a. Champhai khawpui atanga pan thlakna kha kawng engemawzah a awm a. Chunggho repair-na zawng zawng te chu an theih ang angin, sum awm lo deuh chung pawhin khawilai lai ami emaw pawt khawmin, kan CM department PWD lam atang khan theihtawp min chhuahpui a, mualpho lovin a kawng, a panna te leh engkim kha fel taka zawh niin ka hria a. Tin, tui lampang pawh kan harsatna zawng zawngah te khan PHE lam te tan lakna atangin theihtawp chhuahin khatihlai khan tui nghei leh eng awm loh an sawi lova, thil lawmawm tak a ni a.

Tin, ka'n sawi kai duh chu tunah hian Kelkang khi mipuiin kan pan luai luai lem tawh lo naa engmaw chenah chuan a hmun khi hmun pawimawh takah kan hmang reng dawn niin a lang a. Nikum te ang chuan kan kal vut vut tawh lo a ni. Amaherawhchu, PHE Department hian kan Chief Minister te nen tangrualin a vengthlang atang khian tui pump chhuah turin tunah khian an buatsaih a. A kawng te kan lai a, a kawng an laih bakah culvert leh eng ilo siam tur tam tak khilaiah khian a awm a . Chungte pawh chu an siam fel tawh niin ka hria a. Chutiang chuan hma nasa takin an la a. Khilai khaw tan pawh khian chhenfak tham tui mipui han pungkawm leh deuh pawh ni ila tangkai tham kha an ti chhuak dawn niin ka hria a, a lawmawm ka ti khawp mai a. Tin, kawng mai ni lovin eng thlengin Electric Department lamin tlachham lovin min pe te kha a lawmawm em em a. A bialtu ka nihna angin lawmthu ka han sawi ve leh a ni e.

Tin, chubakah chuan Mizorama kan field lian ber tur khian Zotlang khaw bulah field lianpui mai kan Sports Minister te, kan CM te thahnemngaihna avangin din a ni a, an zo tep tawh a. Khi khi chu public inkhelh theihna tur a ni lo kan tih kha, AR lammual ang deuh hian humhalha eng eng emaw ,sports mi te leh khatiang kalkhawmin an hman tur, an practice-na hmun tur kha a ni a. Chubakah chuan field dang tunah khian Zotlang-ah te pawh lei a ni a. Chungte pawh chu tunah hian umzui zel a ni a. Kan hotute, kan Minister te thahnemngaihna azarah henge pawh hi tihpuitlin ngei kan tum a. Tin, Champhai khawpui khian Chhangphut field-ah an inkhelh theih loh avang khian inkhelhna mai tur an nei lova. Tunah hian Jail Vengah khian field kan buatsaih mek a, chu chu engemaw zat sengin MLA fund atangin kan lai tawh a. Khingte pawh khi a puitlin zel theihna tura hmabak la awm khi kan hotuten min hriatpui ka'n duh a, ka'n sawi lang tel duh bawk a.

Tin, NLUP chungchang hi kan sawi thin a, a tha a. Amaherawhchu, NLUP hi a office-a thu zawng zawng te, kan hotupa ber Chief Minister atangin, ani hi Apex Board-ah Chairman a ni a, kei Vice-Chairman ka ni a, NLUP Implementing Board-ah Chairman ka ni thung a, khatiang khan kan keng a. Department hrang hrang hnena pawisa kan dah hi kan pe kim vek tawh zawk a, chung chu department-in an enkawl hnuaiah a scheme kal leh a mihring kan va thlanah te khan an sem mai tawh a ni a. Khang kha kan hriatpui zui lova.

Tin, Board-in thil an ngaihtuah leh eng ilovah hian Chief Secretary hova Board nei kan ni a. Chmi hnuaiah te pawh chuan Board dang a la awm zel a, khang khan mahni hmun theuhah pawisa sanction leh engilo kha chu a tul ang kha khawih a ni tih min hriatpui kan duh a. Keini lam atang chuan a pawisa leh eng ilo hi kan khawih lem lo a ni tih pawh min lo hriatpui ula ka duh a.

Tin, Zokhawthar panna kawng khi lianpui maiin an lai a. Khilai khi a diak thei khawp mai a, kal te pawh a huphurhawm a, an la lai tlang lo deuh a. Thahnemngaia

theihtawp chhuah lehzuala khi khi chak zawka kan laih tlang theihna turin hma min lakpui vat sela kan duh a, ka'n ngen nghal bawk a. Tin, chubakah khilai kawng khi lo lian ringawt pawh ni sela Seling atanga Champhai thleng khi a len leh si loh chuan khilaia a tawpa Burma nena inkalpawhna laia kawng lianpui lo awm ringawt kha a tawkw dawn lova. Seling atanga laih chhoh tura pawh hi chak lehzuala (khaw chhak lam panna kawng khi sumdawna pawimawh a lo ni bawkw nen) min laihsak turin ka'n ngen duh a.

Tin, Champhai leilet zawlah khian Tuipui lei tawite mai hi a awm a.

Amaherawhchu, a lei khi a hlui tawh khawp mai a, motor lian pui pui, tunlaia ke tam tak nei ang chi te pawh hian an zawh ve mai a, a chim thu chu kan la hre lo na a, khi khi repair a ngaih hmel tawh khawp mai a. A lei khi a hlui tawh a, a nghet tawkw lovang tih pawh khi a hlauhawm a, lei te tak te a ni a. Khi khi min ngaih pawimawh sak turin ka'n ngen nghal duh bawkw a.

Tin, Minor Irrigation-ah hian Champhai te, leilet awmna te hi chu ngaih pawimawh an ni a, an ngai pawimawh a, theihtawp an chhuah thin a. Tunah pawh hian hmabak engemawzat a la awm a. Khingte khi min ngaih pawimawh sak a leilet tam zawka buh kan thar theihna turin a tlangram deuh te pawh khi tui kan lak theihna tura Minor Irrigation hian theihtawp min rawn chhuahpui turin ka'n ngen nghal duh bawkw a.

Tin, Champhai-ah khian hna chi hrang hrang khawpui cheina tur te leh thil dang dang thawh chhoh ve mek zel a ni a. Khingah pawh khian kan hotute hmalakna hi a lawmawm ka ti a, department hrang hrangin hma min rawn lakpui a, LAD lam atang te pawhin hmanni ah kan sawi tawh a, LAD-a thingtlang lam fund an ti tawp te hi thingtlang lam hian kan ui a, Tin, hemi a laili ho, keini chu border-a awm kan ni a, kan bialte border-ah engemaw zat chu Border Area Development Fund atangin kan la chang thei zawkw a. Chungte chu awm lo phei se chu development a awm lo deuhthaw tluwak a ni dawn a, chungah chuan hengte pawh hi tih leh theih hram ni sela. Kan Chief Minister zahawm tak ho pawh hian engtinngte kan kalpui leh theih ang tih kha min nawrpui sela a

lawmawm khawpin ka ring a. Tin, a tlangpui thu in Champhai kan panna kawng khi, nichina ka sawi tawh ang khan a tha lo khawp mai a, insut palh te a hlauhawm a; tin, Champhai lam atanga lirthei lo kal khi a driver khawchhak lam mi te an ni a. Khawchhak lam leh keini hi kan inpelh dan hi a inang lova, anni chu veilam a nih chuan keini hi dinglam a ni a, chuvangin insut te hi a hlauhawm em em mai bik a. Kawngah khian fimkhur a ngai khawp mai a. Kan tlan ngun a, a kawng a lo hla bawk nen, chuvang chuan, khingte pawh khi khuahkhirh deuh a, tlema a kawngkawi zual lai leh engemaw te pawh khi inhmuh theiha siam a tha khawpin ka hria a. Chungte chu vawiinah hian ka'n sawi ve duh a.

Fisheries Department lamah hian sawi belh duh ka nei bawk a. Nichinah khan sangha no te chungchang thu pawh kan sawi nual a. Sangha chi hi kan duhthusam chuan a lian deuh zawk supply turin kan duh khawp mai a. Tin, a supplier-te pawh hi an han koh thin hian a thlangtu kan ni lem lo na in engemaw chin chu kan zuk hre ve a. Sangha te kan han tih hian te tak te te an rawn telh thin hi a pawh khawp mai a, lian deuh ni thei se tih thu hi chu kan sawi tawh thin a. Tin, chubakah chuan sangha chi supply pawh hi Mizote pawh hian an dil ve thin a ni.

Amaherawhchu, a hmunah kan han entir a, kan han fiahtir a, dil nei lo te an lo ni a. Dil nei lo kha chu khawilai ami emaw lak leh chhawn tur kha a ni. Chuvang chuan, dil nei, sangha chi nei tha kha thlan loh theih loh a nih thin avang a nih ka ring a, a thlangtute pawhin sangha chi supply tu hi Mizote kan thlang lo fo mai thin a ni tih te pawh kan hria a. Hmun tam tak atangin nawrna te pawh a lo kal ve thin a, dilna te pawh a lo kal thin mahse khang zawng zawng kha a fiah nan kan dil leh kan sangha chi kha tihtlak a ni em, Mizorama sem darh tlak a ni em tih kha kan fiah a ngai a. Chung chu ngun taka thlir chungin kan hotute hian hma an la thin niin ka hria a.

Tin, Sericulture Department ah hian tunhma khan silk pangang kan khawina kha a rei tawh mai a, kan pa te ho atang pawhin silk pangang hi an lo vulh ve

tawh a. Amaherawhchu tih leh dan tur kha chu an hre chuang hlei lova, a chi pawh dah that a ni lova, lakluh leh theih pawh a ni lova, khatiang khan an ti ve mai mai a. Tun hnu ah hi chuan kan ram chhungah a chi te pawh dah that theih a lo ni tawh a. Khatiang a lo nih takah kha chuan, kawng engkimah hian Mizoram ah department tin hi kan han sawi chuan eizawna tlak thiau vek a ni a, chuta tan chuan hma kan sawn tak tak theihna tur chuan mipui hi kan taihmak a ngai. Kan tih tawh ah hian kan tih tak tak a ngai a ni.

NLUP te pawh kan han ti a, thlai a lo thar nghal mai lo. Vawiinah NLUP ah hian engzatnge in sem ral tawh, an va thar lo ve tih te pawh zawhna awm a. NLUP hi a thar tur chuan kum4/5 a duh a ni, kan thlai chin te azirin. Chungte chu tunah hian a lo thar dawn mek a, link road te kan mamawh em em a ni tih kha kan sawi tawh a. Chuvang chuan, sericulture lamah pawh hian eizawna tham a awm. Champhai zawlah ngei pawh khian sasua an tih te, pangang chaw atana tha tak tak, pangang tha tak taka vulh theihna, maimawpuana siam pawh kha tha tak tak chhuah theihna tur kan nei a ni. Amaherawhchu, mipuite hian hna leh eizawna ah hian tih tak taka hma kan la lak loh avang in kan ramah hian eizawna awl zawk leh ilo, thatchhe deuh chung pawha ei tawk tawka kan nun theih chuan ti a hmasawn tum lem lo hi kan tam khawp niin a lang a. Chutiang zawng zawng chu kan inzirtir mawlh mawlh a ngai a, NLUP atangin theihtawp kan chhuah a, tunah pawh hian in zirtir chhoh leh mek a ngai 3rd leh 4th te pawh kan han sem chho leh tan a, kan sem chho zel dawn a. Heng zawng zawngah hian a ti hlawhtlingtu kan nih theihna turin kan zaa mahni bial theuhah tan kan lak a ngai a, ka rawn sawm duh che u a ni e. Ka lawm e.

DY. SPEAKER : Tunge sawi veleh ang le? Dr. K.Beichhua.

Dr.K.BEICHHUA : Pu Dy. Speaker, ka lawm e. Ka'n sawi nghal deuh zung zung mai ang a. Demand no.35, Fisheries Department kha han sawi phawt ila. Kan Governor zahawm tak thusawiah khan NLUP beneficiaries chhungkaw 3654 in modern technology fish culture hmangin nuai 1 leh a chanve atanga nuai 2 kha monthly income a

ti a. Chuti a nih chuan, thla khatah hian nuai 738 lai an thar chhuak a ni, kum khatah chuan nuai 87696 kan thar chhuak leh bawk a. Chutiang a nih chuan Fisheries Department hian productivity ah hian an va ti tha em! Lawmman pek tlak hial an ni in ka hria a. Nikum lama kan budget-ah khan 847.40 a ni a, chutiang leka heti zat thawk chhuak thei hi a ropui hle in ka hria a. Hei hi lawm tur nge ni ang a, nge Fisheries Department hi a hnawk lutuk a an tusual nge ni tih rilru te pawh kha ka nei a. Helai hi kan Minister zahawm tak khan House-ah ngei hian min hrilhfiah se tih ka sawi duh a.

Demand no.41-na kha Pu Dy. Speaker, han sawi leh ta ila. Department in NLUP beneficiaries atangin cocoon an leisak vek a, Department in cheng engzat chiah nge cocoon zawrh atang khan sum an laklulh tih kha min hrilhfiah a tha hle in ka hre bawk a. Cocoon an thar chhuah kha nuai 1518,58,052 a ni. District tinah cocoon purchasing centre an nei a, khata tanga lak chhawn sak vek an ni a, kha kha engtin nge ni kan tih ral dan? Cheng engzat chiah nge cocoon atang khan kan hmuh tih kha kan Minister zahawm tak hian min hrilh bawk se a tha in ka hria.

Demand no.47-na, Minor Irrigation Department ah khan ka kal nghal mai ang a, Pu Dy. Speaker. Ei leh bar, agriculturea hlawhtlinna nei tur chuan minor irrigation hi a pawimawh hle a ni tih kan Chiang vek a. Chutihlai chuan, kum engemaw chen kha project nei hleithei lovin kan kal a. Khanglai khan mak ka ti a, NLUP-ah theihtawpin hma kan la a, minor irrigation lam kha kan hlamchhiah leh si kha mak ka ti a ni. Chutihlai chuan, kumin kan budget-ah chuan project 25 lai kan nei tuh te pawh a rawn lang a, a lawmawm ka ti a. Tha taka kan thawh ngei pawh ka beisei a ni.

Demand no.15-na ah khan kal leh ta ila, GAD-ah khan, Pu Dy. Speaker, Kan Chief Minister zahawm tak duhsakna in Latytla Airport Area aerial survey leh ground survey keima hovin kan va nei ta a, engineer-te pawh kan hruai a, a hmunah ngei kan zuk kal a, report an rawn thehlut tawh a, kan engineer-te pawh an lawm khawp a. A runway tur saw km 4 chuang siam theih tur dinhmunah a awm a. Tin, a zau zawng saw

350 m chuang a zau kan nei thei a, engineer-te pawh an lawm viau a. Hei hi kan Chief Minister-in min duhsak a, sawlaih airport kan neih theihna turin hma chak takin min laksak a, chung report te pawh chu kan thehluh vek tawh a, A theih chuan kan Chief Minister zahawm tak hnena ka ngen duh chu, tun aia chak deuh hlek a hma min lak sak theih chuan ka lawm viau ang tih ka sawi duh bawh a ni.ho pawh hian engtinngan kan kalpui leh theih ang tih kha min nawrpui sela a lawmawm khawpin ka ring a. Tin, a tlangpui thuin Champhai kan panna kawng khi, nichina ka sawi tawh ang khan a tha lo khawp mai a, insut palh te a hlauhawm a. Tin, Champhai lam atanga lirthei lo kal khi a driver khawchhak lam mi te an ni a. Khawchhak lam leh keini hi kan inpelh dan a inang lova, anni chu veilam a nih chuan keini hi dinglam a ni a, chuvang chuan, insut te hi a hlauhawm em em mai bik a. Kawngah khian fimkhur a ngai khawp mai a. Kan tlan ngun a, a kawng a lo hla bawh nen, khingte pawh khi khuahkhirh deuh a, tlem a a kawngkawi zual lai leh engemaw te pawh khi inhmuh theiha siam a tha khawpin ka hria a. Chungte chu vawiinah hian ka'n sawi ve duh a.

Fisheries Deptt. lamah hian sawi belh duh ka nei bawh a. Nichinah khan sangha no te chungchang thu pawh kan sawi nual a. Sangha chi hi kan duhthusam chuan a lian deuh zawk supply turin kan duh khawp mai a. Tin, a supplier-te pawh an thlan thin hian a thlangtu kan ni lem lo na in engemaw chin chu kan zuk hre ve a. Sangha te kan han tih hian te tak te te an rawn telh thin hi a pawh khawp mai a, lian deuh ni thei se tih thu hi chu kan sawi tawh thin a. Tin, chubakah chuan sangha chi supply pawh hi Mizote pawh hian an dil ve thin a ni. Amaherawhchu, a hmunah kan han entir a, kan han fiahtir a, dil neilo te an lo ni a. Dil neilo kha chu khawilai ami emaw lak leh chhawn tur kha a ni. Chuvangchuan, dil nei, sangha chi nei tha kha thlan loh theih loh a nih thin avang a nih ka ring a, a thlangtute pawhin sangha chi supply tur hi Mizote kan thlang lo fo mai thin a ni tih te pawh kan hria a.

Hmun tam tak atangin nawrna te pawh a lo kal ve thin a, dilna te pawh a lo kal thin, mahse khang zawng zawng kha a fiah nan kan dil leh kan sangha chi kha tihtlak

a ni em? Mizoram a sem darh tlak a ni em tih kha kan fiah a ngai a. Chung chu ngun taka thlir chungin kan hotute hian hma an la thin ni in ka hria a.

Tin, Sericulture Department-ah hian tunhma khan silk pangang kan khawina kha a rei tawh mai a, kan pa te ho atang pawhin silk pangang hi an lo vulh ve tawh a. Amaherawhchu, tih leh dan tur kha chu an hre chuang hlei lova, a chi pawh dah that a ni lova, lakluh leh theih pawh a ni lova, khatiang khan an ti ve mai mai a. Tunhnu ah hi chuan kan ram chhungah a chi te pawh dah that theih a lo ni tawh a. Khatiang a lo nih takah kha chuan, kawng engkimah hian Mizoram-ah department tin hi kan han zirchian chuan eizawna tlak thiau vek a ni a, chuta tan chuan hma kan sawn tak tak theihna tur chuan mipui hi kan taimak a ngai. Kan tih tawh ah hian kan tih tak tak a ngai a ni.

NLUP te pawh kan han ti a, thlai a lo thar nghal mai lo. Vawiinah hian NLUP-ah hian engzat nge in sem ral tawh, an va thar lo ve tih te pawh zawhna awm a. NLUP hi a thar tur chuan kum 4/5 a duh a ni, kan thlai chin te a zirin. Chungte chu tunah hian a lo thar dawn mek a, link road te kan mamawh em em a ni tih kha kan sawi tawh a. Chuvangchuan, Sericulture lamah pawh hian eizawna tham a awm. Champhai zawlah ngei pawh khian sasua an tih te, pangang chaw atana tha tak tak, pangang tha tak taka vulh theih na, a maimawpuana siam pawh kha tha tak tak chhuah theihna tur kan nei a ni. Amaherawhchu, mipuite hian hna leh eizawna ah hian tih tak taka hma kan la lak loh avang hian kan ramah hian eizawna awl zawk, thatchhe deuh chung pawha ei tawk tawka kan nun theih chuan ti a hmasawn tum lem lo hi kan tam khawp niin a lang a. Chutiang zawnzawng chu kan inzirtir mawlh mawlh a ngai a, NLUP atangin theihtawp kan chhuah a, tunah pawh hian inzirtir chhoh leh mek a ngai, 3rd leh 4th te pawh kan han sem chho leh tan a, kan sem chho zel dawn a. Heng zawnzawngah hian a ti hlawhtlingtu kan nih theihna turin kan zaa mahni bial theuh ah tan kan lak a ngai a, karawn sawm duh che u a ni e. Ka lawm e.

DY. SPEAKER : Tunge sawi veleh ang le? Dr. K.Beichhua.

Dr.K.BEICHHUA : Pu Dy. Speaker, ka lawm e. Ka'n sawi nghal deuh zung zung mai ang a. Demand No.35-Fisheries Deptt.kha han sawi phawt ila. Kan Governor zahawm tak thusawiah khan, NLUP beneficiaries chhungkaw 3654 in modern technology fish culture hmangin nuai 1½ leh a chanve atanga nuai 2 kha monthly income a ti a. Chuti a nih chuan, thla khatah hian nuai 738 lai an thar chhuak a ni, kum khatah chuan nuai 87696 kan thar chhuak leh baw k a.

Chutiang a nih chuan, Fisheries Deptt. hian productivity ah hian an va ti tha em! Lawmman pek tlak hial an ni in ka hria a. Nikum lama kan budget-ah khan 847.40 a ni a, chutiang lek a heti zat thawk chhuak thei hi a ropui hle in ka hria a. Hei hi lawm tur nge ni ang a, nge Fisheries Deptt. hi a hnawk lutuk a an tisual nge ni tih rilru ah ngaihtuahna min neih tir a. Helai hi kan Minister zahawm tak khan House-ah ngei hian min hrilhfiah se tih ka sawi duh a ni.

Demand No.41-na kha Pu Dy. Speaker, han sawi leh ta ila. Cocoon Deptt. in NLUP beneficiaries atangin cocoon an leisak vek a, Deptt.in cheng engzat chiah nge ni cocoon zawrh atang khan sum an lakluh tih min hrilhfiah a tha hle in ka hre baw k a. Cocoon an thar chhuah kha nuai 1518,58,052 a ni. District tinah cocoon purchasing centre an nei a, chu ta tanga lak chhawn sak vek an ni a, kha kha engtin nge kan tih ral dan. Cheng engzat chiah nge cocoon atang khan kan hmuh tih kan Minister zahawm tak hian min hrilh baw k se a tha in ka hria.

Tin, Demand No.47-na, Minor Irrigation Department ah khan ka kal nghal mai ang a, Pu Dy. Speaker. Ei leh bar, agriculture a hlawhtlinna nei tur chuan minor irrigation hi a pawimawh hle a ni tih kan Chiang vek a. Chutihlai chuan, kum engemaw chen kha project nei hleithei lovin kan kal a. Khanglai khan mak ka ti a, NLUP-ah theihtawpin hma kan la a, minor irrigation lam kha kan hlamchhiah leh si mak ka ti a

ni.Chutihlai chuan, kumin kan budget-ah chuan project 25 lai kan nei tih te pawh a rawn lang a, a lawmawm ka ti a. Tha tak a kan thawh ngei pawh ka beisei a ni.

Demand no.15-na GAD ah khan kal leh ta ila, Pu Dy. Speaker. Kan Chief Minister zahawm tak duhsakna in Latytla airport area aerial survey leh ground survey keima hovin kan va nei ta a, engineer-te pawh kan hruai a, a hmunah ngei kan zuk kal a, report an rawn thehlut tawh a, kan engineer-te pawh an lawm khawp a. A runway tur saw km 4 chuang siam theih tur dinhmunah a awm a. Tin, a zau zawng saw 350 metre chuanga zau kan nei thei a, engineer-te pawh in tha an ti hle a ni. Hei hi kan Chief Minister-in min duhsak a, sawlaih airport kan neih theihna turin hma chak takin min laksak a, chung report zawng zawng pawh chu kan thehlut vek tawh a. A theih chuan kan Chief Minister zahawm tak hnena ka ngen duh chu, tun aia chak deuh hlek a hma min lak sak theih chuan ka lawm viau ang tih ka sawi duh bawk a ni.

Pu Deputy Speaker, tunah khian Saiha DC office khi, (ka sawi deuh zauh zauh tawh a, mak ka ti a) Pathian zarah hotute duhsak na in hruaitu hlun, Cabinet Minister-te, Speaker-te, MP-te hial kan lo nei tawh thin a. Kan DC office khi hmanni Governor a va kal pawh khan a thawktu te chuan. Governor inthiarna tlak pawh ni mang lo khan an sawi a. Chu chu tunah hian concept paper kan rawn thehlut a, kan Chief Minister zahawm tak hian min approve sak tawh a, hei pawh hi a rang lama hma min lak sak theih beiseina sang tak kan nei a, Saiha mipui kan lawmin, beiseina sang tak kan nei a ni tih Pu Deputy Speaker, ka sawi duh a ni.

Demand no.45-na PWD-ah khan kal leh ta mai ila. Pathian leh mipuite zarah kum 2 rorelna sang takah kan lo thu ve ta a, ka bengchhen ve berna leh nghal nih pawh ka hlawnah ni a ka hriat chu kalkawng leh leihlawn chungchangah hian ni in ka hria a, a sawi tam pawh min ti ngei ang. Kalkawng leh leilawnah hian sawrkar pawh hian tun aia chak zawka hma kan lak hi chu a tul mang e aw tih hi ka ngaihdan a la ni fo a ni. Chutih lai chuan, kan Chief Minister leh Higher & Technical Minister te hian tuna kan

Polytechnic ram, a sakna tur chungchangah khian theihtawpin hma min lak sak a. Tunah khian Polytechnic sa thei turin work order pawh a chhuak tawh a, an chungah lawmthu ka sawi bawka ni.

Chumi piah lamah chuan, tuna kan kawng dinhmun erawh hi chu ka ngaihtuah a. Vanduaithlak takin, hei ruah a sur leh tan ta mai a, vawiin pawh khua a dur leh viau a, fur a tla leh mai dawnin a lang a, fur-ah hna kan thawk thei mang bawka si lova, thal a rei si lova. Chuvang chuan, khaw awmdan pawh hianin tun sawrkar hi a duhsak lo ta nge maw ni tih te pawh min ngaihtuhtir rum rum a ni. Kan leihlawn dinhmun te ka ngaihtuahin, nikum lama ka resolution sawiho laia tawngkam pakhat kha ka bengah hian a la cham reng mai a, 'Leilawn hei aia tha zawk nei tur chuan air-condition kan vuah ngawt mai loh chuan,' tih kha. Kha tawngkam kha tunah hian ka rilruah a cham reng mai a ni. Chuvangin, tuna kan leihlawn dinhmun ang chi te, kan Chief Minister zahawm tak khan hmanni zawhna ah khan min hrilhfiah Chiang viauin ka hria a. Hengte hi engtingge tun aia chak zawka hma kan lak ang? Kan hotute hi chuan ngaihtuahna an neih ngei chu ka ring a ni.

Tin, kan kalkawngte pawh hi, hei fur a rawn tla leh mai dawn a, thingtlang lam leh khaw kilkhawr deuh tan chuan harsatna namenlo kan tawka leh dawn a ni tih hi a Chiang a. Hengah hian tun aia chak deuh zawka kan Chief Minister zahawm tak hian hma min lak sak hi a tul hle in ka hria a, ka ngen bawka ni.

Tin, Pu Deputy Speaker, demand No. 27-na District Council Affairs hi sawi ta ila. Pu Deputy Speaker, Autonomous District Council chanchin han sawi hi chuan, a nihna dik takah chuan mahni mawng hlim te pawh kan ang a, kan nihna lai te pawh a awm a. Mahse, kan hmuh leh kan hriatte hi rilruah a awm tlat si, thil dik lo kan sawi chhuah lohva thup reng hian mahni inthiam lohna min neih tir a, sual a ni zawk hian ka hria a. Tuna kan District Council dinhmun chu a changtu kan Chief Minister zahawm

tak hian a hriatchian viau ka ring a. Tuna kan dinhmun hi tun aia strict deuh hleka min enkawl hi chu a va han tul dawn em tih ngaihtuahna lian tak ka nei a ni.

A bik takin Mara Autonomous District Council khi han thlir ta ila, tuna kan kal dan khi kan CEM atanga kan EM tam tak, an vai chuan an ni kher lovang a, fel tak tak te pawh an awm a. Chungah chuan kan hnathawh dan hrim hrim, heng sorkar atanga sum rawn kal leh kan administration kenkawh dan en khian a fatu dan khi kan thiam ta lutuk zawk nge ni! Kan fatu a, a kawchhung tui lai lai mahni in kan chang vek a, a ti tha tha mahni in kan chang vek a, mipui chan tur hi kan dah mang tlat lo a ni. Tin, plan leh non-plan anga sum kan hmuhte pawh kha 95%-96% vel a ni ang, chutiang chu hlawh ah kan kal tir a. A bak office maintain-na tur leh office enkawl na tur lo ni ta se, mipui chan tur khi kan nei lo reng reng a ni. Chuvang chuan, khilai khi min enchain sak a tha hle in ka hria.

Tin, kan CEM zahawm tak mai in VIP car nena ama contract a vil a vil te hi chu, khawvelah hian thil zahthlak a ni in ka hria a. Chumi piah lamah, District Council engineer-te hmangin, dumka labourer-te hmangin (DEPUTY SPEAKER : Ngawi rawh aw, khalai kha chu House-a insawifiah ve thei lo, a mimal kha, House-ah sawi phal a ni lo. A chhan chu a insawifiah ve thei lo a.) A mimal anga a theih loh chuan Pu Deputy Speaker, min lo hrethiam la, rorelna lamah ka'n sawi ang e. Chutiang dinhmunah chuan an rorelna khi a kal a ni. Chung avang chuan, khinglaite khi kan CM zahawm tak hian amah timualphotu a ni tih hi amah hian a hrechiang viauin ka ring a, tun aia strict lehzuala min enkawl sak a pawimawh hle in ka hria a ni.

Heng BADP kan tih te, Centrally Sponsored Scheme hrang hrang leh BRGF-te pawh hi a hmanna tur dik takah hian hmang ta ila chuan khi lai ram te tak te ah khian visible asset kan nei ngei ngei ang. Chutih rual chuan, tam tak hi chuan JCB nen he sum lo haw hi kan lo chang emaw tih tur deuhthaw hian administration khi a kal sual a ni. Chuvangin, kan CM zahawm tak hnenah hian khilai khi tun aia strict leh dik zawka

min enkawl a, min zirchian sak a, a tul chuan action-te pawh la se, kan zavaia kan that tlanna a ni dawn a, ka phut bawk a ni.

Pu Deputy Speaker, demand no. 39, Power & Electricity-ah ka kal nghal mai ang a. Tun fiscal year a kan achievement, physical leh financial work implementation thlir hian, project te, mega watt tlem te te thar chhuahna tur siam teuh a ni a. Hei hi kei chuan, hetia hma lak teuh ai chuan engatinge a lian tham law law ah hian kan in concentrate mai loh? Entirnan, Kaladan Multi-Hydel Project angah te khian han in concentrate tak tak ta ila, MW 460 chuang thar chhuak thei tur angah te khian engatinge kan in concentrate law law loh tih hi ka rilru ah a awm a. A te neuh neuh, puiltling lova tih kual vak vak ai chuan a lian thamah hian in concentrate ta ila, ram tan hian a tha zawk awm mang e aw, tih ka ngaihndan a ni.

Pu Deputy Speaker, demand no. 1-na kha han sawi ve lehngal mai ila, Assembly ah hian Committee hrang hrangah te kan tel a, hmun dang dangah te pawh kan han zin kual a. Kan Assembly officer te leh staff te hi an felin an efficient viau ka ti. Chutih laia an tlakchham pakhat ka hmuh chu, nikum lamah pawh khan vanduinana accident kan tawh te pawh kha a chhan tur awm ang deuh ka zuk ngaih ruat chu motor tha hi kan ngaihtuah sak a tul viauin ka hria a ni. Kan han zin a, motor fit deuh ah kan han tlan a min han zui hian an tan a buaithlak riau a. Chuvangchuan kan Assembly official te hi duat deuhhlekk ila, an mamawh te hi ngaihtuah sak ni se tih ka sawi duh bawk a ni.

Tin, Pu Dy. Speaker, demand no. 11-na Secretariat Administration kan sawi ang a. Secretariat Administration chungchangah hian Pu Dy. Speaker, tuna kan kal dan phung hi thlak dan a awm ang em aw? Kan hotute hian hei aia tha zawka hma lak dan tur an hriat ngei ka ring a. File kal thui lutuk leh, kal rei lutuk, Under Secretary atanga Secretary thleng, Commissioner thleng, Additional te an lo awm, chumi chungah Parliamentary Secretary, Minister a thleng chauh a, heti

chuan file a luhna kua hi a tam lutuk a ni. Hei hian sorkar hmalakna hi a tithuanawp deuhin ka hria a ni. Chutihlai chuan a then damlohna vangte leh an lo zin chhuah changte phei chuan room khatah hian file hi a tang rei lutuk a, hei hian kan hmalakna pawh hi nasa takin min tithuanawp in ka hria a ni. Chuvang chuan, henglai hi kan hotute hian enchiang in, engtinngge file hi a tawi thei ang bera kan kal tir dan tur tih te pawh hi tunlai khawvel hmanhmawh tawh ah phei hi chuan kan dap a ngai hle in ka hria. Chumi tur chuan a changtu Chief Minister zahawm tak pawh heng chungchangah hian tun aia chak zawka kan kal theihna tur leh, sorkar in chak zawka hma a lak theihna tur leh, muangchang lutuk kan pumpelh theih nan hma min lak sak thei se tih ka ngen duh bawk a ni. Ka lawm e.

DEPUTY SPEAKER : Le, tunge han sawi leh ang, Pu Joseph Lalhimpuaia.

Pu JOSEPH LALHIMPUA : Pu Dy. Speaker, ka lawm e. Kan Chief Minister demand a ni a, a demand mal te te ang khan ka sawi lovang a. Khaikhawmna ang deuhin ngaihpawimawh zual pali (tun tum demand-ah hian ka la sawi ve miah lo bawk a) tawi te tein ka rawn sawi duh a.

Pu Dy. Speaker, pakhatnaah chuan New Economic Development, Chanchinbu lampangah te leh hmun thenkhatah development holiday tih sawi a nih reng lai a, a ti hlang, tute tawngkam takin emaw vbc 200 chuang budget-a kan han dah thei te hi a ropui tak zetin ka hria a. Hei hi kan ramah, central- in, Planning Commission-in ruahmanna min siam sak a, a system hranpa min pek thin awm tawh lo kha chu aia tam zawk mah, A tak takah chuan, special plan assistant te hi vbc 150 vel plan year khatah khan kan nei thin kha a ni a. Chu chu department hrang hrangin, department zawng zawngin infrastructure leh thil dang mamawh atan, a mamawhna apianga pawhsawn kha a ni thin a. Tunah

chuan vbc 220 kan han nei te hi ram hruaitupa, a ngaihna hriain min han hruai dan leh, mipuite leh, demand kan sawiho tawh ah khan Pu Dy. Speaker, vanduinawna tawh, chenna in kang te, chenna in khuhna tur rangva han tih te, khatiang miharsa zual zawk tanpuina atana budget dah kha kumtinin a awm chho a, hei hi a lawmawmin ka hria a, tin a malsawm pawhin ka ring a. Hei hi a ropui tak zetin ka hria a.

State thenkhat plan hi ka en ve zauh zauh a, ka la en tam lova, hetiang mahniin special plan assistant ang deuh economic development policy duh duh a an hmanna tur hi dah an tlem khawp mai a. Mizoram ah, state harsa ber te zing ami in, kan hotupa in hetiang ruahmanna an siam hi a lawmawmin ka hria a. Kan ram rorelna leh kan ram budget-ah hian record awm reng tur a ni a, heng hi a lawmawmin ka hria a, pakhatnaah ka'n sawi duh a.

Pahnihna ah chuan Pu Dy. Speaker, Prime Minister Employment Guarantee Project (PMEGP) chungchang hi ka sawi duh a. Industries Department te, KVIC Department te a nodal department an ni chungin, hei kan Finance Minister phei chu titi na ah ka lo ngen tawh a. Hmanni deuh lawk, kar hmasaa session kan neih chung khan Speaker phalna in Chanmari-ah ka va khuallian a, na angreng deuhin ka sawi a. Amaherawhchu, chanchin tharah leh chhiar tur ah pakhatmah ka hmu lova. Chuta ka thusawiah phei chuan, Prime Minister programme hi Nationalised Bank te hian an ngai pawimawh lo a ni tih thlengin ka sawi a ni. Kan hotute hnungzuia engtikah emaw ka kal hun chuan 'Pu Modiji, i programme hi Nationalised Bank hian an ngai pawimawh lo a, engtingge i tih dawn' tiin Delhi-ah la zawh tur a ni tih te ka ngaihtuahna ah chuan a awm a.

Pu Dy. Speaker, tawitein a figure hi kan sawi ang a, 2009-2010-ah khan margin money nuai 451 (a point kha chu sawi lo ta ila) min rawn pe a, a chuang hlek. Chutah chuan kan hman chu nuai 226 leh tlem a ni. 2010-2011-ah

khan margin money nuai 731.52 min rawn pe a, kan hman chu nuai 578 a ni. 2011-2012-ah khan nuai 508 min pe a, tin, 2012-2013-ah hian nuai 724 min rawn pe a, nuai 500 chuang kan hmang a. 2013-2014 ah hian margin money nuai 1210 min rawn pe a, nuai 886 kan hmang a, nikumah pawh khan 1210 min pe a, nuai 807.97 kan hmang a. Pu Dy. Speaker, hei kuminah pawh hian vbc 9 margin money min pe a, Mumbai KVIC Headquarters atangin min rawn pe a.

Kan rama thalaiten eizawna, industry an dinna kawngah, anmahni eizawna leh midangte eizawna siamsakna tur atana tanpuina a ni. Chuta tan chuan vbc 9 min rawn pe a, February thla thleng khan vbc 3 chang chang kan hmang a. Mumbai atangin lehkha pakhat a lo thleng a, 'in state tana kan pek che u in hmang zo dawn si lova, in hmang tlem si a. Tripura-ah vbc 1 phei chu lo pe thla rawh u,' tih khan lehkha a lo thleng a. Amaherawhchu, kan hotute, kan Minister-te an tang a, 'theihpatawpin hei hi chu kan hum hram hram tur a ni, la pe lo rih ila, an ti a. Tichuan, March chawlhkar khatna leh chawlhkar hnihna velah hian kan han pechhuak ve ta nual mai a. Tunah chuan vbc 2, vbc 3 vel chu a la bang a awm a, kan pechhuak zo hman dawn lova.

Engpawhnise, Pu Dy. Speaker, tuna financial ending a kan pek chhuah ho hi EDP training an ko hman tawh lo reng reng a. Industry Officer te emaw, KVI Board lampang ten, EDP training an pek loh chuan pawisa hi sanction mahse pek theih a ni si lova. Chuvang chuan pek anga lang pawh hi, a zat ve aia tam hi kuminah hian Mizoram thalai te, kuthnathawktute leh, industry lama eizawna nghet neitute, a thlawna min rawn pek hi kan nei dawn lo a ni.

Tin, kan pekchhuah tam tak te pawh hi Pu Dy. Speaker, kan han enchiang a, margin money a project atanga thingtlangah 35% te, khawpui-ah 25% te, a margin money chauh te hi an lo pechhuak a Bank lampang hian. Chuta tang

chuan, a bank loan phe chu an pe lova. Tin, Dan in a phal miah loh margin money an pekchhuah atang khan loan repayment an lo dil leh nghal thin a. Chuvang chuan nuai 5, nuai 10 project-ah, nuai 1 te, nuai 2 te an pekchhuah a an khawl lei tur te leh an in din tur te an in din theih loh chuan engtinng e loan te pawh an rulh theih ang a, engtinng e an project te hi an tihhlawhtlin theih ang. Chuvang chuan hei hi under project tak tak a niin ka hria a. Hei an hming chu ka sawi lovang a, Nationalised Bank hetiang la pe ngai reng reng lo te pawh hi kan nei a ni. Khawpuiah hian kan nasa leh zual a, hei hi kan thalaite eizawna tam tak min siam sak theitu state control ni chiah lo mahsela Chief Minister, demand sawiho a nih avangin kan hotupa ber a ni a, a ngaih pawimawh awmin ka hria a.

Kan thalaite eizawna tura central-in Prime Minister project tha tak an siam hi kan hmang lo teuh zel a ni. Kan state thenawmte an hmuh dan leh an hman dan ka'n han en a, an hmang tha em em a ni tih te kan hria a. Keini state-ah hian kan thlan vek tawh, district atanga Bawrhsap hoa Committee-in an thlan vek tawh pek mumal loh tam tak kan nei a, hman bang tam tak kan nei a, kum leh atan an lo ring lehngal a. Chuvang chuan heng scheme, state tam takin tangkai taka an hman hi vawiinah chuan Mizoram-ah hian kan Rural Bank te leh Apex Bank te hi a titha ber te an ni. Anmahni hnena kal tur te hi cent percent deuhthaw hi a chang chuan cent percent te an lo tihlawhtling thin a. Chuvang chuan Prime Minister programme hi Nationalised Bank bawh hian an ngaipawimawh lo a ni. Hei hi khawngaih takin kan Chief Minister leh kan Finance Minister te pawhin min lo chhinchhiah sak atan ka duh a, ka ngaipawimawh khawp mai a ka'n han sawi a.

Tin, Pu Deputy Speaker, pathumna ah chuan Kendrya Vidyalaya School chungchang hi. Hmanni deuh khan party pakhata social network a active tak mai chuan Lunglei East bialtu khan a sawi si a, Lunglei Ramthar-ah pawh

Kendrya School sakna kha khawiah nge pawisa hi, Congress sorkar hian a dah tak tih ang kha group hrang hrangah a post a, ka nui ka nui a, ka sawi duh lem lo a. Amaherawhchu, kan zirlai pawl te, MZP te, MSU ten minrawn zawt a, ka lo chhang ang che u ka ti a. Chu chu helai House kaltlangin, nangmah kaltlangin Pu Deputy Speaker, tawi te ka sawi duh a. Tin, KVS kan tih school hi GAD hnuai ah, DC Chairman-na hnuai ah direct funding ang deuh a ni a. Education Department hian (ka sawi tur a ni em chu ka hre lova) kan hriatpui miah lova, hei hi inhriattawnpui dan te pawh hi GAD lam atang hian ruahmanna siam thei sela a tha khawpin ka hria a, chung chu ka'n han sawi a.

Kum 2003/2004 ah khan Lunglei Ramthar-ah KVS school din tan a ni a, chutah chuan ram acre 2.98 lei nan nuai 21 chuang an lo hman a. Hei hi KVS Board of Governor meeting Delhi-ah vawi tam tak nei chuan, 'KVS pawisa atanga ram lei hi phal loh a ni. Chuvang chuan India ram State thenkhat ami angin Lunglei Ramthar ami te hian a ram leina hi Mizoram sorkarin a rawn pe thei lo a nih chuan school titawp rawh se,' a rawn ti a, Lehkha vawi tam tak thawn a nih hnu ah Commissioner, KVS, New Delhi in Lunglei Bawrhsap hnenah 2011-ah khan school titawp turin lehkha a rawn thawn a, hriattirna a rawn pe a. Chumi hnuah chuan a ram lilam tur te, a building leh a thil neih te lilam turin a rawn hriattir a. Chutih lai chuan Ramthar khawtlang nu leh pa te leh khawtlang hruaitute thahnemngaihna in India rama school tha zing ami, mirethei leh harsa tam tak a thlawna an kalna a nih avangin thahnem an ngai a, a hminga bialtu han ni ve ta chu ka hnenah vawi tam tak an rawn thlen a.

Tin, zirlai nu leh pa te pawhin association te insiamin an rawn thlen a ni. Chuan keiin Chief Minister hnenah ka thlen chhawng veleh a. Tichuan kan Chief Minister-in thahnem a lo ngai a, hetiang school pawimawh hi tihawp kha a lo hlau khawp mai a. Chuvangin kum 2003/2004 atan a ram an leina nuai 21 kha kan Chief Minister ho-a meeting chuan Lunglei High Power Committee

pawisain cheng nuai 21 kha a rul ta a ni. Chumi a rulh hnu ah chuan Project te kan han siam a, Trade & Commerce hnuai ah MAMCO in project te an han siam a, chutah chuan kum 2014-ah khan Project Approval, KVS Headquarters in vaibelchhe 24/23 aia tam deuh project approval minrawn pe a. Amaherawhchu, IIT VAT te alo ngai a, MAMCO hian Delhi-ah consultancy firm hranpa te ruaiin, Delhi IIT in a VAT hnu ah thla hmasa mai khan KVS Headquarters-ah DPR kimchang tak an thehlut ta a, vaibelchhe 25 chuang a ni a. Hei hi reiloteah pawisa te pawh kan hmuh kan inbeisei a. Social network-ah hrechiang mang lo nge hrechiang chungang intihmualpho tumna ang deuh leh an hunlaia ba te pawh kan Chief Minister-in min rulh sak hnu ah vaibelchhe 25 chuang hmu mai thei dinhmuna kan han ding te hi a lawmawmin ka hria a.

Mizoram-a zirna enkawltu Education Department te hian heng kan KVS te, Navath High School kan tih te pawh hi engemaw chen inhriatpawh na a nih theihna tur atan hian kan GAD lampang hian Bawrhsap te direct zel a nih avang hian kawng zawng thei se chu a tha khawpin ka ring a, chu chu ka'n sawi velehduh a.

Tin, Pu Deputy Speaker, a tawpna berah chuan PWD chungchang tawitein ka sawi duhduh a. Hei a lawmawm khawpin ka hria a, hmanni lawkah DoNER Secretary a lo kal a Mizoram-ah project pakhat a en dawn a, kan PWD hotuten kan project-ah pawh kan chhuan ve a ni a anti a, a hminga ka bial ve ah, kan veng ah, Chandmari-ah Indoor Stadium vaibelchhe 5 dawn lai man kan hotupain min sak sak meka, chu chu a hmunah an va kal a. Kan DoNER lampanga kan official te, Secretary te, Joint Secretary te pawh an lawm ve khawp mai a. An kal hnu karkhat velah 2nd installment pawh vaibelchhe 2 dawn anrawn release leh tawh nghe nghe a. A sak a tha a, tin a timing te an la vawng tha em em a, a lawmawmin ka hria a. Hemi kawngah hian PWD kan official te hian min hrilh chu 'record a ni ang a' anti a.

DoNER Ministry atangin query chhan tur tam tak a lo kal a, Mizoram sorkarin a chhan hmam kan Chief Minister thahnemngaihna avangin sanction kan hmu a ni. Query tam tak chhan tur a awm laia chhanna pawh kan pek thlak hmaa sanction hi kan la nei ngai lo an ti a. Hemi kawngah hian kan Chief Minister te, tin a Department-a kan Principal Secretary te pawh a bik takin Delhi-ah te pawh a hmunah te kalin an bei nasa tih kan hria a, kan lawm takzet a. Tin, a sak enkawltu kan engineer-te pawhin tun thlengin ram pumah pawh project tha ber te zingah an la chhal ngam te pawh hi a lawmawmin ka hria a, kan nghakhlel hle a ni tih kha lawmthu sawi pahin ka'n han sawi a.

Tichuan, Lunglei-Tlabung kawng, kawngchhe ber thin kha pawisa kan neih huna siam tura kan tih reng thin kha National Highway-ah min han puan sak te hi, a bawm awmsaah min han hnuklut leh ta niin kan hria a, kan nghakhlel hle nain a lo kalna tur chiangsa a nih avangin engtik niah emaw chuan kan la hmu ang tih kan ring a, kan lawm hle a.

Tin, chhim lam atanga Zoram kawtchhuah hmasa thin Tlabung leh Kawrpuichhuah kawng pawh World Bank siam turin kan hotuten min han tihpuitlinsak te hi a lawmawmin ka hria a.

Tin, Pu Deputy Speaker, term hmasa 2009 ah khan Lunglei High Power Committee meeting hmasa ber kan Chief Minister hovin Lunglei-ah kan nei a, project pahnih a pass a, chutah chuan pakhat chu chumi kan meeting-na chu Lunglei-ah meeting hall mumal tha tak a awm loh avangin Baptist Kohhran, Sap Upa leh Pu Buanga Hall-ah kohhran ho kan dil a, min hmantir a ni. Mi thenkhat phei chuan hetiang a kohhran office a Sorkar meeting neih chu tiin an sawisel hial nghe nghe a. Khatih lai khan Lunglei-ah Chief Minister leh cabinet minister engemaw zat meeting neihna tur kha hall kan nei tha lo a ni. Chumia kan Chief Minister hova kan rel chu convention Centre lian tak siam ni sela,

meeting hall pawh, conference hall tha tak awm sela tih kan rel a. Tichuan kan UD&PA Minister-in theihpatawpin a umzui a, tunah chuan hall kan nei tep tawh a, reiloteah an peih dawn a, kan lawm hle a.

Chumi tuma kan rel pakhat chu Lunglei by-pass a ni. Lunglei khawpui chhung lut lova Lunglei khawpui hel deuha a veng hmawr lampang leh chhim lampang zel pana an kal theihna turin DoNER-ah project kan hotupain min siamsak a, an rawn retain nghe nghe a. Amaherawhchu, DPR siam te a lo fuh tawk lova, harsatna tam tak kan tawk a, tunah pheih chuan an drop tawhin ka hria a. Hei hi khawngaih takin kan hotupain hun hmasa lama hma a lo lak silawng tawh kha a ni a, min tharthawh leh sela ka duh khawp mai a.

Lunglei saw ka ngaihtuah a, khawvela kan awm chhung chuan kan tawpna tur te, kan bultanna te a ni a, tun atanga kum 4/5 ah chuan motor saw kan inzui duah duah ang a, kan kal bek bek dawn niin a lang a, kawng zauh dan mumal a awm tawh bawk si lova. Chuvangin, Lunglei by-pass te, Lunglei link road kan tih ang chi te pawh hi special deuh hleka ngaihtuahna min siam sak loh chuan khawpui chhung saw a hrehawm zual lutuk dawnin ka hria a, chungte chu ka'n sawi a ni. Pu Deputy Speaker, hun min pek belh a ka lawm e .

Tichuan, kan Minister-te pahnih, kan Chief Minister leh kan Minister zahawm tak-te demand hi ka support a ni tih kha ka rawn sawi a ni, ka lawm e.

DEPUTY SPEAKER : Tunah Pu John Siamkunga

Pu JOHN SIAMKUNGA : Pu Deputy Speaker, ka lawm e. Vawiinah kan Chief Minister zahawm tak, kan House Leader demand leh kan Minister zahawm tak Pu B.D. Chakma demand-te kan sawiho dawn a. Vawiin chu minutes 15 min han pe a, a lawmawm hle in ka hria. Ka sawi hmasak ber duh chu

sorkar tha hi eng sorkar nge ni le tih hi a pawimawhin ka hria a. Sorkar tha kan tehnaah chuan corruption a tlem tur a ni a, hmalakna mipuite tan a tam tur a ni. Chuvangin, welfare state kan nih angin mipui tan a ding ang a, mipuite chanai a nihna dik taka thawh tirin eirukna a tlem tur a ni tih hi sorkar tha kan tehna pawimawh ber a ni a. Vawiinah hian Vigilance hnuaiyah sorkar hnathawk rinawmlo deuh engemaw zatin case an neih phah a, sorkar hnathawk thenkhatte phe chu hrem an ni nghe nghe a. Chutiang chuan he sorkar hian huai takin hma a la a, Gazetted Officer engemaw zat hemi hnuaiyah hian case nei an awm a ni. Chuvangin he sorkar hian dikna a duh avangin corruption a tlem theihna turin theihtawpin hrem ngaite hremin hma a la a, chuvangin a lawmawm hle in ka hria.

Tin, welfare state nihna lampangah chuan mipui tam zawk 75% vel loneimite tan NLUP kalpuiin mi chanhnuai zawkte lo dinchhuan ve theihna turin nasa takin hma a la a, mipuite dinchhuah ve theihna tur hi a rilru pui ber a ni tih tuna kan sorkar hian a tilang chiang hle in ka hria.

Tunah hian Minor Irrigation, demand no. 47-na hi tawite a han sawi ka duh a. Budget kan neihna hnuaiyah an work programme-ah hian river diversion AIBP leh NABARD hnuaiyah hian 2000 lakh lai a lo lang a, 758 hecta lai an siam dawn a ni. An siam tawh sa hi engzatnge tih chu ka hre lo, an siam leh tur pawh hi Zoram loneitute tan chuan chhenfakawm tak a ni dawn a ni tih hi he budget atang pawh hian a langin ka hria a. Tin, an lo siam tawh sa repair-na tur te, renovate na tur leh re-construct na tur atan hian 400 lakh lai a awm bawk a.

Tin, firm development atan hian on going leh new project atan CAD & WMP hnuaiyah cheng nuai 1,120 a awm bawk a ni. Hetiang hian lo nei mi, kuthnathawktute tan department hrang hrang, Minor Irrigation bakah hian department tam tak an la awm a ni. Hengte hian kan kuthnathawktute dinchhuahna turin anmahni zawnah hma nasa tak in an la theuh a, theihtawp an chhuah theuh a

ni. Hetianga department hrang hrang ten kan kuthnathawktute dinchhuahna tur atana kil hrang hranga an thawhna hian rah tha a la chhuah zel a, a chhuah chho zel turah pawh a ngaih theih a. Amaherawhchu, hengte hi overlapping lo hram sela, an project hi inthuah lo hram sela, awmze nei zawk leh systematic zawka a kal chuan kut hnathawktute dinchhuahna tur hi chu awmin a lang a ni, he budget atang ringawt pawh hian tih kha ka sawi duh a.

Tin, GAD demand no.15-na ah hian - tunhma hun kal tawhte min ngaihtuah chhuah tir a, Congress sorkar hmasa ah khan Lengpui Airport khu kan House Leader zahawm tak ho hian siam tum a ni a, khatih lai khan miten an awih thei lo, an ring thei lo a ni. “Thil theih a ni lo, Choak pawh a tum lovang” ti ten beihna nasa tak a awm a, min puitlin pui kha kan ring lo a ni Mizoram mipuiin. Mahse, vawiina thil lo thleng chu enge ni ta kan tih chuan Airport mamawhtute chuan kan hre vek, mirethei te, mi hausa te, damlo te leh sumdawngte thlengin kan hmang tangkai em em a ni. Tunhma chuan mi hausate chauh hman turah kan ngai thin, tunah chuan mipuite hmakhua tur a nih angin mipuiin kan hmang tawh a ni.

Damlo pakhatin a sawi ka la hriatreng chu an u pakhat kha cancer a vei hlauh mai a, biopsy an la a, an mang a ang em em mai a, thlawhna ticket an cut a, Mumbai-ah an thlawk thla a ni. A ma sawidan chuan “tunhma chuan mihausate chauhvin an hman tur emaw kan tih kha, keini mirethei mangang, damlo ten kan han hmang ve a, a ni la la in Mumbai kan thleng a, tlaiah damdawi inah kan indah lutin investigation kan ti hman a, a ropui ngei mai, hetiang a ropui a ni dawn tih tunhmain ka lo hre ngai lo” a ti a. An kal hma avangin a ni pawh a cancer a dam a, tunah pawh engmah in sawiselna nei lovin a tha hlen ta nghe nghe a ni. Chuvangin, Mizo mipuiten kan mind set hi kan siamthat a ngaiin ka hria a, kan lo rin sawi a, a chhe zawng hlira thil kan thlir pawh hi kan insiam that a ngai. Miten hma an lak chuan a tha zawng tur kan

beisei hmasa phawt tur a ni, a lo thalo a nih erawh chuan thu hran, a chhe zawng hlira kan in sawisel erawh hi chu a dik lovin ka ring.

Tin, helicopter service te pawh kan Chief Minister hmalakna in, theihtawp a chhuah a, 'he ram chhungah hian helicopter service nei ve ila, Pawan Hans hmang ila central sorkarin home department in 75% lai min subsidy thei dawn si a,' tiin thahnemngai takin a ti a ni. Vawiinah chuan helicopter service kan nei tawh, kum engemaw zat kan hmang tawh, a tirah khan enge chanchinbuah kan hmuh tam ber 'Pawan Hans chu miten an hluihlawn tawh, company tha lo, a accident duh si,' ti khan kan lo sawisel nasa mai a ni, kha kha a tha lo. Sorkara thiltha ti duhtuten hma an lakna tur hi a chhe zawnga lo thlir hrim hrim anga kan lo awm hi a fuh lo, an thlirna kha a lo dik tak tak lova, vawiin thleng chuan khaw kilkhawr ber thlenga damlo pawh hmunpui an rawn pan thei tawh, mi hmanhmawh tak tak sumdawng te, sorkar hnathawk buai tak tak te pawhin awlsam te te in khawpui hrang hrang kan tlawh thei tawh a ni, a ropui hle in ka hria.

Hmanni lawk Chawlhni, ni 28 khan kan Chief Minister hmalakna in Aizawl - Delhi direct flight thlawhna a rawn awm ta a, chutianga nasa taka hma a lakna zarah, mi hmanhmawhte leh harsatna tawkte tan leh zin khawthawng duhte tan pawh tha taka an hman theihna turin tunah a rawn chhawpchuak leh tawh a ni, a ropui hle a ni.

Tin, chumai bakah hmanni lawkah rel lian a lo lut a, meter gauge kan hmanlai kha chuan kan harsa thin , a ke kar kha meter gauge a ni a, 3 ft. emaw vel leka zau, khatiang leka zau kan hman lai chuan kan harsa thin a. Vawiinah chuan broad gauge train a lo lut tawh, heng te hi hmasawinna ropui tak khua leh tui te tana theihtawp chhuahna avanga hmasawinna lo thleng a ni. Heng te hi fak tlak tak niin ka hria a, ka'n sawi chhuak duh a.

Tin, hei vawiinah Aviation hnuaih Lengpui Airport runway bula hnim hnawk deuh hlek hnim samfaina tur atan ₹6 lakhs an dah te, terminal building rawng han hnawih that leh tlema siam na tur atan ₹5 lakhs an dah te, Lengpui airport han cheimawi ve na hrim hrim tur atana pawisa lo lang te hi a ropui hle in ka hria. Kan ram, miten an rawn hmuh hmasak ber na hmuna kraws awm te, chubakah a theih ang a mawi a chei an ni chho mek te khu a ropui hle in ka hria.

Tin, Pu Dy.Speaker, demand no.45-na PWD hi han sawi leh hlek ka duh a. Vawiinah hian a mal te te in kan sawi seng dawn reng reng lova. Vawiin hian a chhe lai rawn sawi chhuak thin mahse a tha lai hi chu a tam a ni. A chhe lai sawi hian mi beng a verh thung a, a tha lai erawh hi chuan mi ngaihtlak a hlawh vak lo. Mahse, chuti chung chuan he sorkar hian chawl lovin theihtawpin mi sawiselna chu sawiselna lo ni se, hna kan thawh that chuan Zoram in a chhawr dawn tho tih hi kan ngaihndan a ni. Chumi a nih avang chuan PWD pawh in nasa takin hma a la a, tunah hian black-top mek ringawt pawh hi (kawng hrang hrang chulai leh chulai inkar tiin kan sawi vek seng lo) 36 laiah hma an la a ni.

Tin, chu chang ni lovin, kawng upgrade mek pawh hi tam tak a awm. Hun a tawi avangin an hming ka sawi lovang a. Chu chang la ni lovin, kawng kan strengthen mek lai hi tam tak a awm bawk a ni. Tin, World Bank hnuahia hnathawhna te leh khatiang hrang hrang kha a tam mai. Tunah hian kan Chief Minister zahawm tak PWD Minister ni bawk hian a sawi thin a. A dung zawng hi chuan kawng hi kan ngah thawkhat tawh viau a ni. Amaherawhchu a tan zawng hian kan la nei tlem deuh a ni a ti thin. Road communication a that hian changkanna ropui tak kan thleng a ni tih kha a hriat. Road communication a that loh chuan mi a changkan theih loh. Chuvangin, road communication heti taka sorkar in rilru puia a neih a, a beihna hi changkanna indawm chho mek tur atan hmasawna ropui tak a ni tih hi ka'n sawi lang duh a.

Tunah hian lei dawh mek pawh 2 lane RCC bridge pawh hi keima hriat ringawtah pawh hian 4 chu ka hria a ni. Chu chang ni lovin sawng Darzo kai suspension bridge te min dawh sak a. Sawng saw BRTF kawng a ni, chuti chung chuan kan Chief Minister thahnem ngaihna in sawlai lei tha tak mai tur saw tunah sawn an dawh mek a. Tin, black top ah pawh S.Vanlaiphai atanga Muallianpui inkar te, Hnahthial, Tuichang atanga Tumtukawn inkar black top tur te, hmun dang dang ami sawi sen a ni mang lo. Chutiang khawp chuan mipuite tana ding he sorkar hian a mipuite tan hna a thawk a ni tih kha ka'n sawi lang duh a.

Tin, power chungchangah hian vawiinah chuan kan nuam ve ta hle a ni. Sorkar in a mipuite hrehawm taka kan awm a phal loh avangin sum tam tak pawh seng dawn ila kan miten eng tha an neihna tur a nih chuan tiin mipui tan a in sacrifice tak meuh meuhin ka hria a. Vawiina kan eng neih dan te han chhut hi chuan state danga kan kal ve changa kan neih ai hi chuan a tha a ni. Mahse, chuti chung chuan tam tak chu zan khat emaw, darkar 2 lek kan han thim pawhin kan phun hman tho. A chhe lai hi kan hmu chak em em a ni. Chuvangin, Mizo mipuite hian kan mind set kan siam that a, a optimist zawng deuh hleka thil kan thlir thiam hi a ngaiin ka hria.

Tin, chubakah nghak thei rilru, hmanhmawh lo leh tlema a nghah dan thiam deuh kan nih pawh a pawimawh hle in ka hria. Tunah hian power generate na tur atana hmalakna tam tak a awm a. Tuna kan hman tangkai mai theih tur Tuirial hydel project phei hi chu tunah hian kan beisei hnai tawh hle a ni. Sorkar hmasa hunah khan khatiangin lo tichingpen lo phei se chuan mega watt 60 hi tunah kan hmang tawh ang. Amaherawhchu, lo tihchingpen a ni leh mipui hma ngai hauh lo a chet an lo lak avang khan hetiang hian kan lo muang chho lo thei ta si lova, a pawl tak zet a ni.

Heng bakah hian Tuivai hydel project te, saw tah Chhimtuipui lampang te, khuah tur tam tak a awm a, kan sawi seng lova, tunah hian MoU sign na pawh hi tam tak a ni. Khatiang khan power-a kan intodelhna tur hian nasa takin hma kan la a. Pu

Dy.Speaker, i veilam ami ten thermal power plant hi ni se an han ti a. Gas te kan lai chhuak a, kan siak chhuak a nih hma hi chuan a ngam awm loh a ni. A chhan chu production cost hi a sang lutuk a, tih chi a ni lo a ni, diesel atang chuan. Chuvangin, helaia leilung hausakna kan laihchhuah hunah chuan, kan Chief Minister zahawm takin a sawi thin, 'heng hmang hian eng kan la siam chhuak ve ang a, power lamah kan intodelh mai ni lovin, hralh chhuah tham kan la nei ang,' tih a sawi thin te hi miten kan hriat nawn fo hi a tha in ka hria.

Demand no.35-na Fisheries chungchang hi tawite han sawi ka duh a. Tunah hian dil siam thar tur construction of new ponds hi hectare 250 lai ni dawnin ka ring a. A vang chu helai work programme atanga a lan dan hian hemi atan hian ₹250 lakhs lai hman tur a ni a. Chutih rual chuan enge an lo thar tawh dan ka hre lova. Tin, renovation atan existing ponds hi hectares 1000 lai tih tur alo awm bawk a. A pawimawh bera ka'n hriat chu kan tharchhuah tawh chu kan tharchhuah tawh ni sela, vawiinah hian kan sangha thar te a lo pun chhoh zel lai hian a marketing lampang hi a pawimawh in ka hria. A marketing kan tih that loh chuan kan tharchhuah te hi tam mahse sangha vulhtute hi an beidawng ang tih a hlauhawm a ni.

Tunhma in an sawi thin a, America ramah chuan bawng an vulh a, bawngnute an thar chhuak tam em em a. Bawng vulh tute an mangang a, ama'rawhchu America sorkar chuan hetilaia bawng vulhtute kan tih beidawn chuan an tho chhuak leh tawh lovang tih a ring thin a. Chumi anih avang chuan a bawngnute thar chhuah bawngnute powder khan Pacific tuipui a pawt ti khan upa ten min hrilh thin a ni, rual u zawk ten. A vang chu loneimi, kut hnathawktute tih beidawn hi a pawt tak zet a ni. Chumi a nih avang chuan sangha chingtute pawh hi an beidawn lohna tur kawng kan dap a ngai tak zet in ka hria a. Hetiang hian hectare tam tak tak siam thar dawn mah ila, kan rilrua lian ber tur zawk erawh chu sangha khawitute hian man man zawka an hralh theihna tur leh an beidawn lohna tur hi kan ngaihtuah tul hle in ka hria. Pu Dy.Speaker,

heng kan Chief Minister demand leh kan Minister zahawm tak demand te hi ka rawn thlawp a ni e. Ka lawm e.

DEPUTY SPEAKER : Tunah Pu P.C. Zoram Sangliana.

Pu P.C. ZORAM SANGLIANA : Pu Dy.Speaker, demand no.35-na Fisheries-ah hian han sawi nghal kan duh a. A bik takin Serlui-ah remhre tak maiin cafe culture hmangin sangha khawi kan han ti a. Nikum ringawt chhung khan chhungkaw 96 lai maiin hemi kaltlang hian malsawmna an dawngin sing tel teh meuh mai an hlawh hlawm a. Tin, kuminah pawh chhungkaw 37 lai mai an han khuah belh tir leh a, heng ho hian cheng sing tel teh meuh mai an hlawh leh dawn tih hi kan hmuh sa a ni a. A sangha dil thar leh a repairna mai bakah ti tak tak te hnena thlam sakna nen lam mai an han pe te hi keini sangha lama tharchhuak hnem district tan chuan a lawmawm lehzual a ni. Hetianga remhre tak maia Minister leh department ten hma in han la hi lawmawm kan ti a. Kan district tan a lawmawm em em, i Chair kaltlang a minister pawh kan sawm duhna chu District Fisheries office min sak zawh sak tawh a. Chutih rual chuan a side development leh a electric wiring erawh chu la peih loh a ni a. Hengte hi hma taka zawh a min hawn sak ngei tur pawhin i Chair kaltlangin kan Minister hi ka sawm duh a ni.

Demand no.41-na Sericulture-ah hian kan tana lawmawm bawh sawi hi a ngai zel a. Muga silk project Mizoram-ah an han introduce a, chumi an introduce rual chuan kan rama project an han siamna ah Kolasib district bawh min han thlang leh ta a, kan lawm em em mai a, thlan tlak pawh a ni reng a, hmun hma te an nei tha a, tin example tih nan pawh a tha a, chhungkaw zanga laiin silk siamna eizawmna he department kal tlang hian kan hmu a ni. Kolasib district bikah ringawt pawh tun hnaiah hemi kal tlang hian chhungkaw 140 laiin bul an han tan te hi, farmer te tibeidawng lo, tihlawhtling, department tereuhte anga lang ni mahsela a kila lung tangkai, kan ram, kan hnam leh sum leh paiah pawh an

thawh hlawk em em mai a ni. Chungte chu he department pahnihah hian lawmthu sawi pahin ka sawi duh a ni.

Pu Deputy Speaker, kan Chief Minister zahawm tak maiin a demand a rawn pharh zingah hian a demand wise a sawi lovin bul tan nana ka'n sawi duh chu, kan Mizoram sorkar hnuaiia hna hrang hrang group A,B,C,D te hi inkhairual leh awmze nei zawka kan kal hi a pawimawh hlein ka hria a. Mizoram sorkar hnuaiiah hian Recruitment Rules policy hi mumal tak kan nei lo em ni aw ti hian a lo thlir theih a. Chumi a nihna chhan chu Group 'A' MPSC kaltlang tein kan la a, ama'rawhchu a khawihtu tak tak bawrah hian (B,C,D helai bawrah hian) mumal taka recruitment kalpui lohna hi a rei viau tawhin a lang tlat a, ennawn leh pawh a thain ka hria.

Thi leh pension kum tin an awm reng a, thlaktu tur kum 10 tel hi kan la tawh lova, group 'A'- ah erawh chuan kum tin lak a ni a. Chumi bakah chuan tuna kan lan danah chuan tun atanga hun reiloteah kan sorkar department hi lu lawk bur, ke zuih, ke pawh nei mumal lo te a ni hial dawnin ka hria a ni. Helai bawr hi a pawimawh ka ti em em mai a, chuvangin sorkar hnathawk department hrang hranga hnathawktu, a te ber atanga a lian ber thlengin an strength zir chian a, chutah mumal tak leh khai rual zawka recruitment policy hi duan chhuah a hman a hun tawh tak zetin ka hria. Hei hian Chief Minister demand han sawi hian a leng zual bikin ka hria a ni, chulai chu ka sawi uar duh lai a ni.

Department zirchian a ngaihna chu tunhmaa pawimawh tak tuna pawimawh tawh lo te a awm a ni. Entirnan, British hun lai chuan department pawimawh tak tak pathum kan nei mai a, tun, vawiinah chuan khang lai aia pawimawh zawk hi a awm ta tlat mai a. Heng angte hi mamawhna nen zirchiana chutianga tih chu a hunin ka hria a ni. Helai bawr hi ka'n sawi tel duh a ni.

Tin, Union Territory kan nih tan tirh atanga kan kal chhoh zelna ah hian ka'n thlir let mai mai thin a. Sorkar inrel bawl na lian chho tial tialah, department lo pung chho zelah sorkar inrelbawl dan leh office hmun hma ah te pawh hian tun aia kan enkawl uluk, kan humhalh, land leas kan nei chiah em tih te pawh hi department tinah hian enchian a ngaiin ka hria. UT hunlai vela department, khang lai chuan thingtlang khaw lian deuh PPV center kan tih ang chi ang kha chuan ram leh hmun hma an nei deuh vek a ni. Mahse humhalh ni lovin VC te tan leh mamawhna atana theh sak ang hi a tam em em mai a ni. Department tinah hian GAD kal tlang hian humhalh hna hi Revenue te nen tih ni se a lawmawm hlein ka ring a ni. Sorkar ram humhalhna ah mimalah leh tute emaw pe lovin department leh department chu mamawhnaah chuan pek tur, mimal leh NGO hrang hranga pe lo hian humhalh hi a pawimawh a ni tih hi ka sawi duh a ni.

Tin, NEC leh DoNER hi kan ram tan chuan a pawimawh ta hle mai a, tunah pawh kan sorkar kal dan pawh a danglam chho ta a, naktuk lawkah hian 2017-2018 budget pawh hi thukhawm dawn ta ila thutkhawm theih tlukin kan pawisa sum leh pai kan hre tawh a ni. Chutianga danglam a nih rual chuan NEC leh DoNER atanga kan nghahna hi a la lian em em mai a, hemi hmang tangkai leh zual tur hian private firm tam tak kan sorkar-in panel a siam te hi hmang tangkai ta ila, chu chu department hrang hrangah hei hian malsawmna min thlen ang tih ka ring a ni. Kuminah pawh NEC atanga priority list te kan hmu a, ka hmu sual em ka hre lova. Kan district atang ten kan lo beisei ve em em lai khan kan lang lo niin kan hria a. NEC-ah khan, DoNER ah tal chuan kan district hi min lo hre ve se tih kha ka'n sawi duh a ni.

Heta tana pawimawh em em chu project tam thei ang ber central-a ministry neitute hnen atangin an ministry in an approved firm te nen lam pawh inthuruala department te hian, kan Chief Minister pawhin vawi tam tak a sawi

tawh thin a, heti lama tan la tur hian ka sawm nawn leh duh a ni. Hetianga sum min pe thei Ministry-ah hian a ze mi deuh te phe chu an zu cham chilh a theihpatawpa tan zuk lak a, kan ram kan hnam tan, India sorkar-in Look East a ti, a thilphal lai tak hi kan hman tangkai thiam a thain ka hria a, chu chu kan sawi duh a ni.

Keini ang damdawi in lian mamawh tan hian Lengpui Airport choak aia lian deuh kan hotupain a lo tum tir hi kan va nihlawh e aw! Tunah phe chu an Delhi direct in nitin a kal thei ta. Engtikah nge Chennai-ah , Mumbai-ah direct-in min thlawh tir leh dawn kan thlir tan tawh a ni. Khang ang kha a mamawhtu ber chu mihausa, sorkar milian nawm chen nan ni lo, damlo helicopter atanga rawn phurh thlen oxygen pek mek nena thlawhnaa phurh thlak te hian kan lo mamawh zawk a, chung ang zawng zawng chu hotu kan nei a, ram tan hian malsawmna min thlen a ni. Hengte hi lawmawm ka ti tak meuh meuh a, churang chuan a demand han sawi te pawh hi phurawm ka ti leh zual a ni.

Pu Deputy Speaker, Legislative Assembly hi sawi duh dan ka nei ve tlat mai a. Ka sawi duh dan chu, kan staff te thawh rim dan leh mitin te thawh rim dan te hi lawmawm ka ti. Chutih rual chuan hmannah House-ah, kan sawi a kan dinglamah te pawh Tv te pawh tunah chuan tar a lo ni ta a. Min vengtute kan lirthei min khalh saktuten pute an lo chhuak dawn em tih hi tun hma chuan an awmna hmun atangin TV atangin an lo thlir ve thin a, vawinah chuan TV hi an nei ta lova, kan Police hote leh (Deputy Speaker: Camera te pawh chung lam atanga lak thin kha helaiyah hian a hniam atanga lakna tur hian theihtawp an chhuah a, I & PR te nen, LPS te pawhin nasa takin an contribute a ni, anmahni sum seng in tih kha House hriatah ka'n sawi lang ve a nih chu) chair atanga sawi khan a chiang leh zual a ni. A ngaihna hriaah chuan tiang hi a ni zel a ni.

Hmanni-a Opposition Group leader-in a sawi ang khan, helamah pawh hian han dah sak leh ula chuan an thla te pawh an hmu chiang leh zual ang a, a lawmawm hlein ka ring a ni. Kan security leh kan driver ten kan pu te, an pi te chhuah hun an lo hriat ve theih nan TV te hi han dah leh ni se a van lawmawm dawn em ka ti a ni.

Demand oo.39-na hi keini kan district chuan hemite hi tute nge an nih kan hria a ni. Nikum khan YMA General Conference kan thleng a, thenkhat chuan hlawhchham se an ti em em a, Cachar ram lam kawng chhe hliir kha FB-ah, Whatsapp ah te, facebook ah te an tarlang a. Khulaia Kolasib dai liam lawka ban tlu te kha misualin a part an ruk avang a ni tih sawi duh der lovin kan sawrkar leh a changtute dem nan te, bialtu dem nan te an han hmang a. mahse, khawmpui hlawhtling tak mai eng tha tak hnuaiah min han pe a. Khang atana tan an lak dan te kha, fur chhe hnuaiah pawh i ti ang, ramhnuaiah nen lam kan engineer ten an thawk tak tak a, chuang chuan sawi thui vak a ngai lovin ka hria. Chungte pawh chu enge a chhan? Enkawltu a zir a ni, pocket a lut tur ngaihtuah lovin mipuite malsawmna tur kha an ngaihtuah a enkawltuin, chumi avang chuan heng malsawmna te hi a thleng a ni.

Tuirial Hydel Project te hi kan district chhunga awm a ni bawka, kan va nghakhlel, tihchhiata a awm te khan kan rum. Vawiinah chuan a ngaihna hriain an rawn enkawl ta a, beisei ang chuan kumin kum tawp a ni ang, a nakumah te chuan khumi hmang khuan kan hmet eng tawh dawn a ni. Chung ang te kan han hmuh hian lawmawm kan ti a, a district ang hian kan lawm tak zet zet a ni tih te pawh hi hengah hian ka sawi tel duh talh. Sawi tur a tam lutuk, mahsela kha kha ka duh tawk mai ang a.

PWD bikah hian Pu Deputy Speaker, ngaihtuahna thar kan neih hi a tul ka ti ngawt mai. Kan khawpui kawng (hmanniah pawh zawhnaah ka pek kha) UD & PA-ah pek tumna an nei em tih hialin zawhna ka pekna chhan kha. Ngaihtuahna thar neih ka duh a ni khawpui bikah, thingtlangah chuan a la theih vek lovang. Cement kawng hi ka

ti mai a ka sawithiam dan chuan, engtinng e an tih kha rigid pavement an ti em ni, a sawi dan ka hre chiah lova. Chutiang chu kan khawpui kawngah chuan tih ve a hun a ni, ram dang khua kan sawi hmam Aizawl khawchhungah pawh a chiang lutuk. 2007-2008 kumtira an zawh Ngaizel kawng cement-a an enkawl saw kum engzahna nge? Vawiihah kan kawng tha deuh ber lai a la ni deuh reng a ni lawm ni Aizawl-ah hian. BRTF-in cement-a an tih Bawngkawn atanga Helipad inkar hnuai sawng lai kawngphei saw han en ila, kumtin harsatna kan tawh thin kha vawiihah engatinge hetiang a that? Cement-in an enkawl a ni.

1994-a Mumbai khawpuia film an channa hmun kan tlawh chuan, a chhung vel chu cement vek hian kawng an lo ti. A hnu kum sawmhnih hnuah ka zu en leh a, chu kawng chu Mumbai khawpui ah a la tha ber pawl a la ni. Vawiihah hian kan kawng han tih ni sela, an theih ang tawkin kan officer ten an sum neih hre ranin ba thlau nen lam te, tawng mawi lo ni suh sela, an han enkawl a. Chutah chuan tihfuh loh tuk chuan kawng hrula ar vulh ten ar an chhuah tuk chuan a rang nang mai hi a ni, a sorkar lai tan pawh sawi mawi vak harsa khawp hian kan khawpui kawngah hian kan hmu thin a ni, zep tur a awm lo. A maintenance a hautak si, kan thiam ve si lo, mahni kawta mi pawh bitumen kan chhuangso ve thiam si lo, a chawhpawlh dan tur kan hre lo. Cement te chuan min han tih se kei chu kan kawtah khuan ka chiang tlat, Lower Kanaan-a kan awmthlak tirhah chuan motor lian za pawn lei a hrut thei a ni. Mahse cement nen kan han tang a, kan han hnawhchho a, a chhe khat ta khawp mai a. Chu chu tun hnu ah cement in han tih ni ta se khu khu, mahni kawt khuar ai chuan cement khan kan lo ti ve mai dawn a ni. Kha kha a nia, a maintenance-ah hian sum harsatna lai ber a ni tih hi kan hriat phak ve tawh leh kan hriat dan a ni bawh si a, chung avang chuan helai kawngah hian tan an lak thar hi a pawimawh ka ti tak zet a.

Helai bawrah hian khawngaihtakin ngaihtuahna thar te pawhrawn seng se. A initial stage-ah chuan sum a harsa ang, a initial stage a sum harsatna lai tak kha vawiihah hian keini ho pawhin kan va hriatpui a, kuminah a cover a lo zim anih pawhin

a daih reina tur hi kan ngaihtuah a ngai ta. Kan khawpui kawng hian tun ah chuan kan khawpui thal khat pawh daih lo, a zana ruah a rawn sur phei chuan a tukleha chhe nghal ni fo lo hian tui mamawh cement hian kan kawng hi enkawl tawh ang u. Tui pek that leh in pawh a char tha, kha kha a nih avangin tui mamawh cement nen hian kan kawngpuite hi enkawl dan zawng ta ila.

A bik takin Bawngkawn atanga Kulikawn inkarah te hian bul han tan ta ila, a thatzia kan hria ang. Bawngkawn piah chiah Zemabawk kalna kawngah a thatzia kan hmu, Kulikawn piah chiah Ngaizel-ah a thatzia hei chen kan hmu tawh. Heng ang te hi hmana kan tih dan a ni lo ti reng lo hian ngaihtuahna thar nen hian kei chu kan kal a hun takzetin ka hria a, Pu Deputy Speaker, hengah te hian thahnem ka'n ngai lehzuah a ni.

Vawiinah ka sawi uar duh em em chu, kan ram kan hnamah malsawmna tam tak kan lo dawn hi engvang nge kan tih chuan sawrkar hnathawk tinreng ten he sorkar hnuaiyah hian zalenna nen security nei chungin hna an thawhna hi a rah niin kei chuan ka hria. Chumi chu a enkawltupa ber vawiinah hian Chief Minister demand ah hian sawi a rem. Chumia zalen taka, zalen ka tih awmzia chu a tha zawngin an ngaihtuahna te, keini kan bialah khuan PWD ah kan chiang em em tlat mai a ni kan district-ah khuan. Kan kawng khuti taka a lo that tak nachhan te chu officer zanlaih pawh kal peih, Executive Engineer, an hming chu ka sawi em lovang a, chu miina min han enkawl takah chuan vawiina Bairabi kawng, ka sawi soal loh chuan vaibelchhe 28 hmanni lawka hna an pek tak, khang ang te pawh kha midang daih rawn thawk tur chu ni mahsela, kan Executive Engineer khuan tunah a hmaa a enkawl dan bawkh kan enkawl theihna hi nei sela kan kawng a va tha dawn em. Mizoram zawng zawnga kawng tha bera an lokal duh chuan Kolasib bialah lo kal mai rawh u. Chuvang chuan khami kha tun kumkhat lek chhunga he PWD hi ka beidawna em em thin tawh beiseina min siamtu a ni.

Thingdawl daia Horticulture Rest House bul te chu chatuan khuar, chatuan motor din reina leh tanna tih te chu a tang leh har tawh ngawtin ka ring. Khang ang kha enge engineer ti tak taka viltu ten an vilna rah a ni, enge an vil theihna chhan? Chung ami te thuneihnaa delh lovin hnathawk theiin an siam vang a ni. Hemi hi kan ram malsawmna a niin ka hria a. Chutiang malsawmna lo thleng chu engvang nge kan tih chuan hruiatuin a hrui dik vang a ni. Chuvangin vawinah hian heng demand pahnih te hi kan district tan leh kan ram tan malsawmna an nih em avang hian han sawi a han pass pui atan kei chuan karawn thlawp a ni tih karawn sawi e. Pu Deputy Speaker ka lawm e.

DEPUTY SPEAKER : Dr. Ngurdingliana.

DR. NGURDINGLIANA : Pu Deputy Speaker, ka lawm e. Year of consolidation (Insawhnghehna Kum) tih atang hian Pu Deputy Speaker, kan tan lawk ang a. Nichina kan member zahawm tak Pu Joseph Lalhimpuia rawn sawi atang khan ka vei zawng tak kan Chief Minister demand kan sawiho bawk a, a rem vek bawk a, kan sawi ang e.

A hmasa berin Pu Deputy Speaker, tunah hian kan ram ah hian thalai kut hnathawk thei kum 19-60 hi za ah sawmnga pali kan awm a ni. Tuna kan budget kan rawn present atanga kan ram kalphung tur kan Finance Minister-in a rawn sawi kum li kum nga chhunga insawhnghehna kum a tih nen hian a inmil chho in ka hria a. New Economic Development Policy tarlan ah khan Mizoram hi a mihring chhiarpui lamah kan tlem lai ber a ni bawk a. Khatiang sum tam huk si lo mahse inrenchem deuh, a tulah hman tur thla hual nei bawk si a kan kal mekna ah hian policy mumal tak central atangin a lo kal nawn awn awn a, start-up te kan ti a. Chutiang chu Mizoram ah pawh hian kan nei dawn niin a lang a. Amaherawhchu kan ngaihthlak tawh ang khan tunhma atanga hetiang entrepreneurs tih hmasawmna tur kawnga sum pai, sorkar a ni emaw, bank a ni emaw, khawi atangin emaw kan pek thin ah hian a rulhna kawngah kan ngaihthah leh si avang hian institution tam tak hi an tawmim em maw ni chu aw a tih theih a ni. Mahse khami boruak lai tak nationalised bank, SIDBI a ni emaw, an rilru sukthlek kha tun

thangthar rilru nen hi chuan kan kalsan tawh a ni. Tunah hian kan thalaite hna la thawk lo entrepreneurs tam tak te; tin, sorkar officer eng department ah pawh, hemi younger generation hi chuan hmahlir thuitak an nei niin ka hria. Tunhmaa zelthel deuh a sorkar atanga tanpuina kan neih te zuzi a luangliam ta mai ang kha a ni tawh lo. Tunah chuan eng sector ah pawh Agriculture a ni emaw, Forest a ni emaw, Education a ni emaw, I.T. sector-ah a ni emaw mahnia intunnun a midang tana hna siam thei tur zawka thluak tha, mi taima/dedicate hi kan ngah lutuk a ni. Chuvangin, tun economic policy kan beih mek ah central atanga tam tak lokal turah hian kan bank te pawh hi he House kaltlang hian Pu Deputy Speaker, in hawng turin ka ngen ngawih ngawih a ni. Tun kum 5, kum 6, kum 7 era kha chu a zo tawh, tuna kan thalai te hian challenge, chona hi an hmachhawn ngam a ni tih kha bul tan nan ka rawn sawi duh a ni.

Demand ka sawi hmasak ber duh chu demand no. 45-na PWD-ah hian a ni a. PWD hi kan inngahna an ni a, nuamsa taka kan zin veivah nan te, kan bungrua, kan ei leh in kan phurhna tur, kan duhna taka min thlen tirtu department an nihna ah an hmalakna hi chhuanawm ka ti a. An hnathawh te leh an hmachhawp te ka lo chhinchhiah thlap a. Tin, an hmachhawp leh zel te, eng agency nge an hman dawn tih te pawh fel takin an rawn chhawpchuak a, hengte hi tawite in ka tarlang duh a. A hmasa in tun financial year chhunga PWD-in rampuma kawng an laih chu 62.440 km an covere hman a, black topping hi 109.942 km an covere hman a, culvert hi 152 an siam zo hman bawk a, retaining walls hi (RM tih hi technical mi ka nih loh avangin ka hre chiah lo a) 7213.74 m, a pawisa hu pheih chuan ₹ 129.537 crore an zo hman a ni Tin, lei hi ₹ 43.64 crore in lui 4 an dawh zo a. Tin, road works hrim hrim ah ₹ 3633.32 crore sengin an lai zo hman a. Tin, building tuna an sak mekte nen ₹ 148 crore an sa mek bawk a, sorkar building 22 lai an zo fel hman bawk a ni.

Tin, hemi piah lamah hian a khaw bil chuan ka rawn sawi lo ang a, tun 2016-2017 a an hmachhawp te hi a tam khawp mai a, khawthlang lamah khuan a tam bawk a, chhim lamah a tam bawk a. Tin, hemi bakah PMGSY-ah ringawt pawh 77 crore

an propose a. Tin, NLCPR te, NEC, DoNER, JNNURM atangin nichina member zahawm tak Dr.K.Beichhua sawi lei siam tur chungchang pawh kha he mi scheme ah hian an rawn dah vek mai a ni. Chu chu bihchian chuan a hriat theih a.Chuvangin, PWD hi tuna an hmalakna ah chuan kei chuan an chhuanawm hle in ka hria a, lawmthu kha chu hmanni ah Supply Department demand kan sawi ah khan ka sawi tawh a. Kan bialah pawh hna tam tak kal mek a awm a, kal leh zel turte pawh. Khang kha kan bial bik chauh ngaihtuah ni lo in a ram pum huap khan hma la zel se tih hi duhsak takin nangmah kal tlangin ka chah a ni, Pu Deputy Speaker.

Demand no. 39-na Power & Electricity-ah hian ka lut duh a. Kumin 2015-2016 kan kum hman mekah hian kan install capacity power hi 29.35 mega watt a ni a. Hei hi a chhan chu heta report-a kan lo hmuh ang khan tun hnaivai maia kan beisei Tuirial 60 mega watt-a 12% kan chan tur te; tin, Kawlbem SHCP 3.5 mega watt pe chhuak turte kan beisei a, Kawlbem te, Tlawva te, Tuiriza te kan beisei avang hian state dang atang pawhin Power hi kan lei tam lo niin a lang a. Matric exam ten eng hnuai lehkha an zira an exam theih nan Power department hian state dang atangin ₹ 50 lakh hu an lei te pawh kha vawiinah Pu Speaker, nangmah kal tlangin lawmthu sawi nan remchangah ka la duh a ni.

Power chungchangah hian Tuirial hi kumin kum tawp lamah kan beisei a, amah tanpuitu tur khan project nichina kan han tarlan Tlawva te, Tuiriza te, Kawlbem te kan nei baw k a. Tin, kumina report-a a lo lan dan khan Tuirini pawh tunah hian buaipui mek a ni a, chung chu a mimal tak pawhin ka bial chhunga awm a ni a. Hemi bakah Tuivai, tunah Memorandum of Understanding tih tawh vek, mahse statutory clearance tlem kan la bak avangin a la tih theih loh a, mahse kan beisei hnai viau a. Tuna a hming ka rawn tarlan ah hian Pu Speaker, kan in sawrbing chuan tun kum 3/4 ah hi chuan power-ah hian kan intodelh a rinawm em em a ni. Chuvangin, kan sorkar hmalakna he lai ah pawh hian tha ka ti a, lawmawm ka ti tak zet a. Mahse ka hlauhthawn ber chu zelthelna boruak nichina ka rawn sawi, start up project eng anga tha pawh central-in min

rawn pe se kan thalaite inbuatsaih tawh reng, tunhmaa kan zelthel vanga bank te pawhin min tanpui ngam lohna thin bawk kha a ni a. Mahse kha boruak kha a reh tawh hi chuan kan hmalam hi a eng in ka hria a, chu chu ka'n sawi ni se.

Tin, ka sawi duh leh chu kan sorkar chak takin thil hrang hrangah hmachhawp a rawn nei a, hemi in a ken tel a tha ka tih chu measures kan tih ah hian transmission lost hi a lo va nasa em ve aw ka ti a, hei hi a remedial factor kan hotute hian an hre thei em? Sum vaibelchhe tel kumtin a luangliam hi pawl ka ti a, inrenchem hun kan tih mek laiin pawngpaw inthlahdah vanga a luangliam hiau hiau hi check dan a awm theih chuan a lawmawm ngawt ang. Tin, chumi kalzel ah austerity measures-a ka sawi lan duh chu department hrang hrangin Health Department a ni emaw, Agriculture a ni emaw, a dang chu ka sawi lo mai ang example an ni, ka mean vang ni lo in. He laiah kan mi te mamawh eizawngtu kuthnathawkte tan khawl tha zawk an neih theih nan te, damlo ten awlsam taka an natna an hmuhchhuah theih nan khawl tha zawk te, a chi hrang hrang a ni ang. MIFCO lam khawl concern pawh hemia ka sawi duh chu, khawl kan lei hian Purchasing Board kan indin thin a ni mai thei, khawl lei phur fe fe hi kan tam.

Mipuiin nghakhlel takin engtiknge a rawn thlen ang tiin kuthnathawktu ten an khawl dawn tur an lo chang, damlo ten C.T.Scan emaw, a hrang hrang pawh a ni ang, an lo chang. Amaherawhchu, Aizawl, Mizoram a lo thleng ta cheng a, nikhat pawh awl lo khawl hi tunah hian kan khawl hnem lutuk ringawt. Vai thirchhe zawng hnena hralh tur a quintal phei chuan a tam viau ang. Hei hi chu sim theih ni se, sorkar sum, mipui sum kan hmang dawn a nih chuan a tha ber ber chi, chumi in a kentel tur chu kha khawl operate tur pawh kha train turin mi pakhat mai ni lo, mi pahnih mi pathum, a lo damloh hritlan palha chhawktu tur, khatiang khan systematic deuh in i kal teh ang u tih hi Pu Speaker, vawiinah he House kaltlang hian ka rawn ngen duh a ni.

Demand No. 41 leh 45 Sericulture leh Fisheries tawitea ka sawi duh chu Pu Speaker, sangha fish culture an ti a, tunah Serlui 'B'-ah NGO te nen, V/C te

nen hlawk takin an kalpui a. Kumin kal mekah pawh hian revenue nuai 13 lai te an hmuchhuak thei a, An revenue hmuhchhuah pawh a zat ve zat ve in NGO te leh V/C te leh Fisheries Department te khan an in sem a, tichuan, Fisheries chuan sorkar-ah a chhung mai a. Chutiang chuan tunah Tamdil ah te, Palakah te hma an la mek niin kan lo hria a, hengte pawh hi zau zawk, mipui tam zawk huap thei turin project lian han siam thei se tih hi ka'n ngen duh a. Tin, chubakah fish hatchery centre, Article 275 (1) of India Constitution an tih Ministry of Tribal Affairs atanga keimahni state ah chuan Social Welfare Department kaltlanga sum lo kal turah hian Lawngtlai-ah te, Saiha-ah te, Lunglei, Serchhip-ah te fish hatchery an din dawn niin kan lo hria a, kha kha khawthlang lamah te pawh a tih belh theih chuan tih belh dan kan Minister te, kan sorkar officer te khan an hria in ka ring a. Heng an hmalakna kan ngaihthlak tawh ang khan tih tak taka ti duh mihring hi an tam a, khang mi commitment inpe te kha chhawr tangkai mai hi department te chuan kan tih tur niin a lang.

Tin, a tawp berah chuan Sericulture Department hi department te deuh angah kan ngai a, kei pheih chuan tunhma deuh ah pheih chuan pangang khawi department ka ti mai thin a, pangang hlau chi kan lo ni bawk a, ka lo ngaihsak vak thin lova. Mahse a tul zia, a tangkai zia, an contribution khawthlang nunphung-ah kan han hriatchian hnu hi chuan ka zirchiang ve zel a. Fund allocation-ah, work schedule-ah emaw, demand-ah hmun chang tam lo mahse Minister te, department officer te hmangchang hriatna ah central atang pawhin sum tam tak an hailut niin kan hria a, hengah te pawh an thawhrimna ah te he House kaltlang hian ka'n fak duh a ni.

Tichuan Pu Speaker, kan House Leader leh kan Chief Minister zahawm tak demand leh Minister zahawm tak Pu B.D. Chakma demand te hi he House-ah hian pass pui turin karawn thlawp a ni e, ka lawm e.

SPEAKER : A lawmawm e. Tunah chuan Pu T.T. Zothansanga.

Pu T.T. ZOTHANSANGA : Pu Speaker ka lawm e. Kan Demand-ah hian kan Minister zahawm tak Dr. B.D. Chakma Department hi ka rawn sawi hmasa duh a.

Demand No. 35-na Fisheries Department ah khan a chungah lawmthu sawi ka duh a. Champhai-ah feed plant tha deuh mai tunah ruahmanna a nei a pawisa pawh a rawn sanction vek tawh a. Champhai khian khawthlang lam sangha kan ei pha ve lova, kan intodelh a ngai a, phai atangin sangha a lo kal a, khilai a lo thlen chuan a uih ti tih hman zel a. Chuvang chuan keimahni phai ngeiah sangha tui chi lehngal kan ei theihna turin a feed plant min rawn ruahman sak avangin an chungah ka lawm hle a ni tih kha ka'n sawi hmasa duh a. A chi siamna turte pawh nakinah kan la sawiho mek zel a ni tih kha ka'n sawi hmasa duh a ni.

Tin, Sericulture chungchangah khan session hmasa lamah ka sawi nasa tawh a, Muga kha a lo tha tawh khawp mai a. Assam ram khu khawvela a thatna ber hmun a lo ni tawh thin a. Amaherawhchu, sik leh sa lo danglam avangin khua a lo lum ta a, Mizoramah hian tunah chuan a tha tawh zawk a ni an ti a. Mizoramah muga that theihna turin a chaw tur Mizoramah kan nei tha em em mai si a, a chi a tha bawk si a. Khatiang khan zau takin Champhai District-ah te a hlawm hlawm in tunah hma an la chho zel a, a taka mipuiten an hmuh a an han thawk suau suau han hmuh hi chuan lawmawm ka ti khawp mai a, a hnenah lawmthu ka'n sawi duh bawk a.

Chutih rualin, Champhai Sasaw awmna ramah khian Oak Tasar an tih ang chi kha tih that leh te kan tum em tih kha nakinah min rawn react thei se ka duh khawp mai. Tunhma atangin Oak Tasar khi pangang awmchhun emaw kan

tih mai Champhaia an vulh nasat ber thin kha a ni a, kan kalsan viau mai ang tih kha ka hlau khawp mai a min lo chhinchhiah sak se ka duh a.

Pu Speaker, kan Chief Minister zahawm tak chan ah hian a hmasaa lawmthu ka'n sawi duh nachhan chu-Champhai inkhawmpui lian ah khan PHE, PWD, Power-ah khan nasa takin kan beisei aia tha in min rawn tihlawhtlin sak a. PWD te pheih chu ruahmanna awm sa lovin kan han ti deuh pawp pawp phawt mai a, a hnuah sawifel leh tur ang chi in. A chungah lawmthu ka'n sawi hmasa duh a ni.

Tin, chutih rualin Pu Speaker, ka'n sawi duh pakhat chu Assembly chungchangah khan tawng mawi lo a ni em lovang a, thenkhat chu first timer te kan ni ang a, training hi mumal tak khan kan nei lo niin ka hria a, training hi neih leh a tha em aw ka ti a, a chhan chu kan behavior hi nalh lo a awm deuh zeuh zeuh mai a, a bu kan chhiar taima lo niin ka hria a, kha lai te kha min lo chhinchhiah sak ka duh a. (SPEAKER : Parliament khu chuan training an pe a maw) Helaiyah training kan nei mumal lo aniang kan chhangche tlat zel. Chuvangin kha kha a that ka'n ring deuh hlek a, short course talin kan tih tur leh tih loh tur ang chi kha inhrilh hriatna awm se a tha in ka hria a.

Tin, member zahawm tak Pu P.C. Zoram Sangliana rawn sawi-kan driver te leh kan PSO te khuan Assembly hi en an chak ve em em a, in hnuai ah khuan bang dan ah en thei lovin an awm a. A lehpek ah chuan T.V. hi dah sak ve thei ila an pu te che vel an en ve chak a ni, Assembly-in min lo hriat sak theih chuan Pu Speaker, kan lawm khawp ang.

Tin, Demand 39-na Power chungchangah khan Pu Speaker, ka'n sawi duh chu, Mizoram hi kum 1986-ah state ah kan awm a, chumi hnuah chuan department hrang hrang te zingah Power hi a lian ber pawl a ni a. Chuti chung siin keimahnin office la neih chiangkuan loh, mi in luah mai mai hi ala awm deuh

nual mai a. A bikin Champhai-ah khian ram zau tawk tak, hmun tha tak mai kan nei a, khilalah khian mi in kan luah thluah mai a. NLCPR emaw hian ruahmanna hi han siam leh ta ila chuan mimala pawisa tam tak tak chhunglut reng lo khian keimahni building ngei kan sak hun hi kan hmahlir a ni tih kha ka'n sawi duh a ni. Ram kan nei tha a, a accommodate theih vek mai si a, khi khi kan hotuten min lo hriat sak sela ka'n duh a.

Tin, hei Champhai bialtu kan ni a, Champhai zawl atang khian tunah chuan Aizawl kan rawn chawm a ni deuh ber tawh mai a. Antam tui chi hang tak mai dam sawng sawng na a ni a. Chu chu Zoram mipui tan hian rawn thar chhuah zel kan chak a, phai zawl tuipui dungah khian electric ban tam tawk khi kan mamawh a, khilalah khian power-a Tuipui ami tui han lakchhuah hi kan mamawh khawp mai a, khalai te kha min lo chhinchhiah sak theih chuan ka lawm khawp ang tih kha ka sawi duh a ni.

Tin, Pu Speaker, PWD chungchangah khan ka'n sawi duh chu Champhai leimin chungchang chawhma lamah te pawh zawhnaa zawh kha, khami leimin avang khan tihngaihna dang a awm der mai silova, tichuan kawng hran kha MLA Fund in kan rek tawp mai a ni. Khi khi PWD road-a puan a bawhzui ngai tak mai a ni a, work schedule-ah te kan lo thun ve leh ang a. Kha kha sawta tang chauh ni lovin hetah sorkar lam atanga ruahmanna fel fai zawk takin changtlung deuh taka kan tih theih hi kan beisei a. Km 1 leh tlem emaw a ni ang a. Chu chu ka'n sawi lang deuh hram duh a. Tunah khian kan laih mai bakah boulder, rora lian, engtinngan sawi chiah ka hre lova, rora lian pui puite kha kan dah chhuak vek tawh a ni, fund atangin. Khang kan lo kalpui tawhte kha min lo hriatpui ka'n duh bawka ni.

Tin, tunah khian ka bial Hnahlan tlangdung zawng zawng mai khi Champhaiah an rawn kal a, Aizawl an rawn kal hian a kawng a kual khawp mai a, km 250 chuang an rawn kal thin a ni. Amaherawhchu, direct link, hetah Hnahlan atangin

Tualcheng lam ah, Rabung lam ah khian ruahmanna awmin km 200 pawh tling lovin thlen theihna tur a ni a. Vanneihthlak takin kan CM zahawm tak hnenah te a thleng a. Anin nimin lawkah min recommend na tur NEC priority list-ah min telh sak hram turin ka request a. Ka lawm khawp mai a, kha kha ka'n sawi tel hram duh a. Khimi piah lehah chuan khaw 14, 15 khi Champhai tlawh kher lovin hnaiteah Saitual ah rawn tla thlain Aizawl lamah an kal ve thei dawn a ni. Khalai te kha ka'n sawi tel duh a nih chu.

Tin, Pu Speaker, Demand No. 47 Agri, MI-ah khan sawi duh ka'n nei leh a. Niminah khan Agriculture pawimawhna ka sawi nasa khawp mai a. Link road laih te, land levelling te kha ka sawi teuh mai a. Amaherawhchu, khatiang zawng zawng kha ti pawh ni ila, tunlai chuan tui hi a pawimawh ta ber mai si a, motor tha deuh nei ila, petrol nei si lo ila, thui kan tlan lovang tih ang deuh hi a ni a. Land development-te leh ring road te kan laih fel tawh hnu ah khan tui kan mamawh ber mai kha a la pawimawh reng mai a. MI-ah tunah hmalakna a awm chho dawn nia ka'n hriat hian kut kan lo beng lawk a ni. Chutih ruala ka'n sawi duh chu, kan MI hotu, kan official lamah te pawh Pu Speaker, ka'n zawt thin a, Zaila phai, Mizorama phai zau berte zing ami khi tunhmain ruahmanna an lo nei tawh thin a. Ama'rawhchu, khatih lai khan vanneihthlak tak kan ti dawn nge vanduaithlak kan ti zawk dawn, grape kha a rawn hlawk thut mai a. An tui tak rih loh em avang khan MI hotute khan an tin san rih kha a ni a. Tunah chuan chei thar leh theih a ni tawh a ni. Grape lamah an sang em em mai a, grape lam tlemin hnuchhawn rim kan nam leh tan tawh a. Tichuan MI atangin Champhai khi min rawn chei sak leh thei se kan ti hle a ni tih kha ka sawi duh a.

Phai hi kan ngaina khawp a, khawchhak lam chuan. In han kal chuan 'phai ro' tih vel hi hmingah pawh khian a tam a nia. Chuvang chuan khilai khi kan ngai pawimawh a. Min lo hriat ve hram ka duh a. Zilhri phai te, Tuiphaite, Dim Phei, Phaithlang, Vawng zawl tih ang reng vel, develop tur hliir mai khian kan la khat a, min lo hriat sak theih chuan ka'n sawi lang a ni.

Tin, Pu Speaker, Demand No. 15-na, GAD ah khan sawi ka'n duh chu, Champhai ah hian helicopter hi a kal ve deuh reng a, a full em em reng mai a. Hmun dang kan han en a, hmun dangah chuan kal mumal lohna te a lo awm nual mai a. Helaiah hian kar khatah Champhai hi vawi thum tal kal theih dan a awm em aw tih kha kan ngaihtuah a ni. Tunah khian helicopter-a kal tur hian thla khat te hi an in line zui mai a. Kei pawh helicopter-ah ka la chuang hleithei lo a ni, chuang duh an tam lutuk. Chuvangin hmun danga an chuan mang lohna leh chuan kim mang lohna, tlan deuh zeuh zeuh ai hi chuan Champhai ah hian nitin pawh kal se chuang tur kan awm ang tih kha min lo chhinchhiah sak ka duh a.

Tin, chubakah, tunah khian Sipai tlangah khian kan tum a. Hei, vanneihthlak takin kan hotute hma lakna in, kan CM zahawm takin a hma laknain Champhai zawlah khian helipad kan siam thar a. Tunah khian an zo tawh a, hmannah pawh kan zuk enfiah a, trial landing kha a tih theih tawh a ni. Chu chu office lam te pawh ka lo dawr leh ang a, trial landing theih hun hi kan nghakhlel a, tun dinhmunah chuan tlang chhipah kan tum avang khian, a weight category an siam avangin mi pakhat kan chuan loh ziah a ngai a ni. Entir nan, panga chuan theihna turah pali kan chuan te a ngai a. Elevation a han sang lutuk a, chuvang chuan harsatna kan tawk a. Phaizawla kan helipad khi Durtlang level chiah a nia tunah hian. Khimi a nih kha chuan a full in mihring kan chuang ve thei dawn a ni tih kha ka'n sawi duh a.

Tin, Pu Speaker, GAD-ah tho ka'n sawi duh chu Urban Area Rent Control Act kha term hmasaah khan Private Resolution-ah vawi hnih ka pulut tawh a, mahse vanduaithlak takin a tlang lo ve ve a. A ziaka a lan dan chuan kum 1974 March thla daih tawh khan Mizorama hman theih turin pass a lo ni tawh a ni. Amaherawhchu, han enchian deuh hlek khan amend a ngai a. Tlema amendment han siama effective deuh taka han siam dan kha a awm a ni. Hei hi ka lo zir nasat deuh tawh avangin a tul ka ti a. Tin, a victim hi ka ni ve tawh hrim hrim a. Gauhati-a ka awm laiin mi in ka luah ve tawh a. Chutah chuan lehkha minrawn pe a, 'I chhuak thei tawh a ni. Kan hnawtchhuak a

che, naktuk atangin chhuak rawh, midangin an luah ve duh tawh e,' min rawn ti tawp mai a, a titu kha doctor a ni a. Kei kha ka lo inti dan hre ve deuh bawk a. 'E khai, chuti maia chhuah chi ka ni hleinem, hei Urban Area Rent Control Act hi lo en ve phawt rawh', ka tia, a copy kha ka xerox a, ka lo pe a ni. Khami avang khan thla hnih hi chu ka la luah dawn hrim hrim ka ti a. Tichuan min hnawtchhuak thei ta bik lova. A chhan chu notice te kha two months ah te pek a lo ngai a. Kan tihna zawn ve deuh hlek a lo nih avang khan kan han inlek ve deuh hlek kha a ni a.

Aizawl ah hian nichina kan member zahawm tak Pu R. Vanlalvena'n a rawn sawi ang khan duh duh zat hi in luah manah hian kan chhiar emaw tih tur a ni a. Mi in kan va luah dawn a, 'engzatnge i chhiar,' kan ti a, 'ngawi rawh, ka ni te kan han rawn phawt ang e,' te an han ti a. A ni te khan duh zat zat kha an lo tuk tawh mai thin a, khatiang ang chi te. Tin, 'naktukah chhuak tawh rawh, kan naute an lo pemthla dawn a,' tih te, a mipui hi kan rethei lutuk a ni. Chuvang chuan dan mumal hi kan mamawh tak zet a. Urban Area Rent Control Act hi kan tuaihnum deuh a, tlema amendment siama Mizoramah hian kan kalpui ve a ngai a ni. 1974 a kan pass ang ngau ngau erawh kha chu Assam ta kha kan copy chhawng tawp kha a ni mai a. Chu chu Meghalaya pawh khuan an copy deuh tawp mai a. Keimahni milin, kan ram milin, keimahni in kan zawh tawh angin keimahnin kan siamrem ang a, chumi hnu-ah chuan kan ti thei a ni tih kha ka rilru-ah a awm a ni.

Tin, Pu Speaker, han sawi tel hram ka duh chu, thingtlang lam chungchang hi thingtlang lam bialtute hian kan sawi hnem a, vawiin hian Aizawl nuam i siam ang u, tih hi ka rilru-ah hian a awm tel a ni. Aizawl nuam hi kan siam a ngai. Hmun hla te kan han tlawh a, khawhawite a lo zau ve ta deuh a. Mi ram nawm zia te, a thianghlim zia te, kal leh a chakawm zia te hi ha-hip in kan in hrilh thin a. Tunhma te pheih kha chuan ram hla deuha kalte kha chu kohranhote pawh khan report an pekte kan ngaithla thin kha a ni a. Amaherawhchu mi kan lo changkang ta deuh a, khatiang em kha chu a awm tawh lova, chu chu ka rilru-ah a awm a.

Ka hriat reng chu, Shillong-a kan awm laiin Rev. K. Lungmuana hi Pyongyong, N. Korea-ah a han kal a, a fai zia te, a fel zia te engkim mai kha arawn sawi a, vawiin ah hian ka bengah hian a thil sawi kha a la awm reng a ni. Khawvel ram dang thianghlim zia leh an in uluk zia te leh discipline an neih that zia te kan chhiar thin a. Hmundangah te kan kal a, fai takin kan awm a, Mizoram ah kan lo hawng a, kawtlaiah bawhlawh kan paih leh mai a. Mizoram hi a nuam ve thei a ni, Zoram nuam siam turin khuta engineer emaw, mithiam tak tak leh thil ti thei tak tak kan ngai lo, keimahni theuh hian Zoram nuam hi kan siam thei a ni tih kha kan hriat a pawimawh a.

Tunah hian kan khawpui tawp zia leh a tawt tawh zia, ek cheh thut in kan thu ringawt a, taxi in tlanchhawk ila kan thawl sawt ang kan ti a, eng pawl pawl emaw hi kan lo tam si a, tangrual tham hi kan lo awm zel si a, Zoram nuam hi kan siam tak tak dawn a nih chuan huaisen takin hard decision hi kan siam a tul tawh a ni tunah hian. Pu Speaker, tunah hian nangmah kaltlanga ka ngen duh chu Zoram nuam tak siam tur hian mimal theuh hi kan pawimawh a ni tih kha ka sawi duh a ni. U.S.in independent a beih lai khan (Pu Speaker, khi a zo tep tawh a, min zawh tir mai rawh aw, ka nek miah lo ang che u khalam kha, lo hlau suh u). America-in independent a beih lai khan nasa takin an bei a, British atangin an tal chhuak a. Khatia an tal chhuah hnu rei lo te ah khan an awm khawmna leh an hmunpui ber Philadelphia kha a hnu lawkah chuan khaw tawp, khaw tenawm, mi te nuihzat, mi te hmuhsit leh tenawm sawi nan an hman thin a ni Philadelphia kha an nuihzat em em mai a. Chutih lai chuan mipa panga kha restaurant ah an kal khawm a. Chuta an kalkhawm na ah chuan “E khai, keimahni theuh hi kan lo ni” tih kha an sawi chhuak a, chu chu “The Triumph of five angry men” mi thinrim panga te hlawhtlinna tih kha Reader Digest-ah khan Chiang takin a in zia k a. Khami te khan an khaw tawp chhan ah khan midang tumah an va puh tawh lo reng reng, keimahni vek kan lo ni, keimahni vanga tawp a lo ni, keimahni in hma kan la a nih si loh chuan tuman hma minrawn lak sak dawn lo an ti a. Tichuan, an mahni khan hma an han la chho tak tak mai a. Philadelphia chu America ram ah chuan khaw nuam, khaw thianghlim, khaw tlawh chakawm, mi te pawhin hmuh an chak kha a lo ni ta reng mai a ni.

Miin an tih theih chu engatinge Aizawl ah hian kan tih ve theih lo ang? Decision erawh chu huaisen taka kan lak a ngai ang. Hei hi ka rilru ah hian a lian khawp mai. Aizawl hi kan duh chuan kan siam ve thei a ni, miin an tih theih chuan kan tih ve theih lohna chhan tur a awm lo. Chhura chuan Naa kha fing a ti lutuk, Chhura kha chuan thei a lo dawn a, a kuai kur a, theirah te kha an khawih vel thin a, ‘Nahaia chu ni se, tihian a lo mai tur,’ a ti a, Nahaia a nih loh avang khan a lo thei tlat lo mai a ni, a lawh theih reng kha. Khatiang deuh hlek kha kan ni tunah pawh hian. Kan ram khawpui pawh hi tunah hian han sawi ila, Japan khawpui chu ni se, Korean ho chu ni se kan ti a, hnam dang tihtheih tur ah hian kan ngai tlat a. Engatinge keini hian kan tih ve theih loh ang? Chu chu vawiin ah hian kan ngaituah ho ka duh.

Dik tak chuan Mizo mipui te hi han in ngaituah chiang ve ila, tumah hi kan sual tak tak lo, thu pawh hi kan awih khawp mai. Christmas-ah halpuah hal te kan chak kan ti thin, mahse “tun kum chu hal lo ang u” kan tih chuan thu kan awih dial mai. Kan zinga a sual ber pawh hi Christian kan nih na hian min lo hliahkhuh a nih hi ka ti mai a. Dawhkan hmaa fel taka rel fel a nih hi chuan tumah hi sak lutuk kan awm lo. Mizo te hi kan rilru a nem a, kristianna hian min luahkhat tlat a. Chuvangin dawhkan hmaa kan indawr dan a fuh phawt chuan thil har lutuk hi a la awm lo in ka hria. Chu chu kan hman tangkai pawh hi a tha ka ti. (SPEAKER : I sawi rei viau tawh lo maw? Khi minute li chauh a awm tawh a. Speaker : Dar li thleng kan nghak ang che) Pu Speaker, ka sawi tam tawh dawn lo, ka in buatsaih dan phei chuan ka sawi tur chanve chauh a la ni. A chhan chu kan Aizawl hi a veiawm lutuk a, “Durtlang ka han kal teh ang” kan ti a, darkar khat te kan kal a, hmun ralmuang te chu ni se, kawng sirah motor te hung thep thup lo ila chuan minute sawm leka thleng tur hian darkar chanve te kan hmang zel si a. Hetiang ah te pawh hian hma kan lak a ngai a ni. Sawi tur a tam si a, USA-ah te khu chuan an huai khawp mai. Hmanni lawk pawh khan John Kerry, US Secretary of State kha a kawt ko a then fai loh avangin an hrem a, pawisa an chawitir a ni. Khatiang te kha a lo ni a. Tunah hian ka rilrua awm dan takah chuan Sikkim te,

Kohima te, Shillong te, Itanagar te ai hian kan dinhmun hi a tha fe zawk. Direct in Delhi kan pan vek thei, kan khaw than zel na turah pawh hian kawngro a su lutuk, miten nikhat leka a rawn pawh theihna ringawt ah pawh hian nasa takin khualzin te kan hip thei a ni. Aizawl ah mi an lo kal a, nuam an ti a, an han cham deuh a, engtingge in khua hi in tih nawm zual theih ang an ti a, an thu hnuhnung a ni ziah mai, chu chu home work-ah min pe a.

Keini hian engtinge kan tih ve ang? Kan ram nuam siam tur hian tih theih tam tak kan nei. A dik tak chuan Maxicab stand khaw pawn ah dah ang te kan han ti a, khawchhunga dah te kan han duh leh a, hengah pawh hian sawi ho tur hi a tam lutuk. Thingtlanga kal tur Aizawl atangin kan han chhuak a, Zemabawk dai kan pelh meuh chuan darkar 2 ten kan lo tlai tawh a. Kan kal hun pangngai Champhai pawh tun hma chuan darkar 5 darkar 6-ah kan thleng kan ti a. Tunah darkar 8 aia hmain kan thleng thei tawhlo reng reng. A chhan chu helai khawpui traffic tawt vang vek hi a ni a. Keimahni leh keimahni vang a ni a. Disaster Management lam atang te pawhin chhiat rupna pawh hi lo thleng mahsela kan police te hi an tha lo, an fello kan tihna ni lovin, an che thei dawnlo hrim hrim, a hnawk lutuk kal kawng hi Emergency-ah damlo chungchangah pawh kan member zahawm tak ni thin Pu Thena sawi ka hriat reng pakhat chu, ‘nakinah chuan khawpui a tawt lutuk avangin mi hi kan la thi kan la thi ang, a tawt vang hrim hrim a thi nilovin damdawi in kan thlen hman loh avangin kan thi fo dawn a ni,’ a tih kha ka la hria a ni.

Chuvangin vawiinah hian kan Zoram, kan Aizawl khawpui bik hi nakinah mi te pawhin nuam an rawn tih ve na, tlawh an chakna khawthianglim, khaw fai, khaw discipline kan nih ve theihna tur in khawngaih takin vawiinah hian kan rilru i siam ang u. Keini hian vawiinah rilrua kan siam a nih loh chuan, tu emaw nakina rawn lal tur emaw, helaia thu emaw khan a rawn siam ngawt dawn lo. “Five angry man” kan han tih ang chi hoin an tih ang deuh hian, ‘keimah hian mawh ka phur a ni’ tia kan tanna atang hian he

kan khawpui hi kan siam thei dawn a ni. Pu Speaker, sawi tur a tam a, kha kha ka sawi theih ni rih mai sela, demand-te ka thlawp a, ka lawm e.

SPEAKER : Hei dar 4 a ri mai dawn a, mahse kan zawh hram a ngai dawn a, chhunzawm zel ang aw.

Pu LAL THANHAWLA, CHIEF MINISTER : I hrelo palh a ni mai thei a, nichin Deputy Speaker ho a kan thut laiin, kan Deputy Leader Pu Zira khan dar 4-ah thingpui in in chawl ila, kan rei deuh palh takin a ti a. Kan zavai atan thingpui a buaisaih a nih ka ring.

SPEAKER : Awle, kan vai atan a nih chu, chuvang chuan i chhuak phawt ang luh lehah kan sawi dawn nia. A nih minute 15 a tawk em? Darkar chanve a? A rei lutuk lawng maw?

Pu LAL THANHAWLA, CHIEF MINISTER : Pu Speaker, i awmlah hlan khan helai ami ho hian kan lo pass vek tawh a.

SPEAKER : A reilo maw, awle, darkar chanve kan chawl dawn a nih chu, chumi hnu ah kan lut leh ang. Recess at 4:00 P.M.

4 : 30 PM

SPEAKER : Pu Dinga'n sawi tawh sela.

Pu S. LALDINGLIANA : Pu Speaker, sawi tur tam tak pawh ka nei lova, lawmthu sawi ka duh a. Tin, ngenna tlem siam ka duh bawk a. Chumi hma chuan Pu Speaker, Demand No. 35 Fisheries-ah hian kan hriat angin Zobawk, Lunglei bulah sawn sangha dil, sangha farm tha deuh mai sorkar in kan nei a, enkawl chhoh mek a ni a. Sawta tang sawn sangha chi hi kum tin engemaw zat tharchhuah ve a ni a.

Amaherawhchu, kan la indaih vak lova. Nichinah khan member zahawm tak tak te khan an sawi nual a. Sangha chi kan indaih loh dan te, duh aiin a te tih te leh khatiang hrang hrang kha sawi a awm a. Tunah hian Tawipui North-II dai hnaite-ah sawn fish farm tha deuh mai tunhma-a sorkar in a lo enkawl tawh thin, tunah hian hluihlawn tak Zo Fishfed ah khan an pe a, ama'rawhchu, Zo Fishfed ho pawh khan an enkawl tha tak tak chuang lova. Saw saw Pu Speaker, a hmunah kalin ka va tlawh tawh a. Sorkar hian kan la let leh a, kan enkawl thei a nih chuan, sawta tang sawn sangha chi tam tak a thar chhuah theih dawn a. A hmunin a zir em em mai a, a bikin Lunglei leh a piah lam zawng zawng saw a chawm thei dawnin kan mithiamten an sawi a. Hei hi thar thawh leh theih ni sela a tha hlein ka hria a ni.

Tin, GAD, Aviation chungchang thu-ah khan Pu Speaker, han sawi ve hlek ka'n duh a. Airport chungchang thu-ah hian kan hotupa, kan House Leader hian thahnem a ngai khawp mai a. Chhim lamah airport puitling a awm theihna tur in nasa takin hma a la a. A hmalakna-ah te pawh keini pawh a changte chuan kan han kal ve dawrh dawrh thin a. Kan hriat angin Saitluk-ah term hmasa atang khan airport siam tumin kan bei nasa tawh a. MNF unau-te pawhin an sorkar lain bul kan tan e an ti a, tan pawh an tan niin a lang a, ama'rawhchu, tih tak taka hmalakna a awm lem lo a, ralkhat atanga thlir mai kha a ni a. hei hi kan sawi tawh thin a. Engpawhnise, Saitluk hi airport siam puitlin theihna hmun a ni lova. Kan engineer ten a hmunah kalin an enchiang tawh a. Hemi zawhah hian Thlisam kha kan han ti leh a, Mualcheng South ram kha Pu Speaker. A hmunhna chuan a zo a, ama'rawhchu, vanduaithlak takin crosswind kha a awm ta tlat mai a. Kha vang khan kan mithiam, kan engineer te khan siam theih a ni lo ve an ti a.

Tunah hian member zahawm tak Dr.K.Beichhua khan a rawn sawi a. Kha mi bakah khan chhim lamah hian khawthlang lamah Saihum Tlang an tih Vaisam leh Bukdawn inkarah sawn hmun pahnih a awm a. Pakhat chu Tlangdungsei an ti a, pakhat chu Saihum Tlang an ti a. Saihum Tlang hi 7 km zeta sei a ni an ti a, a hmunah kan la kal lo a. Hei hi kan hotupa hmalakna in Aviation official te kan hriattir tawh a. Remchang

hmasa berah a tul ang angin aerial survey te leh ground survey te pawh neih tumin tunah hian kan buaipui mek a ni tih kha ka'n sawi lang duh a ni.

Tin, power chungchang hian Pu Speaker, sawi tur tam tak a awm a, amaherawhchu, hei hi kan sawi tam tawh a. Thil pahnih khat lek sawi ka duh a. HPC-a kan hotupa hmalakna-in tunah hian Lunglei chhuah lampang, Lunglei atanga 20 minutes lek kalah sawn Nghasih zau kan tih a awm a, chhungkaw 30 chuang leilet leh huan nghet nei an awm a ni. Sawng ho sawn power an mamawh em em mai a. HPC kaltlang hian kan hotupa hmalakna-in tunah hian power pawh luh a ni tawh a. Hei hi a lawmawm khawpin ka hria a. Vawiin-ah hian he House zahawm tak kaltlang hian lawmthu ka sawi duh hrim hrim a. A bik takin sawlai ram nghet nei leh leilet, huan nghet neite saw an lawm em em a. Lunglei thlasik thlai a chawmtu a ni a sawlai hmun saw. A lawmawm tak takin ka hria a ni.

Tin, he mi baka ka'n sawi leh hram duh chu Pu Speaker, Lunglei khawpuiin a hming a put chhan, Lunglei saw Nghasih zau chhak lawkah sawn a awm a. Lungleia kan mi pawimawh i ti mai teh ang, a bik takin kan mi senior te ho sawn saw saw chei that a, entheih tura siam a buatsaih hi an duh em em thin a. Tin, a hmingin YMA hruaitu kan nih laite pawh khan chei that a, Aizawl atangte leh Mizoram hmun hrang hrang atangte leh ram pawn atangte pawh a lo kal khualzin ten en an duh thin a, kawng tha a awm bawk si lova, chu chu High Power Committee kaltlang in tunah hian cheithat a ni ta a. A hmun thlengin kawng laih that a ni a.

Tin, electric eng te pawh Nghasiha pawhluh ang chiah khan, Nghasih zau electrification Phase-II ah khan tunah hian pawhluh a ni tawh a. Hei hi a lawmawm hle-in ka hria a. Heng zawng zawng kan sawi thin hi Pu Speaker, kan hotupa, kan House Leader min duhsakna in Lunglei-ah Lunglei High Power Committee kan nei a. Kumtinish leh pai thahnem tak, hmasawna hna thawhna turin min pe a. Hei hi tangkai takin District hian kan hmang chho mek a. High Power Committee term hmasa-ah khan

department hrang hrang office la neilo te leh quarter la neilo te, khatiang ho kha sak sak an ni a. Tunah pawh hian Vety Department te, Soil te, Health Department te, heng office la neilo te leh quarter la neilo te engemawzat hi tunah hian buaipui mek an ni. Hetiang hian he High Power Committee kan neih hi tangkai takin hmasawna hna thawh nan kan hmang a, kan lawm hle a ni tih hi vawiin-ah hian ka'n sawi lang duh a ni.

Tin, chumi rual chuan Pu Speaker, High Power Committee hmalakna kaltlang bawkin tunah hian Lunglei atanga hnaite Diltlang pawh tur sawn kawng laih kan tum a ni. A concept note kan siam a, Planning-ah kan thehluh tawh a. Lunglei atanga Vaisam saw 25km chauha hla a ni a. Ama'rawhchu, kawng a chhiat em avang sawn darkar 2 chuangte kal a ngai a, fur lai phei chuan a kal theih loh. Tin, Vaisam atang sawn Diltlang pawh tur hian lui kan awm miah lovin 26 km lekin a thleng thei baw a. Chutiang a nih chuan Lunglei atanga Diltlang thleng tur sawn helaiah hian kawng kan siam thei a nih chuan 60km tlinglo in Diltlang saw awlsam-te in kan thleng thei dawn a. Kan sawi fo thin Look East Policy, Look Act Policy kan tih tak, Kaladan Multi Model Transit Transport Project pawh saw lo puitling ta ni se, hnaite-in Lunglei atang in he kawng hmang hian bungrua kan phur lut thei dawn a ni. Chuvang chuan, hei hi tunah hian a pawimawh hle-in kan hria a. A concept note kan thehluh tawh hi he sorkar hian theihtawp min chhuahpui a, min tihpuitlin sak turin vawiin-ah hian ngenna ka'n siam a ni.

Tin, Pu Speaker, chu mi pah chuan Vaisam ka'n sawi takah atang khan a chhak lawk kha Sailen khua a ni a, chu chu 7km chauh a hla a ni a. Helai hi kawng awlsamtea laih tlang mai theih, Sailen lam atang phei chuan a thlang lawkah ramri, Phairuang lui hnar thleng khan kawng an rawn lai tawh nghe nghe a. Pawisa tam tak pawh sen ngai lovin helai kawng hi laih tlang theih niin a lang a. Chutiang a nih chuan, Sailen atang hian Zehtet-ah, Zehtet atangin Rualalung-ah. Rualalung thlang mai kha Chawngte a ni ta a. Tichuan, Chawngte kalna atana darkar 5, darkar 6 kan hmang thin hi, helai kawng 7 km chauha thui hi kan lai tlang thei hlauh a nih chuan Chawngte hi

awlsam te-in darkar 2 lekah Lunglei atangin kan thleng thei dawn a ni. Chutiang chu thil awm dan a ni a. Hengte hi tih hlawhtlin theih a nih chuan a lawmawm dawn em a, ka'n sawi hrim hrim a ni.

Tin, chu bakah chuan Pu Speaker, term hmasa tawp dawn lamah khan kan House Leader zahawm tak in hma min laksakna zarah Lunglei Kawmzawl ah sawn 33 KV Sub-station, SPA atanga sum kan hmuh, sum min siam sak atangin kan siam a. A lawmawm kan ti khawp mai a, kan lawm hle a, vawiin-ah hian lawmthu ka sawi a. Amaherawhchu, saw mi aia mamawh kan la neih tak chu Lunglei chauh ni lovin, Lunglei piah saw tah, Saiha piah thlenga kan mamawh a ni a, 132 KV Sub-station hi sawlai hmunah sawn kan mamawh a ni. A chhan chu tunah hian sorkar ruahmanna-in Melriat atangin direct line in 132 KV line hi a lo phei dawn a. Tunah ban khurte pawh lain, ban te pawh phun tan tawh a ni. Pu Speaker, kan hriat angin Bukpuiah a chhiat chuan chhim bial pumpui an thim reng mai a ni. Chu chu sawlam in kan au hla leh kan lungawilohna ni fo thin kha a ni a. He sorkar ngilnei tak hian hriain tunah hian Melriat atangin direct line an pe dawn a, pawisa te pawh sanction a ni tawh a, tunah hian buaipui mek a ni. Chumi lo dawngsawng thei tu tur 132 KV Sub-station emaw hi Kawmzawl ah sawn kan mamawh em em a ni. Tunah hian 33 KV Sub-station kan nei tawh a, hei hi pawisa engemaw zat sengin upgrade leh in 132 KV Sub-station siamin Melriat atanga 132 KV line lo kal tur lo dawngsawng thei tur tunah Lunglei leh a piah lamah sawn kan mamawh em em a. Hei hi min ngaihtuah sak leh thei se tiin vawiinah ngenna ka'n siam a. Khawiva ah sawn a lut leh a nih chuan sawi tawh ang khan Khawiva saw kawng a chhe em em a, transformer chhia pakhat pawh in phur chhuak turin thiah vek loh chuan a phurh chhuah theih tawh loh a ni.

Tin, chumi bakah chuan Pu Speaker, Khawiva saw a kawng chhiat chu thu dang ni se, a hmun saw a hrisel lo em em a, Malaria area a ni a. Tin, tui thianghlim in tur a awm tawh lo baw k a. Hei hi department-a thawktute pawh hian an hrechiang em em a ni. Chuvangin awm loh theih loh a lo nih pawhin he 132 KV line

lo thleng pheii tur lo dawngsawng thei tur hi chuan tuna 33 KV Sub-station kan neih saw upgrade chu tihmakmawh a niin ka hria a. Sawng te pawh saw tih theih a nihna turin vawiinah ngenna ka'n siam duh a ni e.

Pu Speaker, vawiinah hian kan Chief Minister zahawm tak demand leh kan Minister dang demand te hi ka han support a ni e.

SPEAKER : Awle, Pu Nihara.

Pu NIHAR KANTI CHAKMA : Pu Speaker, ka lawm e. Vawiinah hian kan Chief Minister zahawm tak demand leh Pu B.D.Chakma, Minister-te demand kan sawiho a ni a, thu tam tak sawi tur chu ka nei lova. Amaherawhchu, ka ngaih pawimawh zual tlemte chu ka'n sawi ve ang e.

Pu Speaker, a hmasaa ka'n sawi duh chu, Assembly chungchang a ni a. Member zahawm tak tak te'n an sawi nual tawh a, Pu Speaker, nangmah kaltlangin a bikin Assembly-a hnathawkte a hniam ber atanga a chung ber thlengin lawmthu ka'n hrilh a ni. Assembly hi sawi ta ila, MLA In pui a ni a, an efficient em em a, punctuality an nei bawk a, discipline an nei bawk a. Tin, subject hrang hrangah tum an nei a, chuvangin nangmah kaltlangin lawmthu ka'n sawi duh a ni e.

Tin, Pu Speaker, ka hriatsual loh chuan ka pa dam lai 1975 khan U.T. hunlai kha hemi Assembly-ah ka luh hmasak ber tum a ni a, chumi hun lai chuan Assam type a ni a, tunah chuan khami thiah hnu ah hetiang hian ropui deuhin Assembly hi a kal chho tawh a ni a. Ka sawi duh chu Pu Speaker, entirnan hei mihring hi kan pung chho zel a, Assembly hi hmun zau deuhah sa thei ila tih ka ngaihtuah a, a chhan chu Assembly hi kan prestige a ni a. Assembly Committee hmingin hmun hrang hrangah kan zin fo thin a, state dang leh kan Mizoram hi kan ngaihtuah chuan gap hi a nasa khawp mai a. Chuvangin, nakinah entirnan sawi ta ila, kum 50/60

hnu ah chuan he mi House te pawh hi seat 60 te pawh ni chho thei a ni, a hmun hi a zim a, tun atangin ngaihtuah a ngai a ni e.

Pu Speaker. Chubakah tuna New MLA Hostel hmun te chu a tha hle a, kha kha thiatin ropui deuhin, entirnan, state dang atangin MLA te pawh an lo zin ve thin a, anmahni Hostel te leh keini MLA Hostel-te ngaihtuah chuan a gap hi a zau lutuk. Anni chuan changkang deuhvin an nei a, keini chu duh angin kan nei tha lemlo a ni.

Pu Speaker, GAD chungchang tawite ka'n sawi leh duh chu, kan hriat theuh angin Tlabung hi hmanah kha chuan khaw lar tak a ni a, Mizoram khawpui ah pawh pathumna a ni hial a, Aizawl, Lunglei, Tlabung tih kha a ni thin a. Tunah phei chuan Tlabung hian kan prestige hi kan lost nasa khawp mai a. Tunhma ami Sub-Division office te pawh a hlui tawh in sak that a hun tawh a ni.

Pu Speaker, Tlabung phei chu border area a ni a, engemaw chenah kum khatah vawi hnih/vawithum te flag meeting te an nei ve thin a, flag meeting-na tur hmun hi rin aiin an nei tha vak lo a ni, infrastructure hi an nei lo a ni. Chuvangin vawiin hi Chief Minsiter zahawm tak demand a ni a, remchangah hemi Sub-Divisional office hi min sak thar sak thei se tih ka ngen duh a ni. Nichin khan member zahawm tak tak te pawhin an sawi nual tawh a. Kawng chungchangah PWD hmalakna in Tlabung kawng Tlabung-Lunglei kawng hi kan life line a ni a. Hmanni-ah tender loh a ni a, reiloteah hawn that tur a nih kan beisei a ni. Chuvangin Chief Minsiter zahawm tak leh PWD hnathawktu zawng zawng chungah kan lawm thu ka sawi duh a ni. Tunah tender an kova, fur hma hian kawng hi an siam tha hman dawn lo a ni. Khawngaih takin fur chhung hian kawng tha kan neih theih nan hma min lak sak thei se ka duh hle mai.

Pu Speaker, hemi kawng hi life line a ni a, Tlabung thlen nan darkar ruk a ngai a, border area a nih avangin min ngai pawimawh thei se ka lawm khawp ang. Chubakah Tlabung hi helicopter service nei a ni a, mahse helicopter hi an service miah

lo a. Thla hmasa khan helicopter service tur angin kan ngai a, mahse tun thlengin a la service thei lo a pawl ka ti khawp mai a, kan Chief Minister zahawm tak hian hma min lak sak se ka duh khawp mai.

A tawp bera ka'n sawi duh chu Pu Speaker, kum tin hian Electoral Roll hearing revision hi an nei ve thin a. Mahse ka bialte hi sawi ta ila, a bial ang zawngin kan thalaite kum 18 tling hi India ram hmun hrang hrangah college te an kal thin a, hearing a an tel theih loh avangin Electoral Roll-ah hian an tel thei lo hi pawl ka ti khawp mai a, a nu leh a pa an din ngei hi chuan Roll-ah hian thun thei se ka duh khawp mai. Democracy ram a ni a, democracy-ah chuan Roll-ah an thun loh chuan right hi an nei dawn lo a ni. Anmahni awm kher lo mahse hriat chian a nih chuan thun thei se kan duh khawp mai. Pu Speaker, kha zawng kha ka sawi theih tawk ni se, demand te kha ka rawn support e. Ka lawm e.

DEPUTY SPEAKER : Tunge sawi leh ang le? Pu Ruatkima.

Pu LALRUATKIMA : Pu Speaker, ka lawm e, hei vawiinah kan Minsiter zahawm tak Pu B.D.Chakma leh kan House Leader zahawm tak Pu Lal Thanhawla te demand, a vaiin 13 kan han sawi a ni a. Kan Minister zahawm tak hian a hming bulah doctor a dah emaw ka ti a, kan lam tel dawn a, a lo tel si lova, min lo hrethiam sela, hetah a awm loh avang hian ka rawn lam tel lova.

Pu Speaker, fakna lam kan ngaithla tam khawp mai a. Kan sawi thin a, keini ang te hi chu khang zawng zawng khan min fak rawn ta se, min fak a vek tawh mai ang a tih tur ang mihring hi kan ni a. Chuvang chuan, fakna karah hian han inkhen zeuh zeuhna awm sela mihringte chuan kan ngeih zawk ni te pawhin a lang a. Chuvang chuan, helaiah hian thahnemngaihna, kan ram leh kan hnam tana thahnemngaihnaah hian theihtawp kan chhuah tlang zel a ni tih kha min lo hriat hmasak ka duh deuh a ni.

Pu Speaker, Demand No.41-na Sericulture Department kha nimin lamah kan sawi tawh a, question hour-ah khan. Sawi tur tam tak ka nei lo nangin RKVY leh NLUP atanga kan sum dawn ngaihtuah khan kan thawhchhuah kha a la tlem a ni. Tan lak lehzuah a la ngai khawp mai tih kha ka han sawi nawn duh a. Niminah khan kan inchhang hman chiah lo nangin NLUP beneficiaries farmer te kha 2206 tih a nih laiin 2195 tiin kan Minister zahawm tak khan min chhang a, 11 in a tlem zawkna chhan kha a rawn sawifiah tawh si lova. Tin, mi 27 lai maiin pangang khawi eizawna an bansan kha a paw khawp mai a. Tin, chutih laia eizawn nana thahnemngai taka la ti tang tang te kha department lam pawhin zawnchhuah a, dapchhuah a, dawmkan hi an tul in ka hria a. Hei hi kan intodelhna tur, chungkaw tam takin eizawna ngelnghet kan neih theihna tur ni te pawhin ka hria a, chu chu ka sawi hmasa ni sela.

Tin, Demand No. 35-na Fisheries-ah khan ka sawi fo a, ka zawt fo baw k a. Fish seed farm engemaw zat kan nei a. Chutah chuan Lengpui ah khuan fish seed farm kan nei a, Laldenga Fish Seed Farm tih a ni thin a. Assembly ka zawhna thenkhatah hian a hming hi an vuah tha duh tlat lo mai a department hian. Hei hi thil paw tak niin ka hria a. A tute pawhin sorkarna kan chang ang, kan chang reng dawn lo tlang vek a. Chuvang chuan, hetiang hruaitu hmasa ten hming an lo puah tawh, hming han thlak ngat duh mai department kan nei hi a vanduaithlak in ka hria a. Hetiang zela kan kal chuan tun atanga kum hnih kum thum hnuah kan sorkar veah, entirnan, kan Chief Minister zahawm tak hmingchawia sak Hawla Indoor Stadium te pawh hi thlak duhna rilru pawh kha a piang ve thei a ni. Chumi thlak duhna rilru a piang a nih chuan Fisheries Department te mawh a ni ang tih kha ka ngaihtuahnaah a awm thleng hial a. Chuvang chuan, kan Minister zahawm tak hian min enthat sak se thain ka hria a.

Tin, hei kan hriat angin NLUP Input Purchase Board hi ni 10.10.2014 khan Purchase Board an thu a. Chutah chuan sangha chi an lei a ni, paddy cum fish culture atan ₹ 4.40 a rate an tih a kha, a hnu kum khat hnu ni 10.3.2015-ah khan State Purchase Advisory Board kha an thu leh a. Chumi chuan district hrang hrangte sangha chi rate hi

common carp hi kan hriat lar deuh a ni bawk a, hemi ₹1.20 te, ₹ 1.30 te district azir khan, a tlangpuiin ₹1.20 khan a hrut rual theih ang tiin a rel a, chumi chu approved thlap a ni.

Amaherawhchu, chumi hnu lawkah chuan ni 18.5.2015-ah khan cheng nuai za chuang man kha rate hlui NLUP rate in kan lei kha mak ka ti a ni. He thil hi he House zahawm tak pawh hian ngaihtuahna kan hman loh chuan sum hi a nihna tur ang leh sorkarin kalphung a nei a. NLUP Input Purchase Board in alo rel aia thuneitu zawk State Purchase Advisory Board in rate a fixed ang khan lei ve mai se a tha tur a ni a. Chuvang chuan, he thil hi chu thil serious tak niin ka hria a. Chu chu ka han sawi chhuak tel duh a ni.

Tin, Pu Speaker, Demand No. 1-na Legislative Assembly kha, ni e, kan sawi a. Kan opposition group leader zahawm tak khan ngenna te pawh a sawilang tawh a. Helai camera tha tak mai, (keini pawh kan lang slim deuh zaih mai a) min rawn chhawpchuah sak a. I&PR te, LPS te leh helai Legislative Assembly te chungah lawmthu ka han sawi tel duh a. Tin, hei Assembly Session kan inbuatsaih naah hian hun rei tak atangin an inbuatsaih tawh a. Chutah chuan zan dar 10, 11 te an thleng zak zak a ni a. Staff te hi hun dangah chuan honorarium an pe ziah a, tun tumah hian, full budget kan pass dawn tum berah hian sawilan a ni ta mang hauh lo mai a, chungte chu he House kaltlang hian Pu Speaker, ka'n ngen duh che a, honorarium, staff ten an thawh hah man hi chu pek ve ngei ni thei se a lawmawm hlein ka hria a.

Tin, kan member zahawm tak tak ten an sawi tawh a. Committee hrang hrang te Mizoram chhungah te kan han zin a. Chutah chuan hmanhmawh taka zin te kan ni. Kan Assembly motor hi Rih artui phur ang hne hne mai hi a ni a. A chang leh a chhe thul, kan han ngaichang leh thul, chutiante chu a ni a. Committee turin chawpchilh taka han thut te a ngai chuk chuk a, an inbeng khu thuk thuk a, kan Zoram kawng dinhmun chu kan hre vek a. Khatiangte a nih avang khan Committee support a kal te, official duty

te tan hian motor tha zawk te hi lei dan a awm lawm ni tih kha ka sawi lang duh a bawk a ni.

Tichuan, Demand No. 47-na Minor Irrigation hi tan lak a ngai khawp mai a. Kan hre tlang vek a, nikum lamah te hmalakna tharlam thui tak a awm lem lova. Amaherawhchu, loneitute tan hei hi tharchhuah tipungtu leh inngahna tak tak an nih avang hian tan lak a ngai khawp mai a. Tun dinhmunah pheii chuan water channel han siam te hi a tha taw lo nge ni, sum siam nan kan hmang lek emaw chu aw tih mai tur hian a kal a. Chuvang chuan, hmasawna tur, kan ramin ei leh bar kan zawnaah kan intodelh theihna tur atana hmalaknaah hian tan lak leh zual a tul hlein ka hria a, chung chu ka'n sawi kai duh a ni.

Tin, Demand No. 15-na GAD-ah hian, Saitluk chungchang kha, ni e, Lunglei 'S' bialtu zahawm tak khan arawn sawi a. April fool tak mai 2010 khan he Assembly House-ah hian resolution an pass a. Amaherawhchu, tihhlawhtlin theih a ni hrih ta lova. A kaptu nih te pawh hi kan inchuh lek lek ni te pawhin a lang a. Amaherawhchu, he House-ah pawh hian kan ngaihthlak fo tawh ang khan chhim lamah airport hmun tur a awm phawt chuan tiin kan House Leader zahawm tak pawhin, Saiha bialtu MLA zahawm tak te hma lo la a, a hmun te pawh zawng tur te pawhin a ti a ni a. Chuvang chuan, engtik ni ah emaw chuan kan la nei ve ngei ang tih te pawh kha kan ring a.

Tin, helicopter service kan han nei a, a tangkai khawp mai a, dam mawh hritlan thu ah te. Chulaiah chuan kan lawm viau lai hian passenger te tan hian insurance kan ti em aw tih hi ka ngaihtuahnaah hian a awm fo a ni. Hun kal ta kan han thlir chuan Andhra Pradesh-ah te, Arunachal Pradesh Chief Minister te pawh kha rin loh deuh maiin an chesual palh hlauh mai a, an vanduai a. Kan vanduai ang kan ti kher lo, mahse boruaka thlawk a nih avang leh kan climate in a zir loh avang hian hetiang palh awm thei a nih avangin engtin emaw ngaihtuahna kan nei tawh em ? Kan la nei lo a nih chuan ngaihtuahna hman a tul hlein ka hria.

Tin, Demand No. 13-na DP&AR-ah hian, hei Assembly Session zawhnaah pawh khan ka pe nual a. Pension tawh rawih nawn hi engemaw zat hi kan la awm a ni. Mi tam tak rawih nawn chu an tul ang. Amaherawhchu, heng rawih nawn tul vak tawh lo ni anga ngaih theih hi rawih nawn kan la nei nual niin a lang a. Chungah te pawh chuan thalaite leh midang rawn promotion tur te tan pawh an hmun lo luah thei te a nih avangin hemi kawngah hi chuan thahnemngai lutuk lo deuh ila a tha awm mang e aw ka ti a.

Tin, Secretary te, Commissioner te kan han nei a, heng te pawh hian an chanpual hi kan thlak zing lutuk mah mah deuh em aw tih chang te hi ka nei a. Assembly Committee-ah te pawh kan han committee tlang a, a lo ni leh tawh lova, a hmaa a ni emaw kan tih kha, chutiangte chu a ni a. A bik takin Education leh Transport Department-ah te phei chuan Director leh Secretary hi kan intodelhna tak mai niin ka hria a, tun kum sarikh chung hian kan nei tam hman viau a ni, team khat kan daih lek lek mai a. Heng angte hi tunah chuan nghet tak kan nei tawh turah ngai ila. Department hmasawna kawnga ke pentu turte leh ngaihtuahna ril tak lo hmangtute hnathawktu tak tak an nih avangin helaiah hi chuan ngaihtuahna kan hman zui zel a tulin ka hria.

Tin, Demand No. 39-na, power hi kan mamawh a, eng tel lovin kan khawsa thei lova. Current awm lai chuan Pu Speaker, tumah kan phun lo a ni, mahse current awm loh hi chuan hnathawktute kan mawhpuh a kan sawisel luai luai a, hei hi kan hnam zia a ni a, tumah indem thei kan awm chuang awm lo ve. Kumtin mai hian a hman man tariff hi revise a ni ta zel mai a, JERC te kan han nei a, rawtna te pawh an han siam a. Naktip mai atang hian 4.02% a tihpun turin ruahmanna siam a ni zui a. Kan department te phei chuan JERC-ah khan 8.21% laia tihsan turin rawtna te pawh an siam a. Amaherawhchu, public hearing-ah te han sawiho han sawiho a nih hnu khan mipui tan phurrit ni thei tura ngaih a nih avangin helaiah hi chuan a zing lutuk deuh e tih hi ka ngaihtuahnaah chuan a awm a ni.

Tin, power policy hi tunhnai chanchinbuahte pawh kan hmu a, kan lo la nei hauh lo mai a. Power policy hi neih a tul tawh khawp mai a, power renchem chungchangah te, hetiang kawnga mipuite zirtirna tur pawhin thil tul tam tak a awm ang. Heng ang zawng zawngah hian kan power policy neih hlan hi a nghahhlelhawm tak zet zet in ka hria a. Hei kan sorkarin hma te a han la a, small hydel project-ah hian mini hydel project kan han tih ang chi ah te hian kan cham rei khawp mai a, kan ram hi. Chutiang dinhmunah chuan kan ding a. Tunah kan privatise a, amaherawhchu, duhthu a sam tawh lova, kan privatise te hnen ami kha kan han lei let leh a, khati vel kha kan ni a. Kan thar chhuah hi nichina kan ngaihthlak tawh ang khan mega watt 29 vel bawrah khan kan cham reng mai a. Helaiyah hi chuan tan kan lak hi a ngai khawp mai a.

Hydel project chungchangah hian MoU pariat lai mai ziah a ni a, a hlawhtlin hun erawh chu hydel project hlawhtlin chhung hi, tihpuitlin chhung te hi a rei a, kan hre tlang vek a. Helaiyah hi chuan theihtawp chhuaha tan kan lak tlan a, kan ram dinchhuahna turin potential kan nei a ni. Chumiah chuan mipuiten sorkar hmalakna kan tawiawm hi a tul khawp mai a. Chutihlai chuan ka'n sawi tel hram duh chu Tuirial hi i dinglama ami te khan an sawi zing lutuk a. Tuirial lo pawh sawi tur kan nei ve tho a, Serlui 'B' Hydel Project te pawh kan tungnung ve tho a ni. Khatiang vel kha a ni a, Zawlbuka e tang theuh theuh tih ang mai kha kan ni a. Chuvangin Serlui 'B' Hydel Project te pawh khu khawl la function kim lo niin ka hria a. A function kim theihna turin enge mamawh phei chu Pu Speaker, ka hre hauh lo. Amaherawhchu khulai khu kan tharchhuah belh theihna tur, kan mamawh puhrukna tur a lo nih theihna turin tihphuisui chu a tul khawpin ka hria a ni.

Tin, Mizoram hmun thenkhatah eng la pek loh khua, UT kan nih hun lai, District Council kan nih hun laia khua la awm niin a lang a. Hengte pawh hian eng neih ve an nghakhlel viauin ka ring a. Central lam atangin RGGVY te kan nei a, khang khan a cover vek nia kan ngaih lai khan a lo la cover loh chinte pawh a awm a ni thei a. Chungah te chuan tan kan lak a tul khawp mai.

Tin, Power Department hmalakna atana tul em em, ka ngaimawh chu Aizawl khawpuiah hian line hi a invet khat chuk mai a, thir ban zawng zawngah hian eng hrui hrui emaw hi a tam em em mai a ni, Naupang school han chawltan lekhate an lo chaih a, an chesual fo a ni nichina kan ngaihthlak tak ang khan. Heng ang chi ah te pawh hian aerial bunching cable (ABC) kan han tihte pawh hian Aizawl khawpui hrui engemawzat kan han thlak a. Amaherawhchu, veng hmawr, a thlafem deuhten heng ang hi kan la chang ve phak lova. Hengte hi tih dan a awm em? Ngaihtuah theih ni ta se chuan accident tam tak leh power loss pawh hi a awm lo thei turah te chuan ka'n ngai a. Chungte chu ka han sawi tel duh a ni.

Tin, Pu Speaker, Demand 45-naah hian PWD hian kawng enkawl lai kan kawng sei zawng hi 7688 km niin hemi Economic Survey-ah hian kan hmu a. Kan kawng neihte hi a enkawltu chu Department a ni ngei mai, amaherawhchu khawpui chhunga kan kawng enkawl dan erawh hi chu inzirtir kan ngai khawpin ka hria a. Kawngah motor kan sil a, rod kan chhu mar a. Tunhma ministry hmasa khan Road Protection Squad te an ti a. Amaherawhchu, tun hunah chuan sawiseltu pawh kan awm lova, tihian kawngah duh duh, lung te kan bun a, khatiang khan kan ti a. Bitumen alkatra kawng tha tak takte kha kan tichhia a ni. Chuvang chuan mipuite zirtira kawng humhalhtu hi kan neih a tul khawpin ka hria a, hemi kawngah hian tan kan lak lehzuai hi a ngai a ni.

Tin, nichina kan sawi tak ang khan hna PWD-ah hian project lian ang chu a awm deuh vek a. Chutihlai chuan revised estimate hi a ngai nasa lutuk a, a hun takah an zawh loh avangin harsatna tam tak a awm a ni. Chung chuan kan ram hmasawna kawng a ti sawt lova. Chungah chuan mipuite leh sorkar ang pawha tan kan lak a tul khawp mai a. Chuti a nih loh chuan hei kan ramah project lian tak tak te, road project te, chi hrang hrang a rawn kal hi Pu Speaker. Amaherawhchu, a hun takah an thawh duh loh avang leh kan working season-ah te an mutthlукsan emaw tih mai turin contractor-te hian hun an hmang thin a. Working season a tlem si a, fur ruahtui a lo tla a, an thawk leh thei lova,

malaria te, chi hrang hrang natna a lo awm si a. Heng avang hian hmasawna ti thuanawptu an nih fo avang hian hemi kawngah hian a thawktute leh sorkarin tan kan lak hle loh chuan kan ram hi a ngaihtuahawm viauin ka ring a.

Tin, Pu Speaker, nikum lamah te kan sawi a, kan buaipui em em MZU road khu JNNURM atanga pawisa hmuh niin ka hria a. Chutihlai chuan permanent works thenkhat retaining wall kan tih ang chi te mimal hnenah te khan pek a ni a. Tun thleng mai khuan bill la lo an la tam a ni. Helai hi chu kan Minister zahawm tak hian min enchhuahsak se la, mi mangang tak takte khulaiah harsa tak taka hnathawk, mi pawisa puk chawpa thawk ve tawk tawkte an ni a. Khungho manganna khu sutkiansak turin ka han ngen tel duh a.

Tin, tawitein Serkhan-Bagha Road compensation a fel mai dawn emaw kan ti a, a fel mai hleitheh lova, a pawih khawp mai a. Tihfel ran ni se, khulai khu kan inkalpawhna kawng pawimawh tak a ni a. Khulai kawngah khuan Group No.14-naah khuan contractor pakhat chu earnest money midangin an lo lakchhuah khalh daih mai a. A mangang em em mai a, engatinge department kan fimkhur tawk lo em ni? Signature pawh a inang miah lova. A lachhuaktu hian a contract neitu leh a lachhuaktu signature hi a dang daih a ni. A pechhuaktu hian mawh a phur dawn lo em ni? Hei hi chu min bawhzuisk se thain ka hria.

Tin, ka'n sawi tel duh chu Pu Speaker, Aizawl khawpui side drain hi ngaihtuah a ngai khawp mai a. Fur a lo kal a, bawlhhlawh kan pah fimkhur si lova, ruahtui a rawn tla a, a rawn inhnawh tut tut a, culvert-ah a leng leh si lova, a tawp em em a. Drain cover ang chi te, side drain hian cover nei ta se, a bik takin khu ka bial chhung Tuikual chhukthlaah te phei khu chuan, kawng a lo zauh phah ang a, a ziaawm ngei ka'n ring a. Chungte chu ka'n sawi tel duh a ni.

Tin, Pu Speaker, a tawp ber atan chuan, hei kan House Leader zahawm tak Demand a ni a, skill development chungchang hi ka ngai pawimawh khawp mai a. Hemiah hian society te leh mission te hmalatu department kan tam hlein ka hria a. Helai hi chu enfel a ngaihtuahna kawng khat kan zawh theih hi a tulin ka hria a.

Tin, Aizawl khawpui nuam siam ang u tiin kan Home Minister zahawm tak khan ngenna a siam a. A dik khawp mai a, Aizawl khawpui kan tawt a, mipuite kan zalen lova, a hrehawm khawp mai a. Aizawl hi Zofate Jerusalem-a siam hi a ngaiin ka hria a, mitin kan zalen a, kan hlim a, he khawpuiah hian ralmuang taka kan khawsak hi a tul khawpin ka hria a ni.

Motor a chep em em a, kan Aizawl khawpui hi kan extend a ngai a ni. Khawpui thang zelah hian urbanization a lo sang zel a chumi ruahmanna kan neih loh chuan 2040 vision, 2050 vision kan neih thlen loh chuan thangtharten min la dem mai ang tih hi ka hlau thin a. Nichinah kan member zahawm tak tak te pawhin an sawi tawh a, kan Aizawl khawpui hi khawpui nuam, naupangten infiamna hmunhma an neihna tur tein kan DC hmalak tum dante kan sawi tawh a, holiday remchangah, sawlai Vanapa Hall kawt pheiah sawn motor kal lohna tur siam ang u te a tih kha rawtna tha tak niin ka hria a. India ram hmun hrang hrangah hetiang hi a awm fo mai a ni, a thain ka hria a. Khatiang zawnga kan Home Minister-in khawpui nuam i siam ang u a tih kha Zofate Jerusalem, Aizawl khawpui, khawpui nuamah siam turin mipuite inzirtir ila, inkaihruai ila, kan siam theih ngei pawh ka ring a ni tih kha ka'n sawi tel duh a ni e, ka lawm e.

SPEAKER : Pu T.Sangkunga.

Pu T. SANGKUNGA : Vawiinah kan House Leader Demand, department tam tak leh Minister of State Demand pahnih kan sawiho dawn a. Ka tan pheih chuan a lunglenthlak khawp mai a. Vigilance Department-ah te hian inti thu em em in kum 13 vel ka awmna a ni a. Tin, PWD Department, Power & Electricity Department, M.I

Department, Fisheries Department-ah te inti neitu, ka thu ber emaw in ti a rei tak kan lo chetna hmun Demand han sawi dawn te hi chuan rilru hi a khawih thin a, sawi pawh a chakawm khawp in ka hria a.

A hmasa berah chuan Demand No. 35-na hi han sawi ila. Tunhma in Fisheries Department pawimawh zia te hi ka lo hre ngai vak lova. Ka han awm ve hnu khan sangha khawitute tan sangha no te tha leh thalo inthlauh zia te ka hre ve ta a. Anni Department hi hei ai hian han tichakin han tilian deuh ila, sangha no te tha, a thang duh chi lei tam thei sela a tha hle ang. Tin, sangha hi vur tello chuan a uih vat mai bawk si a, vur khawlte hi indaih deuh hlek tura leina te hi pe ila. Tun hma chuan sangha khawi te hi tui tihna ka nei mang lova, kan lei kha a hlui thin vang a lo ni a. Man thar han tui zia te chu, a hmui hak mai a. Chuvangin,he Department tih chak hi a pawimawh ka ti hle a. Demand No. 41-na Sericulture Department-te pawh silk puan tha tak tak min petu an ni a, an pawimawh em em a.

Demand No. 39-na Power Department hi sawi daih ila. Power Department hi six basic needs tih atangin Economics zirtu zawng zawngte chuan power leh kawng pawimawhna hi kan sawi bel hlur a, a tello chuan engmah hi a tih theih loh a ni mai a. Tunhnu ah hian ka belchiang zualin ka hria. Subject Committee-a kan thawhhona ah Power Department ho lo efficient zia leh thahnemngaih zia te, han sawipui a a hlawk zia, contractor-te nen an in agree theih mang loh pawh Committee-ah kan han sawipui a, kawng tha zawk, rang zawka a project thawh zawh dan leh project tha zawkte kan hmuh phah a, fel ka ti hle.

Demand No. 45-PWD : Committee kan han kal a, an kawng laihte 'helai chu a va thalo ve' han tiha sawipui a an in open zia te, kan zu en leha an thawh leh lo that tak zia te ka'n hmuh hian kan engineer-te fel zia a langin ka hria a. Tin, Mizoram House-te kan zu en a, Old Ballygunge phei kha chu a chim lek lek mai a. Tin, kan zin vel hian kan lo thleng ringawt a, kan lo enchiang lo tawp mai tih a hriat a. Salt Lake-te pawh khu

a lo chhe em em mai a, a chung mawih vanga sign board tla te khan mihring a delh hlum lek lek mai a. Thingphel hian kan lo la tar mai mai hi a lo ni a. Tun hma in a thawktute kan fak viau a, Old Ballygunge-ah phei chuan ke rek tiat deuh thaw te hi bang atang khan hmawng lo tiak te kha a awm a, kan awm laiin an han thlak a, a lo tawp em em mai a. Khatiang tih dan tur te kha a thawktute leh engineer-te nen kan han sawiho a, a hlawk thlak khawp mai.

New Delhi-ah, Mizoram House, Vasant Vihar-te khu han en ila, engineer aia thiam Chief Minister kan neih laia a duh dan anga design a sak niin an sawi a. “Engineer leh architect ai chuan kan hre daih,” a ti mai a. Kha vang khan a chhe laklawh niin an sawi a, khung tih that nan te khuan, (kan rawt vang pawh a ni kher lovang) ₹ 80 lakhs lai tun budget estimate-ah a lo lang a. Tin, Salt Lake atan ₹ 84 lakhs lai a lo lang baw a. Hengte hian hna nasa tak a thawh ka ring a. Tin, Guwahati Mizoram House-te, malpui thleng thleng kan hmeichhiate fur laia inhlum ngai, side drain aia kawt hniam zawk kan lo nei te a siam na tur K-deposit ah a lo tang reng mai a lo ni a, pawisa awm reng si khan. ‘E khai, release vat teh u,’ kan ti a, an release ta a, an thawk tan thuai dawn a. Khatiang khan ‘engatinge’ titu awm hi an lo mamawh mai mai a lo ni a. Kan engineer-te hi an efficient em em mai a, keini aia thiam daih kan sawipui a, keini chuan engmah hi kan hrelo reng reng a, kan tar at hian min nang tep tawh lehngal a. Chuvangin, an hna hi ropui ka tiin thawhpui an nuam, han sawi ila an rawn ti zung zung mai a ni, a chhan chu mithiam an ni tlat a, lawmawm ka ti tak zet a ni.

Tin, DP&AR- ah hian, “kan officer-te hi ‘Delhi-ah ka batch mate’ tih tur nei an va tlem ta em,” kan ti thin a. Kan pute kan lo dem ru lek lek a. Tunah Additional Chief Secretary thar leh Principal Secretary thar, henga kan hmelhriat sa, efficient tak tak an han la chhuak hian ngaih a ti tha veng veng mai a ni. Delhi lamah zuk kal sela, mahni thiante zu sawipui sela ‘enge ka tih ve theih,’ lo ti tur hlir kan nei thar hi lawmawm ka ti. (SPEAKER : Ngawi rawh, khawngaihtakin, Chair kan inthlak lawk, reilote.) Pu Deputy Speaker, a break lai kha chu i paih ang chu tiraw? (DEPUTY SPEAKER : Awle.) Mi

fel leh senior I.A.S an han chah chhuak ta te hi a ngaihthat thlak ka ti a. Minister-te chu policy zamtu mai an ni, a execute tak tak tu chu kan official-te an ni a. Chuvangin, mitin hian an tih tur ti theuh sela, Pu Deputy Speaker, he state hi chu a changkang a ni mai. Chuvangin, All India Service-a tling te, State Civil Service-a tling te, Engineering Service-a tling te, mithiam rual awmkhawmte hian an tih tur tui taka an tih, phur taka an tih theuh hunah hian he ram hi chu a changkang dawn a ni mai a.

Tin, MPSC-in combined Civil Service exam kum tina an buatsaih hi tha ka ti. Ka tih chu a ni hauh lova, Pi Sangkhumi Chair lai te, Pu Liansailova'n DP&AR a chan laite khan, 'sorkar hmasa anga a changa kum khata vawihnih MCS lak a, a changa kum 5-te han chawlh hi a dik lo reng reng, tlem te te in la ulangin, 10 exceed lo in, a cream in la thei ang', ti a vawi tam tak ka sawipui hnu ah ka rawt chhuah phei chu a ni hauh lova. Ka lo tui zawng ve, ka sawipui anga hetiang kumtina an han ti kan sawisel kan sawisel hi chu kei chuan ka ei lo khawp mai a.

Entirnan, Assam-ah te pawh Combined Examination an ti thin a. Secretariat U.D.A atangin Assam Civil Service-te, APS-te tan an exam tir thin ti a ka sawi ka sawi, kan tih vang ni hauh lova lo awm te hi, hei ai hian la ti tam sela. Taxation-te, Sports-te, Co-operation-te, heng ami te hi combined examination-ah tel se, tuna kan Chairman thar pawh hi, 'tih dan zawng teh u, DP&AR te nen, official-in in rawt hi chuan kan pu ten thil tha hi hnial an nei ngai lo a nia,' te ka ti ve mai mai a. Chutiang chuan, 'nangni tan pawh hna a tlem zawk fe ang. Assistant-a exam hi an tlak chuan Taxation Inspector an va exam leh a, MCS-ah, Account-ah, a ngai hlir hi an exam a, vawikhatah a combine hian ti ula, in hna pawh a tlem ang,' kan tih thin te a lo puitling ta hi lawmawm ka ti a.

Demand No. 1-na Legislative Assembly : Keini kum 40 dawn lai sorkar hna thawk tawh pawhin Assembly Secretariat hna hi kan lo hre lo khawp mai a. Paper han present dawn ila, a tihdan kan zawt chawp a, min ziah sak a, Pu Deputy Speaker, Chair-a in tih dan zawng zawng pawh hi a tirah chuan an guide loh che u chuan tumahin

kan hre lo a lo ni a. An hna hneh zia leh phone-a han hrilh pawha rang tak tak mai a minrawn hrilh chho te ka han ngaihtuah hian hetiang Department efficient leh mahni hna zo kan nei hi Chair atang te, keini MLA tlinglo tak leh Committee hrang hrang kan han kalna ah te min guide nasatzia ka ngaihtuah hian an fakawm ka ti in, thawk nasa ka ti bawk a. Tunah pawh reilote chhungin naktuka ka present tur 3 anrawn zo ringawt mai a ni, nimin break chhunga kan committee rel tluk chauh kha. Engtingge an thawh aw tih hi ka ngaihtuah a. ‘Zan lamahte kan lo chhiar lawk loh in,’ ka han ti a, siam sa minrawn pe nghal ringawt mai a ni, nimina kan approve chauh kha. Khatiang ang chi khan an efficiency hi fakawm ka ti a.

Tin, Mizoram House hi duh aiin motor an tlachham kan ti a, Delhi direct a nih pheichuan kan bawh tawlh tawlh dawn a. Kan VIP-te hian kum 5 motor an hman hi chuan a thar an lei hi opposition-te nen kan sawi ho pawhin a ngai kan ti a ni. Dinmun hlauhawmah awmin motor chhiaah an chuang tur a ni lo kan ti tlang theuh a ni, kan Committee hian. Mahse, an hman hlui hi heta a indawta tawlh thla a nih chuan, repair nan kan sengso tam ting dawn a ni a. Motor dawng an tam ang a, repair na leh oil kan seng tam ang kan ti. Chuvangin, ‘Mizoram House-ah hian a tha deuh pahnih/khat te hi chu chhukthla se kan phun hi a reh deuh ang maw le,’ te kan ti a. Chuvangin, motor hman hlui thenkhat hi Mizoram House tan a ngaihtuah theih loh em ni kan han ti a ni.

Tin, a dawl lehah chuan Demand No.15-na GAD sawi ta ila. Hmana kum 20 kalta a state dang kan zirna ah (kan sorkar in min thawn a) GAD hi a lo lian em em mai a, Maharashtra-ah te, Karnataka ah te chuan DP & AR te hi GAD hnuaiah a lo awm a. GAD-ah ringawt hian Secretary 4 an lo awm a, (Maharashtra-ah te khan) chutiang chu a ni a. Kan ramah pawh Department zawng zawng co-ordinate tu, Secretary Meeting-te hi an chan a ni a. Vawiinah pawh chumi avang chuan, ngampa takin, kan rama thil pawimawh tak lo awm, Department pahnih related a nih chuan GAD hi a khaikhawmtu an ni fo thin a. Hmanniah kan bial lamah ka han kal a, kohhran pakhat centenary ah, pulpit atangin Pastor pakhat hian zu hi arawn sawichhe hrep mai a, keini lah midum

zinga a nei te ber ang mai hian kan ngawi chal mai a. Zawhna leh chhanna kha a awm thei tawh baw si lova, (sermon ania) kan chhuak chu a inthlahrunawm khawp mai a, ka inkhawm tawh lovang tih mai hi a awl in ka hria a. An beramte rilru na tur hi an hre kim lo emaw ni aw ka ti deuh a. Nimina kan ngaihthlak lah chu police thi tam zia te, sorkar damdawiinah zu related avanga damlo an lo mu dul mai tih thawm han hriat chuan thlawhna a chuan a, 'in thlawhna ah khan bomb an phum ru a ni,' tih ang deuh a ni, mi a barakhaih em em mai thin a. Chutah chuan ka rilrua lo lang chu khatiang kha Presbyterian leh Baptist pheii chuan (ka hriat deuh an ni a) uar bik neih hi an duhlo khawp mai a Bible changte pawh hi a bul ami awm renga a pakhat chauh uar hi chuan a tum a thelh thei ti kan ni a.

Chuti taka police thi, zu zawrh leh damlo kan sawi chuan Health Department nen a in relate avangin GAD hnuaiah sawi a rem dawn hi ka ti a. Kan Home Minister leh kan Health Minister te kaltlang in figure lak a ngai a nih hi ka ti a. Chuta ka hmuh chu a hma kum aia zu avanga thih pun kum ber chu tunhnai ah chuan 2011 kha a ni a, 2010 a police thi aiin 2011 ah 26% in an tam, a dawt leh chu 2009 a ni a, 2014 atanga 2015 police thi zu zawrh hnu a a punna hi 15.6% chauh a ni, mahse engatinge 2009-ah 23% a a pun te, 2011-ah 26% a a pun te khan kan ngawi reng si a, zu zawrh a nih a 15%-a a pun hian kan sawi kan sawi leh si, hei hi a kalkhat deuh in ka hria a. Tin, Civil Hospital-te kha 'zu in vanga damlo in an mu dul mai em ni'? tih ka zawt a. Medical Superintendent chuan damlo 270 an awm a (tukin khan) zu vanga damlo chu 9 chauh an lo ni a, chu chu 3.8% chauh a ni. Nimin khan kan sawi tam em em si a. Helaite pawh hi AIDS pun dan zia mai te hi. AIDS positive zingah pawh sex hman dikloh avanga vei hi an pung nasa zual em em mai a, kohhran tan pheii chuan vei hle chi a niin ka hria a. Chutah chuan sex avanga AIDS vei te hi chuan a chhan zu sawi chiang lo mah ila engemaw kohhran huat zawng tak, ram tana paw si a awm tih a hriat reng mai a. Chuta sex hman dik loh avanga AIDS vei pun dan chu :- 2009 - 2010 ah khan 72%, 2010-2011-ah 68.1%, 2012-2013-ah 80.5%, 2013-2014 ah 76.9%, 2014-2015-ah 77%, nikum aiin a tlahniam zawk a nia. Zu ah ve thung khan 15% chauha police thi a pun kha

kan sawi vak si a, heta 70% chunglam sex hman sual vanga AIDS positive pung, chutah pawh sex hman dikloh vanga tam lawrlak lehngal bawk si kha kan sawi vak bawk si lova.

Cancer vangin tunlaiin mi kan thi tam ber a, vaihlo leh a kaihhnawih vangin a tam tih hrereng mah ila kan sawi mumal bawk si lova, pulpit atanga sawi phei hi chu ka la hre lo reng reng. Ka hre tawi deuh nge ka hre lova. Chuvangin kan kal dan hi a kal khat ta lutuk a, chuvangin GAD inter-department related changtu ber hnuaiah hian sawi a rem ber dawn hi ka ti a ni. Niminah kan House-a sawi chhuah a nih avang khan material ka collect a, chuvangin ka sawi har nachhan pawh hi minute nga kal taa ka va chhuah te pawh khan phone in ka materials dik leh dik loh ka la zawt a ni, tihsual ka hlau lutuk a. Chuvangin hetiang khawpa dika kan collect hian HIV positive pun dan hi a rapthlak hle mai, ralkhel dar pawh vuak a hun ta. MLA te pawhin nuai khat theuh kan fund atangin kan thawh hial a ni. Zu in a thi ai chuan AIDS veia thih hi a rapthlak in a hlauhawm daih zawk.

Chuvangin he thu hi he House kaltlang hian Pu Deputy Speaker, kan rama thil thleng mek, hlauhawm em em a kan sawi zu hi chu ti em em a lo nih loh zia hi han sawichhuah a thudik hriat hi ringtute tih tur hi a ni ve hrim hrim mai a, MLA te tih tur chauh pawh a ni lo. Chuvangin helama thawk mithiam, doctor te chu an thiam ania, HSLC ah pawh top ten a awm hi an ni fur mai a ni. Khang ho in an rawn chawh chhuah survey based an han tih te kha chu a hnial a han hnial rual hi a ni lo. Keini Matric 2nd a pass tan chuan hnial ngaihna hi a awm lo reng reng. Damlo mu dul tia an sawi pawh kha a vaiin 9 chauh an lo ni si a chuvangin heng thudik han sawi hi survey awm miah lo hian House-ah te hian kan rin sawi pup zel a, a ngaithlatu ten a ni emaw an lo ti leh hlui thin si a. Kha vang khan heng hi kan duty ni a ka hriat avangin (**Er. LALRINAWMA** : Pu Deputy Speaker, nimin khan sorkar damdawi in ka ti miah lo a nia, private hospital-ah daih zawk a ni ka kal kha.) Nia, nimin kan chhuah kha ka han sawi ve hram duh a ni. Hetiang hi kan khawvel awm dan a ni a, uar lam neih vak hi a dik thei lo hrim hrim.

Chutichuan, kan House Leader leh kan MOS, Fishery leh Sericulture changtu demand zawng zawng hi lawm takin ka rawn support a ni e. Ka lawm e.

DEPUTY SPEAKER : A lawmawm e, chauh tawh lamah i sawi ziah dawn nia ti khan. Awle, Pu Zawma i lo sawm ang.

Pu VANLALZAWMA : Pu Deputy Speaker, ka lawm e. Ka'n sawi hmasak duh chu he House zahawm takah vawikhat kan luh ve na ah a veilama thu nimah ila, mawhpurhna pawimawh tak ah ka'n han awm ve a. Chungah chuan kan tih tur leh tih loh tur te pawh hi ka hrechiang thiam mang lo a. Amaherawhchu, kan Speaker leh kan Dy. Speaker te leh kan House zahawm tak member te mitmei leh kaihhraina in hetiang hian hun kan han hmang chho ve a, nuam pawh ka ti khawp mai a. Lawmthu sawi ve te pawh hi helam atang hian ka tih ve tho turah ka'n ngai a.

Kum 2 pumhlum zet zawt kan lo kal ve a, House-ah kan thu ho zauh zauh a. Vawiina lawmthu ka'n sawi ve duhna lai tak chu kan House Leader-te hi kan Deputy Leader te leh Minister ho hrim hrim te, hetia kan rorel khawmna ah hian ka rin aiin an taima vek mai a. A tira ka tel ve hlima ka ngaihtuah dan loh deuh hian ka awm ta roh a. Kan thu ang a, a chang chuan kan kal lo deuh mai mai ang chu tih te ka ngaihtuahna ah a awm laiin, a hotu lam House Leader te leh Deputy Leader te hi a thu taima ma ah an tang a. Chuvang chuan keipawh theihtawpin kan thu ve ngar ngar ringawt a. Chungte pawh chu he House zahawmna leh lawmthu sawi na ve tho turin niin kan ring a. Kan House Leader leh Deputy Leader te hian min uap reng mai a, hetiangte hian rorel a nuam bik a, thusawite pawh a nuam bik tih kha thuhma ang deuh in kan sawi ve lawk duh a.

Tichuan, kha kan Minister zahawm tak Dr. B.D.Chakma Demand kha a Department chan a kha a lian lo ve ve nachungin sawi thui vak pawh tul lo, ka ngaihtuah dan erawh chuan heng Department pahnih Fisheries leh Sericulture Department-te hi a len viau hunah chuan kan ram hi chu a changkang ngawt ang tih hi ka ngaihtuah dan a ni a.

Fisheries Department-a ka rilrua lo awm daih chu, kan naupan lai chuan kan thlanglama awm Bengali ho hi an fin em em nachhan chu sangha an ei hnem a ni tih te kha kan inzirtir dan leh mi min hrilh thin dan kha a ni a. Fisheries Department a than chhoh a, sangha te kan ei hnem tawlh tawlh chuan kan fing ve viau dawn tihna kha niin ka ngai a. Chuvangin, ka sawi duh chu he Department hi lian chho zel sela tih duhsakna a ni ber mai.

Tin, ka lawmna em em pakhat chu hman deuh ah a hming pawh lam ta ila, kan MLA te pawh lo ni ve thin Pu Rinte-a sangha dilah kan kal a, sangha te kan zuk man pui a. Chuta a sawi lawmawm ka tih deuh chu ‘sangha man tur leh dil sah tur te hi kan hotuten Aizawl lam atang hian an rawn rel a. A in chhawk te te in kan sah a, chumi ni chuan, ‘Zirtawp zan chuan chuti zat chu rawn thawn chho rawh u’ tiin kan insem thin a, a tha khawp mai,’ tih thu a sawi a, a va finthlak em aw ka ti a. Tunhma kha chuan khatianga tih a awm lo, a remchan hun hunah khan an sah a, an sah rual a nih pheii chuan a hnawng titih thin a. Tunah chuan keimahni ram chhunga dil sangha ngei mai an rawn zuar tuk tin deuh thaw mai te hi awmze nei deuh takin kan lo kal tawh a ni tih ka hre ve a, a lawmawm khawpin ka hria a. A sangha khawi lam leh eng ilo kha chu ka hre thuk em em pawh a ni lo a, a lawmawm in ka hria a. Khatianga khan thang chho zel ila. Kan ram chhunga kan tharchhuah a ni a, kan tharchhuah a tam chuan kan economic a kang dawn tih kha ngaihtuah naah a awm a, chu te mai chu ka’n sawi ni sela.

Tin, Sericulture hi a chipchiar pawh ka hre chuang lo va. Amaherawhchu, silk hi India ramah hian an lo mamawh nasa khawp mai a. Sari atan te hian an lo mamawh nasa khawp a lo nia. Silk sari kaih theih kha chu changkang tak hi an lo ni a. Silk pangang hi kan thar tam hian a market hi a buai reng reng lova. Chuvang chuan hengte hi ti lian ila, lian chho zel sela la kan ram hnuk a ni tel zelin ka hria a. Mizopa tan chuan pangang han khawi thiam loh thu hi a awm lo. Kan thiam nghal, zir tehchiam pawh a ngai lovin ka hria. Chuvangin tuna department te reuh te te pahnih hi lian chho zel turin duhsakna ka hlan a. He department 2 (pahnih) kan tih len hian kan ram hmel a danglam dawrh thei dawn a ni tih mai te kha ka'n sawi duh a.

Tuna ka hma ami sawi ang khan, kan Chief Minister zahawm tak demand sawina ah hian han sawi tel ve tura ka duh pakhat a awm a. Hmanniah kan sawi a, Assembly lamin, 'kan mawh a ni lo,' an ti a. Parliamentary Affairs lamin, 'kan mawh a ni chiah tawh lo,' an ti bawk. Tu demand a lut tur nge tih pawh hriat loh Chief Minister demand sawina a han sawi ka duh leh lawk chu Consultative Committee, hmanna ka sawi bawk kha, hei kan haichhuak chiang a, 20th March, 2014 khan mumal deuh mai hian order, Office Memorandum siam a ni a. Chutah chuan kan keu kan keu a, keipawh hi hmun 5 lai ah member ka lo ni ve a. Kan Chief Minister zahawmtak chair-na hnuai Consultative Committee ah ka ni a; tin, kan Home Minister zahawm tak chair-na hnuai ah member pakhat ka ni bawk a. Tin, Social Welfare leh Horticulture Minister chair-na hnuai ah member ka ni bawk a. Tin, Health & Family Welfare Minister zahawm tak chairna hnuai ah member ka ni leh bawk a. Tin, wawiin kan sawi mek Sericulture leh Fisheries Department-ah hian kan Minister zahawm tak chair-na hnuai ah member ka ni a, hmun 5 lai ah ka lo awm a. Mahse ka hriatsual loh chuan chung zawng zawng chu committee kohna ka la hmu ve reng reng lo nge ni, ka hre sual te ka hre lova. Committee kan la nei lova, kum 2 a liam tawh a, March, ni 20, 2014-a siam kha a ni a.

Hei hi Committee tul vak lo hi kan lo din mai nge mawni aw, ka ti deuh a. Mahni tel ve zawk tawhna lam, Parliament ah chuan Consultative Committee hi kan phur thei khawp mai a, Minister ho hian nawm pawh a nuam duh bik em em a. Sawi ve na hun chance te pawh kan lo nei ve bawk a. (DEPUTY SPEAKER : Ngawi rawh aw, Chair kan han inthlak lawk ang e) SPEAKER : (sawi zel rawh le) Pu Speaker, ka lawm e. Khalai te kha vawiinah hian a sawichhuahna tur ni hian ka'n ring deuh a. Chutih mek lai chuan, kan keu kan keu a, kan nula neihchhun hi member-ah hian kan ziak lut ta reng reng lo a, a dangah hi chuan an siam rem zung zung niin ka hria a, Pi Vanlalawmpuii hi, helamah chuan in ziahluhna pawh hi a awm ta chuang lova. He Committee kan ti vak mai, koh chiah mang bawk si loh, a then kha chuan kan nei tih thawm te kha chu ka hre bawk a, hei hi engtia kalpui zel tur nge aw tih kha kan sawichhuak in, a remchang a nih leh kan Chief Minister zahawm tak pawhin min chhang turah kan ngai deuh a. Kha kha a penhle deuh hlek anga ngaih te kan sawi a.

Tichuan, Pu Speaker, a vaiin ka sawi lovang a, kan Chief Minister zahawm tak chan PWD-ah hian kan sawi tan duhna chu, lawmthu sawina in ka'n tan duh a. Mahni bial lam a tih loh theih loh a, Aizawl West-III lamah sawn kan lawmna em em chu opposition kan nih avangin PWD atang hian en hranna kan tawng reng reng lo a ni. Min duhsak viau ni hian ka hria a, ka lawm khawp mai a. Sawng kawngpui hrang hrang min rawn black-top sak leh hmalakna hrang hrangah sawn lawmawm ka ti a, lawmthu ka sawi ni sela.

Chutih mek lai chuan thil pakhat kan sawilan lawk duh chu, kan Chief Minister zahawm tak pawhin a hriatchian tho niin ka hria a. Lawipu mawng lamah khuan, Bungkawn Presbyterian Pastor Bial sawn Camping Centre, a duh apiang hman tur an ti mai a, kohhran dang te pawhin an hmang thei a, tlawmngai pawl te pawh in an hmang thei a, Rescue & Counselling Centre tih an

nei a. Saw saw ka hriatsual loh chuan 4th April, 2013 khan kan Chief Minister zahawm tak hian a va hawn sak nghe nghe a. Saw saw kei pawhin an thiltih dan kalphung te leh an hmalak dan te ka hmuh in MLA fund tlem te pawhin ka pui ve tawh nghe nghe a. Sawlai saw a panna kawng saw a chhe khawp mai a, ‘hei hi engtinng e in ngaihtuah le?’ ka tih khan ‘kan Chief Minister zahawm tak hi nikum March ni 1 khan kan hmu a, lehkha tha tak min siam sak a, an rawn ti mai ang,’ an ti leh mai thin a. Chung lai tak te pawh chu han sawi chhuah veleh hrim hrim hi ka duh a. Kan Chief Minister-ah a innghat a, lehkha min ziah sak tawh, an la rawn ti mai ang an tih lai khan kum 1 chu a lo liam leh der tawh mai a. Kan hotute paw ‘khan in umzui em’? te ka ti a, ‘umzui ve bawk e’, an ti mai a, a ngaihna hi an hre lutuk lo em ni aw ka ti a. An centre saw an hman dan a duhawm a, kohhran pawl hrang hrang pawh an hmantir a, tlawmngai pawl te pawh an hmantir a, a mamawh apiang khan an hmang thei a ni. He Centre kawng hi sawlaiah chuan ngaihpawimawh awm deuh pakhat a ni mai e. A dangah hi chuan nichina ka sawi tawh ang khan opposition bial kan nih avang hian engmah in enhranna awm lovin a remchang lai lai ah kawng te min siamthat sak zel a ni tih kha ka’n sawi duh a.

Tin, Department zawng zawng ka sawi dawn lo ka tih tawh kha. Power Department chungchangah khan hmanah pawh ka sawi zawk tawh a. Kan electric ban upa lutuk tawh hi chu kum 20/30 te a ding tawh a ni, heng ho hi chu ngaihven thar deuh a tha mang e, engemaw vanduaina tawk palh ila chhiatrupna leh engemaw mihring te pawhin tawhsual tawh theih na hi a tam em em mai a, Aizawl khawpui-ah hian, kan bial chauh pawh a ni lo a, Mizoram pumpui ah a nih ka ring a. Hei hi ngaihtuahna thar hmanga ban hlui tawh lutuk te han thlak, han thawmthat te hi chu tihmakmawh a nih hi mawle aw tih kha ka’n sawi duh a.

Tin, bill sang chungchangah khan hmanniah ka sawi thuak tawh a, ka'n sawi nawn leh duh chu Mizoram hi state dangte leh ram dang te nena compare ngawt theih a ni lo. Petrol te pawh hi Aizawl ai chuan Delhi-ah a to daih a, Mumbai-ah a to daih, Kolkata-ah pawh a to daih. Chuti chung chuan khunga khawsak khu a awl zawk a ni. Thil dang hi Aizawl aia tlawm, entirnan Gauwahati-a ₹ 100-a kan lei theih Aizawl a cheng 130/140-a kan lei hi a tam em em a ni. Silchar mai ah pawh zu kal ila bungrua leh ei leh ei bar thil ho hi. Electric bill hi chuan mipui a concern lutuk lehngal a, mi zawng zawng in kan pek ngai a ni. Heng kan tax thenkhat hi chu a pe tur tlem an awm a, mi tam takin kan pe lova, electric bill ber kher hi chu mi zawng zawng in kan pek a ni tak meuh a, chhungkaw tin economy a khawih pha tlat a, chuvang chuan indim deuh dan hi awm se ava tha em, thil dang te nena kan tih a, chumi khawpuiah chuan chutiang zat chu tia han hrut liam puat chi a ni lo tih kha ka'n sawi nawn leh duh ni sela. Sawi tur tam tak a awm ang a, mahse khalaiah khan ka cheng rei lo ang a.

Tichuan Pu Speaker, ka'n sawi leh lawk duh chu GAD-ah hian, GAD atanga sawi tur tho nge ni? Assam Rifle te hi tun aia nawr nat theih deuh hi an ni em aw, an hmun lam te pawh saw peih thawkhat ni tawh in ka hria a. Nawr ta ila nichina kan ngaihthlak tam takte pawh helai Assam Rifle hmun te hi han singsa thei deuh ila chuan kan traffic jam te pawh hi a thawl sawt sawt dawn ni hian a lang a. Mahse an awm ngai hian an awm nghet riau mai a, pressure pek deuha chak thei an nih ka'n ring deuh a. Central Home Ministry lamah henge pawh hi ngaihpawimawwah neih ta ila, helai an chhuahsan tho turah pawh an ngai niin ka hria a, henglai ram te hi anmahni pawh saw lamah hmun te kan sorkarin a pe fel in an cheibawl chho mek a, chak deuh zawka nawr ni ta se tih kha ka'n rawt leh ni sela.

Tin, point khat dang leh GAD atanga ka'n sawi leh lawk duh chu, February ni 20 state holiday ni thin, kumina holiday a awm ta lo ringawt mai hi ka ngaihtuah dan hi a dik em aw ka'n ti deuh a. A chhan chu tunhma atangin ka ngaihtuahna ah hian a awm thin a, State Day kan tih lai te hi kan va ngainep ve mawle aw. Ram angin, a state angin hei baka ni pawimawh hi engemaw ni kan neih le tih hi ka ngaihtuah a. Entirnan history lamah han let ta ila, 1891-ah British ho in Mizoram min rawn awp a. Lal hrang hrang neia awm kha administrative unity an tih ang khan hmun khat atangin min han hruai khawm a. A tirah chuan Lunglei lam leh Aizawl a hrang hret a, mahse an hlawmkhawm leh thuai a.

Tichuan tuna kan Mizoram kan tih lai hi administration pakhat hnuaiah min han dah a, chutiang chuan kan han kal chho ta a. Chu chuan keimahni ah in unauna leh in pumkhatna/unity a siam a, Mizote unification atan a tha em em a ni. A chhan chu village hrang hrang, ram hrang lal hrang ni mai si thin kha. Tichuan 1947 ah independent kan lo hmu a, India ramah kan tel lut ve a, tah chuan thil thar engmah ala awm em em chuang lova. Mahse kan hriat angin 1952-ah chuan politically- a kan step hmasa ber (ti teh ang) kan han lut a, District Council kan ni ta a ni. Khang te kha a pawimawh hian ka hria a.

Chutah hun a lo kal a, kum 20 hnu ah 1972-ah chuan UT kan lo nei leh ta a, a kipkawi a sawi a ngai lo. Chu chu step khata kan chhoh leh na a ni a, ram angin state ang in, a hnam ang in te ti ta ila. Tichuan 1987-ah state-ah hlankai kan lo ni leh ta a, chu chu hemi political development chho a Mizoram anga kan step rah hnunhun ber a ni a, a pawimawh hian ka hre si a. Dik tak chuan holidah dah loh ringawt mai hi kei ka lai a na deuh a, tuna kan holiday neih tam tak hi chu India ram atanga an rawn rel, 'hei hi holiday ah lo hmang rawh u,' tih te, India Independence day tih te, Republic day te, chung ah chuan engemaw zawnga sawi duh chuan kan tan a pawimawh lem lo ti teh ang. India

ram Independence Day a ni mai a, a tha tho a, kan awm ve na ram a ni a, mahse a Mizoram ang hian a pawimawh lutuk lo zawnga sawi theih dan a awm a ni. Chutih laiin kan holiday thenkhat hi chu kan sakhuana avanga kan state in holiday-a a dah te, India sorkar-in min dah sak te pawh a ni tho a.

Tin, a then hi chu tlawmngai pawl lam te ni pawimawh a nih avanga holiday-a kan dah te pawh a ni a, a tha vek a. Mahse khang zawng zawng aia pawimawh ni a ka hriat chu kan state ti a kan neih, political development kal chho zela kan step sang ber kan luhna ni hi hetu ringawt maia ngaih tur hi a ni em aw tih hi tun hma atangin ka ngaihtuah thin a. Kumin calendar-a an tel ta lo pheih hi chu kan ngaihtuah that leh hi ava tha em aw ka ti a Pu Speaker. A chhan chu kan holiday tam tak leh kan ni pawimawh ni a kan chhiar tam tak hi Mizoram chhunga cheng te pawh kan rual chiah lova ni. Christmas-ah ngei ngei pawh Kristian lo engemaw zat an awm a, anni tan a ropui viau lo maithei. Tin, a then chu sakhaw dang holiday kan han hman ang te pawh. Tin, kan hnam thil deuh anga kan ngaih Chapchar Kut te pawh hi thenkhat tan te chuan a ho viau thei lawi a. Tin, tlawmngai pawl lian ni pawimawh holiday-a kan puang te pawh a tha e, amaherawhchu khawilai area ah emaw chuan pawimawh lem lo a nih dan a awm a ni.

Amaherawhchu he State Day kher kher hi chu a ram pum angin, a hnam angin tunah chuan political step kan chhoh sanna ber a ni hrih a. A pawimawh hian ka hre si a, lawm te pawh kan lawm ngai lo kha dik lo in ka hria a. State unification atan leh kan inlungual zel na atan te pawh dah pawimawh thiam kha tha in ka hria a. Chutih mek lai chuan central sorkar lam atang chuan khang ni te khan kan ram te pawh kha, kan state te pawh kan hotu lian te pawhin minrawn wish ni in ka hria a. Helai pawimawhna hi kan dah pawimawh thiam loh chuan he ram kal zel dan tur te pawh hi ngaihtuahawm in ka hria a. Kan hriat angin Mizoram chu kan chhehvela Zo hnahtlak zawng zawngte pawhin

an thlir ber kan ni, Myanmar ram atang te, Manipur ram atang te, Tripura te, Bangladesh te leh hetah Washington atang pawhin a ni tho, Delhi tlang atang pawhin a ni tho, min rawn thlir vek a ni. Khatia political step-a kan kal chhotha kan thlen san ber ni hetia kan dah ringawt mai hi kan ngaihtuah that leh hi avatha em tih kha Pu Speaker, vawiinah uar deuh takin ka sawi duh a. Zawnah ah te pawh ka zawt ve a, mahse a chhuak dawn em ka hre chiah lova, naktuk chauh hi a awm tawh a. Engpawhnise khati zawng khan ngaihtuah ila he hnam tan, he ram tan, he state tan hian hei aia ni pawimawh han ngaih pawimawh tur hi a awm lo a ni lawm maw ni le ti hial in ka ngaihtuahna ah chuan a awm a. Chu chu GAD subject tho niin a lang a, hei hi uar deuh in Pu Speaker, ka'n sawi ni sela.

Sawi tur tam tak a awm ang a, amaherawhchu sawi vek kha a ngai lova, member zahawm tak tak ten thiam tak tak ten an rawn sawi tawh a. Vawiinah hun tha tak kan nei leh a, a lawmawm ka ti a, lawmthu ka'n sawi a ni, ka lawm e.

SPEAKER : Awle, sawihona chu kan duh tawk tawh mai ang a. Tunah hian kan Minister zahawm tak Pu B.D. Chakma-in sawihona kha han khaikhawm se, sawifiah ngaite a sawifiah zawhah pass rawn dil nghal tawh mai se, amah ilo sawm tawh mai ang u.

Pu B.D. CHAKMA, MINISTER : Pu Speaker, ka lawm e. A hmasain session chungchangah thil tlem sawi ka duh a. Ni 15 atanga vawiin thleng ngawi reingin ka thu ringawt a, zawnah pawh hi a hnunung berah an dah si a. Nimpiniahah reilote MLA zahawm tak Pu Ruatkima zawnah ka chhang a, ka auchhuak a ka lawm hle a ni.

Vawiinah hian react tur engmah a awm lova, member zahawm takten an rawn sawite kha sawiselna ni lovin thurawn vek a ni a, chuvangin, a lungchhiat thlak ni lovin, a lungawi thlak a ni. Member zahawm takten tam tak an sawi tawh a, serial no. pawh hi 1,2,3 in ka pe a, thenkhat chuan lut miah lovin an by pass daih a. Kan department Seciculture hnuaiiah hian member 10(sawm) in min sawipui a, mahse serial no. dah loh kha chu tam tak an awm, anni hian Sericulture Department hi an by pass a, pangang a hlauhawm an tih vang nge, an tui tak tak loh vang tih chu ka hre lova. Pi Vanlalawmpuii Chawngthu pawh kha khawih miah lovin a tlan daih a, Er. Lalrinawma, engineer a ni a, mahse zawhna leh chhanna cross question ukil angin a ti thin a. Pu K. Lalrinthanga pawh hian pangang hi a hlau emaw ni aw, ka ti a, a by pass daih a.

Pu Vanlalvena chungah lawmthu ka sawi rualin thil thar pakhat a rawn sawi a, Lunglei leh Kolasib District-ah Sericulture chungchanga hmalakna a rawn fak hle a, a lawmawm ka ti a.

Tin, Pu K. Sangthuama, member zahawm takin Sericulture hi eizawna department tha lutuk a rawn ti a, a lawmawm ka ti a. Mahse, tun thlengin Sericulture leh Fisheries chungchangah sermon tuman an sawi loh avangin kan hming hi a lar miah lova, mahse department te tak te chu a ni lo. Central lam atangin pawisa kan dil mek a, state matching share-ah hian buaina a awm deuh a, a hun takah state matching share kan neih theih loh avangin central lamah pawisa an dang zel a. Engpawhnise, hun lo kal zelah Finance Department lam pawhin kan ngenna hi khawngaih takin record thei sela.

Tin, member zahawm tak Pu J.H. Rothuama'n Sericulture chungchang a rawn sawi bawk a, a bik takin NLUP chungchangah nimin lamah hot exchange chu a awm tak tak lova Pu Ruatkima zawhnaah khan. Mahse kha kha chu NLUP

ah hian Sericulture hi labour intensive a nih avangin farmers thenkhat chuan an khawih thiam loh avangin mi thenkhat chuan hemi hna hi an bansan tawh a ni. Mahse, tun thlengin khami report chanchinbua an chhuah angin field-ah kalin verification kan la mek a ni.

Kan member zahawm tak Pu J.H. Rothuama sawi angin effect thar chhuak turin hun a ngai a, a tlem berah kum 4/5 vel a nih loh chuan thar chhuah hi a har lutuk a. Chuvangin, NLUP atangin Sericulture hnuaiah tharchhuak turin hun min pek belh a ngai a ni.

Tin, kan member zahawm tak Dr. K. Beichhua, amah hi doctor a ni a, mahse a zawhna leh zawhbelhna hi business lam ringawt a ni a. Silk tharchhuah hi engzatnge ? Cocoon tharchhuah hi engzatnge ? engzat man nge in tharchhuah ? khawiah nge in hralh ? tih te kha business lam daih a ni a, amah hi doctor ni lovin, business lamah kal thei se chu a tha ngawt ang.

Pu Joseph Lalhimpua pawh engmah sawi lovin reiloteah a chhuak daih a, engmah comment min pe lova. Tin, Pu John Siamkunga MLA zahawm tak pawh khan khawih miah lovin a tlan daih a.

Pu P.C. Zoram Sangliana hi MLA senior ber a ni a, a ni hian muga culture chungchang a sawi a, Mizoram hi muga culture chungchangah tunlai hian India ramah kan hming a lar hle a, tun thlengin Assamah hi muga-ah hian a lar thin a, mahse khua a lum avangin Assam atangin Mizoram ah hian Central Silk Board pawhin an ngaihtuah mek a ni, Mizoram hi ideal state for muga culture angin. Chuvangin, department atangin project emaw, proposal emaw a luh veleh anni hi reject phe chu a ngai lem lo, serious lutuk a nih loh chuan a reject ngai lem lova.

Tin, MLA zahawm tak Dr. Ngurdingliana pawhin tlemte a sawi a, tun hunah hian Sericulture hi a tha lutuk a ni a ti a. Eizawn nan hei hi a tha a. Engpawhnise, a chungah lawmthu ka sawi a ni.

Tin, Pu T.T. Zothansanga, MLA zahawm tak pawhin muga hi Mizoram, Champhai ah pawh hma kan la mek a. Tin, ani hian oak taskar chungchang hi tlem a rawn zawt a. Oak Taskar hi kumkhatah hian vawikhat chauh a rah thei a, mahse chumi ai chuan mulberry leh muga te chu an hlawk zawk a, kumkhatah vawi hnih, vawi thum vel chu a rah thei a. Mahse, Oak Tasar hi Mizoram ah hian thil thar a ni a. Tin, kum khatah vawi khat, vawi hnih tal chu a rah thei a. Chuvangin, Oak Tasar hi tul kan ti em em lova, mahse mulberry, muga leh eri, eri pawh hi tun thlengin Mizoramah hian a lar vak lova. Eri-ah pawh tunah hma hi kan la mek a ni. Delhi-a kan kalin D.O letter Textile Minister zahawm tak hnenah proposal kan thehltut a. Mizoram western bialah khawlum lai hmunah hian Eri hi tha an ti a. Chuvangin Eri project kan siam theih nan proposal hi kan thehltut tawh a, positive response hi kan hmu tawh a ni.

Tin, kan Parliamentary Secretary zahawm tak Pu Dinga pawh hi engmah khawih miah lovin a tlan daih tawh a. Pu Nihar-a pawh Sericulture Minister hlui a ni a, hmasawanna tur engemaw min pe dawn emaw ka ti a, mahse, ani pawh hi engmah sawi lovin a tlan daih a, Electoral roll te, Tlabung bial British hunlai tih te, hming lar deuh Aizawl, Lunglei leh Tlabung tih ringawt a sawi a. Engpawhnise, ama hnenah pawh lawmthu ka sawi a ni, engmah sawi lo mahse.

Tin, Pu Lalruatkima, kan MLA zahawm tak niminpiahah pawh zawhna tha tak min zawt a, keipawh in duhtawkin ka chhang thei a. Mahse, incorrect report chungchangah nimina ka sawi kha chu final a ni a, tlem chu variation a awm thin a ni, 3rd phase leh 4th phase-ah, one village, one trade policy kha kan hman duh vangin

fluctuation tlem a awm vang a ni a. Kha kha chu tih dikloh na pawh a ni lo, minor fluctuation tlem a awm vang a ni.

Tin, kan member zahawm tak Pu T.Sangkunga pawh engmah khawih hman lovin department dang hi nasa deuhin a sawi thin a, mahse, sericulture chungchangah hian pangang hi a hlau tawh em ni aw ka ti a, nge a tui vak loh vang? Ani pawh hi technical line hrang hrang ah pension hmain a kalkual nasa, mahse, sericulture-ah chuan engmah a sawi lo kha chu a mawi lo a ni. Nakum budget session ah a sawi tawh ka beisei ang. Department dang a lar deuh PWD te, Power & Electricity te, PHE-te kha chu sawi ngai lovin a chiang sa a, mahse, hetiang department te tak te kha chu uluk deuhin sawiho tur a ni a, hemi House zahawm takah Pu Speaker. Chuvangin nakum lamah te chuan Pu T.Sangkunga ka ngenna chu, hei Sericulture chungchangah chuan nasa deuhin minute 20 tal chu i sawi tur a ni.

Tin, a tawp bera kan group leader, senior ber, MP pawh lo ni tawh, member zahawm tak Pu Vanlalzawma, amah hi Fisheries chungchangah pawh positive response lutuk, Delhi-ah te, Mumbai-ah te a kal nasa a, Vai ho sari hi a then chu pakhat man pawh cheng nuai khat vel te a awm a, chutiangin silk sari chungchang min sawipui avangin a chungah hian lawmthu ka sawi a ni. Engpawhnise, budget speech angin Sericulture chungchanga sermon dik tak chu a sawi ngai lovin ka hria a. He department hi chu a hminga lar lutuk, department te tak te chu a ni lo, department lian tak a ni a. Mahse, sawihona a awm loh avangin a hming hi a lar miah lo a ni a. Engpawhnise, he House-a member zahawm tak zawng zawngte hnenah hian Sericulture lampanga interest hi nei vek turin ka sawm che u a ni.

Fisheries hi chu pentom style in Pu Speaker, kan lo kal thin a, kan MLA zahawm tak ten pentom style in khitah Irrigation lam atangin an sawi tan tawh a. Kei pawh Sericulture hi a hnung zawkah awm mahse ka sawi hmasa a, a chhan chu a Minister changtu hian Sericulture hi a ngaipawimawh lo min tih ka hlauh vang a ni.

Tin, Pu Speaker, MLA zahawm tak zawng zawng ten Fisheries chungchang an sawi nasa khawp mai, a vaiin member 16 in an sawi a. Pu Nihar-a leh Pu Joseph-a ten min by-pass tawh a, hei hi chu a diklo lutuk, by-pass surgery kha chu ka duh miah lo. Tlemte tal pawh sawi tur a ni a, engpawhnise, serial no.1-ah hian ka'n kal hmasa ang e.

Member zahawm tak Pu R.L.Pianmawia hi chu Fisheries lampangah chuan potential area mi tak tak a ni a. Khaw tam tak chu potential area angin keimahni Fisheries Department-ah record kan nei a ni. Hei uluk deuhin kan en hman lova, ama sawi hnu ah chauh a lang ta a ni a. Motor pakhat lei nan pawisa hi ka en that loh vang a niang, kha chu a tha lutuk Pu Speaker. Director zin nan pawh motor hi hire a ngai si a, a awmsa kha chu a hlui tawh lutuk, fuel pawh a heh lutuk a, kalkawng pawh a chhe lutuk tihna a ni a. Chuvangin, motor thar leina tur pawisa a awm kha a lawmawm ka ti a.

Tin, initiative incentive to YMA hi nikum pawisa hi kan hmuh tlem avangin kan pe thei tawh lova. Mahse, nikum hmasa daih a ni a, YMA branch thenkhat te chuan incentive hi an dawng tawh a, RKVY hnuai atangin ₹ 40,000/- bawr vel niin ka hria. Kha kha chu innovative programme tak tak a ni a. Anmahni hian luidung te, sangha humhalhna ang chi ah hian hma hi an la tha em mai. Nikumah pawh Darzokai, Tuipui 'D' ami, Tuipui 'D' ah chuan kan kal ta a, hetah hian YMA te, VC ten sangha an humhalh danah fakawm ka ti a. Sangha lian pui pui a awm si a, bridge atangin kal kualin kan en a, lunglen thlak a ni. Application ziakin, 'watch tower pakhat tal hi min ngaihtuah teh Minister sap,' an ti a, assurance kan pe a. Mahse, hei nikumah pawisa kan hmuh tlem lutuk avangin kan thei ta lo, kuminah eng pawhnise, pawisa zawngin assurance hi kan implement ngei tur a ni, Darzokai-ah watch tower kan siam theih nan. Kuminah RKVY hnuai Agriculture Minister model a nih avangin RKVY lam atangin sum hi min pe tam thei se uluk takin kan ti thei ang.

Tin, Mizo tawngin ka sawi thei lovang tih ka hlau va, nizan dar thum bawr vel khan ka nupuiin min kai tho va, 'enge i sawi Mizo tawngin'? a ti a, 'ka demand hi naktukah pharh tur a ni a, chuvangin Mizo tawngin ka sawi a ni,' ka ti a. Pu Vanlalvena min fakna kha ama hnenah pawh lawmthu ka sawi duh a ni. Mizorama awm chhungin Mizo tawng hi hman ka duh a, a nih loh chuan motor a kal chuan Vairengte kal pelh hian Bengali tawng hman a ngai a, Lengpui ah kan flight chuan English emaw, Hindi emaw hmang lo chuan a theih loh a ni. Chuvangin Mizorama awm chhung Mizo tawng hi hman ngei a tha a ni. Ka lo sawi sual palh a nih chuan ngaihdam ka dil a ni.

Tin, Cold Storage chungchangah hian, cold storage chu a tha, marketing chungchangah pawh cold storage hi a pawimawh hle a ni. Aizawl ah pawh tunah Zemabawk ah a ding mek a, compressor a dik loh avangin Calcutta-ah machine kan chah mek a ni. Hun reilote ah chuan a running leh thei dawn a ni. Tin Bilkhawthlir lamah pawh ice plant hi kan neih lai a ni a, Zawlnuamah a awm bawk a, Serchhipah a awm bawk a, Lunglei leh Lawngtlaiah pawh dah kan tum mek a ni. District tinah dah thei se marketing lamah pawh a tha zawk ang.

Kan MLA zahawm tak Pu K.Sangthuama sawi angin sangha chi size lam hi chu amah ringawt ni lovin member zawng zawngte opinion hi a inang vek a. Sangha chi size kha te tak te a ni a, a lian zawk supply theih dan hi a awm lawm ni tih kha. Laymen vision atanga ka'n sawi duh chu, a lian deuh deuh kan sem chuan a la awm kha chu dilah dah lovin Phung dil ah an dah dawn em ni aw tih te kha ka hlau a ni. A size lian lian kan pek hmain, resolution kan lak hmain uluk deuhvin kan ngaihtuah a ngai a ni. Kei pawh ka lu a hai khawp mai, kan MLA thenkhat ten size lian chi min pe rawh, a man chu hetiang zat a ni a, a size tein pawisa tlem te inpek theih dan a awm lawm ni tih kha a awm thin a ni. Engtingnge kan kal dawn, a lian nge kan sem ang a te chi a buaithlak hle a ni.

A rate chungchangah hian sawi duh ka nei a, 4.40 kha chu NLUP atangin a ni a, mahse hei chu sawiselna pawh awm lovin, tihdik lohna pawh awm lovin hei chu a dik a ni. A size lian an duh a, a rate pawh a pung tur a ni.

*Speech not corrected.

Er. LALRINAWMA : Khalai kha common carp fingerling Serchhip leh Champhai tan ₹ 4.40 apporved a awm a ni. He meeting hi ni 10.10.2014-a pawm a ni ta a ni. Khami lo kha a hran a awm ta a, ni 10.3.2015-ah hian common carp fingerling tho kha khami size chiah chiah kha Mizoram pumpui atan khan rate passed a awm a ni. Kan chhiar ang e - The Committee also decided that approved rate can be made applicable for other Departmental on going programme on similar item like Fish Farmer Development Agency, National Fisheries Development Board NLUP leh RKVY te pawh a ti a ni. He Committee hian NLUP tan Mizoram pumpui rate a siam a. Tichuan ₹ 4.40 kha chu Champhai leh Serchhip tan chauhva siam a ni.

Pu B.D.CHAKMA, MINISTER: Er.Lalrinawma chu hisap lam chu a thiam khawp mai, kei chu class 12 passed hnu ah Maths ka khawih ve ngai lova, MBBS zirlaiah pawh

* Speech not corrected.

Er. LALRINAWMA : Pu Speaker, kha kha chu a ni thei lo, Chiang takin document a awm a, i thiam lo a nih chuan Pu Speaker, engatinge thiam lovin a enkawl. Pawisa tam tak involve na a ni a, mipui pawisa hi he rate ₹ 4.40 a hman avang hian he supply ang hi ₹ 121.5 lakh a tling a, rate pangngai hi Zoram pumpui ah hian hmang se chuan ₹ 32.79 lakh in a complete theih a ni. Tichuan, a lo thlawn tawp in ₹ 88.71 lakh hi kan seng thlawn a ni.

Pu B.D.CHAKMA, MINISTER : Ka hriatsual loh chuan Er.Lalrinawma hian chanchinbu hi a chhiar lo em ni aw ka ti a. Hei hi chu tunah ACB in an en mek a ni, chuvangin kan investigation neih laiah khan khatia sawiselna hi House zah lohna a ni a. (Speaker : Investigation a awm mek a ti).

*Speech not corrected.

Er. R.LALRINAWMA : Pu Speaker, chu chu a tan tirah khan a rawn sawi tur a ni. ACB in an tih lai a ti a nih chuan engatinge a rawn react si tunah khan a dik thlap ti lo khan hei hi chu ACB in an chhui mek ti se a fel ni mai tur a ni a, a rawn sawifiah alawm amah khan. ACB in a chhui ti se chuan kan ngawi mai ang, amaherawhchu, sawi fel a tum a, a dik thlap a ni a ti a, kha vang khan ka rawn point out a ni tunah hian.

Pu B.D.CHAKMA, MINISTER : Pu Speaker, kan hriatsual loh chuan Investigation kal lai kha chu House-ah hian discuss chi a ni lo.

Tin, kan MLA zahawm tak, Pu K.Lalrinthanga'n Fish Mill Plant chungchang min sawipui a, Bilkhawthlir ah pakhat chu a awm a, mini type Fish Mill Plant a ni a, kha kha chu fund problem kan neih avangin raw material kan lei thei lo a, chuvangin, he fund hi kan neih theih veleh sangha chaw siam theihna khawl zawng zawng hi run turin kan beisei a ni. NLUP lamah emaw, RKVY lam atangin emaw pawisa min pek theih chuan khawl zawng zawng hi kal thei turin kan ngai a ni.

Tin, MLA zahawm tak Pu J.H.Rothuama'n sangha chi size chungchang bawk kha a sawi a, hei hi chu uluk deuha sawi ngai lovin a dawt ah Dr.K.Beichhua, kan member zahawm takin fish production chungchang hi a sawi a, hei Governor Speech ah hian dik chu a dik, he House-ah hian ngaihdam ka dil a ni. Hei hi chu ziaik dik lo a ni a, printing mistake pawh a ni maithei. NLUP beneficiaries page No. 4 at least 1.5-2 lakh as monthly income ni lovin yearly income a ni a, hei hi chu printing mistake a ni a, tihpalh awm thei a ni a, NLUP pawh hi National Land Used Pulicy angin an ziaik a, nakin zelah

kan kal chak lutuk a nih chuan keini pawh yearly ni lovin monthly a nih theih ka ring a. Tunah chuan a dik a nih loh pawhin nakin zelah reiloteah hetiangah thar chhuah dan chu awm theiin ka ring a ni.

Tin, Pu Joseph Lalhimpuia chuan sawi lovin a tlan daih a, Pu John Siamkunga chuan a sawi tha khawp mai. Construction of New Born, hei chu sorkar lam atangin scheme tam tak a awm a, 200 hectare vel chu sangha khawia hman turin ruahmanna a awm a. Tin, marketing chungchangah pawh thurawn min pek avangin a chungah lawmthu ka sawi a ni. Tin, fish fed chungchang pawh hi sawiselna a awm vak lo a, mahse size chungchangah chauh a ni a.

A size hi tunah hian ka sawi belh duh chu Pu Speaker, sangha chi hi size te tak te a nih chuan courier capacity a sang lutuk thin a ni. Bel pakhatatah a leng tam lutuk a, mahse a lian lutuk a nih chuan courier lam pawh hi a harsa lutuk ang. Oxygen hi an mamawh a, mihring angin sangha pawh hian oxygen an mamawh a ni. Sangha lian pui pui a nih chuan khitah khaw hla lamah te an chho a nih chuan oxygen an mamawh avangin an survival rate hi a hniam lutuk ang. Kha kha chu scientific reasoning a ni a, sangha chi te aiin sangha lian zawk kha chu phurh laiin survival rate a risky zawk a, chuvangin sangha chi size lian nge size te tha ang tih kha chu uluk deuha sawiho tha ka ti a.

Tin, member zahawm tak, member senior Pu P.C.Zoram Sangliana khan Serlui 'B' chungchang tlem a sawi a. Hetah hian catch culture hi kan nei a ni. Kumtin khulaiah V.C. leh YMA te, department ten tangkawpin improvement kan nei thin a ni. Chumi thar chhuah ve leh revenue hi 50 – 50 in kan sem thin a ni. 50% chu V.C member leh YMA te kutah a awm tihna a ni a, 50% dang chu state revenue angin kan nei thin a ni. Tin, DFO Office Kolasib chu an sa zo tep tawh in kan hria a, PWD ah ₹ 35 lakh hi complete nan kan dah tawh a ni. Electricity te, tui connection te, khata hman turin pawisa hi PWD kutah kan dah a ni.

Tin, kan member zahawm tak Dr.Ngurdlingiana'n Serlui 'B' chungchangah NGO, te V.C te kan sangha khawid an chungchang ah a sawi a, a chungah lawmthu ka sawi a.

Tin, Pu T.T.Zothansanga, member zahawm tak sawi Fish Mill Plant Champhai ami hi tunah a zo tep tawhin ka hria a.

Tin, member zahawm tak Pu S.Laldingiana khan Tuipui Fish Feed chungchang a rawn sawi a, tunah chuan Fishfed kutah a awm a. Zofishfed kut atangin a lo thleng vat lo a nih chuan nakin zelah renovation atan central sorkarah fund hi kan dil mek a, existing fund renovate turin revise vek turin department lam atangin kan duh a ni. Department lam atangin pawisa hi kan hmuh theih veleh Tawipui Fish Seed Farm pawh hi renovate turin kan pawm a ni. Tin, Pu Nihar Kanti Chakma, member zahawm tak pawh hian fisheries hi a by-pass daih a.

Tin, member zahawm tak Pu Ruatkima'n hming chungchang thu ah hian, Electoral Roll-ah hian Dr. tih hi a lang miah lova, B.D. Chakma tih chuan khu lamah chuan an hre vek tho va Dr. tih ziah tel loh pawhin, hei hi chu a pangngaiin kal rawh se ka ti a. Electoral Roll-ah pawh correction hi kan ti ngai lova chuvangin B.D. Chakma-in a kal ringawt a ni.

Tin, Fish Seed Farm, Lengpui khu chu tun thlengin Pu Laldenga hmingin Pu Laldenga Fish Seed Farm tiin an dah a, kha kha chu engtik hun atangin nge khami hming kha a put tawh, engtik hun atangin nge khami hming kha paih a nih tawh tih kha chu uluk deuhin scanning tih a ngai a ni a. Ka hriatsual loh chuan sorkar establishment ah hian mahni hming hi tihlan kan duh chuan contribution neih a ngai a ni.

*Speech not corrected.

Pu LALRUATKIMA : Pu Speaker, kha lai kha His Excellency the Governor of Mizoram in a hawn a ni a, a lungphun pawh gate bulah khuan a awm a. Amaherawhchu, department-in signboard in zuk tar a, kum 2010 pawh khan Lengpui Fish Seed Farm in ti ngat a ni. He thil hi thil sensitive tak a ni a, kan hruaitu hmasate hming chawia thil lo tih tawh inthlaksak hi a mawi lo a ni. Chuvangin he House zahawm takah ka zawhna unstarred question thenkhatah pawh Lengpui Fish Seed Farm tiin min rawn chhang fo mai a, chuvang chuan Laldenga Fish Seed Farm kha enge vuah leh hman a harsat viau le, hming an lo phuah tawh thlak kher kha a tul kher em ni? Thlak zel dawn chuan politics-ah thil tha lo deuh kha a thleng thei dawn niin ka hria a, chuvang chuan, hei hi chu pu ve mai ula, Governor zahawm takin a lo tih tawh a nih vang khan ka ti a nih chu.

* Speech not corrected.

Pu B.D. CHAKMA, MINISTER : Pu Speaker, a tha e, hei chu ngun takin kan en dawn nia. Engpawhnise, thil pakhat ka sawi duh chu, hming aiin hnathawh hi a pawimawh a ni. Example-ah LADC lam tlem ka'n sawi lawk ang e Pu Speaker. LADC inthlanah khan Chawngte 'P' ah khan ka campaign laiin putar pakhat a lo kal a. Congress lam atangin campaign pui turin Pu Zodintluanga a lo kal dawnin kan hria a, "Pu Mama hi a lo kal dawn lo em ni," min ti a (Pu Zodintluanga aiin Pu Mama hming hi keimahni lamah chuan a lar zawk a ni.) Chutiang bawkin hei pawh hi hming aiin hnathawh dan hi pawimawh tak a ni a. Engpawhnise, anmahni hming hi tar an duh chuan pawl kan ti lova, uluk deuhin kan en dawn nia.*speech not corrected.

Pu LALRUATKIMA : Pu Speaker, i duh emaw duh lo emaw kan Minister zahawm tak kha i tar ngawt theih kha a ni chuang lova, an tar sa vek a, kha kha maintain mai ula.

*Speech not corrected.

SPEAKER : Ngun deuhin kan en dawn nia a tih chuan Minister khan sawi zawm leh se.

Pu B.D. CHAKMA, MINISTER : Pu Speaker, member zahawm tak Pu T. Sangkunga'n Fishery hnuaia initiative kan lak chu a fakawm a tih kha a chungah lawmthu ka sawi a.

Tin, fish consumption chungchang pawh a sawi a, hei pawh hi ice plant chungchanga tel daih a ni a, a fresh-a kan ei duh chuan ice facilities hi nei h a ngai a, District tinah hian ice plant hi nei turin kan ngaihtuah mek a ni.

Tin, a tawp berah kan senior member, opposition group leader Pu Vanlalawma'n kan MLA chungchang tlem a sawi a, keima lam atang pawhin Pu Speaker, a fakawm ka ti a. Hei state dangah hian sawiselna a tam a, exam an nei zel a ni a, mahse vanneihthlak takin Mizoramah chuan chutiang incident chu kan en ngai lo hrim hrim. Chuvangin, Mizoram Assembly te chu India ram pumah model Assembly angin hun reiloteah India sorkar in min puang mai thei, kha kha chu fakawm ka ti a.

Fish consumption chungchangah amah pawhin tlem thurawn min pe a, sangha chungchangah vai hote chuan exam lai hian sangha lu hi an fate tan an sem tih a ni a, kha kha chu a scientific deuh nge social lam atangin khatiang rilrua thil awm kha chu engmah base a awm lova. Engpawhnise, sangha hi taksa tan chuan a him ber a. Kan opposition member Dr. K. Beichhua pawh hian a hre lutuk, sangha thau ah hian omega three saturated fatty acid hi a awm thin a Sangha ah hian. A thau kha chu a tha lutuk an ti, lung tan pawh a tha lutuk an ti.

Chuvangin, sangha nitin a ei hi engmah restriction a awm lo. Red meat kha chu lung lama harsatna nei te tan chuan a tha lo lutuk a, doctor-in ei an phal lo a ni a, artui pawh ei phal loh a ni a, mahse sangha hi chu engmah doctor lam atangin restriction a awm lova, ei theih zel tiin anmahni hian an prescribe thin a ni.

Chutiang chu a ni a, sangha hi most safe food angin kan puang ngam a ni House-ah. Fisheries chungchang a ni a hei hi chu. Hun a rei duh si a thil zawng zawng a sawi vek theih lova. Fishery chungchang ah thil pakhat ka puang duh a, nichin lawkah chanchinbuah kan chhiar a, UD & PA atangin nge khawi lam atangin nge office zawng zawng survey an nei a. Chumi zingah chuan kan Fishery Directorate chu fai ber zingah a tel a ni. Chuvang chuan officer and staff te hnenah lawmthu ka sawi rualin April ni 1-ah hian kan MLA zahawm takte ka office-ah lo kal kual thei se, ka awm loh pawhin ka personal branch amite chu an awm ang a, BPL thingpui kan inpui dawn a ni tih kan rel a ni, ka personal branch te nen. BPL thingpui kha chu a sen hang a ni a, Pu Speaker. Pawisa nei lo tan a him ber a ni, a tha ber a ni. An lo kal kual theih chuan ka awm loh pawhin ka personal branch te hi BPL thingpui in lo inpui dawn nia. Chu chu ka'n sawi duh a ni a.

Tin, a tawp ber atan, hei ka demand tam tak sawi tur chuan hun rei tak a ngai ang a, chuvangin keini chu vawiinah hian demand te ber place tur kan ni a. Chuvangin hun rei tak hman ka tum lova. Mizo tawngin rei tak ka wind up theih avangin ka lawm khawp mai, Pu Speaker.

Tin, tlem wind-up hmam Fishery chungchangah hian ₹ 8,76,45,000.00 ah hian revised estimate siam hmam Finance Minister changtu leh kan House Leader te ka ngen a, kan Department chan pahnih tan. Fishery chu tlemte a ni a, crore something a ni a, Sericulture chu 16 crore something a ni a, inang lo khawp mai. Department pahnih chauh ka nei a, Minister ka nih avangin heng department pahnih te hi ka fa angin ka duat

thin a. Chuvangin 80 crore vel hi Rfisheries tan RE-ah chuan min pek belh thei se, tin, Sericulture hi 16.95 crore chauh a ni a, kha pawh kha 116 ni thei sela. Tianga a kal theih chuan difference hi kan nei tam vak lo ang a, unau angin an kal thei mai ang, department pahnih hi. Chuvangin Revised Estimate siam hma in ka Department pahnih tan Anticipatory Bail dil ka duh a ni. A nih loh chuan pawisa awm loh avanga thawh theih lohna avangin Jail-ah an tang ang tih ka hlau a ni. Chuvangin Anticipatory Bail hi ka dil duh a ni, kan Finance Minister zahawm tak hnenah.

Tichuan ka demand 2, demand No. 35, Fisheries Department- ₹ 8,76,45,000/- leh Demand No.41, Sericulture Department - ₹ 16,95,60,000/- total - ₹ 25,72,05,000/- hi he House hian min pass pui turin ka ngen a ni. Ka lawm e.

*Speech not corrected.

SPEAKER : Awle, a sawi zo tawh mai dawn emaw tih laiin, 'tin' a la awm leh thin a, chu chuan a tirei deuh hlek a.

Tunah hian kan Minister zahawm tak Pu B.D. Chakma-in a Demand No. 35 leh 41 hnuaia department te 2016-17 chhunga pawisa hman tur a vaia belhkhawm ₹ 25,72,05,000/- hi pass pui turin a dil a, pass remti zawngin 'remti' ti ru le, remti lo kan awm em? Awm lo.

Tichuan, Fisheries department leh Sericulture department ten 2016-17 chhunga an pawisa hman tur a vaia belhkhawm ₹ 25,72,05,000/- chu he House hian lungrual takin a pass a ni.

Pu B.D. CHAKMA, MINISTER : Pu Speaker, ka lawm e.

SPEAKER : Awle, tunah chuan kan House Leader zahawm tak Pu Lal Thanhawla'n a demand kan han sawihote kha han khaihawm se, sawifiah ngai te a awm

chuan sawifiah se. A Demand hrang hrangte pass rawn dil nghal mai sela. Amah i sawm tawh mai ang.

Pu LAL THANHAWLA, CHIEF MINISTER : Pu Speaker, vawiin kan demand sawiah a bikin a hminga ka'n chanpual ve ah member zahawm tak tak 18 in an sawi a. A tlangpuiin lawmthu sawina bakah constructive suggestion te tam tak a awm a, a lawmawm tak zet a. Tun session-ah demand sawina hnuhnung ber a ni a. Thahnem pawh kan ngai tlang a, tin, thahnemngai tur pawh kan ni a, A lawmawm hle a, lawmthu ka sawi takzet a. Tin, tun tuma kan House hi tun thleng hi chuan a nuam hle a. Hei, keini lamah kan inkawmngaih tlang a, a tua te pawh. Kan Deputy Leader nen pheih chuan thiamna lamah pheih chuan zir sang lo berte kan ni a, mahse, chuti chungin kan nih bak piaah lamah kan thawhpui ten min chawimawi a, tun thlengin hmingtha takin min la chhuah a, ka lawm tak zet a.

Tin, kan discussion kalphung reng rengah pawh tun baka constructive opposition hi a awm thei dawn em ni aw tih te ka ngaihtuah thin a. Tin, engemaw hriatthiam loh a awm pawhin a tlangpuiin induhthawhna lampang a ni zawk mah mah a. Insawichhiat ai chuan constructive taka insawisel te, duhthawhna sawi te a ni a, lawmawm tak a ni. India ram chauh pawh ni lo, khawvel Parliament hrang hrang, House hrang hrang, insual bur bur thin te, inhnek buai thin te, intin uaih uaih thin te tan chuan entawntlak tak kan ni a. Kan zavaia ringtu kan nihna nen pawh a inhmeih hle a. Hetiang decorum hi hun lo kal zelah pawh hian la maintain zel theih se thil duhawm tak a ni.

Pu Speaker, hei dar 6:30 PM a ri tawh a, political platform-ah hi chuan rang tak maiin darkar 2 chu ka sawi mai thin a, darkar 2 aia rei te. Ka nupui hi ka sirah a thu thin a, che map lo hian a ngaithla tluanchhuak zak thin a. Zanin ah hian member zahawm tak te hi ka nupui tluk an awm hlawm ang em aw tih ka ngaihtuah a. Tin, an sawi te, an duh thawhna te zawng zawng kha sawi fiaha ka chhan dawn chuan darkar 2 ah kan lengin ka ring lova, chuvangin a zavai khan ka ti lo ang a, mahse ka lak tawi lutuk

chuan hei officials thahnemngai tak tak, kan member ten an hriat duh te min rawn hrih zel tute, ka lo hriat loh palh hlaua thanhnemngaite an zahawm bawk si a. Engtingge ka tih ang? Rei deuh kan sawi vak mai dawn nge?

SPEAKER : A pawimawh zual kha, House-in a hriat atana pawimawh zual kha ti la.

Pu LAL THANHAWLA, CHIEF MINISTER : A pawimawh zual vek mai si a, engtingge ka tih ang aw !

SPEAKER : A pawimawh zual chu i hre thiam ve tawh mai ang chu.

Pu LAL THANHAWLA, CHIEF MINISTER : A hmasa in tlema a penhle deuh kha han sawi ta ila.

SPEAKER : Hemi zawhah bill pakhat kan neih kha ka pu.

Pu LAL THANHAWLA, CHIEF MINISTER : Aw ka hria e, chu chu rawn putluha 'aw le,' tih kha a ni mai a. Member zahawm tak Pu Zawma Opposition Group Leader in holiday chungchang a rawn sawi kha, kuminah hian State Day kha Inrinni a ni a, chuvangin tihlan a tul hranpa lova, chuvanga ti lang lo mai kan ni a, kum dangah chuan holiday-a kan puan ka ring, tun hma pawhin kan puang thin a. Tin, holiday tam lutuk hrim hrim, kan calendar a sen thluah mai hi rampum huapa enin a zahthlak kan ti a. Chuvangin holiday ngah ber state nih kha thalo in kan hria a, chuvangin danin a phal china tlem thei ang ber te hi ngaihtuah ve zawk ila tih hi kan hotute ngaihtuahna a ni a, chutiang chuan kan kal a ni. Tin, central sorkarin holiday neih ngei ngei tura a ruat compulsory holiday's 14 a awm a, chung chu Republic Day, Independence Day, Mahatma Gandhi Birthday, Udha Purnima, Christmas Day, Dushera, Vijaya Laxmi, Diwali, Good Friday, Guru Nanak's Birthday, Id-ul Fitr, Id-ul Juha, Mahavir Jayanti,

Mohuram, Prophet Mohammed's Birthday, Id-E-Milad-te hi an ni a. Hemi hi sakhaw zawng en chuan Mosolman unau te holiday hi a tam ber niin a lang a. Heng hi compulsory an ni a, tichuan a bakah hian keini ramah chuan YMA Day te, MHIP Day te ngaih pawimawh loh theih loh, kan NGO Mizoramah chauh ni lo, India ram pumpuia pawimawh te, lo lar tawh te an awm a.

Tin, tunhmaa holiday a rawn sen thluah thin tam tak kha erawhchu kan paih a ni, kan ngaipawimawhlo ni lovin a enjoy tu te, a hmang tute an tlem tawh avangin. Entirnan Onam chu Malaylee ho festival pawimawh tak a ni a, anmahni chuan an ngaipawimawh em em a, Mizoramah an lo puang veleh ringawt thin a, mahse Keralite Malaylee employee hi kan nei tlem hle a ni. Chuvangin chung ho chuan an duh chuan engmah in restrict na awm lovin an enjoy theihna turin Restricted Holiday-ah kan hmang thung a.

Chutiang chuan Sikh ni pawimawh a ni emaw, khatiang ho kha helaia Guru Nanak's Birthday tih ang reng te piah lamah hi chuan Government of Mizoramah khatiang observe tur chi an tlem tawh em avangin leh awm manglo te pawh awm tawhin kan hria a. Chutiang ho chu Restricted Holiday-ah kan dah a ni. Chuti chungin sakhaw hrang hrang occasion pawimawh zual hi chu tunah hian kan la retain tho a, chu chu a kal phung a ni a. Tin, Missionary Day hi tun hma khan January ni 11 kha kan hmang ngar ngar a, Kohhran thenkhatin an han tih belh a, mahse kum 100 chuang kan lo hman tawh January ni 11 kha hman chhonzawm zel hi a dik berin kan hotuten an ring a, chuvangin January ni 11 hi Missionary Day atan kan hmang chhonzawm zel a ni Pu Speaker.

A zawng a za chu sawifiah pawh a ngai lova, sawi pawh ka tum lova, mahse a pawimawh zual deuh deuh leh tlema han penhle harsalo deuh, hun la lo deuh, entirnan MLA zahawm tak Pu Zawma'n khulai Lawipu Camping Centre a sawi kha hmun tha tak a ni a. A hawnni ah min rawn sawm a, kan zuk kal a, develop tlak a ni a, develop pawh tha kan ti a, chuvangin zawi zawiin sum neih angin kan la ngaihtuah zel

ang chu kan ti a. Tichuan a kawng kha kan zuk kal a, kan department ten lo ngaihtuah se kan ti a, a sei zawng hi 2.60 km a ni a, hei hi thil pawimawh tak a nih avangin tun kum tharah hian repair dan, tihchangtlun deuh dan kan lo ngaihtuah ang.

Tin, member zahawm tak Pu Ruatkima khan city road side drain hi a cover, a khuhna siam ni se a tih kha AMRUT hi UD & PA ah a awm a. AMRUT scheme-a proposal ah hian link drain PHE Department proposal milin Phase-I ah road side drain a remchanna hmunah chuan khuh tura hmalak mek a ni a, a proposal pawh thelthuh tawh a ni a. Hnawmhnawk, garbage tamna chhan hi chu a tam ber hi chu link drain-a bawlhhlawh paih kan tam vang a ni. Kan inthlahdah vang a ni tlangpui a, kan inthlahdah result hi keimahnin kan tuar leh a, a pawh hle a ni.

Tin, member zahawm tak Pu Ruatkima rawtna thenkhat heng kawng enkawl chungchangah Road Protection Squad hi a la awm reng a. Action te pawh la-in report te pawh an la rawn thelthuh reng a, an theihpatawp chu an han chhuah a, mahse kan luhlul hlawm khawp a, chuvangin a effective lo em ni chu aw tih te a awl khawp mai.... road side a workshop han siam ve ringawt te hi awih loh a ni a. Mahsela, an ti lui zel tho a. Chung ang te pawh chu tunah hian action lak mek te a awm chho mek zel a ni.

Tin, University kawng hi sawi a hlawh hle a. Permanent work khawihhute bill pek loh tih hi tun kumthar-ah hian pek tura ruahman a ni a. Tin, Serkhan - Bagha kawnga khatiang a diklo taka sum inlaksak awm kha engatinge tun thlenga action lak a nih loh le tih hi ka hriatthiam loh zawng tak a ni a. Sum a kal lohna tura kal leh a khawihlo tur ten an lo khawih chingpen hi ka huat zawng ber a ni a. Chuvangin, hei hi chu rang takin a chhuichhuah theih pawh ka ring a. Tin, an chhuichhuah theih loh chuan a petu kha identify si lovin engatinge a pek ringawt, kha kha a diklo niin ka ring a. Chu chu awlai taka chhuichhuah theih tur a nih ka ring a, kan chhuichhuak bawkw ang.

MLA zahawm tak Pu Rinthanga'n Secretariat Main Gate Aizawl West lam panna kawng tih zauh, Secretariat panna kawng dumping ground ah leivung paih kawng hnaih lutuk a tih vel hi enfel mek a ni a. Hei hi PWD leh GAD ten an mawh tur a ni a, an lo en ang.

Er. Lalrinawma hi thahnem a ngai hle a. A tlin leh ngei pawh kan hotuten an duhsak a ni ang. A bialah hian kawng a tam hle mai a. A tul chuan a sawi chhuah tih te pawhin kan han sawipui ang chu. Chhawrtui – Rullam road hi chak zawka hmalak ni se a ti a. Tunah hian Chhawrtui – Rullam road hi formation cutting, culvert leh retaining wall te zawh vek tawh a ni a. Tunah hian pavement hna hi PMGSY Phase V Scheme a thawh mek a ni, 20.46km a thui a ni a. A hna hi ni 18.1.2008 a pek tawh, hna chak loh vanga tih tawp, terminate, midang hnena pek leh a ni a. Tunah hian 5km vel chauh blacktopped zawh a ni a. A hna hi kum 2006 PWD settled rate a estimate a ni a. Tunah hian price escalation hi a sang tawhin, contractor work order rate pawh hi a hniam tawh em em mai a. A hna a kal tluang lo bawk si a.

Chuvangin, a hna zawh nana pawisa mamawh belh 249.50 lakh hi high level monitoring committee meeting, Chief Secretary hova ni 20.1.2016-a thukhawm chuan state fund pek turin a rel a. Kumin chungin hna zawh vek tum a ni e.

Pu P.C. Zoram Sangliana'n Aizawl city roads rigid pavement leh concrete pavement a siam tan tawh ni se a tih hi NLCPR ah proposal siamin concept paper DoNER Ministry-ah submit tawh a ni a approve a, nih dawn leh dawn loh nghah mek a ni.

Tin, Pu Sangthuama, member zahawm tak rawtna Vaivakawn – Ropaiabawk kawng siamthat ni se tih leh Ramrikawn PTC road siamthat ni se a tih te hi a tul ve tawh khawp mai a, sum awmdan a zirin ngaihtuah a ni ang.

Tin, member zahawm tak Pu Lalrinthanga rawtna New Secretariat Complex tlak lam approach road dawh ni se tih kha hmanni khan kei pawh ka kal a, sawlai saw a te khawp mai a. Han tih zauh deuh dan turte a awm em tih te ka'n melh deuh a. A lehlamah chuan a ko a sang tawh hle bawk a. Chuvangin, kan mithiamten tha si, hlauhawm lo deuh zawka ngaihtuah dan an la rawn zawng dawn a ni.

Seling-Champhai National Highway hi Seling-Keifang 35km atana kawng siamthat tur hi ₹ 16,65,67,000 MORTH-ah thehluh a ni a. Kawlkulh-Khawzawl kawng siamthatna turin estimate 15,95,71,000.00 thehluh a ni a, estimate te hi 2015-2016-ah thehluh a ni a, sanction tawh an ni. Chutiang chuan tunah hian kawng pawimawh bik te kha ngaihtuah chhoh a ni a. Tin, member zahawm tak Pu J.H.Rothuama'n Champhai Zotlang kawng bailey bridge over river Tuipui a sawi kha, a span hi metre 12 ft. 20-a sei a ni a. Lei dawh kum hi 1999 daih tawh kha a ni a. Kum 2013 khan a structure thlak a ni a. Tunah hian a him leh him loh ngun taka vil reng a ni.

Tin, nichinah khan Lailapur kha sawi a ni a. Mizoram PWD in repair a tum hian lo khap khanglang thin a, chuvangin repair hleihtheih loh a ni a. Ram inchuh lai a ni a, keinin a piah daih thlengin 'kan ram a ni' kan ti a, annin an lo chuh ve bawk a. Khulaiah khuan vai an tam zawk a, chu chuan repair tu tur te hi an lo dal thin a, chuvangchuan a chhe deuh bik a ni maithei. Anni khanglang ina an lo dal chuan 'thik he' kan ti mai a ni. Kolasib-Kawnpui kawng siam mek hi thla lehah zawh tum a ni.

Khatiang khan han sawi fel neuh neuh tur a awm a, mahse khang kha tlema a pawimawh zual deuh, a ngai zual deuh a ni a. Kan road map hi chu kan hre thawkhat hle a, zawhna leh chhanna ah te pawh khan a rawn kal tawh in ka hria a, Pu Speaker, sawi tehchiam a ngai pawhin ka hre lova. Amaherawhchu, member te pawhin an ngaih pawimawh deuh, a tlangpuia kan sawi tak piah lamah khan, member zahawm tak Pu Pianmawia'n Lungdar-Zuangtui kawng siam ni se, tiin, a km pawh 30 lai in emaw ni a tawi dawn a ti a, a dik a. Mahse khami kawng tluan khan East Lungdar-

Zuangtui khan a kalkawngah khaw pakhatmah a tlawh dawn loh avangin sum zem vawng tu Minister of Road Transport (National Highway) ten an remti thei lova. Mahse kan PWD ten an ngaihpawimawh avangin scheme dang atangin proposal siam dan an ngaihtuah a ni Pu Speaker.

Tin, National Highway 306, Vairengte-Zohmun New Vervek km 100-a thui hi tun kumah Ministry of Road Transport National Highway annual fund-ah siam that tura pawisa dah a ni lova, tha taka maintain erawh chu kan tum ve hrim hrim a ni.

Tin, member zahawm tak Pu Sangthuama rawn ngaih pawimawh Vaivakawn-Ropaiabawk kawng black top pawisa awm dan azira black top tum tur a ni a, chu chu department hotuten an ngaihtuah mek a. Tin, Luangmual internal road pawh pawisa awm dan azira black-top tum a ni. Sakawrtuichhun-PTC kawng pawh hi pawisa awmdan azira siamthat tum a ni a. Tin, East Lungdar-Zuangtui, nichinah ka sawi tawh a, East Lungdar-Phaileng kawng siam turah pawisa a tam dawn avang leh khwar hnawh tur a awm dawn loh avangin an remti lo a ni tih kha ka sawi tawh a. Tin, nichinah ka sawi tawh a, Chhawrtui-Rullam PMGSY kawng siam zo turin contractor kan tur mek a ni.

Tin, Kolasib leh Bairabi-ah chauh maintenance fund dah a nih avangin khulai vela khaw dang ah dah ve ni se, second lane a kawng siamthatna tur buaipui ni se tih te MLA zahawm tak Pu Rinthanga rawtna, Kolasib-Bairabi kawng black top thalo lai tih te department hotute nen a tul angin kan lo bawhzui zel ang a, kan lo en ang e kan ti a nih chu.

Kan road sector awm dan te, sum siam dan te leh building kan neih dan te chu zawhnaah khan a lo kal tawh a. Chhan hman loh pawh kha Pu Speaker, kan member zahawm tak te hian an neih avangin a zawng a za hi chu sawi lo mai ila tiin ka ngaihtuah deuh va, khi dar 7 a ri tawh a, thenkhat chu mut a hun mai dawn tawh a. Amaherawhchu, kawng pawimawh tak tak hi chu han sawi thuak thuak thain ka hria a,

building lampang hi chu a hmasa ah kan hmu a. PMGSY hnuai ah hian hna a awm nual a, Rullam-Lungpho road black top te, Lungpho-Hmunzawl black top, Er. Lalrinawma bial ami deuh zel a ni mai ka ti. Khamrang-Mualkhang black top, Zohmun-Tingmun road cutfill concrete road te, West Phaileng- Damparengpui road, cutfill concrete road te, Chhawrtui-Vanchengpui road black top. Bungmun-Thaidawr road formation cutting, Bungmun West-Mualthuam road formation cutting. Hengte hi kum 2015-16 chhunga hman atan MURD in Mizoram tana pawisa min ruahman sak chu vaibelchhe 30 a ni a. Mahsela min beisei aia kan progress a that avangin vaibelchhe 50 nuai 90 gross min pe a ni.

Tin, NABARD hi an tangkai khawp a, kawng atan te leh thil dang dangah hian kan puk sak deuh reng a, power lampang thleng in chutiang chuan NABARD te nen kan thawh ho na a tha a. Anmahni pawh an phur a, kawng hrang hrangah hemi tangka puk thu lo ah pawh hian tangkaina hrang hrang an nei a. An chungah hian sorkar ang pawh in lawmthu kan sawi a. Hengte hi an sum a kan thawh pawimawh zual deuh te chu an ni a - strengthening & rehabilitation of West Phaileng to Marpara road, 80 km a thui a ni a, sanction hi nuai 4895 a ni a. Pavement of Muallungthu-Khumtung road hi kawng pawimawh tak bawk a ni a, kawng tam tak te a short cut phah a, 21.90 km a thui a ni a, sanction amount hi nuai 1971.06 a ni. Tin, NABARD hnuai ah vek hian improvement & widening of Zawngin to Suangpuilawn road te; tin, formation cutting & pavement of Zote-Chhiphir road te, sum tam tak a nuai 10 tel vek a ni. Construction of Laki-Vahai road te, construction of pavement at river Tuichang, Tumtukawn, Hnahthial-Thingsai road ami. Pavement work of Chuhvel-Sihthiang road tih te a ni a, 11 km, nuai 559 lai. Tin, CRF (Central Road Fund) hnuai ah hian kawng pahnih thawh mek an ni a, strangthening & improvement of Aizawl – Reiek - West Lungdar road, sanction amount hi nuai 1156 a ni a.

Tin , strengthening & improvement of river Tuipui to Biate road, nuai 880. He hna hi December 2016-a thawh zawh tura ruahman a nih laiin chak taka thawh a ni a,

April 2016 chhung hian thawh zawh hman tum a ni. Tin Central Road Fund hnuaiah hian lei pali (4) siam na tur DPR pawh thehluh tawh a ni a. Ministry lamin April thla chhung hian sanction hman an beisei thu pawh hriat a ni. Chungte chu - construction of pre-stress concrete girder bridge, Bawrai lui a ni a. KTZ KTF kawngah bridge span hi 35 meters a ni. Sanction amount chu nuai 585.80 a ni a. Tin, construction of pre-stress concrete bridge of river Tlawng, Aizawl – Reiek – West Lungdar road, bridge span hi 40 meters a ni a, sanction amount chu nuai 757.56 a ni. Construction of double lane pre-stress concrete bridge over river Tuichang on Keitum - Artahkawn road bridge tih a ni a. Ropaiabawk tih leh Artahkawn tih hian helai kan member ni thin, awm ve ta lo te ka hrechhuak ziah a, an ngaihawm hle a ni. Hemi bridge hi a span 68 meters, sanction amount nuai 754.74 a ni.

Tin, construction of RCC T-Beam girder bridge over river Serlui on Bilkhawthlir – Saiphai – Notasura road bridge hi span 48 meters a ni a, a sanction amount chu nuai 900 a ni. NLCPR hnuaiah hna engemaw zat kan thawk a, hun a la a, kan sawi rih lo mai ang a. Chiang duh te chu ziak te pawh in kan la in pe ang a. Tin, building te pawh tunah hian 20 thawh mek a awm bawk a. Heng project atana sanction zat chu nuai 11692.56 a ni a. Tin, kumin chhungin central atangin nuai 1363.23 hmuh niin state atangin nuai 168.19 lakh hmuh a ni bawk.

Nichinah khan airport/helipad kha sawi a awm a. Airport hi chhim lamah sawn awm se kan duh a. Tin, a principle chuan Kaladan Multi-Modal Transit Transport kawng avang hian, saw tah trade outlet kan neih dawn avangin, gateway kan neih dawn avangin sorkar hmasa khan min remtihsak tawh a ni. Tuna sorkar pawh hian a remti zel tho va. A hmun hi kan zawng nasa a, kan beidawng titih a. Tichuan, Kawmzawl saw ATR, thlawhna te chi tum nan chei mai ila kan ti a, engemawtia her rem chuan a theih hram hram a. Civil Aviation dan chhungah chuan as a crow flies-in 500km chhung a nih avangin a rem chiah lova. Mahse a pawimawhna min hriatpui avangin a principle chuan rem chu an ti mai a. Chutihlaiin, Saitlukkawnah tih a awm a, kan han en a, a remchang

lova. Airport Authority of India official senior-te nen te pawh thlawhnain kan va fang kual a, tin, a hmunah te an kal a, mahsela rem an ti lova. Hetah Chhiphir pang lamah khian zawna tur a awm ang an ti a, mahse chu chu zawn turah kan ngai lova. A chhan chu Lengpui atangin as a crow flies khan 500km chung a lo nih dawn tho avangin an remti dawn chuang lova, chuang chuan buaipui loh kan ti a.

Tichuan, sawtah Tuipang lama kan zinin Theiri atang sawn Pu Hiato, kan hotupain tlangdung tha deuh mai hi min kawhhmuh a, “Hei hi a theih ngei kan ring a ni, hei hi entir ila a tha ang e, kan mithiamten va en se la,” a ti a. Tin, Lawngtlai thlangah Mampui te kan han en a, mahse Mampui chu a tih chi loh a. A khua kha compensation a ngai dawn a. Khaw awm lohnaah pawh compensation avangin kan buai kan buai a ni a, chuangin tih chi ah kan ngai ta lova. Tunah chuan he tlangah hian kan in concentrate ta deuh a. Remchang takin bialtu MLA, saw lama kan hotupa Dr. K. Beichhua hi ka sawipui a, ani a lo phur a, “He lampang MLA i ni baw k a, Pu Hiato-a, a tira min kawhhmutu tunah chuan tlemin rem lohna a lo awm tak avangin,” tiin. Phur takin ani hian a lo buaipui a, tunah hian beiseina kan nei sang hle a. A remchang hmasa berah helai kan engineer-ten an certify hnu ah Airport Authority of India-ah te kan va kalpui ang a. Hemi hi central lama kan hotute, sorkar hmasa UPA leh tuna NDA pawhin an ngaih pawimawhna chhan chu saw tah Bay of Bengal-a trade outlet kan neihna tur atana lo inhmui tur leh hemi rail kawng hi Bairabi atangin Sairang, Sairang atangin Lawngtlai thleng tura tun thlenga kan rawtnaah hi chuan a principle-a central sorkar hmasa leh tun ami pawhin an pawm a ni a. Chumi avang chuan helai hi central lam pawhin anrawn ngaipawimawh a.

Tin, helai hi UPA Look East Policy avanga lo chhuak a ni lo. Hmana kan sorkar hmasa lam daihah Pu K. Thangzuala, Chief Engineer a la nih laiin RITES ho kan survey tir a. RITES hovin an va survey kha Burma border ava thlenin Burmese army te khan an lo remti lova, engmah phalna leh remtihna kan bilateral agreement te a la awm loh avangin. Chuangin, kan hotuten Burma sorkar dawr turin kan Chief Secretary te,

kan CE te khatihlai ami kha kan tir a. Tichuan, annin an lo remtih zawng tak a ni a. Chutatanga kal chhuak chho chu a ni a, vanneih a siamin. Tin, keinin RITES ho kha kan ruai nawn leh a, RITES hovin survey and investigation hna an tih lai khan UPA sorkarin Look East Policy a rawn ti ta a, an term chanve vel tawh hnu ah khan. Chutah chuan sawlai saw kan lo hriattir a, an phur ve ta hle a, min phurpui a.

Tunah hian Prime Minister zahawm tak Pu Modi-a hi amah ngei pawh a office-ah ka sawipui tawh a. Tuna an Act East Policy-ah hian an phur hle a. Keimahni lampang kawng kan sial chin chu tukinah khan report kan ngaihthla tawh a. A lehlam Burma ram chhung saw Akyap thleng kawngpui sial turin thla hmasa lam daih tawhah khan central sorkarin cheng vaibelchhe 2000 chuang a sanction tih kha chanchinbuah ka chhiar a. Chu chu Burma sorkar an thawh tir a ni awm e. Chuvangin, sawmi a puitlin hun atana keimahni pawh hi kan lo inpuahchah lawk, hmathlir thui tak neia kan inpuahchah lawk a ngai a ni. Chutiang chu sawlai kalphung saw a ni.

Tin, NEC hnuai hian hna kan nei nual a, construction of Saitual-Saichal-North East Bualpui Road, hei hi km 36.60 a ni a, sanctioned amount nuai 4097 a ni a. Kuminah state sorkar atangin nuai 33.33 hmuh tawh a ni a. Kumin chhungin black top km 4.60 zawh tawh a ni. Tin, upgradation of Thanlon-Singat Road, Ngopa, Tuivai lamah 43.5 km hi sanctioned amount chu nuai 6067 a ni a. Kuminah NEC atangin cheng nuai 1500 kan hmu a. Kumin chhungin SMBT 29.0145 km leh retaining wall 56 running metre zawh a ni a. Tin, hemi kawngah hian a lehlamah chuan Manipur ho hian kawng an siam ve tha duh mang lova, Mizo area a nih avang te pawh a niin ka ring a. Hmana blockade rei deuh a awm tum khan helam atang hlin essential commodities te kha lak a ni a, keini pawhin kan lo tanpui a. An Chief Minister Ibobi Singh pawh a lawm hle a, 'helai hi kan ngaihsak ve tawh ang,' a ti a. Mahsela an ralmuang leh deuh a, an ngaihthah leh ta a. Tunah sawn Mizo unauten an duh, an awm ve, an rualawhna avangin sum te an thawhkhawm a, engtin tin emaw an lai a, JCB te an hire ve a ni awm e. Amaherawhchu khang vel han tih mam nan khan road roller te an neih loh avangin hmanni khan min

rawn ngen angin sawlai contractor Tantia Construction Company te hnenah, 'in road roller te a tul angin lo hawh ve ula, tin, in hun awl ah JCB te pawh lo hawh ve ula,' ka ti a.

Nimin khan an rawn report a, 'kan theih ang chuan kan han tanpui ve a, mahse JCB pawh kan hmu lo,' an ti a. Mahse, chuti chung chuan theih ang ang chuan an tanpui ve niawm tak a ni. Tin, upgrading of Serkhan-Bagha hi sanction amount ₹ 14,863 lakhs a ni a, kuminah NEC atangin ₹ 1,500 lakhs kan hmu a. Kumin chhungin formation cutting km 1.30, side drain 3400 running meter, protection work 373.10 running meters 14, 73 km leh black topping 1.95 km zawh a ni.

Khang te te kha a tenau deuh in ti maithei a, mahse sawlai kawng saw eng eng emaw avangin a hmingthang ve a. KDZKT road hi tunhma kan hun hmasa lam atanga kan lo ruahman daih tawh kha a ni a, mahse sum kan nei har hle a, 88.50 km a thui a ni a, khawthlang lam tan chuan kawng pawimawh tak tur a ni a. Kuminah hian ₹ 17,963 lakhs sanction a ni a, NEC atangin ₹ 1,500 lakhs hmuh belh a ni a, formation cutting 18 km thawh zawh tawh a ni. Tin, upgrading of Zamuang road pawh hi khawthlang lamah kawng pawimawh tak a ni. Sanction amount ₹ 3,768.05 lakhs a ni a, kuminah NEC atangin ₹ 89 lakhs dawn a ni a. State sorkar atangin bridge over river Tlawng atan ₹ 486.16 lakhs leh ₹11.15 lakhs chu sorkar atanga hmuh a ni. Tin, building pawh NEC hnuaiah engemaw zat thawh mek kan nei a. Tin, Mission Veng Bazar Complex te pawh thawh mek a ni a.

Tin, Cultural Centre cum Auditorium, Vaivakawn hi sanction amount ₹ 619.10 lakhs a ni a, hnathawh mek a ni. Tin, Asian Development Bank-te pawh hi kan hmang tangkai hle a. Kan hna in a tih lungawi avang te pawhin min phurpui a. Tunah hian Serchhip- Buarpui road hna thawh mek a ni a, 55 kms a sei atan hian ₹ 259.20 crores sanction a ni a, tunah hian 11% vel thawh zawh tawh a ni. He kawngin a paltlang

Mat lei bailey bridge leh Tlawng lei bailey bridge te pawh steel girder bridge a thlak vek tura ruahman a ni.

Tin, World Bank pawh hi kan hmang tangkai hle a. Tunah pawh khawthlang lam atan pawh an rawn sanction tawh a. Tin, Champhai-Zokhawthar road khi kan hria a, laih mek a ni a, laih mek lai hi chu thal ah a khu lo thei lova, fur ah a diak lo thei lova. Zawh hunah khang kha chu a bo vek tura beisei a ni.

Tin, Champhai-Zokhawthar Road bakah Chhumkhum Chawngte Road te a ni a. Kawng a chhe khawp a, mahse a that dawn avangin a chhe lailawk rih a ni. Chutiang bawkin Tlabung- Kawrpuichhuah kawng te pawh a ni a, Tlabung kawngte saw a chhe hle a. Tin, Tlabung saw Mizorama khaw pawimawh hmasa berte zing ami ni si tunah sawn sorkar hian kan ngaihthah ta viau emaw ni chu aw tih tur khawpin an awm a. Amaherawhchu, loh theih loh in Bangladesh nena kan border trade Kawrpuichhuah ami a lo puitlin hunah hi chuan khawthar kan din leh a ni ringawt dawn a ni.

Tin, heng bakah hian World Bank tanpuinain Chhuntlang- Darlung-Buarpui road te, Thenlum-Zawlpu, Chawngte to Bungtlung South multi-modal road junction te, Zawlpui-Phairuangkhaite chu a awm bawk a.

Tin, Economic Importance leh Inter-state Connectivity hnuaiah hna engemaw zat kan nei a, chung zinga a pawimawh bik chu Tuipuibari- West Kawnpui road a ni a. Hetah hian ₹ 23.79 crores sanction a ni a, tender pawh an ko tawh a, approve turin Minister of Road Transport & Highways-ah thawn a ni. Heti zel hi a ni a, hna hi a chak hleitheilo a ni.

Tin, National Highway hnuaiah Lailapur, Tuipang Hrangchalkawn, Lunglei, Zero Point, Saiha, Buhchang, Bairabi, Seling, Tuivai, Sairang, Lawngtlai, Zocha river, Keifang, Ngopa, Theiriat, Lungsen, Tlabung, Kawrpuichhuah, Vairengte,

Zohmun, N. Vervek, Seling, Champhai, Zokhawthar hi an awm a. Tun fiscal-ah hian DPR 37, ₹ 1900.22 crore pawh central sorkar-ah theh thlak leh a ni a, DPR 37 thehthlak ah hian DPR 6 rawn sanction tawh a ni a, DPR 6 man chu ₹ 107.57 crore a ni. Khatiang khan hmalakna tam tak a awm a, ka sawi vek dawn chuan in ning ang a, in chhinchiah dawn chuang bawk si lova, chuvangin, ka sawi tawh rih lo mai ang a.

Tin, lei sector hi, lei chim hi a lar hle a, chuvangin, fimkhur thar te pawh a ngai a. Kumin chhung hian kawng hrang hrangah lei 4 thawh mek a ni a. Hetiang hi an dinhmun a ni – PSU bridge over river Tlawng, NEC hnuaiah, Bareilli-Zamuang kawngah PSU bridge thawh mek a ni a. He hna hi tun thal chhung ngei hian zawh hman tum a ni. Heng hi a rei tawh hle a, amaherawhchu, a design an ti diklo an ti a, khu lamah thawn thlak leh a ngai a, a kal chhung a rei a. Khatiang khan vawi engemawzat tihnawn te a tul avangin hna a chak thei lo a ni.

Tin, suspension bridge over river Chhimtuipui, Darzokai suspension bridge thawh mek a ni a, kan hriat angin. Tin, river Tut bridge, National Highway 44A ami hi chak taka thawh mek a ni a. He hna hi 86% thawh zawh tawh a ni a, tun thal chhung ngeia thawh zawh hman tum a ni bawk. Bailey bridge over river Tlawng, airport panna kawng, hei pawh hi tih mek a ni a, Shiva Industries-te hnenah a materials pawimawhte order a ni a. Anni chauh hi order theihna an ni a, an muang khawp a; tunah hian harsatna tam tak kan tawh phah avangin a nghahhle a awm hle a ni.

Tin, sorkar thu in kan lei te hi inspection uluk taka tih a ni tawh a, chawlhkar tinah vawi hnih bridge te hi endik thin an ni a. A lei part thlak ngai leh thawm ngai te a tul anga thlak leh thawm that nghal zel an ni. Kha kha a tlangpuiin kawng chungchanga pawimawh zual deuh kan member-ten in rawn sawi, in rawn sawi piah lamah pawh kan zavaia kan hriat tlan atana tha ni awma kan han ngaih te a ni a.

Tin, nichina airport chungchang an sawi kha, hei hi uluk taka en mek zel a ni a. Tunah hian preliminary survey, GAD Aviation Wing-ah report thehluh a ni a, an zirchiang mek a ni. A lan danin, preliminary survey-ah chuan ni 24, March khan va beih a ni a. Runway sei zawng 3,250m awm thei, a vang lampang pawh 300m awm thei tura beisei a ni a, detail survey neih thuai tur a ni a. Vanneihthlak takin, Civil Aviation Director-General khu helaia kan Chief Secretary hlui a ni a. Ani chuan, 'ka theih ang tawkin tan ka la ang,' a ti a, a thlamuanthlak viau a ni, vawi hnih ka sawipui tawh a. Hengah hian ti tura phut emaw kan ngai lova, kan tih sa tawh, hman atanga kan lo ngaihtuah tawh a ni a, amaherawhchu kan kutah engkim a awm loh avangin duh angin a chak thei lo a ni.

Tin, kan helicopter-te kan chhawr tangkai hle a, tunah pawh hian a indaih lo khawp mai a. Indaih lo mahsela daihzai thei ang bera hman an ni a. Helaiah Thuampui ami saw sipai ho in a hanger-ah sawn dah an phal lo khanglang a, kan inbei kan inbei a, tun thleng hian kan la hlawhtling lova, kan la nawr zel tho va. Hetah kan 3rd Battallion HQ ah sak kan tum a, ngaihtuahna a awm mek a. Chuti a nih loh chuan kan helicopter hi a chuangtlaiin khutah a zu kal ziah a, kan zu park a, kan pilot-te hi khawpuiah an lo kal leh ziah a ngai a, an khawngaihthlak hle a ni.

Tin, Champhai helipad kha kan zo tawh a, tin, hmun dang ami pawh kan ti mek zel a. Mahse tunah hian GAD Civil Aviation Wing-ah PWD in an la hand over thei lova, churang mai a la lak loh a ni a. Kan remchan tlanah tih thuai a ni ang tih member zahawm tak kha ka'n hriattir duh a. Tin, insurance hi tih vek a ni a, accident a awm a, thi an awm chuan ₹ 7,50,000/- pek tur an ni.

Tin, hliam erawhchu an nat dan azir in insurance ngai khan tanpuina pek an ni ang a. Tin, insurance hi Pawan Hans te tum tur a ni. Chutiang chu helicopter chungchangah chuan thil awmzia tlangpui a ni e.

Tin, kan sorkar-in thalaite tan khawvel thar kan siam ang kan ti a, tunah ah hian a theih ang ang in thalaite tan khawvel thar siam lamah hian kan hotute'n hma an la nasa hle a. Pu Ngurdingliana, kan member zahawm tak khan a rawn sawi a, thalaite an rin ngam a, tunah hian determination leh ambition te pawh an nei tha tawh a. Tin, an rintlak a, chhawrtlak an ni a, deliver hi an chak a ni tih hi thil lawmawm tak a ni. Competitive spirit an put hi kan duh a, chuvangin hun hmasa lamah pawh khan khatih laia Education Minister zahawm tak Pu Lalsawta khan Administrative Reforms Commission te din in, khatah khan eminent educationists , India ram ami engemawzat kha an la chhuak a, khata member pakhat phei chu tunah khuan UGC-ah (University Grant Commission ah) Chairman a ni a, kan chhawr hle a ni.

Tunah khan report kha a tha khawp a, a hmu apiangin tha an ti a. Tin, keimahni mithiamte'n keimahni mil leh zual turin tunah hian an siamtha leh tawh a. Chumi implementation atan chuan cheng vaibelchhe 700 vel kan mamawh a. Planning Commission kal ta khan Finance Ministry-ah leh HRD Ministry-ah an pathuma in tum sem tura ruahmanna an neih lai in thiah a lo ni ta a. A thara in dap leh a ngai a, DoNER-ah te, NEC-ah te vaibelchhe sang tel tunah hian DPR te siam in kan nawr mek a. Hei hi quality education kan neih nan leh kan standard sang taka hlankai a nih theih nan tih theih hlan kan nghakhlel tlang hle a ni. Chutiang chuan thalaite tan khawvel thar kan siamna turah hmalak a ni a.

Tin, Sports Minister viak tha tak, a ngaihna hria kan nei a. North-East ah chuan infiamna facilities football ground a ni emaw, hockey ground a ni emaw, Indoor Stadium a ni emaw, teakwando, boxing ring etc., khatiang zawng zawng kha a nei tha ber te zing ami kan ni tawh a. India ram football inelna sang ber te kan han thleng ve thei ta te hi thalaite tana khawvel thar siamna tur kawngah kan Sports Minister-te leh a tawiawm tute hmalakna a ni a, an chhuanawm hle a ni.

Tunah hian kan thalai te zingah football-a eizawng ringawt hi za tel an awm tawh in kan hria a. Tin, hausak phah te pawh engemawzat an awm tawh a. Chu chu thalaite tana khawvel thar kan siam ang kan tih, Sports lamah chuan kan hlawhtlinna langsar zual deuh te an ni a. Tunah hian a formative stage ah kan awm chauh a ni a, duh angin kan la hlawhtlinglo a nih pawh in hma la tha ber te zing ami kan ni a. Football-ah phei chuan Mizoram hi India ramah ‘football factory’ an ti ringawt tawh a ni. Kan enkawltute chungah lawmthu kan sawi lo thei lova.

Chutiang chuan kawng hrang hrangin, empowerment opportunity ah pawh, kan thalaite tan khawvel thar kan siam ang tih ah chuan kan hotute’n hma an la chho mek zel a. Skill development atan te pawh tunah hian UNO agency lo lut te pawh in skill development leh capacity building ah te thawhho dan tur kan hotu, mithiam ten an ruahman mek a.

Tin, ZAYKA (tunhma chuan khumi Tuirial leh Tuivai kan khuahna tur atan tanpuina min pe turin Pu C.L. Ruala ho a kan inbiak chhin lai chuan, ‘Overseas Economic Development of Japan’, tih a ni a, Overseas Development fund of Japan, tunah chuan ZAYKA an ti ta niin ka hria) hian India ram hmun hrang hrangah hna an thawk a. Mahse, Mizoram-ah kan hun hmasa lampang, hman deuh pawh khan an lo lut a, kan thawhhona a tha hle a. Tin, an phur hle a, kan bekang te tui an ti a, churang ringawt pawh chuan Mizoram ah rawn luh an chak niin ka hria. An lo kal apiangin bekang hawn tur min dil ziah a ni. Chungte nen chuan hmanni lawk ah kan Chief Secretary ten thawhhona thuthlung, Memorandum of Understanding an siam a. Chumi zulzui chuan capacity building kawng hrang hrangah kan thalaite tana khawvel thar kan siamna kawngah awm chho dawn niin kan hria a, kan lawm hle a. Keimahni zawk hian advantage kan la thiam tur a ni a, chumi atan chuan kan mithiam, kan official te an pawimawh a ni tih an in hriat a pawimawh. Keini chu thiam awmkhawm kan ni lo a, kan

mithiamten an thluak vaivir a, a tha thei ang bera kan ram, kan hnam tan, a bikin thalaite tan thahnemngai taka hma an lak hi kan duh dawn a ni.

Tin, mimal company tu tu ten emaw kan thalaite hna zawng tura an lo thawn chhuah ve ringawtah hian sorkarin mawh kan phur lo tih hi ka sawi duh a. Tin, sorkarin kan hriatpui lo bawh a ni Pu Speaker. Kan hriatpui chin ah chuan tun thleng hian buai kan la nei lova, buai a awm pawhin kan Minister te leh kan Youth Commission Chairman leh a thawktu te hian an vir vat a, an siamtha zel a ni. Chutiang chuan vawiin ah hian vocation hna hrang hrangah India ram pum ah leh pawn lamah te pawh engemaw zat an thawn chhuak tawh a, an la thawn chhuak mek zel dawn a. Tin, chutiang export quality kan neih theih nan chuan helaiah hian coaching centre te leh a train tu te pawh kan ngaihtuah mek zel a.

Tin, tunah hian kan Youth Commission te chuan min la hriatpui chiaah lo na in mimal thahnemngai te nen thawk ho in Japan-ah Hokoro University, Nagasaki ami te nen inbia in mi 19 emaw lai Japan tawng zira khilaila placement an pek turin kan thawn chhuak a. Central Bank of India-ah guarantor-ah min tan sak in tiang chuan kan inremsiam a, (15 a ni zawkin ka hria) 9 chuan Japanese tawng hemi working knowledge kha an theih tawh avangin tunah hian placement tha tak an hmu a, an hlim hle a ni tih kan hria a. Mizo pakhat lo sawithaih titih a va kal a awm a, mahse Embassy-ah Mizo thawk mifel tak kan nei a, chumi chuan khatiang mi vakvai, misual tawng kha lo ngai pawimawh lo tura va hrih tur leh va thlamuan turin kan ti a, a va thlamuan tawh in ka ring a. Tichuan la pass ve chiaah lo, an zirlai pawh khan Mizorama an hnathawh theih ang awm tawh an thawh aia tam hlawh kha an la a. Tin, accommodation engkim, transport te a tha hle a, an hlim hle a ni. Hemi University ami te hian Mizo 50 tal Japanese tawng rawn zirtir turin Aizawl-a rawn kal an tum a, April ni 17-a lo thlen an tum a. Thla 3 chhung emaw Japanese tawng an zirtir ang a, chumi hnu ah chuan an duh phawt

chuan an ramah placement tha tak tak an zawn sak dawn a. Tun tum an lo kal turah hian alo berah thalai lehkha thiam 50 tal chu awm se an duh hle a ni. Chutiang chuan thalaite tan khawvel thar kan hotuten an zawwna kawngah kawng hrang hranga eizawwna tling an neih theih na turin an dap chho mek zel a.

Tin, Sainik School kan hre tawh a, kan sorkar hmasa lam daih tawh khan kan lo tum tawh a, mahse kan awm tak loh avangin a reh a. Kan lo kir leh khan kan hotuten an bawhzui vat vat a tunah hian Chhingchhip khaw mipui ten ram tha tak kan mamawh aia zau engmah pawisa sen khat pawh phut lo in, ram hmangaihna avangin, thahnemngaihna avangin, thalaite tana khawvel thar siam na kawngah tiang chuan ram an pe a. Chutah chuan an thawk mup mup a, an chanchin ka zawh hnuhnung ber chuan zaa sawmruk vel chu an peih tawh a. Hmanniah kan Home Minister zahawm takin a sawi tawh a, class pawh tan theih thuai kan tum a ni. Khimi kan hotute thinlungah a chhuah nachhan chu Manipur ho sawn, Meitei ho sawn a bikin Meitei, ram buai tirh khan Commission Officer Army-ah 3 chiah an nei a, pakhat chu Major Oinam Singh a ni a, helaiah Assam Rifle-ah a rawn thawk a, kan in thian tha hle nghe nghe a. Keini khan kutzungtanga chhiar bak engemaw zat Commission Officer kan nei a ni. Ram te a lo buai a, vai huat te kan han in zirtir a, sipaiah kan tlem tial tial a.

Tichuan tunah hian keini hian tuna kan lo kir leh hnua nasa taka kan han encourage hnu ah hian engemawzat chu Commission Officer hi kan nei tawh a. Manipur Meitei ho khan Sainik School an nei a, tunah hian Commission Officer hi sang chuang an nei tawh a. Tin, General junior, Major General hi 2 an nei tawh a ni. Chutiang chuan min tlan pel tawh a, chuvangin tunah hian umpha leh turin thalaite tana khawvel thar siamna kawngah kan hotuten hma an la a ni. Tin, tun kum 7 emaw chhung ringawt pawh hian kan thalaite Indian Army-ah, Para Military Force-ah, Navy-ah, Air Force-ah engemaw zat sipaite nena tang hovin kan thun leh tawh a, a tam thei ang ber thun kan tum a ni.

Kan ramah kan hmu a, Ex-Servicemen-te hi society-ah, an awmna khua theuh ah mi chengvawng, mi thothang tha, decipline tha an ni deuh zel a, chuvangin Army-ah leh Para Military Force-ah kan Mizo tlangval a tam thei ang ber kan thawn luh hi ram leh hnam tan a tha ang tih kan ring a, chutiang chuan kan hotuten ngaihtuahna thui tak an nei a ni.

Tin, NCC hi an hotu lalberte nen kan sawiho tawh a, heng zawng zawng hi rem min tihpui tawh a, tunah hian keimahni lamin kan tih turte kan tih ran leh ran loh azirin hlawhtling nghal mai turte an ni a. Pakhatnaah chuan Lunglei-ah battalion thar min hawn sak an remti a, amaherawhchu Lunglei-ah office tur te leh staff-te chenna tur te an mamawh dawn a, chungte chu min ngaihtuah pui ang an ti a.

Tin, group headquarter hi tunah hian Guwahati atangin min enkawl a, a group zawng chuan. Aizawl-ah group headquarter neih ve an duh a, chuvangin state government-in group headquarter an neih theihna turin hma kan la a. Tunah hian Silchar-ah NCC group headquarter chu a awm a, Mizoramah battalion te an hawn belh dawn avang leh Aizawl-ah pawh an tihpun zel dawn avangin chung ang zawng zawng co-ordinate tur chuan Mizoram-ah an duh ve a, chu chu sorkarin a ngaihtuah sak mek a ni.

Tin, chumai a ni lova, NCC Air Activities Hub din turin kan ngen a, an remti a. Tunah hian Civil Aviation a ni emaw, Air Force a ni emaw, pilot hi kan nei chau hle a, kan hun hmasa lam daih tawh khan kan han ngaihtuah a, Mizoram hian Wing Commander Lalzawma te hnungah hian a officer chin phei chu kan nei ta miah lo va. Chuvangin, kan hotuten Air Academy khawi khawiah emaw scholarship te ngaihtuah sak an han ti a, tunah hian pahnih kan neih phah a.

Amaherawhchu, scholarship a to em avangin kan tizui thei lova, tunah hian private-a zirte an awm a, theih ang ang chuan sorkar pawhin a tanpui ve a. Mahse, in tanpui ziktluak a har hle a, anmahni in an bei ve tang tang a ni. Chutiangte avang chuan flying chip neihte pawh kan lo rawt thin a, mahse tuna NCC hian Air Activity Hub, Aizawl-ah North East tan headquarter rawn dah an duh a, tunah hian light aircraft pahnih a engine an thlak mek a, chu chu an rawn dah ang a, tun June thla chung hian pahnih dang rawn dah belh an tum a. Chung atang chuan kan NCC cadet-te leh civil lam atang pawhin a interest deuhthe chuan flying hub neih hma pawhin micro light aircraft atang hian preliminary training an nei thei dawn a. Heng hi kan nghakhlel hle a, keimahni lampang kan inpeih theih chuan June, 2016 hma ngeiin heng zawng zawng hi rawn tih an duh a ni.

Amaherawhchu, hetih lai hian tih tur kan nei ve a, keimahni sorkarah hian eng eng emaw incentive heng cadet-te tan hian kan pek ve te min phut ve a, decipline te leh khatiang zawnga thil a kal that theihna turin. Chuvangin, kan sorkarin tih tur kan nei a, a rang thei ang berin kan hotuten an la ngaihtuah ang a, thil tih harsa lo te an ni.

Tin, Republic Day-ah te kan cadet-te hi an rawn thlang ve thin a, an ti tha thei hle a, chhuan pawh an chhuang a, an hotute pawhin an tih that dan te min rawn hriattir te pawh hi nuam an ti ve a. Amaherawhchu, chuti chungin an sum hi nuai 12 lek hi kan ba reng mai a, hei hi pawh an ti a, hrehawm an ti a. Chuvangin, anni hian hetiang a tul ang anga hman atan hian 'Mizoram sorkar hian fund hi lo dah hrang thei ve ula, nuai 25 vel bak kum khatah kan mamawh miah dawn lova, heng a thei bikte khawi khawi emaw camping ah te leh Republic Day parade-ah te an kal ve thin na tur atan hian, a zawng a za hi kan tum thei si lova, heng hi chu min tum sak ve ula,' an ti a. Thalaite tana khawvel thar kan

buatsaihna kawngah hian heng hi thil pawimawh tak a nih ka ring a, kan hotuten tih atan pawh an ngaihtuah thuai ka ring a ni.

Tin, ka beisei loh takin kan hotute hian helai member zahawm tak te hian engatinge hydel project lian hi kan neih loh? Engatinge kan siam loh an ti thin a. Hei hi ka sawi fo tawh thin a; tin, chanchin bu ah hian mithiam pui pui hre mang si lo hria anga inhria, thiam mang silo thiam a inhria hian an ziak taima riau a. Mipui rilru an tibuai a, pawl ka ti a. Hydel project hi kan hun hmasa chhung zawng khan state power chu 5 mega watt a ni, 5 mega watt a pelh chuan central ah central electricity authority-ah te, khawi khawi emaw ah clearance, technical clearance, environment clearance, chumi khami clearance tam tak kha a ngai a, chuvangin, a te lampang ah khan kan kal a ni. Tin, a te kan tih ah hian REC Rural Electricity atang te pawhin fund te kan hmu a. Tin, New and Renewable Energy Source Ministry atang te pawhin tanpuina kan hmu thei a. Chuvangin a te hi tih loh theih a ni lo. Mega watt 5 a pelh vaih chuan lipui a thlak ang vang vang tluk a ni. Engang pawh in buaipui mah ila, kum 5 kum 10 a duh, an clear nan khan. Ama'rawhchu, Deva Gowda a rawn Prime Minister hnu khan ani kha a harsat zia lo hre tawh a ni a. State thuneihna mega watt 25 ni tawh rawh se, a ti a. Mahse, kan thuneihna kha 25 ni ringawt mahse, khawi atangin nge sum kan neih ang? Khawi atanga khuah tur nge ni ang tih kha ngaihtuah leh a ngai a ni. Chungte avang chuan a tih zung zung theih lova, chu chu member zahawm takte hi chuan hria ila ka duh a.

Tin, clearance zawng zawng lo peih vek pawh ni ila, entirnan, Koladyne hydro project tuna NTPC te kan pek mega watt 460 pe chhuak thei ang te hi tunah hian clearance zawng zawng hmu in kan inpeih ta ti selang ; khawi sum atanga khuah tur nge? State project ti tur chuan central-in min rawn pek si loh chuan khatiang kha ngaihtuah a ngai a ni. Sum hi a awmsa lova, zawn chawp a ngai a, zawn hmuh a har khawp.

Hei Tuivai mega watt 210 pe chhuak thei tur pawh hi 1998 kumtir lama Tuirial lung kan phum lai khan OECF tanpuina in Tuirial pawh khuap tur kan ni a. 'Ka

pu, nakum tun ang hunah Tuivai pawh hi a lung i phum leh thei ang,' min ti a. Mahsela, an bo ta vang vang a, Tuirial pawh chuti tho chu a ni. Tichuan, kan lo kir lehin kan hotuten an nawr char char a, chumi hunah chuan khami Japanese ho tanpuina tur kha a lo awm tawh lova. Chuvangin, power kan state chhungah kan duh si avangin NEEPCO te nen inremsiam in PPP mode ang chi te in kan han pe a. Chutiang chuan Tuivai pawh hi PPP mode in viability cup funding te pawh Ministry of Finance min pek an phal a. Mahse, arawn interest company ho khan bank guarantor an neih theih loh avang leh North East-ah hian PPP mode-a hmalakna hi hlawhtling a ram ala awm lo a ni awm e. Chungte avang chuan an tim a, kan hlawhchham ta a.

Tunah hian Tuirial kan tih ang bawkin NEEPCO in an khuap dawn a ni. MoU te pawh kan sign tawh a, kan tan a hlawk viau lo a nih pawhin kan ram chhunga power generation lian a awm kha kan hotuten tha an ti hrim hrim a. Chuvang chuan, khatieng zawng khan a kal loh theih loh a ni. Nakin zel ah pawh 'engatinge an lo tih loh le' in tih he hu a awm tawh lohna turin. Chutiang avang chuan Tlawva mega watt 5 te, Kawlbem mega watt 4 te pawh hi tih loh theih loh a ni a. Heng hi kan sum seng lovin REC atang te leh New and Renew Resources of Energy atang te in sum a hmuh theih a. Tin, heng tenau kan thawh hian kan engineer-te intah hriamna alo ni ve zel bawk a. Keimahni sum seng si lovin, chutiang chu a kalphung a ni tih hi hriat a tha. Saw mega watt 460 Kawlchawa thawh pawh saw NTPC kan pekna hi 2009 lam daih tawh kha a ni a. Mahse, tun thlengin an la tan thei lo a ni. A chhan chu an DPR kha kan hun hmasa lama DPR siam kha a ni a. A thar alo la awm lova, chuvangin, cost over run, time over run khang zawng zawng avang khan siam that leh a ngai a. Tichuan tunah hian a clearance hrang hrang te an zawng mek a, chumi clearance chu anmahnin an hmuh veleh an thawk tan dawn a ni. A tir lamah khan harsatna tam tak kan tawk a compensation ah bawk a ni, kham pang lui kam te saw mimal ram a lo ni vek zel a, compensation avangin, kut tling lova sum lak pawisak lohna hian he ram hi a pawt hnufum hle ang tih a hlauhawm khawp mai.

Tin, grass kan neih hma hauhin grass base thermal plan te kha kan ngai pawimawh a, thil lawmawm tak a ni a, grass hi kan neih hun ah chuan kan tum nasa mai . Kum 10 kan awm loh chhunga Tripura-in min lo tlan pel te hi kan tlawm ngai nasa a ni. Tripura khu kan hnung zel ami an ni a, ONGC te kan koh chhuah khuan Tripura in an la ko chhuak ve miah lova, kum li kum nga an rawn awm hnu ah pawh an la ko chhuak chuang lova. Tichuan keini kan awm loh hnu khan anni kha an bo ta a, chumi hlan chuan Tripura khu an lo tlan chak hle mai a, tunah khuan ONGC te nen Palakana-ah power plant lian deuh an nei a, chuta tang chuan kan share hi mega watt 20 a ni ve nghe nghe a ni. Chutiang chuan min lehpel tawh a ni. Chuvangin tlan pelh leh tumin kan tang nasa mai. Lui zawng zawng hi khuap thei mah ila a tha lova, engchenge kan khuah ang tih chu kan mithiam ten an la ngaihtuah ang. A grass base lamah chuan kan hmanhmawh hle mai.

Kan Minister zahawm tak khan a sawi tawh a, hmanni khan Power Minsiter Pradhana ka hmu a, a lo fel viau va, Secretary rual pariat vel lai a lo ko va, kan sawi hova, ONGC ka rinhlelh dan te ka hrilh a, ‘kan lo veng tlat ang e,’ chu an ti a, min tiam a ni. Ka rinhlelh nachhan chu an hotupa ber a lo kal a, ka rinhlelh thu ka sawi khan ani khan kei aiin a lo ringhlel zawk a, a rinhlelhna pawh a finfiah tawh in a inhria a ni. Tunah hian Palakana ah Tripura te nen collaboration nei in an thawk ho a ni. Chuvangin Meiduma kan gas te pawh khu khu lamah a rugin min drain sak ang tih te hi ka hlau hle a, engtia ven tur nge ka hre lova. Minister pawh ka hrilh a, ‘kan venpui mawlh ang che,’ an ti a.

Kan Minister zahawm tak in a sawi tawh a, north block ONGC-in an chang a, Central Oil India in saw tah Arakan basinsah a tam na tur leh a awm ngei ngei na tura an ngaih lehzual Lunglei leh a piah lamah Reliance ten an thawh duh loh avangin tunah hian an re-tender a, michak zawk thlang turin kan in nawr mek a ni. Kan mihtiamte pawhin oil nen lam awmin an hria a. Tin, tun

hma kan zawlnei te pawh khan oil lipui chungah Mizoram hi a awm a ni an ti a, chu chu kan zawng mek a ni. Tin, a lo awm lo a nih pawhin Pathianin a hnam thlante dinchhuahna Amah kan tih ropui nan a dah belh zel thei a ni tih kan hria a, chumi rinna nen chuan tunah hian hma kan la a ni. Chutiang chuan thermal power in sawi kha ka'n sawi duh a ni.

Tunah hian power hi keimahni ta a nih loh pawhin a transmission line tur zawng zawng kha tih chak a ngai a. Chuvangin tunah hian chutiang zawng chuan kan department hotuten hma an la nasa a ni.

Tunah hian Silchar to Aizawl 400 KV double circuit line hi Power Grid in National Grid Network nen nghet zawka kan inthlun zawmna tur an siam mek a, hemi thlun zawm tu tur atan hian Sakawrtuichhun-ah sub-station pawh lian pui an sa mek a ni.

Tin, Aizawl-Lunglei 2nd Circuit 132 KV line hi Lunglei leh a piah chhim lampang zawng zawng pek pheina line a ni a, pakhat chauh a awm a. He line hi a chhiat chuan Mizoram chanve hi an thim dawn a ni. Chuvangin hemi sutkian nan hian Melriat to Khawiva thlun zawm tur 139 KV line cheng nuai sangli leh za sawmsarih paruk leh sangsarih man sengso turin tunah hian thawh mek a ni, 2017-ah zawh fel tumin tunah hian ngawrh takin hna an thawk mek a ni.

Tin, World Bank transmsion project hna hi Power Grid in an thawk mek a, hei hi 2010-a Washington-a ka zuk kal khan Mizo mipui te min sawmna angin World Bank pisa-ah ka zuk kal a, hetah hian engnge a an tak tiin ka va zat a. Hei hi N.E. pumpui tana Net Work a ni a, Bangladesh-ah pawh la kal zel tur a ni. Chutiang chu a ni a, chuvangin World Bank transmission project hna hi Power Grid-in an thawk mek a, chumi ah chuan heng te hi telh an ni a. West Phaileng Sub-Station 132 KV level-a a hlan kai. Tin, West Phaileng-Marpara 132 KV line Sub Station a ni a,

Lungsen Sub-Station 132 KV level-a hlan kai upgrade tur . Lungsen-Chawngte-South Bungtlang 132 KV line. Tin, South Bungtlang 33 KV Sub-Station 132 KV Line hmanga communication cable optic fibre hmanga 310 kms thlun a ni. Heng World Bank hna te hi thawhkhatna chauh a la ni a, ₹ 3676 lakh senso tur a ni. Tin, shifting of 132 KV Sub-Station at Zuangtui, hei hi lei a tawlh a, a tlahniam a, fur a nih pheh chuan a chhiat chuan Zoram pumpui kan chhe dawn a, chuvangin, tunah hian ₹ 2077 lakh seng in sak that a ni a, July 2016 a zawhfel tum a ni.

Kolasib-Sihhmui 132 KV double circuit line Tuirial Power lak chhuah na atan he line hi siam mek a ni a ₹ 2,497 lakh senga December 2016-a zawhfel tum a ni. Tin, PSDF 132 KV Sub-Station pariat (8) te hi equipment thlak thar tum mek a ni a, hemi atan hian ₹ 2,684 lakh sanction hmuh tawh a ni a, hma lak mek a ni. Hemi distribution hi a pawimawh a, hei hi Mizo ten kan hriat a pawimawh khawp mai. Transmission leh distribution loss hi Mizoram hi a nasa pawl kan ni a, a zahthlak khawp a, power ruk kan ching a, rawngbawltu pawh an bang chuang lo a, vawkhaw chhum nan te an lo ru mai mai, man chhuah te pawh an awm nual a ni. REDB (Rural Electricity Distribution Backbone) ten thingtlang kilkhawr zawk ah electric mumal zawka pek theih na turin 32 KV Sub-Station thar 6 leh a hlui 12 thawm that te leh line te siam mek a ni a, ₹ 7,702 sanction hmuh tawh a ni a, thawh tan mek a ni. Sub-Station thar hi hmun kilkhawr tak tak Tura, Rabung, Bualpui 'Ng'etc. te a tel a ni a. Kum 2017 chhunga zawh hman beisei a ni.

Restructural Accelerated Power Development & Reforms Programme (RAPDRP) Reforms programme population Mizoram khawpui population singkhat chin 9 te thlan chhuah a ni a. Khaw chhunga distribution network thawm that hna thawh mek a ni. He scheme hnuaiah hian veng chhunga transformer leh line thar dah belh te a ni deuh ber a. He scheme in a tum ber chu AT&C (Average and Technical & Commercial) lost 15 % hnuaia dah a ni a , tunah hian ₹ 24,041 lakh senga September 2016-a zawh hman tum a ni.

Tin, Deendayal Upadhaya Grameen Jyoti Yajona, 2011 census a lo chhuak a, census khua te pawh a lo pung a, khaw thar 69 leh khawper 15 te tih en nan ₹ 3,043 lakh sanction tawh a ni a, hna tan thuai theih kan beisei. Integrated Power Development Scheme hi RAPT Act chhunzawmna a ni a, khaw paruk (6) Vairengte, Kawnpui, Mamit, Thenzawl, Hnahthial leh Khawhai-ah distribution network thawm that hna thawh tur a ni. Sanction ₹ 4,916 lakh hmuh tawh ni in a hna hi thawh tan tum mek a ni a, IPDS hi khaw dang atan pawh chhunzawm zel theih kan tum a, kan beisei bawk. NEC atangin 33 KV tower line Aibawk – Sialsuk ₹ 1,4678 lakh sanction hmuh a ni. Hna tan tura inbuatsaih mek a ni a, March 2019 chhung a zawh tur a ni. DoNER atangin 33 KV Sub-Station Saiha nuai 850 leh 33 KV Sub-Station Lawngtlai nuai 853 sanction kan beisei mek a, kan hmuh thuai kan beisei, hetiang hi a tlangpui a ni a. Chuvangin power for all, India ram pumpui hi 2019 chhunga in tin power hnianghnar tawka tih en tum a ni a, hei hi central project and power of programme a ni a. Hemi atan hian document state tinin generation transmission distribution data base buatsaih a ni a, Mizoram pawhin hydro, solar, etc. generation leh transmission distribution te huapin state dang ruala in tin en theihna tura data base buatsaih a ni a, hei hi peih tep a ni. Tin, power policy hi tha tak duan that leh mek a ni a, kan peih thuai theih beisei a ni.

Tin, Tuirial hi 30 mega watt khawl pahnih tur a ni a, 30 mega watt zawk hi September thla hi chuan commission theih an inbeisei a. Tin, 30 danga chu October thla hi NEEPCO min tiam dan chu a ni. Tin, a man hi a to khawp mai a, hei hi non negotiate tur a ni a. Tin, kan lei duh a kan lei theih chuan a power zawnzawnzawn hi Mizoram sorkar in kan lei sak tur a ni a. Amaherawhchu, a man (per in cost) hi duh aiin a tam a, CERC lam te nen negotiate a engtia tih tur nge tih hi kan hotuten an la ngaihtuah dawn a ni. Chutiang chu power lamah chuan a tlangpui a ni a. Tunah hian khaw 29 nge ni la tih en loh a awm a,

chungte pawh chu ti eng tura hma lak mek a ni. Tin, hemi supplement tur hian solar power hi a tam thei ang berin hman kan tum a.

A hrim hrimah wind power te pawh hman dan kan department hotuten an dap mek a, chutiang chuan kawng hrang hrangin an changtlun zawk theihna tur atan kan hotuten hma an la a ni.

Tin, Urban Area Rent Control Act kha tunge a neitu tur an lo buai deuh hlek a, UD & PA nge, GAD nge, engnge tih kha an lo buai deuh hlek a, tunah chuan a hmanhmawh thlak leh a pawimawh avangin kan hotuten tifel in tunah hian a rang thei ang bera siam that a Law Commission ten rawn tifel turin an ngaihtuah mek a ni.

Tin, Serlui 'B' kha an sawi a, kan hun hmasa ah khan kan han khuap tan dawn a mega watt 9. Pranab Mukherjee hi Planning Commission Vice Chairman a nih lai a ni a, min phur pui viau a, mahse an han chhut khan khatihlai hunah khan per unit cost kha ₹ 4.50 aain a hniam thei dawn reng reng lova, chuti a nih chuan khatihlai huna pawisa hlutna ah kha chuan neih ngaihna a awm dawn lova, chuvangin Planning Commission ten, 'kan tan uk tawh na in ti leh lo mai rawh u, a dang tha zawk in rawn melh dawn nia,' min tihna avanga pantul ta kha kan ni a. Hun lo kal zelah sorkar tharin an rawn ti chho a, 'kan zo,' an tih thleng pawh khan forest clearance te a lo awm lova, chungte chu buaipui chhoh a ngai a. Tin, a khawl te kha a tha lova, BHEL te kha kan han rawih tir a, tih that tih that a ni a.

Tunah hian a vai hian a tih pumphlum nan khuan vaibelchhe 30/40 vel hi chu kan seng tawhin ka ring a, tunah hian NABARD atangin nuai 15,50,000.00 a tihpuitlin tak tak na tur atan kan puk leh mek a. Tuna khawl part tha lo te a lo thlen kim chuan a thawktu BHEL ten an rawn riah chilh ang a, a

power pumpui hman theih tura siam theih kan inbeisei a. A chhe zing hle mai a, hmanah pawh khan a chhia a. Khutah zuk liluh a, a hmuna siam te a ngai a, Bombay lam atangin Navy divers te nena tih hial ngai kha a ni a, duh angin thil a awlai thei lova, churang chuan kan duh angin a kal chak hlei thei lo a ni.

Kan Home Minister zahawm tak khan ‘Aizawl nuam i siam ang u’ a ti a, thil lawmawm tak a ni. In tlanchhawk an tih leh teu hler an awm a, chutiang khatiang in, a pawl khawp mai a, engemaw harsatna siam tum te an awm a. Engpawhnise sum ngainat hi sual tinreng bul a ni a, sum hi kan ngaina khawp a, kut tlingloa sum lakluh pawisa lo te kan tam khawp a, kut tlingloa in ti hausa chapo ta viau te pawh hi an awm a. Zankhat thilthua hausa thar ta thut te hi an awm hlawm a, hei hi thil pawl tak a ni a. Bible thu hi a dik a, ‘sum ngainat chu sual tinreng bul a ni,’ a ti a, sual tinreng hi tunah hian kan ramah hian a awm ta a, duhamna sual te pawh a awm a ni.

Pu Speaker, kan khawlai hi a chep em em nachhan chu duhamna sual vang a ni, zep tur a awm lo. Ringtu, rawngbawltu vantlang tana hnawk nih pawisa lo, thenawm khawveng tana hnawk nih pawisa lo kan tam a. Thu kan awih lova, sawrkar thu kan awih lova, AMC thu kan awih lova, vantlang kawng, sorkar kawng nek ranin in kan sa a. Tichuan malsawmna kan dawn motor te, JCB te nen lam, insakna tur hmanrua nen lam vantlang kawngah ngat rawngbawltu khan a chhek a, churang chuan kan chep mai mai a ni. Motor pawh a garage a siam chuan sum tam tak thla tin a hloh dawn a, churangin garage a siam duh lova, vantlang kawngah ngat an dah a ni.

Ka nu ho khan kum sawmhni pariat vel kal ta khan in kan sa ve a, tiang hi a thlang ang tih kan rin avangin garage kan siam a, motor sawm vel a leng a. Tin, kan kawt zawn thlang lamah pawh, chhak lamah pawh keimahni motor leh inlengte motor dah theih na turin kan ramchin ah kan tawlh ngat a ni. Chutiang chuan ti ve se chuan tun ang hi kan ni lo maithei a.

Tunah hian Aizawl nuam kan siam dawn chuan kawngsira motor dah loh tur a ni ringawt mai a ni. Tunah hian kawngsira motor awm zawng zawng hi dah lo se la Aizawl nuam a ni nghal ringawt, intlanchhawk tih sawi a ngai lovang, ropeway tih lampang pawh sawi a ngai lovang, cable car sawi a ngai lovang. Kawngsir ah motor dah loh tur, rawngbawltu huat ngah tak, intihmuka vanram kai tum ang te hian vantlang kawngah dah lo ila chuan kan thawl a ni mai, Aizawl nuam kan siam a ni mai. Thudik hi chu a hunah pawh, a hun lo ah pawh sawi hi a pawilo a, chutiang chu a ni. Chuvangin waviin ah hian chutiang zawng chuan rawngbawltu kan nihna te, kristian kan nihna te hi hmang rim ila chuan Aizawl nuam a ni nghal ringawt. Engatinge ringtu ni si vantlang tan kan hnawksak ? Engatinge thenawm khawveng tan kan hnawksak? Chu chu kan inngaihtuah zui a ngai. Huat viau a sawt mang si lo te huat huat ai chuan keimahni lamah hian enge ka tih tur tih hi ngaihtuah zawk ila thil tha tak a nih ka ring a. Chutiang zawng chuan Aizawl nuam hi siam ila tih hi kei ka lo thlir ve dan leh ka lo ngaihtuah dan a ni. Sawi tur a tam a mahse thenkhat mut a hun tawh a, chuvang chuan khati chin kha tawh mai sela, in ngaihthlak duh chuan sawi chu ka la sawi thei reng a.

Engpawhnise, Minor Irrigation-te pawh hi an tangkai khawp a. Kan hotute hian Minor Irrigation a nih reng hi dik an ti tawh lova, chuvangin minor irrigation lo deuh, Minor Irrigation and Water Resources emaw khatiawng zawng khan tihlen kan tum tawh a ni. Minor Irrigation hi kan khawpkham dawn lova, NLUP te a lo hlawhtlin chhoh a khatianga kan kalchhoh kha chuan nasa takin kan farmers te, kuthnathawk mi te tanpuina a ni dawn a ni.

Tichuan, ‘tihnuam tak leh thuawih taka in awm chuan in rama thiltha te hi in ei ang,’ Pathian Nung in min ti a. Kan rama thiltha te hi kan eitheih na turin khawtlang nun siamthat, khawtlang nun tha, Zo nun zemawi neih let leh dan te hi kan hotute hian an ngaihtuah nasa a. Sorkar angin kan tawh lova, chuvangin kohhran hrang hrang te, tlawmngai pawl te nen thawkho a, khawtlang nun tha, Zo nun zemawi kan neih leh

atangin kan Pathian pawh hi chawimawi, tih ropui dan a awm te pawh kan hotute hian an ring a ni.

Tin, Pu Speaker, duham sawi takah chuan hmanni khan Jamir Milia University ah ‘When the mountain moves and the rivers over flow’ tih emaw ni a thupui kha, saptawng a ni a ka hre vak lova. Chumi seminar chu a awm a, international expert te an lo kal a ni, disaster management lampang a ni ber a. Indian expert-te pawh an awm a, Minister Rijju nen thusawi ah min rawn sawm ve teh tlat a, ka zuk sawi ve a.

Chutah chuan Aizawl rawn hmu tawh zawng zawngin kohhran hruaitu Will Graham te thlengin, Bishop Conference a lo kal te thlengin Aizawl hlauhawm zia hi an sawi vek a, chumi seminar ah pawh chuan Aizawl hmu tawh 5/6 ‘red seismic zone-ah an awm lehngal si a, chuvangin Aizawl khi chu a hlauhawm thlawt a ni,’ an ti vek a ni. Hengte pawh hi dik tak chuan sorkar thu kan awih loh vang a ni a. Thusawitu pakhat phei chuan concrete building neih te hi status symbol ah an ngai emaw ni chu tih mai turin khawiah pawh hian concrete building a awm vek mai a. Assam type building ni se a him zawk teh lul nen tih te an sawi a, a zahthlak deuh rum rumin ka hria a. Chutiang khawp chuan mi hian min ngaihtuah a ni, chuvangin hun lo la kal zelah pawh kan fimkhur a ngai a. Tawngthu chhelo, intawng pachhiat a awmlo ang a, lirngching rapthlak takte lo thleng ta sela, rescue operator te tan pawh hian thawh ngaihna a awm lovang tih pawh a hlauhawm khawp mai. Chuti khawp chuan kan chep a, chutiang chu kan ni a, chuvangin fimkhur a tul a. Tunah hian fimkhur hle mah ila a tlai tawh deuh bawk si a, chuvangin Pu Speaker, Pathian nung zui tute kan ni a, waviinah hian engkimtithi a nih zia chu hmanah Mahasen thlipui a lo tleh dawnin mithiam ten a kawng chu Mizoram hi a ni an ti a, a rapthlak hle a, engtin tak ni ang maw kan ti a.

Kan sorkar hotuten Zoram mipui te Pathian nung hnena tawngtai a, chu thlipui hlauhawm tak chuan min pumpelh nan tiin an tawngtai hlawm a. Tichuan kha thlipui kha Mizoram a rawn thlen hma in a taitam darh ta a ni, mithiam te pawhin mak an

ti hle a ni. Chuvangin tunah pawh hian khawvela lirngching rapthlak tak englai pawha a thlen theihna hlauhawm ber, mithiam ten red seismic zone an tiha awm kan ni a. Aizawl chanve hmar lam pang leh khawthlang lam pang hi a hlauhawm zual an ti leh nghal a, hmanni seminar naah chuan. Chuvangin chutiang chhiatna rapthlak a thlen loh na turin Zoram mipuite hian Pathian hnenah thahnemngai taka kan tawngtai a ngai a ni. Hei leh chen hi Pathianin min hum tawh a, chuvangin kan nun danah te, kan khawsak zia ah te, kut tlinglo a sum lak leh lak loh chungchang ah te Pathian nung thinurna ko thla zawng ni lovin, a malsawmna ko thla zawnga he hnam hi kan awm a tul a. Chuvangin tih nuam tak leh thuawi taka in awm chuan in rama thil tha te in ei ang min titu hian chhiatna rapthlak min thlen lohna turin, thahnemngai takin kan zavai hian kan tawngtai a ngai a ni.

Chutih mek lai chuan ei leh bar ah, sum leh pai ah kan intodelh a tul a, chungte avangin vawiin ah hian a ngaihtuahawm zual chu kut hna thawk te, lo nei mi te, huan nei mi te, hmeithai pachhia te an ni a. Chunggho zawng zawng chuan lei rem an rah a, khaw eng an hmuh chuan Mizoram hi a hlim ang, anmahni khum zawlah theuh mi lian tlawn ngai lovin, thlamuang taka an awm hi Mizoram hlimna tur a ni. Tin, chu chu Lal Isua duhzawng pawh a ni, 'heng kan unau mi te ber pakhat chung a in tih hi ka chung a ti in ni e,' a tih avangin kan hotuten chuti zawng chuan hma an la a ni.

Kan hotute min kaihhruaina hi a ropui ka ti. Kan ram dinhmun azir zelin Pathian lamtang programme an ngaihtuah thin a, rambuai thim chhah hrehawm lai chuan Pathian lam tang programme hi engnge ni tiin Pathian hnen ah an dil a, "Remna leh Muanna" min programme tir a, chu "Remna leh Muanna" a thlen theihna tur atan chuan inpekna a ngai tih te pawh an hria a. Chuvangin Mizo mipui hnenah 'Mizoram buai hi politic buaina a ni a, sipai chakna leh silai thiltihtheihna a seng hawi chi a ni lo, a inngeihlo te inbiak rem tirna atangin a ni. Kan inbiakrem tir ang a, kan inbiakrem na tur a nih phawt chuan kan sorkar nam thlu in lalthutthleng kan kian ang' an tih te chu an awih lo a ni. Mahse Pathian lamtang programme a ni a, kan hotute kha Pathian nena kan

inkarah an chiang a, chuvangin Pa hun tiam a lo thlen chuan an sorkar an nam thlu a, lal thuthleng midangte hnenah an kian a, he ramah hian tun thlengin Remna leh Muanna a awm a ni. A lamtang programme, kan lamah tang se kan tih chuan a lama kan tan hmasak hi a phut tlat a ni. Tichuan remna leh muanna a lo awm a, NLUP in chhungkaw tin sing thum, rangva inchung neilo te hnenah rangva inchung tur kan sem ang an ti. Chu chu Lal Isua duh zawng a ni. Heng hi Aizawl mi hausa te emaw, sumdawng hausa khawsa thei te tan a ni lo. Chuvangin mithiam ten min nuihzat a, khawiahmah rangva inchung an sem ngai lo, chutiang khatiangan, mi nazawng eizawna ngelnghet an neih theih nan rahbi tukna an sem ngai lo an ti. Mahse, an hre lo a ni. Kha kha Lal Isua lamtang programme a ni a. Ani hi mirethei lamah a tang a, chuvangin a ti hlawhtling a ni Pu Speaker. Tichuan, chumi chhonzawm zelah chuan NLUP-ah hian sum hlutna-te a lo tlakhniam zel avangin a tam zawngin kan hotuten an kalpui a. Eng ang pawhin sawichhe thin mahse, vawiin-ah hian NABARD te, Mizoram Synod Social Front te, University-a kan mithiam rualten, monitoring leh evaluation te min tihsak thin a. Chung ho chu vawiin thleng hian an la lungawi a ni. Kan duhthu chu a sam lo, mahse, vawiin thleng hian an la lungawi a. Rinawmna, dikna, taimakna leh Pathian tihna nena dawng lo tu-te chu malsawmna an dawng lo reng ang chu. Mahse, mi khatiangan zawnga dawng leh kalpui tam tak an awm avangin, chungho chuan malsawmna an dawng a. Vawiinah hian mi tam takin an dinchhuah phah a ni. Chuvangin, Pathian lamtang programme neih a tul a.

Tichuan, NLUP kha a lo upa ta deuh a, a hnukhawi lampang a lo ni ta a. Tin, mi tam tak hlawhtling an lo awm ta a. Chuvangin, kan hotuten exit protocol, heng hlawhtling ta te leh hlawhtling lo te pawh chhawmdawl an ngaih avangin New Economic Development Policy an puahchah a. Hei hi mi thenkhatin a hma-in economic policy an nei lo em ni an ti a. Kan nei na meuh a. Khami chhonzawm zelna, a lo hlawhtling te leh hlawhtling lo te chhawmdawl chhoh zel nan kan mithiam ten Comprehensive Growth Strategy for Mizoram min duan chhuah sak a. Chu mi ang chuan tunah kan kal dawn a, Pu Speaker, hei a bu te pawh kan nei a. Mahse, a rei tawh avangin a kip a kawiiin ka sawi

lo mai ang. Chu mi chu tha taka kan zawh leh theihna turin kan mithiamten a road map te an siam a. Hei hi kan economy lo thang chho zelah market economy, chutiang khatiang zawnga kan than chhoh zel nan te kan hotuten he New Economic Development Policy hi anrawn duang chhuak a ni. A chipchiara han sawi chakawm hle mahse hunin min daih tawh lo a. New Economic Government Policy kan hotuten an duang chhuak a. Hemi ang hian NLUP-a hlawhtling te, hlawhtling lo te leh midang a mamawhte a chhawm chho zel dawn a ni.

Chu chuan kan growth strategy te pawh tangkai zawkin a chher chho dawn a ni. Chutiang chuan kan hotuten an kal chhoh pui a ni. Chutiang chu a ni a Pu Speaker, tunah hetiang hi a nih avang hian a thinurna tawng baw lo zawng, a malsawmna tawng baw zawnga kan kal kha a pawimawh hle a ni. Chuvangin, mihring ang pawha a hel zawnga ngaihtuah lovin, a tha zawnga thil kan ngaihtuah a tul a.

Tunlai hian transport lamah eng engemaw harsatna siam tumte an awm a. Hengte pawh hi ngun taka ngaihtuah tur a ni a. Tunah in an rel a ni awm e. Ama'rawhchu, hei hi keini chuan kan duh lova. Hei hi central sorkar ah kan ziak mek a, a sawite pawh kan la sawipui dawn a ni. Phai leh Zo khua a inang lo a ni. Phai-ah chuan kawng te a phei a, a kikawi ve lova, chhuk chho-te a awm lova. Keini ramah chuan chhuk chho kikawi tam tak a awm a. Tin, anni chu ram upa a ni a, keini chu ram buai reh hnu atanga development ti tan ve leh chauh kan ni a, a inang lo a ni, Chuvangin, an lifetime leh kan lifetime hi a inang thiang lo hrim hrim. Kum 5 dim taka kan hman pawhin a chul rawih zel a ni. Chuvangin, hei hi keini sorkar hi chuan kan oppose a, kan ziak a, tawngka pawhin kan ti ang a, kan hlawhtlin leh tlin loh chu thu dang ni sela.

Tin, mi ramah chuan mihausa ten motor lian te an lei a, motor an lei a tiang khan a tax hi one time payment hi an harsat lo a ni. Keini ramah chuan rualawh vanga lei mai mai te, bank atang leh khawi khawi emaw atanga puk a lei te kan tam ber a. Chung ho tan chuan one time payment hi chu a harsa hrim hrim. Chuvangin, one time payment-

a min tihsak lo tur pawhin kan ti ang a. Central atangin an monitor tlat a an ti a nih pawhin, monitor eng ang mahse, kan pek loh miau chuan engtinng e an tih ang ?

Chuvangin kawhmawh bawl lampang nilovin heng hi chu India ram pumpuiah tehkhawng khat ‘one size fit all’ hi a hman theih loh tih hi an hriat nan kan duh a ni. Hmanah B.C.Joshi, Transport Minsiter a ni a, kan hotute DPR siam te hi kan MP te hnenah ‘Engatinge Mizoramah khian in kawng siam man khi a to em em bik, engatinge exorbitantly in a san bik’? a lo ti khar khar a ni awm e. Ka zu kal ve a, ‘Pu Joshi, kal rawh Rajasthan-ah i kal ang, ₹ 50,000 in hnim leh ilo vel i sam fai chuan football ground i nei thei, Mizoramah chuan vaibelchhe khatin Volleyball ground han siam tum teh, i thei miah lovang. Chuvangin in hriat loh chungah ro in rel a, a dik lo a ni. Mahni ram pawh hrechiang lo hian hetianza min tih’ ka ti a. Chutiang chiah chuan kan National Highway te pawh hi Mizoram awmna pawh hre mang lo hian an rawn tender ve ringawt a, an chhang ve ringawt a, chu chu kan buaina bulpui pakhat hi a ni. Chutiang chu a nih avangin, khatiang zawng khan a tha zawnga her that hi kan tum a ni. Chuvangin Pu Speaker, tunah pawh hian heng Bangladesh nena border trade kan neih te, Burma nena border trade kan neih te, sawtah Akyapa chhuahka kan neih tur te ang te hi insumdawnna a ni tak meuh mai, mahse, khawvel zawng zawng kal a, thilsiam zawng zawng hnena Chanchintha hril tura koh te kan ni. Chu chu kan hna pui ber a ni tur a ni he hnam hian. Chhawr theiha kan awm chuan min chhawr zel ang a, malsawmna tam zawk hian min vur zel dawn.

Chuvangin heng angte hi sumdawnnaah chuan keini tan hi chuan tihtham tak tak tunah rih mai hi chuan a awm dawn lo. Amaherawhchu, Chanchintha hrilhna chhuahka tha tak a ni tur hi kan hotute phurna chhan a ni. Chuvangin tunah pawh hian harsatna zawng zawng hi kan hotute hian an paltlang zel a, a chhan chu Engkimtithia hi a inrawlh a ni tih a chiang khawp mai. Chuvangin heng hi kan hotute an phur na em em chhan a ni a. NLUP te hi Pathianin mal a sawm, vawi tam tak ka sawi tawh a, a lo chhawr tha duh lo te an awm a nih chuan an thu a ni a.

Mahse Pathianin mal a sawm, ₹ 1500 vaibelchhia kan dilin engatinge 2813 min pek? India sorkarin khatiang zat kha an la pe ngai lo reng reng, an dil aia tam an pe ngai lo, chutiang chu a ni. Tunah hian engatinge kha pawisa kha kan hman daihzai em em? RKVY-ah te engatinge kum dang zawng zawng aia crore and crore-a kan dawn tam kan tih chuan NLUP malsawmna ken a ni. Chuvangin, a lam tang programme hi ringtute kan nih chuan mimal ang pawhin, pawl ang pawhin, party ang pawhin, sorkar ang pawhin a pawimawh em em tih hi kan hotuten an hria a, chutiang chuan vawiinah hian min hruai a ni. Chuvangin Pu Speaker, a thinurna tawngbaw lo zawngin kan kal a tul a. Lirngching rapthlak englai pawha thleng thei rama kan awm chungin, vawiin thlenga kan la him dam te hi Pathian thiltihtheihna a ni. Hemi hualhimna hi kan chan zel theihna turin nasa zawka kan tawngtai a ngai a.

Tin, kan nun atang pawhin kan chawimawi a ngai. Chutiang chuan a malsawmna tawngbaw zawngin kan kal a tul a. Chuan vawiinah hian a malsawmna tam thei ang ber tawng buak kan hotuten an tum a ni. Kan khawtlang nunah te, kan ram khawtlang nunah te, ei leh bar sum leh paia kan intodelhna atang tein Pathian nung chawimawi a, ringlo mite pawhin an rawn aw h ve a, an rawn it ve te hi kan hotute duh ber a ni. Chutiang atana koh chu kan ni a, awmze nei takin Pathianin sakhaw pathum lian ber ber min hual tir a, chumite kal tlang chuan tunah hian a ropuina turin Chanchintha hril tura koh kan ni. Chung chu kan hriata kan thawh chhung chuan malsawmna tam zawk atangin malsawmna tam lehzual kan tawngbaw dawn a ni. Chuvangin Pu Speaker, 'kan chung a Lalpa a lawm chuan, chu ramah chuan min hruai ang a, min pe ang. Hnute tui leh khawizu luanna ram chu' Numbers ah kan hmu. Chuvangin, hemi ram hi Lalpan min pek theihna turin he ram hi kan hotuten an buatsaih a, a lo ropui zual zel nan leh Chanchintha hre lo ram an tam lutuk, chuang chuan kan mi thahnemngai te an kal theihna turin, chumi atan chuan ram intodelh kan nih a ngai. Chumi chu kan hotuten an tum a ni a. He ram leh he hnam, ringtute hi kan hotu ten hruai thlen, hlankai an tumna a ni. Chutiang chu anih avangin Pu Speaker, kan

hotute hian awmze nei takin, mihring nunah kan tling lo a nih pawh in Lalpan kan hotute rilruah min tanpui a duh tih hre reng in, a tanpui tlaka a lamtang programme hi an kalpui thin a ni. Chu chu he ram mipuite tan malsawmna a nih kan ring a. Chumi ram chu beiseiin tunah hian kan kal a. Kan hotute hian he ram mipui leh he ram hi hlankai an tumna hi an chiang em em a ni. Leihnuai hausakna te pawh a zawngtu ten an duh khawp tunah hian an hmu mai lo a nih pawhin a zawngtu ten a dah belh zel dawn. Chu chu kan hrechiang khawp. Chumi rinna nung nen chuan kan hotute hian min hruai a ni.

Tichuan Pu Speaker, ka Demand No :-

1	-	Legislative Assembly	₹ 19,58,30,000
2	-	Governor	₹ 10,60,000
3	-	Council of Ministers	₹ 5,98,62,000
5	-	Vigilance	₹ 5,27,88,000
11	-	Secretariat Administration	₹ 1,06,01,14,000
13	-	Personnel & Administration Reforms	₹ 2,79,81,000
15	-	General Administration Department	₹ 66,73,52,000
27	-	District Council Affairs	₹ 2,87,88,06,000
39	-	Power	₹ 3,21,46,29,000
45	-	Public Works	₹ 4,86,00,22,000
47	-	Minor Irrigation Department	₹ 51,34,76,000
TOTAL			₹ 13,53,19,20,000

hi he House hian khawngaih takin lungrual taka min pawm sak turin ka rawn ngen a ni. Pu Speaker, ka lawm e.

SPEAKER : Awle, kan House Leader zahawm tak Pu Lal Thanhawla'n a Demand Nos. 1,2,3,5,11,13,15,27,39,45,47 hnuai department hrang hrang ten 2016-2017 chhunga an pawisa hman tur, a vaia belkhawm ₹ 13,53,19,20,000 (vaibelchhe 1353 nuai 19 leh singhnih) he House-in pass sak turin a dil a. Pass remti zawngin 'remti' ti rawh u le. (Members : Remti) Remti lo kan awm em ? Awm lo. Tichuan Demand Nos.

1,2,3,5,11,13,15,27,39,45,47 hnuai pawisa kum 2016-2017 chhunga hman tur, a vaia belhkhawm ₹ 13,53,19,20,000 (vaibelche 1353 nuai 19 leh singhni) chu he House hian lungrual takin a pass ta a ni e.

Pu LAL THANHAWLA, CHIEF MINISTER : Pu Speaker, i hnenah leh member zahawm tak te hnenah lawmthu ka sawi e.

SPEAKER : Awle, pakhat chauh kan nei a. Hei kan dinglama official pawimawh tak tak ten min la thutpui a, a lawmawm hle a, kan sorkar an chawimawi thiam hle a ni.

Tunah chuan Legislative Business pakhat kan nei a, chu chu Appropriation Bill a ni a. Kan Finance Minister zahawm takin he House-ah introduce rawn dil phawt sela.

Pu LALSAWTA, MINISTER : Pu Speaker, he House zahawm takah hian “The Mizoram Appropriation (No.2) Bill, 2016” introduce ka rawn dil e.

SPEAKER : Introduce a dil a, kan phalsak em? Phalsak a. Tunah introduce sela a tha ang e.

Pu LALSAWTA, MINISTER : Pu Speaker, i remtihna leh he House remtihna “The Mizoram Appropriation (No.2) Bill, 2016” hi ka rawn introduce e.

SPEAKER : Le, an introduce ta a, a copy kha sem ni se, khawngaihin. Aw, kan Minister zahawm takin a Bill thehluh kha House ngaihtuah atan rawn move nghal se, pass rawn dil nghal mai sela, kan sawiho tehchiam ngai lovin ka hria.

Pu LALSAWTA, MINISTER : Pu Speaker, he House zahawm tak hian kum khat chhunga a thiltih pawimawh berte zing ami, a tlangkawmna tur kan ti thei ang chu, chutiang chu kan ti dawn a. Tunah hian “The Mizoram Appropriation (No.2) Bill, 2016” kan introduce tawh a, ka’n sawifiah deuh nual ang a.

Hemi hi discussion ngai a nih lohna chhan chu tarik ni 20 atang khan i hovin kan luhchilh ngat ngat tawh a. Member-ten zalen takin an sawi a, a Minister changtuten hrilfiah ngai te, sawi chian ngai te an sawi chiang ve tawh bawk a. A chhunga awm hi hriat tul ang ang te chu hriat vek tawh a ni a. Good Friday lo tla zawk leh Inrinni, Pathianniin khaihhlak a rawn siam hlek lovah chuan tarik ni 20 atanga vawiin thleng hian a chhunga awm hi kan chai kan chai tawh a. Hemi kaihhnawihah hian tawi te, pass ka rawn dil hmain sawi tula hriat ka nei ve a.

Pakhatna ah chuan vawiin hi March ni 30 a ni a, naktuk hi ni 31 a ni a, Department tam takin Finance hotute leh Treasury lamah te an pawisa an buaipui a. Finance lam pawhin theihtawp chhuahin hma an lo lak pui a. Chutiang chuan kan Budget tuna kan han pass tur hian namen lovin min nghawng a. Kan officer-te, Finance officer-te hi an hah hle a. Hetia kan hriat lem loh hlan hian tlaivar te an awm a. Special taka power pek te pawh kan dil a, min pe bawk a. Chutah chuan anmahni chungah pawh hian lawmthu sawi a ngaiin ka hria a. Tin, khami kaihhnawih thil chi ho min han buaipuitu hetilamah Legislative Assembly-a thawktute pawh hah tak tho an ni a. Tin, kan mamawh ang power min han pe thintute pawh an chungah lawmthu kan sawi bawk a ni.

Ka pu, tunhma MLA i nih hmasak ber tum 1972-a UT budget hmasa ber kha cheng nuai 1792 a ni, kum khat chhunga an hman tur kha, cheng nuai 1792 a ni a. Vawiinah hian kan budget hi chumi let 458 a ni tawh a. Hei hi budgetary history atan a tha ve hrim hrimin ka hria a. Percentage ni lovin a let a nih chu, a let 458 a lo ni tawh a. A hun te pawh a lo rei ve tawh bawk a, a awm a. Tin, vawiina kan pass tur hi pawisa hman ngaihna Head 49 a ni a, department ang chuan 46 an ni a. Department anga chhiar

loh, mahse pawisa hman ngai ve si chu Governor-te, Council of Minister-te, tin, Public Dept kan tih te hi kan vote tel, heta appropriation-a lut tel ngai a ni a.

Tin, kan pawisa hman tur, he funpui a awm hi a tam lam aiin hman dik lam hi a pawimawh zawk tih kan sawi tawh thin a. Chumi tur chuan April ni 1 atang hian kan hman tanna ah department zawng zawng leh mipui lam pawhin chu rilru chu min putpui turin sorkar hian kan ngen a.

Tin, naktuk tukleh hian pawisa liam tur zawng zawng, liam mai tur kan hlah ang chi kha liam lo turin theihtawp chhuahin vawiin leh naktuk hian kan bei a ni. Chutah chuan, Finance lam hi chuan kaltir mai ula kan re-validate leh ang a, chutichuan a awlsam alawm kan han tih deuh pawh hian department lam hian ‘min sanction ula K-deposit ah pawh dah zawk mai ula’ an ti a. K-deposit kha a tam kan hlau ve si a, tam lo se kan duh a, mahse anni lam khan khatia re-validate a nih chuan opening balance-ah min dah sak ang a, kan pawisa neih tur a tlem phah ang tih kha min hnialna ve a ni a. Khalai kha ka’n sawi tel mai mai a. Naktuk tukleh lawk atanga kan hmachhawn tur a nih avangin K-deposit hi a pung dawn a ni. A pun chhan tur chu works tam tak kha AC bill in draw a ngai dawn a. Chumi tur chu pawisa in pe dawn ila sorkar-in a phalloh, bank-ah te emaw dah an tum ang a, a nih loh leh office-ah almira-ah ₹ 500/1000 note kha an hnawh tun mai chuan thil fello tak a ni dawn a. Chuvangin K-deposit hi engemawlai hi chuan Pu Speaker, a rawn pung leh lawk dawn tih kha min lo hriat lawk sak ula ka duh nghal a.

Tin, K-deposit hi kan sawi tawh thin a, K hian engmah a denote lova, engmah hrilhfiah a nei lova. A han tlarnaah hian I-ah ‘small savings’ a awm a, J – ah ‘reserve and sinking funds’ a awm a, K – ah hian ‘deposits’ tih a lo awm a, L – ah hian ‘advances’ a awm leh a, M – ah hian ‘suspence’ a awm a, N – ah hian ‘remittance’ a awm a. K awmna zawn tak kha ‘deposit’ a nih mai vang hian K-deposit ti hian kan deklar a. K hian kilo emaw, engemaw kha a sawilo hrim hrim tih kha he House member-te

bakah Mizoram mipuite pawh hian hria se ka duh a. Kan hnathawhna turah hian change a ngai dawn a ni. Change tam tak hi kan sut a ngai dawn a, hnam nun tidanglam tur chuan sorkar-in a kalpui ang kan zawm a, sorkar-in hnam nun tha, rinawmna leh taimaknate mipui atanga hnukchhuak tur zawnga programme a siam thiam hian hnam nun hi a ropui thin a. Zing thawh hmaa naupangte kal hma kan tih te pawh hi hnam nun siamna tur atan factor pawimawh tak pakhat a tling a, mahse change a ni, a lo danglam ta a ni. Change tam tak hi kan kal zelna turah hian kan hmabak dawn avangin kan sawi lawk ve a ni. Awle, hemi “The Mizoram Appropriation (No.2) Bill, 2016” hi ka’n chhiar chhuak dap ang a. Ka chhiar chhuah-ah hian kan Minister zahawm tak tak te, kan Chief Minister tiamin, anni rawn tih nen khan tlem inang lo a awm ang a. A chhan chu, anni khan capital leh revenue kha an sawi hran chiah lova, a total-in an sawi mai thin vangte pawh a ni ang a. Kei chuan ka rawn sawi hran diat diat a ngai ang a. Tin, a chhiar chhung hi a rei deuh hlek dawn avangin in mi ngaihthiamna leh indawhtheihna ka rawn ngen bawk a ni.

SCHEDULE

[See Sections 2 and 3]

(₹ in lakh)

<i>Demand No.</i>	SERVICES AND PURPOSES		SUMS NOT EXCEEDING		
			<i>Voted by Legislative Assembly</i>	<i>Charged on the Consolidated Fund</i>	<i>Total</i>
<i>1</i>	<i>2</i>		<i>3</i>	<i>4</i>	<i>5</i>
1.	Legislative Assembly	Revenue	1938.30	87.20	2025.50
		Capital	20.00		20.00
2.	Governor	Revenue	10.60	560.65	571.25
3.	Council of Ministers	Revenue	598.62		598.62
4.	Law and Judicial	Revenue	1979.61	757.48	2737.09
		Capital	813.00		813.00
5.	Vigilance	Revenue	527.88		527.88
6.	Land Revenue and Reforms	Revenue	2833.98		2833.98
7.	Excise and Narcotics	Revenue	2955.48		2955.48
8.	Taxation	Revenue	1481.79		1481.79
9.	Finance	Revenue	103885.07		103885.07
		Capital	16675.00		16675.00
10.	Mizoram Public Service Commission	Revenue		579.75	579.75
11.	Secretariat Administration	Revenue	10601.14		10601.14
12.	Parliamentary Affairs	Revenue	54.15		54.15
13.	Personnel and Administrative Reforms	Revenue	279.81		279.81
14.	Planning and Programme Implementation	Revenue	7023.90		7023.90
		Capital	66141.00		66141.00
15.	General Administration Department	Revenue	6673.52		6673.52
16.	Home	Revenue	57471.13		57471.13
		Capital	573.00		573.00
17.	Food, Civil Supplies and Consumer Affairs	Revenue	6921.04		6921.04
		Capital	17826.60		17826.60
18.	Printing and Stationery	Revenue	1434.47		1434.47
19.	Local Administration	Revenue	1379.61		1379.61
20.	School Education	Revenue	96558.93		96558.93
21.	Higher and Technical Education	Revenue	18173.06		18173.06
22.	Sports and Youth Services	Revenue	1694.43		1694.43
23.	Art and Culture	Revenue	876.27		876.27
24.	Medical and Public Health Services	Revenue	41428.26		41428.26
25.	Water Supply and Sanitation	Revenue	14354.72		14354.72
		Capital	4282.02		4282.02
26.	Information and Public Relations	Revenue	1419.96		1419.96

(₹ in lakh)

Demand No.	SERVICES AND PURPOSES		SUMS NOT EXCEEDING		
			Voted by Legislative Assembly	Charged on the Consolidated Fund	Total
1	2		3	4	5
27.	District Councils	Revenue	28788.06		28788.06
28.	Labour and Employment	Revenue	2588.27		2588.27
29.	Social Welfare	Revenue	13140.47		13140.47
30.	Disaster Management and Rehabilitation	Revenue	2028.15		2028.15
31.	Agriculture	Revenue	11300.62		11300.62
32.	Horticulture	Revenue	7091.48		7091.48
33.	Soil and Water Conservation	Revenue	1648.59		1648.59
34.	Animal Husbandry and Veterinary	Revenue	7795.76		7795.76
35.	Fisheries	Revenue	876.45		876.45
36.	Environment and Forests	Revenue	7314.55		7314.55
37.	Co-operation	Revenue	1683.04		1683.04
		Capital	842.00		842.00
38.	Rural Development	Revenue	31769.36		31769.36
		Capital	4031.00		4031.00
39.	Power	Revenue	32066.29		32066.29
		Capital	80.00		80.00
40.	Industries	Revenue	6285.87		6285.87
41.	Sericulture	Revenue	1695.60		1695.60
42.	Transport	Revenue	5331.74		5331.74
43.	Tourism	Revenue	675.02		675.02
		Capital	1000.00		1000.00
44.	Trade and Commerce	Revenue	467.37		467.37
45.	Public Works	Revenue	23305.22		23305.22
		Capital	25295.00		25295.00
46.	Urban Development and Poverty Alleviation	Revenue	6680.01		6680.01
		Capital	11322.64		11322.64
47.	Minor Irrigation	Revenue	2233.76		2233.76
		Capital	2901.00		2901.00
48.	Information and Communication Technology	Revenue	1421.13		1421.13
49.	Public Debt	Revenue		58329.46	58329.46
		Capital		31005.79	31005.79
GRAND TOTAL:			730544.80	91320.33	821865.13

Pu Speaker, tuna ka rawn chhiar chhuah kha khawngaih takin he House hian min pass pui turin ka rawn ngen e.

SPEAKER : Awle, Finance Minitar zahawm tak Pu Lalsawta'n 'The Mizoram Appropriation (No.2) Bill, 2016' chu he House-in pass sak turin a dil a. Pass remti zawngin 'Remti' ti ru le. (MEMBER : Remti) Remtilo kan awm em? Awm lo. Tichuan 'The Mizoram Appropriation (No.2) Bill, 2016' chu he House hian lungual takin a pass ta a ni.

Awle, vawiina kan tih tur chu kan tizo thei a, kan awm tha khawp mai a, a lawmawm ka ti khawp mai. Chuan kan haw rih ang a, naktuk Ningani, tahrik ni 31 zing dar 10:30-ah hetah kan kalkhawm leh dawn a ni.

Sitting adjourned at 8:45 P.M.